


1  
IANI NICII  
ERYTHRÆI

EPISTOLÆ

AD

TYRRHENVM.



COLONIÆ VBIORVM,

Apud IODOCVM KALCOVIVM

& socios. CIO IOCXV.

Excellentis viri , Iani Nicii Erythræi , ad  
 Tyrrhenum Epistolæ, merentur subijci præ-  
 lo Typographi , atque exire in publicum.  
 Coloniae Vbiorum, Dec. c i c i c x l i v .

*Henricus Francken Sierstorpffius, SS. Theol.*  
*Doct̃or ; Metropolitanae ac S. Cæcilie*  
*Coloniæ. Presbyter Canonicus ; Gymnasii*  
*Laurent. Regens ; librorum Censor.*

---

## C A R M I N A

hîc Epistolis juncta.

<i>S. Catharina Senensis ad Christum.</i>	Epist. iv.
<i>Ad Card. Capponum.</i>	x.
<i>Ad Silvestrum Colliculam.</i>	xiv.
<i>In cellulas Fratrum S. Honuphrii.</i>	xvi.
<i>Ad Nuncium Apostolicum , Fabium Chisium.</i>	xxxix.
	& xliii.
<i>Ad Marium &amp; Robertum Accorambonos.</i>	xliii.
<i>In S. Firminam, Virginem &amp; Martyrem.</i>	lxiii.

Reperitur quoque , ad calcem Epistolæ xviii, lucu-  
 bratio de Missa, nec non alia de dignitate Sacerdotis.

texere, eadem nocte, fulmen è cælo decidit in tectum, cubiculo meo proximum, ejusque tegulas omnes imbricesque usque adeo perfregit comminuitque, ut in pulverem plane redegerit; à cubiculo autem meo abstinuit. Pontifex, summa animi consiliique maturitate, in dandis magistratibus, se gerit. Nuper, Æmiliæ præfecturam, Patriarchæ Spadæ, qui olim Romanæ Urbis provinciam, Gubernatoris nomine, administraverat, detulit. Ipse interdum, à negociis publicis feriatuſ, in suburbanum suum, Vaticano propinquum, quod Cardinalis habuerat in deliciis, se confert, ibique, aliquibus ex Cardinalibus adhibitis, ac sæpius Cappono, ad omnem animi remissionem alacritatemque descendit. Vale. Romæ, 1 v Non. Novembr. c i o i o c x l i v.

LXXVIII.

T Y R R H E N O,

Viro Clarissimo.

**H**Eri, vix tandem, proximas tuas ad me literas, xiv post die quam Romam pervenerant, recuperavi. nam cum vir optimus, negociorum tuorum gestor, dixisset puero illi, quem octavo quoque die, cum aliqua mearum epistolarum, illuc mitto, quas ad te perferendas curet; cum, inquam, dixisset, fasciculum tuarum ad me literarum accepisse quendam, qui se curaturum ajebat ut mihi redderentur, neque illius nomen elocutus esset, atque ego biduum, triduum expectassem, neque quisquam accederet; discruciar animi, verens, ne ille interiisset. quod me, duplici de causa, sollicitabat; &, quia eram vehementer cupidus, ex te cognoscendi, quid ageres, ut valeres, num aliquis ad vos nuncius, de novi Pont. Innocentii X creatione, venisset; &, quia pro certo sciebam, in eo fasciculo octerniones epistolarum includi, quos superioribus, à te acceptis, adderem. Verum, cum quatuordecim jam dies expectassem, desperatione propemodum debilitatus, heri mane diluculo, cum maximus de cælo imber caderet, è pueris meis al-



terum, ad eundem tuum misi, summa vi ab eo petens, ut ejus mihi nomen, qui fasciculum accepisset, indicaret. quem, tandem fuisse, ait, enim qui, tibi amicus, habitat in vico quodam, Quirinali proximo, ad capita domorum. Accurrit illico famulus, & invenit eum domi, commodum, cum è lecto surrexisset: rogavit, num quidquam tuarum ad me literarum haberet. Qui, paululum erubescens, se habere respondit, sed suo effluxisse animo, mihi eas reddere. Soluta fasciculi vinculo, inveni primum, paucillum quid tuarum ad me literarum, quibus significabas voluptatem, quam ex Innucentii Pont. max. creatione cepisses; tum, octerniones epistolarum tres, quos aliis adjunxi. At Pontifex, totus in pacis cogitatione versatur, in eisque deligendis, qui sint ad eam rem apti. nam antea pacificæ personæ non desiderabantur, sed in bellatoribus fere omnia erant. Interea non cessat petere à Cardinali Cappono, ut, rerum componendarum gratia, legatus istuc profisciscatur; qui, si veniret, generis claritate, magnitudine animi, atque consilii, rerum maximarum usu, quo præstat, plurimum huic causæ proderet. Atqui is, tum exactam propemodum ætatem, tum infirmissimam excusat valerudinem, qua, itinerum labores, & frigidissimi istarum regionum aëris rigorem, ferre non posset. Equidem istam gloriam Illustrissimo Neritonensium Præsuli præreptam nolim: sed, cum omnes ad eam aditus, innumeris obstructos difficultatibus, ac pene interclusos intelligam, malim, eum Urbem colere, & in hac luce vivere, quam istic, ubi si omnia coneris atque perficias, si omnes istas regiones, tuarum virtutum, rerumque gestarum fama impleas, nihilo sis hic Romæ notior ac clarior; quæ tantarum rerum præsentium strepitu adeo obtunditur, ut vix ea, quæ aliis fiunt in locis, exaudiat. Veniat ipsi in mentem illius, quod de se Cicero, in oratione pro Plancio, scribit. qui cum quæstor in Sicilia fuisset, ibique res ita magnas ac præclaras gessisset, ut inauditi à Siculis honores sibi decernerentur, existimabat, nullos alios Romæ, nisi de sua quæstura, sermones haberi: sed cum, decedens è provincia, Puteolos forte venisset, ubi plurimi, ut ille inquit, ac lautissimi solebant esse, interrogatus est à quo-

dam



dam, quo die Roma exisset, & num quid in ea esset novi: cui cum respondisset, se è provincia decedere, Etiam mehercules, inquit, ut opinor, ex Africa. huic primum stomachatus est fastidiose; sed postea destitit stomachari, sentiens, Pop. Romanum aures hebetiores, oculos acres atque acutos habere; ac desiit, quid de ipso audituri essent hominis, cogitare, statuitque habitare in oculis omnium. Id ego consilium utile esse arbitror iis, quibus idem est cursus ad gloriam; ut, postquam satis sibi apud exteris gentes laudis famæque pepererint, Romæ Remp. gerant; ab oculis horum hominum, nisi forte lege ac necessitate, non abeant, Hæc meus in animi nobilissimi virum amor summus ac singularis, atque ardens illud studium, quo incendor, ut ipsum, ex suis virtutibus, ornatum aspiciam, scribere suasit. quod si resciat ille, atque audacius factum existimaverit, ignoscat rogo. Romæ nihil est novi, nisi P. Nicolaum Rodolphum, olim Dominicanæ familiæ generalem magistrum, cui non licebat Romæ consistere, à summo Pont. revocatum, atq; humanissimis honorificentissimisque verbis exceptum, in præcipua parte cœnobii, ad Minervæ, habitare, Vrbein, vel rheda vel gestatoria sella delatum, circumire, omnium cum plausu lætitiæque, quacunque iter facit, honorifice accipi; tum Angelum Cæsium, Ariminensem Episcopum, Episcoporum decus eximium, ab eodem Pont. accersitum, ut, quemadmodum ajunt, ad Regem Hispaniarum mittatur, Rospiliosi loco, Nuncius. Vale. Romæ, i v Idus Novembr. c i o i o c x l i v.

## LXXIX.

T Y R R H E N O,

Viro Clarissimo.

**D**Vm hæc scribo, xviii Kal. Decembris, hora fere noctis secunda, Romanus aër, explosarum fragore bambardarum remugit, tubarum sonitus tympanorumque strepitu percrepat, omnes ferme viarum tractus, frequentium flammis ignium, elucet; ut, si quis Romam,

è locis, unde est in eam despectus, aspiciat. ardere illa &  
 conflagrare videatur. quod si Neroni id venisset in mentē  
 facere, sine urbanorum dolore, immo magna cum illo-  
 rum voluptate, suis potuisset oculis, ardentis imaginem  
 Trojæ subjicere, tum ædium pene omnium fenestræ, lu-  
 minibus, cartaceis in orbem ductis pedalibus laternis  
 inclusis, vel accensis cereis emicant: denique, tota Vrbe,  
 lætitia ac voluptas agitatur. Causa lætitia est Camillus,  
 Innocentii Pont. fratris filius, qui solus ex familia Pam-  
 philia superest, in Collegium Cardinalium cooptatus,  
 una cum Io. Carolo Mediceo, Ferdinandi, Magni Du-  
 cis Etruriæ fratre. Maluit videlicet ille Ecclesiasticæ vi-  
 tæ rationem ingredi, quam matrimonia persequi, & li-  
 beros educare, generi monumentum & sibi. Ajunt  
 etiam, Pontificem, ad eum cooptandum, impulsū,  
 tum Cardinalium omnium, tum Regum atque Re-  
 rum. oratorum precibus, qui recusabant, de suis suo-  
 rumque Principum negociis, cum aliis, quam cum Pon-  
 tificis fratris filio agere. Adolescens est, duo ac viginti  
 annos natus, optimis moribus, ac diligentia Olympiæ  
 Maïdachinæ matris, liberaliter educatus. Sed pridie,  
 quam comitia haberentur, in aula regia, magno omni-  
 um cum plausu, restituta est inscriptio illa, Urbani Pont.  
 jussu deleta, quæ ingentia Reip. Venetæ in Romanam  
 Sedem merita, in pariete ibi depicta, referebat. Con-  
 stans est omnium opinio, hoc Pontifice, neminem in  
 amplissimorum Patrum ordinem esse venturum, nisi  
 eum, qui sit genere, sanctitate, doctrina, ac rerum ge-  
 starum fama, toto terrarum orbe clarissimus. neque  
 enim esse verendum, ne, in Cardinalibus cooptandis,  
 cujusvis alterius rei oblitus, familiæ suæ, opibus, ho-  
 noribus, ac divitiis augendæ, rationem habiturus sit  
 ille, qui eam, fratris filio, in quo unica ejus propagan-  
 dæ spes inerat, ad ecclesiasticam militiam rescripto, pro-  
 peraverit ipse delere. Atque accersivit Romam Angelum  
 Cæsium, Antistitem Ariminensem, veri ac germani  
 Episcopi exemplar ac formam: cujus virtutis lumen,  
 longe clarissimum, ante annos triginta, in Cardinalium  
 Collegium, ad purpuram illustrandam, fuisse translatum  
 oportuit; ut, sicut Episcopis, quemadmodum in suo mu-




# LECTORI

## TYPOGRAPHVS.



Vdemia peperit, quas  
vides, ad Tyrrhenum  
Epistolas. Quod si igitur  
eidem has junxeris,  
acclamare licebit, *Sequitur matrem  
sua proles*; ac justum equidem vo-  
lumen tibi erit. Sinsemotas ma-  
lueris, nihil etiam peccaveris.  
Adultæ filiæ sunt: gloriam pa-  
tri quæsitum eunt: invenient,  
vel solitariae. Vale. Decembris,  
CICIDCXLIV.



IANVS NICIVS  
ERYTHRÆVS.

## T Y R R H E N O,

Viro Clarissimo, longeque doctissimo,  
IANVS NICIVS ERYTHRÆVS

S. P. D.



Quamvis, multos jam annos, maxima cum utilitate Christianæ Reipublicæ, tua isthæc vistanta virtutis atque ingenii, peregrinata, absuit ab oculis & Urbis & aulæ, meo tamen ab animo, cui nihil potest obsistere, nunquam ea recessit.

Etenim ab eo die, quo ea primum se mihi obtulit, ita meum ad se animum arripuit, ita me totum sibi conglutiuavit, atque conjunxit, ut nulla temporis diuturnitas, nulla locorum distantia, nulla regionum diversitas, tantam conjunctionem, tamque arcte constrictum amoris vinculum, dissolvere ac distrahere potuerit. Quid mirum est igitur, si in eo libello, qui mihi, æstate quadam ocio diffuenti, neque, quid potius agerem, habenti, per jocum excidit, ejus ineminerim, cujus mihi virtus semper animo obversabatur, &, quamcumque rem agere ocepissem, se mihi semper objiciebat? Verum, acceptis tuis literis, tanta me voluptas invasit, quantam maximam capere possum, tanta latitiæ vis ingruit, quanta ne in cogitationem quidem cujusquam cadere potis est, dum illud mecum reputo, me in ejus memoria, qui esset omnium virtutum princeps, hæsisse, unde tot annorum, quibus inter nos non vidimus, cursus, tot regionum, quibus disjuncti fuimus, interjectus, tot munerum amplissimorum, quorum adhuc occupatione distringeris, administratio, facile potuisset ejicere. Præterea videbam, iugentes à te mihi gratias agi, per literas, omni elegantia, suavitate, cultuque refertas; ob tenuem, nescio quam, amoris erga tuas virtutes mei, significationem. Quas literas, quoniam in  
A iis à te

iis à te ornor, comperiebam, plus mihi ad immortalitatem nominis profuturas, quam Eudemiam, quam omnes eos libros, ad quos edendos, jam diu amicorum sedulitate studioque, compellor. Sed tanta gratiæ memoris animi virtus, tanta beneficentiæ vis non poterat ab alio prodire, nisi ab eo, quem generis splendor, ingenii nobilitas, doctrinæ magnitudo, omniumque elegantissimarum artium scientia, ab imperitorum atque inurbano-  
rum vulgo secernit. Cujus beneficii si ulla me unquam oblivio capiat, non modo ingratus sim, sed feras etiam bestias, immanitate ac sævitia, superem. Ac non tibi visum est satis, si id unum mihi beneficium tribuisses, sed curasti, ut, cum alio munere copulatum, ad me veniret; nempe illud dico opus, in quo totam itineris tui rationem ac seriem elegantissimo persecutus es libello, ita ornatè, ita aperte, ita dilucide, ut urbes, amnes, viæ, regiones, eisdem descriptæ, non tam verbis exprimi, quam coloribus pingi, non tam animo repræsentari, quam oculis subjici videantur. Quod mihi spectaculum, ita visum est lepidum, ita jucundum, ut ad illud complures literatos viros, ac earum regionum, quæ à te referuntur, peritos, convocaverim: qui omnes clare plausum dederunt, atque urbium earum situs, hominum mores, viarum asperitates, itineris incommoda, atque pericula, apte, lepide, concinne, prope in conspectum adducta, clamarunt. Cujus scripti pulchritudine elegantiaque cum satiari nequaquam possem, coactus sum illud heri, in summo colle Ianiculi, ad D. Petri, inter viridantium illarum arborum umbras, avium cantus, ac leniter susurrantis auræ sibilos, relegere, una cum Hugone Vbaldino, Basilicæ Vaticanæ Canonico & Archidiacono, præstanti sapientia viro, judicio peracri, ac spectatore ingeniorum elegantissimo, uno verbo, Roberti Cardinalis Vbaldini fratre. Ac non potest dici, quanta, ejus opusculi lectio hominem voluptate perfuderit, quantasque ab utroque nostrum assensiones & admirationes expresserit. Illud demum inter nos convenit, tibi neminem, ingenio, eruditione, judicio, ac poëticæ etiam facultatis laude, antecire, idque eo admirabilius videri, quod in summis atque perpetuis occupationibus

tuis, tanta scribendi tam bene facilitas & ratio contingat. Quamobrem eas tibi gratias ago habeoque, quibus es dignus; & posthac interdum audebo litterarum ad te aliquid scribere; non quo tibi, mei memoria, animum refricem; nihil enim hac re opus esse intelligo; sed reverentiæ & amoris in te mei testificandi gratia. Vale. Romæ, VI Non. Iulii MDCXLI.

## II.

## TYRRHENO

V. C. eruditissimoque.

**S**ignificare mihi visæ sunt tuæ humanissimæ ad me literæ, eo jucundiores quo minus expectatæ, tibi non ingratum fore, si interdum ad te literas darem, quibus tecum absens, ut dicitur, loquerer. Verum id me sapius agere cogitantem, argumenti, de quo scriberem, inopia retinuit. Nihil enim occurrebat, quod scriberem, quodque te velle scire existimarem. Nam, quæ hic Romæ aguntur, cum ad te perferantur, arbitror tibi esse notiora, quam mihi, qui adsum. Etenim homo, minime cupidus investigandi ea, quæ nihil ad me attinent, neque cum curiosis versor, qui rem alienam potius curant quam suam, neque ædes in ea Urbis parte habeo, ubi ob frequentiam civium, omnia mihi necessario sint audienda; sed fere solus ago, ac remoto ab arbitris loco inhabito, quo vix tandem levis eorum, quæ fiant, rumor accedit. Cum enim, vel mea inertia, vel eorum ad quos me applicaveram culpa, vel fortunæ injuria, quæ mihi semper adversata est, procul à Rep. semper habuisset; decrevi, relictis omnibus curis, ibi quiescere, ubi, tanquam in portu sedens, turbulentissimo ambitionis æstu eos jactari, qui se illi commisissent, aspicerem, eisque navis Reip. bene gerendæ laudem virtutemque concederem, mihiq; ut dicitur, viverem. Itaque non inelegantem domum, nec ita magna mercede, conduxì, unde amœnissimus est prospectus in Urbem, & in circumjectos Vrbi campos; ibique



diei maiorem partem, legendo aliquid scribendoque, traduco, non ullam inde docti vel litterati viri famam aucupans, sed honestum ocii mei oblectamentum quaerens. Hinc Eudemiola nostra manavit; quæ mihi est erepta è manibus antea, quam castigare expolireque eam possem; cuius duos postremos libros, quos jam diu impressor se typis mandaturum promiserat, nondum apparere, vehementer miror. Ab hoc eodem ocio alia non parum multa prodierunt; fortasse non minus, quam Eudemia, oppleta inanitatum, atque aranearum. Nam cum nihil suppeteret, in quo fructuosius meum tempus contererem, ne nihil interea agerem, ad hæc inania ac levia revolvebar. Quæ, ut alia plura, evanuisent, nisi aliquod illis pondus addidisset Gabriel Nandæus Parisinus, vir doctissimus, quicum mihi aliquot ab hinc annos, magnus usus necessitudoque intercedit. Hic, pro suo erga omnes cupidos literarum amore studioque, singulari me benevolentia complexus est, adeo ut singulos ingenioli mei partus, quos ego semper contempsî, nec aspicere volui, patria prope caritate, suscepit, servaverit, aluerit, summamque dederit operam, ut quam longissima illis vita contingeret. Nam primam Dialogorum meorum partem, quæ Dialogis duodecim continetur, magna ex parte de rebus amœnis lepidisque, conscriptis, Lutetiam Parisiorum ad amicum suum misit, ut eam typis cudendam quam primum curret. Et quia nullum neque finem neque modum facit, de me cogitandi, ac bene merendi, jam nunc in eo est, ut volumen epistolarum mearum, quas plures in libros dispositas habet, transalpinis librorum impressoribus tradat, magis, ut ego interpreter, ardore animi, impetuque, quam maturitate atque iudicio. Novi ego mei tenuitatem ingenii; novi res meas, quam longe infra illud, quod summum ac perfectum est, jaceant. Sed benevolentia illius oblisti non potest, qui obfirmate dat operam, ut mea, quæ penes se habet, ante meum è vita discessum in lucem exeant, quo (id quod ego minime laboro) vivus hac gloriola fruar. Ac cecidit mihi perincommode, ut epistolam ad me tuam, non maiore elegantia quam humanitate refertam, aspiceret, in qua large, tuam ipse mihi

mihi operam ac studium defers. Nam ab eo die magnam in spem venit, posse contingere, ut istic, ubi celebres officinas impressorias esse non ignorat, tua auctoritate & gratia, imprimatur illud opus, quod nuper, de viris, aliqua ingenii fama notis, me vivo vita functis, absolvi. Itaque, quoties me videt, (videt autem sæpissime,) rogat, instat, urget, ut id à te beneficium, quanta vi potest, efflagitem. Cui ego roganti diu restiti: sed cum jam ille, non cohortationes, non preces, adhibere, verum vim facere videretur; coactus sum per literas, quæ non erubescunt, (coram enim ausus non essem,) meum hoc ad te postulatum afferre, teque perquam demisse orare, ut, si fas est, si æquum censeas, si tibi videatur, cum aliquo impressorum istorum agi cures, ut librum, de quo dixi, typis mandandum accipiat. Qui liber, tum meo tum aliorum judicio, non quidem sermonis elegantia, quæ virtus abest à me longissime, sed materiæ varietate, plenus est cujusdam voluptatis, quæ non mediocriter, legentium animos, commemoratione hominum, & cognitione ingeniorum, tanquam formarum, detinere possit. Neque ego sum tam ineptus, quin videam, me temere agere, cum eam tibi provinciam conor imponere, quæ minime occupationibus tuis maximis gravissimisque conveniat, simulque impudenter facere, quod per amicitiam & gratiam aliquid à te contendere audeam, in quem nulla mea merita extent. Sed temeritatis crimen facile propulsabit humanitas, qua te mihi dedisti; impudentiæ vero notam, amicissimi mihi hominis contentio diluet. Nam video, laudi datum esse non nemini, quod deposuerit, ob amici jussa, pudorem. Interim, quidquid futurum est, si tibi non est molestum, significes velim. Etenim, si qua spes istic negotii conficiendi se dederit, id erit mihi gratum in primis, tum mea, tum amici causa; si minus, tuam mihi operam studiumque non defuisse lætabor; idque in magni beneficii gratiæque loco reponam. Romæ, pridie Idus Septembris M D C L X I.

## III.

Doctissimo clarissimoque viro

T Y R R H E N O.

**N**Vdius tertius redditæ mihi sunt uno tempore à te epistolæ duæ; quas, ex die, illis adscripta, tres antea menses quam accepissem, exaratas fuisse comperi. Cujus rei causam cum ab eo, qui detulerat, quæsissem, eam in amanuensi tuo hæere respondit, qui in earum literarum opistographo, pro Nicio alium, fere cognominem, scripsisset; cumque eæ, per duos menses, tota Vrbe circumlatæ essent, neminem fuisse inventum, qui vocaretur ita. Verum, ad me optatissimæ expectatissimæque pervenerunt, tum quia elegantissimum in religiosissimumque illud carmen, de Christo recens nato, ferebant, cujus frequenti lectione, sensi me mirabiliter recreari, atque ad pietatem excitari; tum etiam quia scriptum in illis erat, te daturum operam, ut Pinacotheca mea, vel istic vel in Belgio, typis imprimeretur; quo nihil mihi gratius, nec jucundius accidere potuit. Sed à tam propensa humanissimi in me hominis voluntate aliter expectari non poterat; ac, de utraque re, immortales tibi gratias ago habeoque, ut debeo. Mitto, ut jubes, quatuor ejus operis folia; reliqua deinceps, octavo quoque die, missurus. De forma & characteribus, quibus imprimendum sit, nihil præfinire audeo, sed totum in tuam voluntatem judiciumque rejicio, quo nihil potest inveniri sapientius. Gallucium Sinistrum, adhuc convenire non potui; deterritus, contractionibus his diebus, itineris longitudine; nam ædes meæ, ab ædibus illius, immanè, quantum distent; sed multo magis, corruptis Urbis viis ab imbribus, quas non aliàs altiore obductas limo me vidisse commemini. Sed quamprimum, curabo mandatum tuum diligenter, ac de re quam cupis, certiore te proximis literis faciam. Doleo vehementer, ex animi tui sententia te minus valere, & aliquanto imbecilliore capite, ob perpetuos studiorum labores, uti. At, si tibi tuorum in te amicorum studia, si

Sedis

Sedis Apostolicæ utilitas, quam ex te capit, est cordi; quæso te, ut valetudinem tuam cures diligentius; & quoniam omnis tibi, à medicis, cogitandi labor interdixtus est, quoties ad te literas dedero, (quod, quia ita à te mihi imperatur, faciam scæpe,) ne mihi respondeas, & si quid inciderit, in quo mea tibi opera esse usui possit, id ad me deferendum per alios cures. Malo enim humanitatis, eloquentiæ, doctrinæque tuæ fructu carere, quam vel minimo, valetudini tuæ, detrimento vel incommodo esse. Vale. Romæ, v Idus Ianuarii, C I C I O C X L I I.

## IV.

Doctissimo nobilissimoque viro

T Y R R H E N O.

Cum iterum ac sæpius carmen tuum elegantissimum, de Christi domini natali lectitasset, coepi egomet mecum cogitare, quodnam simile donum, tuo dono contra comparare pro viribus possem. Et aliquandiu in hac cogitatione defixo, proxima Dionysia reduxerunt mihi ad memoriam D. Catharinam Senensem, Virginem sanctissimam, ac popularem tuam, quam feriis Bacchanalibus legimus, maximis à Christo fuisse beneficiis affectam. Itaque hos elegos cecini, ita fortasse inepte, ita ineleganter, ita indocte, ut tu ipse, vel quivis alius, cum legerit, jure dicturus de me sit id, quod est in proverbio, Asinus ad lyram; ita me abhorreere atque esse absurdum, intelliget. Sed, quid vis? non potui me continere, quin hæc incondita funderem: in tempeste omnino: nam fuissem excusandus, si tum ad canendum me contulisset, cum calido latravit Sirius æstu, quo tempore, ut Poëta inquit, resonant arbusa cicadis: nunc vero nullum mihi excusationis perfugium esse relictum video, qui, eo tempore anni, vocem exerceo, quo, ob frigoris diritatem, cicadæ, ranunculi, grylli, atque alia ejusmodi animalia, à natura ad canendum, sive potius ad obstrependum clamore molestissimo auribus, genita, silent. Vnum me forte à reprehensione hominum

minum vindicabit; ardens nimirum ac vehemens, ad te munusculo aliquo remunerandum, voluntas, qua incendor; cui mihi fas non fuit obsistere: hæc in me istam tam ineptam versus faciendi cupiditatem excitavit, inflammavitque. Sed quamquam videri possim irrisione dignus, quod rem, ab usu atque exercitatione mea remotam, & ad quam minime à natura factus sum, hoc est, possim, attigerim, illud tamen objici mihi jure non poterit, quod judicium defuerit in eligenda materia, quæ tibi aliisque probari non vehementer possit; cum sim conatus explicare sacros D. Catharinæ amores, solitudinesque, quibus, ex Christi, ut ipsa putabat, absentis desiderio, afflictabatur. Etenim, sanctissimæ Virginis nomen, cujus ad meos hos versus studia non alluciat, quamvis eorum similes, quos olim Fauni vatesque canebant? Sume igitur id à me munus, quantumvis exile ac tenue, tanquam meæ in te observantiæ, & in Catharinam pietatis testimonium, & ejus quod non recte faciam, agendi temeritatem, meæ incensæ, ad te remunerandum, ut antea dixi, voluntatis excusatione defende; adeoque, eadem opera nunc præclarissimo Præfuli Chisio id à me offerri, scito. Vale. Romæ, xvi Kal. Febr. MDCXLI.

### Argumentum Epistolæ.

**C**atharina Senensis, virgo præstantissima, aliquot supra hanc nostram ætatem sæculis, admirabili sanctitatis laude floruit, Deo autem ita fuit accepta & cara, ut sæpe Christus se illi palam corporis oculis aspiciendum objecerit, manusque & pedes, attrectandos exosculandosque, præbuerit, horarias etiam preces cum ea recitaverit, lateris vultus eidem admooverit, ut divinum inde cruorem, quovis nectare præstantiorem suavioremque, suo arbitratu hauriret. & quod omnem fidem excedit, feriis Bacchanalibus, cum domi sola sederet, eo quod domestici omnes se domo foras ejecissent, ut spectaculis operam darent, eundem Christum, una cum beatissima ejus Matre, Angelorum choris stipata, admirabili quadam luce perfusum, ad se venientem excepit: qui detractum sibi è digito anulum, tanquam amoris

*moris arrhabonem, virginis digito inseruit, atque, ut sit in  
nuptiis, applaudentibus Angelorum choris, sponsa sibi no-  
mine eandem adjunxit. Verum quia fiebat interdum, ut  
minus frequenter se illi in conspectum daret, ac caelestibus vo-  
luptatibus animum expleret, quo videlicet, ut nostro mo-  
re loquar, experiretur, quid illa amaret, quid simularet,  
vel potius, ut ea distractione dissidioque, maiorem ejus in  
pectore faceret divini ipsius amoris incendium, illa, qua  
ejus dissidium ferre non posset, hac epistola queritur, lamen-  
tatur, aitque, se miseram excruciaci, lacrimantem affli-  
ctari, dolore curisque tabescere, quia ipso egeat, quia careat;  
ac propterea eum orare, obsecrare, ut ad ipsam redeat, ut  
veteres secum amores, mores, consuetudines, ac delicias ex-  
erceat, ni eam malit, qua per ipsius vitam vivit, ab ip-  
so, hoc est, à sua vita, distractam, demum vita de-  
volvi.*

Epistola CATHARINÆ SENENSIS ad  
Christum Iponsum.

Queritur, se fuisse ab eo relictam: rogat,  
ut redeat.

**I**lla tui quondam, dulcissima cura, voluptas,  
At nunc perpetui preda doloris amans,  
Sic tibi, postremum, morituro supplicat ore;  
Nec vanum est; facient fata propinqua fidem.  
Ultima vicini venit cum funeris hora,  
Albus olor tales mittit ab ore sonos,  
Quales nunc imo fusas è pectore voces  
Flebilibus cogor consociare modis.  
Non, mihi si lingua centum sint ora, que centum,  
Mœsta queam lacrimas enumerare meas,  
Quæ, simul ac removes dulces, mea gaudia, vultus,  
Decurrunt oculis, more fluentis aqua.  
Undique si vastis pelagi cingentibus undis  
In vacuo sedeam sola relictæ solo;  
Non sic perpetuis maculem mea luctibus ora,  
Nec feriam sæva pectora nuda manus;

*Ut, sine te, lacrimis undantibus ostia pando,*  
*Et crebro laceros verberare tundo sinus.*  
*Occurrunt animo metuendi mille figura*  
*Eripitur tota queis mihi nocte quies.*  
*Illam pavore vacat, cui te contingit habere,*  
*Et quam, pacato nupine, dexter adis.*  
*Aspice, quæ fueram hosti formidabilis, ut nunc,*  
*Ignavus cogat me dare terga timor.*  
*Nec vires animusque subest, gelidusque recurrit,*  
*Hostis ab aspectu, cuncta per ossa tremor.*  
*Sustineas placido, victam succumbere, vultu,*  
*Conjugii titulo qua tibi iuncta manet?*  
*Te patiente, tuam, qui te male perfidus odit,*  
*Ante tuos oculos sub sua jura trahet?*  
*Quod facinus nequeat vilis perferre popellus,*  
*Sustineat divum rex, hominumque pater?*  
*Est ubi, dic, pietas? ubi casta fœdera flamma?*  
*Est ubi pacta fides? est ubi dulcis amor?*  
*Selicet in me alacri fundentur ab ore cachinni?*  
*Scilicet infide fabula gentis ero?*  
*En, quæ, Christe, tibi thalamo sociata jugali,*  
*Syderibus, visa est, inseruisse caput,*  
*Ut famula in morem (referent) onerata catenis,*  
*It nunc, tartarei prada cruenta ducis?*  
*Nec procul illa dies aberit, ni sedulus adsis,*  
*Qua trahar ad Stygios exagitanda lacus.*  
*Eja, age, dulce veni, qualis per gramina cervus*  
*It celer, ad rivos pratercuntis aquæ.*  
*At tibi si lacrima, si sunt suspiria cordi,*  
*Plurimus hic large qui rigat ora liquor,*  
*Et gemitus poterant, properantes pectore ab imo,*  
*Quo mittebantur, cor tetigisse pium.*  
*Sed si jam redeant perfossi corporis artus,*  
*Si nitidum, gestans spineaserta, caput;*  
*Diffugient lacrimæ, tradentur nubila frontis*  
*Obscuræ, æriis diripiendæ Notis.*  
*Quos dem complexus! quot plantis dulcia figam*  
*Oscula! quot manibus, quas terebravit amor,*  
*Quæque manus, solido ex auro, plenaque hyacinthis,*  
*Æternis satagunt nos cumulare bonis!*

*Quam*



Quam memori, illa dies, animò, quam sæpe recurſat,  
 (O mihi ſint tales, & ſine fine dies,)

Illa dies, inquam, qua tu, pulcherrime rerum,  
 Luce nitens nivea, conſpiciendus ades !

Tempus erat, ventri quo quiſque addiſtus opimo,  
 Turpia ſint quamvis, cuncta licere putas,

Cumque, novos induta ſimul turba improba vultus,  
 Carbaſa per vetitum pandit ad omne nefas,

Perque vias omnes, perque omnia compita, currit  
 Ogygio qualis concita Baccha Deo.

Ipſa ſedens vacua triftis meditabar in aula  
 Mores, nec meritis tempora digna tuis,

Qua tibi ſeva darent pro dulci præmia vita;  
 Scilicet interitum, verbera, vincla, crucem.

Sola aderam: namque ingenium moreſque ſecuta  
 Urbis, cuncta domus, denſa theatra petit;

Cum mihi latus ades, manifeſta in luce videndus:  
 Vera loquar, vero vix habitura fidem.

Fulgebant rutilo radiantes vertice nimbi,  
 Et vox mortales non dabat ore ſonos;

Stillabant celfi divina frontis honores,  
 Gemmarum in liquidos agmina ducta globos;

Corpus odoratas ſpirabat naribus auras,  
 Non quas è terra divite mittit Arabs,

Sed quas æternis veſtiti floribus afflant  
 Ætherei colles, & locus almus alit.

Tum promens dira trajeſtum cuſpide peſtus,  
 Ad ſecreta animi quæ via facta patet:

En tibi cor, inquis, dulcis meus ignis, apertum;  
 Hauriat hinc ſacri pocula amoris amor;

Sint lacrima procul & fugiant, mala ſigna doloris,  
 Inque ſuum redeant gaudia pulſa locum;

Te riſus cantuſque decent, te ſola voluptas,  
 Cui pateant cordis regna beata mei.

Vt lapis, ut ſtipes, jacui; vox faucibus hæſit,  
 In ſtupido tantum peſtore frigus erat.

Non tulit & vultus, acies male firma, nitentis,  
 Sydereum ſolis clarius orbe, jubar,

Sed tenebris adoperta nigris, lucemque perofa.  
 Eſt noctem medio querere viſa die.

At poſt.

At postquam lapsa surgunt in pectore vires,  
 Luminibusque redit, te revocante, vigor;  
 Tum per succensas currit nova flamma medullas;  
 Nec moror, ante tuos procubuisse pedes;  
 Et quoniam sine te nulla est mihi vita superstes,  
 Vsq̃ue, precor, lateri sim comes ipsa tuo.  
 Nam propius vita, vitales plenius auras  
 Os avidum, patulo pectore, carpet hians.  
 Hac neque sicca genas veneror tacitoque labello;  
 Namque dabant lacrimas lumina, lingua preces;  
 Cum subitus pulcro rutilat tibi risus ab ore,  
 Cui par non ullum sydera lumen habent.  
 Tum raptam è digitis splendenti murice gemmam  
 Ipse tenens, blanda talia voce refers:  
 Empta mihi toto per diram sanguine mortem,  
 Clarus hic in parvo qui nitet orbe lapis,  
 Si tibi sunt cordi, ut video, connubia nostra,  
 Si geminas animas unus adurit amor,  
 Splendeat aeternum, nostri tibi pignus amoris,  
 Nec digito à digitis sit procul ille tuis.  
 Hic, tua festivo genitrix nitidissima vultu,  
 Ducebat superum, lata per astra, choros;  
 Millibus ac cali niveis comitata ministris,  
 Ipsa est conjugii pronuba facta mei.  
 O tum quanta mihi fulserunt gaudia! quantus  
 Venit honos, cum sic tradita nupta Deo!  
 Ex illo fulget mihi tempore dives in auro  
 Gemma, suasque astris amula jactat opes.  
 Aërias penetrasse vias, calique videbar  
 Limina non dubio me tetigisse pede.  
 Sed dum tuta ratem pacata per equora solvo,  
 Ac, rerum varias, non subit, esse vices,  
 Ah, fugis, & fugiunt tecum pax alma jocusque,  
 Firma manent tantum bella, metusque, dolor.  
 Nec vox, nec luctus, nec pectore missus ab imo  
 Spiritus, heu, pondus vimque morantis habet.  
 Vnica nata meo, pulcherrima causa, labori,  
 Aspera, sed quamvis aspera, cara tamen,  
 Qua mihi contraxit tantos sors improba luctus?  
 Quis furor iratis dat mea vela Notis?

*Omnia si veniunt nobis solatia tecum.*

*Si celerem rapiunt, te fugiente, fugam.*

*Cur prasens vel ades nunquam, aut ubi veneris, aura*

*Ociore, & rapidi fluminis instar, abis?*

*Si, desiderio ut moriar, mea vita, refertam.*

*Muneribus dextram ferisque referisque simul.*

*Heu, patior, quales solvunt sub tartara poenas*

*Pectora, flagitiis nobilitata suis.*

*Sic miser ostensis torquetur Tantalus undis;*

*Hac vesana viri luditur arte fames.*

*Quid facias hosti, venias si talis amanti,*

*Si Dominus sponsa tristis & asper ades?*

*Quid facias servo, rupto qui carcere savam*

*Sit tibi conatus contribuisse necem?*

*At, si jure, meis pro factis, improba plector,*

*Si meritam lasi me premit ira Dei,*

*(Quod misera ut verear, culparum cogit acervus,*

*Quarum mens valido pondere pressa gemit,*

*Atque olido nigroque simul circumlita cœno*

*Deformes toto contrahit ore notas,)*

*Solvantur facili sinuosa ligamina dextra,*

*Atque abeant posito libera colla iugo;*

*Sanguinis atra tui mudentur corda lavacro,*

*Et fiant ipsa candidiora nive.*

*Nam loca fœda situ, lutulentaque sordibus altis.*

*Iure fugis, puro non adeunda Deo.*

*Tum nivei soles succedent noctibus atris;*

*Tum subeant dubiis ocia tuta malis.*

*Lassaque tum positis requiescant ora querelis,*

*Tum sicca careant imbre cadente gena.*

*At, nisi justa celer venias in vota precantis.*

*Non erit, ipse tua quam tuearis ope.*

*Nam moneo, nec longa mora est, jam deferet artus*

*Inque leves auras spiritus ibit iners.*

*Sed neque stulta loquor; doleat, quod linquere vitam*

*Teque querar titulum mortis habere mea;*

*Pro quo, plus una dignum est conducere vita,*

*Vel semel indignam posse subire necem.*

*Illud, dente malo, lacerat mea viscera morsu.*

*Quod tua non moriar, qua tua dicta fui.*

*Da mites*

*Da mites animos, teneros da rursus amores;  
 Non aderit tenebris mors adoperta caput,  
 Sed sumet nitidos, præstanti corpore, vultus,  
 Inque meos veniet pulcrior illa sinus.  
 Quare age, quid cessas, mea lux, mea vita, meaque  
 Tuta quies, portus, perfugiumque, rati?  
 Aspice, ventorum rabie ut, compage soluta,  
 Pene bibat tumidas naufraga puppis aquas!  
 Vita veni, mea vita veni; & si mors subeunda est,  
 Ante meam vitam, sit mihi vita mori.*

## V.

## T Y R R H E N O

V. C. & omni virtutum laude cumulatissimo.

**G** Vilielmus Moonsius, qui hîc Romæ Serenissimi Electoris Colonienſis negocia procurat, magna cum fidei, integritatis, ac diligentiae laude; narravit mihi, se audivisse, qui diceret, minus commodæ valetudinis tuæ causam sustinere aërem istum, sua nimia acerbitate tenuitateque capiti infestum tuo. Quod facile adducor ut credam: nam Italos novi multos, quos, utpote mitiori crassiorique ortos cælo, aër iste ægros fecit: neque ita multo ante, Iesuitam quendam, Balthasarem nomine, P. Valentini, qui cum Card. Legato istuc profectus erat, socium, gravem in morbum induxit; nam posteaquam Romam rediit, à pituita, ex capite in totum corpus defluente, ita correptus est totus, ut omnium membrorum usum prorsus amiserit, ac multos dies, tanquam lapis vel truncus, lectulo defixus adhæserit; adeo ut medici, de eo actum esse, pronunciarent; neque quisquam dubitavit, quin tanta vis morbi, ab eo semine ortum habuisset, quod regionis istius diritas in ipso reliquisset: at deinde se colligentes, sibi que ipsi animum addentes, non inutilem nec illaudabilem in eo curando operam adhibuerunt: nam cum constaret inter eos, stuporem illum torporemque membrorum, à noxio aliquo humore, per totum corpus fuso, manare, nihil esse agendum

dum prius existimarunt, quam ut illum, artificio aliquo & machinatione, foras extraherent: atque vaporario, ad eum usum facto, multos dies hominem inclusum habuerunt, & calor vi<sup>us</sup> sudoris illi plurimum excitandum movendumque curarunt: atque ea curandi ratio hunc exitum habuit, ut paulatim membris vigor redierit, ac demum pristinum illis robur accesserit: & nunc, ex ancipiti ereptus, integer ac validus, Domus professæ foribus præest. Sed ut ad Moonsum redeam, cujus antea megnini, Batavus est, Hagæ, nobili loco natus, Græcis ac Latinis literis doctus, & aliquot abhinc annis in hanc viciniam commigravit: itaque, & jure vicinitatis, quod in propinqua parte amicitiae putatur, & communium similitudine studiorum ac voluntatum, se penitus in meam familiaritatem immergit. Hic Verbis istius, in qua versaris, nobilitatem, situm, amœnitatem, pulchritudinem, civium frequentiam, doctorum hominum, atque omni eruditione principum multitudinem, bonorum librorum copiam, miris laudibus prosequitur. Magna illi spes est, fore, ut sacerdotium aliquod locuples ac pingue, ex iis, quæ istic numerantur in primis, obtineat, atque, ad eam rem, tuam sibi, apud istum Principem, cui tot annos inservit, gratiam atque operam usui & adjumento esse posse existimat. Proximis ludis Bacchanalibus, Antonius Card. Barberinus insignem fabulam populo spectandam dabit: palatium nimirum, quod Ludovicus Ariostus, in suo Orlando furente, ab Atlante magicis artibus excitatum fuisse; cecinit, in eoque tot heroas & heroinas errasse finxit. Ariosti carmen deduxit in actus Iulius Respilius, V. C. more suo, elegantissimis versibus; quibus modos fecit Aloysius quidam, modulatur egregius; selecti ex cantoribus Pontificiis omnium optimi: qui fabulam agant, actores primarum partium, duo sunt, M. Antonius, deliciæ domini, ob singularem vocis suavitatem, & eques Loretus Victorinus, cujus similem neque isthæc neque longè superior ætas tulit. Ajunt, scenæ totius apparatus magnificentissimum fore, ac regali Antonii Cardinalis animo dignum. Præstantissimi artifices adbibiti,

*Qui scenam doceant versis jam frontibus ire,  
Sapius & varios redeuntem promere vultus,  
Ut, populi plausu, concurrat dextera laeva,  
Omnis & indocta decedat ab aure voluptas,  
Adque oculos abeat. namque his plebecula gaudet,  
Nec curat, recto maneat num fabula talo.*

*Sed cur injussu, dictant mihi carmina Musa,  
Quas procul hinc abiisse, loci squallore fugatas,*

proximis superioribus meis ad te literis scripseram; præfertim cum non modo suus huic loco pitor non redierit, sed novarum quotidie sordium fiat accessio? Sed fortasse venerunt, ut mihi, quam longas ad te epistolas dare cupienti, verba suppeditarent. Atqui eæ, nisi numeris lege adstrictis, loqui nesciunt. Sed oro, te ut adversus aëris istius injurias, si tibi noxius est, tuearis ac munias. Vale, Musarum amor, ac decus. Romæ, V I I X Idus Febr. C I O I O C X L I I.

## VI.

Clarissimo atque omnium virtutum laude  
cumulatissimo viro,

T Y R R H E N O.

**Q**uatuor jam menses continuos totos, ferme perpetui de cœlo decidunt imbres, non illi quidem maxime vehementissimique; nam vias, præter modum corruptas, expurgarent atque detergerent; sed sedati, neque ita magni, qui vias easdem, altiori, tenaciori, & ad fallenda vestigia aptiori in primis cœno obducunt; ac vix serenus unus & alter dies intercedit, quo tellus, una cum cœlo exhilarata, eniteat. Sed anni tempus, tam adversum, molestius intolerabiliusque mihi reddit clivî hujus, olim omnium amœnissimi, in quo nunc habito, facies, immutata. Nam, quemadmodum antea nihil mundius, nihil venustius, ita nunc nihil eodem invenias horridius, fœdus, ac lutulentius. Primum enim, tres ex intimis Principis familiaribus, loci amœnitate capti, ædes, in eo coemptas, coeperunt altius tollere, suoque ex arbitrio formare; sed, aliquot abhinc men-  
ses

ses, (quamobrem, nescio,) inchoatum ab ipsis opus interiniserunt, neque adhuc curant ad absolutionem perfectionemque perducere: at hoc minus esset molestum; verum ita ab omni parte clivum, rudere, sabulo, cœmentis, aliaque ad ædificandum materia, complerunt, ut, non modo, quemadmodum inquit ille, è via semitam fecerint, sed vix tantulum loci reliquerint, quo ad Ædem proximam aditus pateat. Deinde, equitum turma, quæ apud nos in hybernis collocata est, ipsa quoque, quod reliquum erat viæ, paleis, fœno, stercore, aliisque sordibus, tum imbribus, tum aqua, qua equos ablunt, semper inadidis, ita referit, ut, ubi vestigium figas, non invenias. At ubinam est remoti hujus ab arbitris loci ocium, quies, silentium? Profecto, hæc omnia exulatum abiere, nec, quando veterem suam in sedem, tanquam postliminio, reversura sint, scio. Nulli hic antea strepitus, nulli clamores audiebantur; nullis hæc vicinia vocibus, nisi avium cantibus, personabat; nihil huc admittebatur, quod posset oculos vel aures cujuscpiam offendere: at nunc, dies noctesque, insanissimis importunissimorum militum ululatibus omnia percrepant, nocturnis bacchationibus vigiliisque replentur, impurissimis meretricibus celebrantur; de quibus illi sæpe numero inter se contendunt, velitantur, rixantur, ac mutuis etiam vulneribus sese confodiunt. Et miraris, illud à me tam incontinuum, tam rude, tam inelegans carmen prodiiisse? At Musæ, ut tu melius omnibus nosti, mundi ciæ, pacis, ociique in primis cupidæ, ad loca sordida, inamœba, ac tumultibus referta, non audent accedere. Ab hac igitur turba atque tumultu, & à duobus insuper tubis, quæ à duabus item valentissimis tubicinibus fere semper inflatum accipiunt, à studiis istis amœnissimis, atque adeo à me ipso sejunctus, & in alia omnia distractus, quasi colligendi mei gratia, sæpe me consero ad Patres Societatis Iesu, qui sunt hic Romæ in domo professa; ac modo unum, modo alterum, modo plures evocari jubeo, ac me illis dedo, cum illis oblecto, sermones consero, & eorum jucundissima consuetudine ac dulcibus alloquiis recreatus, à molestis cogitationibus abeo, atque ad me ipsum redeo. Ac magno



mihi solatio in primis est Pater Iacobus Fuligattus, quicum, jam inde à puero, vetus mihi usus necessitudoque intercedit. Hic miros mecum de te sermones agit, quem probe sibi notum esse ait; quippe qui, cum confessiones tuas exciperet, te duce, ad intimos animi tui recessus & cubilia penetraverit, eaque perlustrarit, inspexerit. Ut ille ingenium tuum laudat, ad omnia summa natum! ut doctrinam & eruditionem, & eloquentiam, quam in te admiratur, multorum facultati atque industriæ, qui aliquod in iis rebus nomen habent, anteposit! ut mores tuos elegantissimos, sanctissimosque, nobili & Christiano viro dignos effert in cælum! Petivit à me opere maximo, ut suis verbis tibi manus exoscularer, ac salutem plurimam dicerem. Egeram, superioribus diebus, cum Gallucio Sinistro, tuis verbis, diligenter, ut ex libro Salvii, ejus paginæ, in qua clarissimæ familiæ vestræ insignia essent depicta, exemplum unum mihi liceret excipere. Qui mihi responderat, rem me difficillimam quærere; se enim propemodum desperare, posse eum reperiri; quod Salvii scripta, una cum innumerabilibus aliis Card. Mazzarini, essent confusa, atque permixta; ac velle singula scrutari, rem esse multæ operæ, magnique laboris. Sed cum postea revertissem, quod promisisset, daturum se operam, ut tibi fieret satis; excusavit Laurentii fratris ægrotationem, qui etiam nunc, ex ancipiti morbo, lecto implicatus, non potuisset, ad perquirendum librum illum, animum adjungere; nam id ad se eum recepisse, apud quem manuscripta omnia, quæ fuerant Salvii, reperiuntur; verum simul ac ille convaluisset, curaturum se, ut negotium susciperet; ac tibi vicissim omnem suam operam, studium, & officium defert. Te meliuscule habere, gaudeo; sed fac omnino, ut valeas. Ego longiores ad te literas do, quia id mihi te cupere significasti: at si earum lectio, vel minima ex parte, valetudinem tuam deteriore faciat, ne legas, sed eas abjicias, vel conscindas. Multo enim, te, malo valetudinis tuæ rationem habere, quam epistolas meas legere, nullo lepore nullaque suavitate conspersas. Iterum vale: Romæ, Kal. Febr. C I D I D C X L I I.

Doctissi-

## VII.

Doctissimo nobilissimoque viro,

T Y R R H E N O.

**C**Larorum virorum imagines, quas ego oratione, quasi coloribus, conor exprimere, ipse quoque, neque scite, neque affabre, neque eleganter elaboratas esse intelligo. Quamobrem, si tibi libitum est unquam, eas aspicere, te videre videor, in hominis imperiti, & ad pingendum delineandumque non aptissimi, inscitia, cachinnos extollere; ac nisi unicuique earum imaginum, ejus, cuius formam referret, nomen antea inscripsissem, fore arbitror, ut te, eorum quoque, qui tibi notissimi, & longo usu amicitiaq; conjunctissimi fuere, notitia effugeret. Itaque ejus pictoris, similis omnino invenior, qui magna in tabula omnes omnium formas pecudum pingebat, quas ita deformabat, ut quivis, cum aspiceret, quamnam earum esset canis, quæ leo, quæ bos, ne inspectione quidem assequi posset, nisi ad earum nomina, quæ singulis erant apposita, oculos convertisset. Verum, ut meam tibi sententiam ostendam, ita ego has ad te imagines mitto, ut de iis imprimendis vel non, nihil statuam omnino, sed rem totam, in tuum arbitrium iudiciumque rejiciam. Nam, si lucis usura indignæ tibi videntur, perpetuis eas tenebris mandandas, vel potius perdendas cures. At, si, posse eas corrigi, non desperes, utinam faceres id, quod egregii pictores solent, qui uno aut altero penicilli ductu, multa, in tabulis vulgarium artificum pictis, vitia emendant. At id à te magis optare ego andeo, quam sperare; cui bonæ felicitates omnes adversæ sunt; & si quid forte pauxillulum boni contingit, non est perpetuum; sed vix advenit, cum abit, ventis & avibus citius. Nactus eram domum, in clivo, qui, amcenitate & ocio, nulli Urbis villarum cedit; id, quod semper optaveram; cum ecce tibi, à centum & viginti importunissimis militibus, cum totidem equis, ut antea scripsi, occupatur, omnisque ab eo nitor & ocium exigitur. Verum inconditas eorum voces, molestissimisque

clamores, ludum jocumque diceret, præut perpetuus, dies noctesque, venaticorum canum ad viginti, qui in ædibus, contiguis meis, aluntur, ululatus ac rabies, quod dat incommodi atque poenarum: nam somnum avertit, quietem abigit, mentem eripit, ut animum ad cogitandum vel scribendum instituere nequeas; & nunc, ut cum maxime, molestus odiosusque, finem scribendi facere me cogit. Audivi ac legi, inter ea quæ Acherunti sunt cruciamenta, damnatorum ejulatus, gemitus, ac stridorem dentium in primis numerari: at nihil video, quod æque Acheruntem referat, ut locus hic, ubi nunc habito: ita canum ululatibus odiosissimis completur, qui omnem ab animo & à corpore, solatii, voluptatis, oclique cogitationem expellunt. Tu fac ut valeas, &, quoniam me in numerum servorum tuorum recepisti, amorem & studium in te meum amplectaris ac diligas. Romæ, Idibus Febr. C I D I D C X L I I.

## VIII.

Nobilissimo sapientissimoque viro,

T Y R R H E N O.

**N**on fuit mihi magnopere quærendum, quidnam potissimum his ad te literis scriberem. Nam, plus quam vellem, uberem tecum dolendi querendique materiam mihi clades illa misera atq; funesta suppeditavit, qua regio ista amœnissima, ab infestissimis Catholicæ religionis hostibus afflictæ ac vastatæ fuisse narratur. Venit enim à vobis ad nos nuncius, Cæsaris copias cum adversariorum copiis, collatis signis, acriter confixisse, sed Cæsarianos fuisse devictos, ac peditatum fere omnem cæde deletum, verum equitatum se intum in locum fuga recepisse. Tum, ajunt, barbaros, agri potitos, ea facere atque fecisse, quæ victores, victis hostibus, facere consueverunt; videlicet stuprum virginibus, vim matribus familias asferre, sana atque domos spoliare, cædem & incendia facere; vos vero, moenibus urbis clausos, ex locis editis, prædia rustica, ædes sacras ac religiosas, ardentes fumantesque despicere. Addunt, Colo-  
nenses,

nientes, homines quietissimos, & à strepitu bellorum remotissimos, magno esse in metu, ne ipsorum ubi opulentissima, ac pacis artibus florentissima, in potestatem hostium veniat. Et sane tam indignum Catholicæ Reip. casum, ad quam denique, clades accepta redundat, miseratus sum, atque etiam desievi. At, quænam est isthæc infelicitatis Germaniæ condicio, ut perpetuo bellorum incendio flagret? Illine præcipua lex calamitatis definita est, ut optata nunquam pæce potiatur? At nos Itali, quibus adhuc contingit, in summo ocio & tranquillitate vivere, tanquam nos pacis ociiq; pœniteat, bellorum causas exquirimus, eaque jam semina jacimus, unde ii malorum trunci proveniant, ut ad eos evelleudos extirpandosque, vix nostræ, vel cuiusquam vires sufficiant. Non te, summa eruditione ac prudentia præditum, latet, bella facile incipere, verum ægre desinere. Nos quidem, nostris flagitiis atque sceleribus, jam dudum divinam in nos iracundiam provocamus. Itaque, nisi Deus inducat animum, ignoscere, male huic Vrbi metuo. Abundat, nec inficior, Roma pluribus vitiis; sed multis etiam virtutibus floret. sunt multi improbi, flagitiosi, ac se ipsos, ut inquit Apostolus, amantes, quos nihil cuiusquam miseret, sed omnia suam ad utilitatem & commoda referunt; at contra, plures possumus adducere, probos, honestos, ac religiosos viros, qui sacras ædes frequentant, ab omnibus vitiis se abstinere, suum unicuique reddunt. Quod si, propter decem viros, paratus erat Deus, parcere Sodomæ & Gomorrhæ, horum bene facta, preces, & lacrimas, magnam esse habituras vim, spero, apud patrem misericordiarum, ut sit propitius, neque, ut sementem fecimus, ita metamus. Tu vero in istorum miserorum calamitatibus, auctoritate, consilio, atque prudentia, ita uti te dignum est, gere; tum, fac valeas, ac me ames. Romæ, x i Kal. Martii c i d i d c x l i i.



## IX.

Clarissimo eruditissimoque viro,

T Y R R H E N O.

**P**Vpigerunt me tuæ literæ vehementer, ex quibus intellexi, stranguriam plurimum tibi negotii facessere: in qua, tantum inaudivi esse molestiæ atque periculi, ut, ejus solum nomine audito, exhorream. Cum vero scribis, plurimis te gravissimisque occupationibus districtum teneri, videris mihi ejus morbi ceterorumque, quibus premeris, causam aperire. Nam, si negotiorum sollicitudines curæque, majore quam par est mole, se nobis inferant, atque omnibus horis, sive prandeas, sive cœnes, sive cubes, sive aliud aliquid facias, implicant; jam caput fatigatur, incenditur, somnus abigitur, ac bene concoquendi facultas amittitur; tum exinde cruditates exortæ, in urinæ iter commeant, eamque, ne libere fluat, impediunt. Quamobrem, tuæ prudentiæ res est, morborum causis, quantum potest, occurrere, labori parcius indulgere, atque accuratius rationem valetudinis ducere; eoque magis, quod si majorem in te vim negotiorum attrahas, quam ferre possis, tibi noceas, nec Sedi Apostolicæ, cujus rem geris, satisfacias, neque summo Pont. iisque, qui istam tibi provinciam detulerunt, gratam rem facias; quorum interest, te ipsis diu incolumem esse, quique, eatenus postulant, in ista provincia recte administranda, omnes à te nervos ingenii industriæque contendere, ut salvus sis, neque nimia diligentia aliquod tibi periculum crees. Statui, Pinacotheculæ meæ modum ac finem imponere. Nam, ut in Tōngo opere sit, ejus me odium ac fastidium cepit. Deinde subiit, inopis & obscuri hominis Pinacothecam esse, non fortunati ac nobilis: etenim magnos magna decent; pusillos ac tenues suo se modulo ac pede metiri æquum est. Proinde indicem imaginum mitto; quod est indicium, omnes Pinacothecæ parietes, à summo ad imum, esse vestitos, neque ulterius cnjusquam imagini locum in ea esse relictum, nisi Celsi Cittadini, jampridem mihi, virtutis

tutis fama, notissimi. Cujus ego præstantissimi ingenii formam, rudi meo crassoque penicillo, conabor exprimere, magis id adeo, ut imperiis tuis obtemperem, quam quod sperem, posse eidem aliquid, ad sui nominis memoriam posteritati prodendam, mea scripta proficere. Ea enim est hominis claritas, ut satis ipsa per sese, sine cujusquam auxilio, à temporis injuria vindicare se possit; ea odæ, qua importunum hominis interitum desces, gravitas, elegancia, venustas, ut ad eum immortalitati commendandum sola sufficiat. Non scribam ad te pluribus, ne fortasse, longa atque molesta literarum mearum lectione, tibi inorbem augeam. Romæ, Prid. idus Martii  
CICIDCXLI.

## X.

T Y R R H E N O

doctissimo sapientissimoque.

**D**Vos atque inter se diversos animi motus tuæ in me humanissimæ literæ concitarunt, Tyrrhene doctissime. Primum, dolorem longe gravissimum excitarunt, cum significant, te à pluribus corporis morbis, tanquam à totidem carnificibus, acriter dilacerari atque divelli. Sed in hujus doloris quasi tenebris, illud non tenue consolationis lumen mihi exoriri visum est, quod intelligerem, te, in iis cruciatibus perferendis, usque adeo fortem impigruumque præbere, ut ne latum quidem unguem ab officio boni viri, neque à sapientis gravitate discedas, sed, ea consolatione, cruciatuum illorum acerbiter minuas, ut eos tibi à Deo imminuti, sicut vere inmittuntur, existimes, quo peccatorum maculas, quarum multas, omnes, ex hujus vitæ contagione concipimus, eluat; teque, ad perpeffionem malorum, quæ non possunt abesse, fortiolem efficiat. Sapienter omnino, mi Tyrrhene: unusquisque enim, atque is præsertim quem in filii loco Deus diligit, suos habet adversarios, & quasi lictores, à quibus perpetuo diverberetur excrucieturque; atque omnia hæc ad utilitatem nostram tamen. Exposui hæc Iacobo Fuligatto, atque etiam particulam literarum

tuarum ostendi, in qua, illius de te memoriam tibi esse gratissimam, ais. Qui visus est magnopere commoveri, tibi que est auctor, ut valetudini tuæ diligentissime studeas: cui maximo adjumento fore existimat, si te, quantum potest, à curis omnibus eximas, ac præsertim à laboribus animi, atque ad ocium & tranquillitatem conferas; præterea, pro tua incolnitate, assiduas ac vehementes ad Deum preces se effusurum spondet. Ex altera vero parte, ex iisdem tuis literis voluptatem non minimam cepi; ex quibus intellexi, in eum tibi carmen, non ita incomitum ac rude visum fuisse, ut ego existimabam. Ausus sum etiam Aloysio Card. Cappono illud ostendere; quod adeo visus est probare, ut non solum honorificis verbis, verum etiam munusculis, sibi gratum extitisse, significaverit, quod ejus sibi legendi copiam fecissem. Non potui in e continere, quin alio carmine maximas illi gratias agerem. Mitto illud ad te, pro eo, quod mihi misisti; iniqua plane compensatione. nam tuum, sine inflatu atque tumore, se in altum tollit; meum humi serpit, tutum nimium, ut ait ille, timidumque procellæ: tuum artificii, gravitatis venustatisque plenum est totum; meum, sine venere, sine pondere, sine arte: tuum aures implet; meum, à se jejunas inanesque dimittit. Neque te participem illius fecissem, nisi in eo verissimæ laudes continerentur Episcopi Neritonensis, Chissi, Sedis Apostolicæ Nuncii apud Vbios, tibi notissimi. Cogito, omnino à versibus animum avocare, ad quos faciendos, nulla mihi propemodum, à natura, data esse instrumenta intelligo; tibi que in hac re, sicut in aliis, cedere, fascesque summittere. Aveo scire, quid agas, num morbi, qui te excruciant, aliquid de sua in te vexando acerbitate remiserint, vel, id quod magis cupio, te plane dimiserint. Tu interim, quo tam optatus ad nos nuncius pervenire possit, diligenter iis, quæ à medicis imperantur, obtempera. Romæ, v Kal. Aprilis C I C I O C X L I I.

Aloysio



## Aloysio Card. Cappono.

**M** Agne heros, Tyrio qui tempora murice felix  
 Vincula gerens fulges, sacri pars magna senatus,  
 Quo totus veluti se cardine vertitur orbis;  
 Cum tanti facias solus mea carmina, cumque  
 Tot me muneribus large, tot laudibus ornes,  
 Dulcia corripiunt stupidam mihi gaudia mentem,  
 Qua se tot dici meritis opibusque potentem  
 Audit, iudice te, quo nil praestantius usquam,  
 Excitat & fusas languenti in pectore vires  
 Ingenii, ad pulcras artes, animumque jacentem  
 Erigit, atque novas alacrem spes sumere cogit;  
 Qui propria contemptor opis, pravoque pudore  
 Actus, quos tulerat partus in luminis auras,  
 Perdidit innocuos tenebris blattisque situque,  
 Mater seva nimis, quovisque immanior hoste;  
 Illud saepe timens, cali si libera lucem  
 Cernere ea atque hominum sineret docta ora tueri,  
 Ne sua seque nimis stulte videatur amasse,  
 Et nugis voluisse meris simul addere pondus.  
 Quod si culta Fabi, divini carmina vatis,  
 Cui datur illa, frequens miris quam laudibus effers,  
 Atque viri titulo decoratur epistola tanti,  
 Ebibere attenta possis feliciter aure;  
 Ducere nectareos succos, insertus Olympo,  
 Teque Iovis credas superumque accumbere mensis.  
 Tam large facunda favis florentis Hymetti  
 Ora illi linguamque dea sparsere canora;  
 Vt tibi det liquido dulcissima carmina melle.  
 Illum olim felix hilari Ferraria vultu,  
 Iura sibi dare, Prolegati nomine, vidit,  
 Tempore, quo, iusta divini Numinis ira,  
 Dira lues Italia passim tellure vagatur,  
 Ac Bellona furens agros devastat & urbes:  
 Questorem Fidei causarum sensit & acrem  
 Post Melite pinguis, sterili vicina Cosyra.  
 Nunc Vbios decorat, Romani Nuncius orbis,  
 Explicet ut validis contorta nodis,

Semidei Regis propere iussa ampla secutus,  
 Mercurii, eloquio, similis, rebusque gerendis,  
 Sed fidei laude ac probitatis clarior illo.  
 Ingenium natura homini, mentemque potentem  
 Viribus, at corpus tribuit non aqua refertum  
 Multiplici morbo, solido nec robore firmum.  
 Iamque ut eam pergat, dudum quam Musa reliquit,  
 Ire viam, atque tuas percurrere libera laudes;  
 Ergo, ne jaceam, ne sim mihi vilis, ut ante,  
 Te tribuente datur, sacri laus indyta nostri.  
 Quod si non viridi Phœbus pulcraque juventa  
 Gaudeat, atque hilaris doctarum turba sdrorum  
 Non fugiat fœdam canis rugisque senectam,  
 Te forsan, levibus vectum per inania pennis,  
 Miscerem superis, sublimi carmine, Divis.  
 Tum pleno loquerer nitidoque rotundius ore  
 Ipse tui varias fœcundi pectoris artes,  
 Cultaque perpetuo, per tot discrimina rerum,  
 Tempora amicitia, constanti fœdere juncta;  
 Capponumque domus, gentes alto à sanguine avorum,  
 Maxima quo tantum se nunc Florentia jactat,  
 Magna foret longi pars carminis, illaque major,  
 Qua tibi, pro grege commisso, quatit anxila mentem  
 Cura. Labor quantus fuit is, quam fervidus ardor,  
 Cum prope mersa undis gemuit, metuitque Ravenna,  
 Florrida ne rursus venissent sæcula Pyrrha!  
 Nam te, non piguit, toties mersare periclis,  
 Atque offerre animam, trepidis pro civibus, ultro.  
 Hæc canerem primo, cythara fidibusque canoris.  
 Tum vellem, quæ longa tuæ nent stamina vitæ,  
 Fatales Parcas dulci compellere cantu,  
 Ne properare manu, digitisque micantibus, ausint  
 Aurea pensa colo plenis involvere fuis,  
 Nestoris ut superes annos longamque senectam.  
 Sed decursa bonum mihi tantum præripit ætas.  
 At, si non amor, ut metuo, tibi somnia fingit,  
 Talis & invenior, qualem tua verba figurant;  
 Gaudeo, tot locuples opibus, quas credere nunquam  
 Ipse meis potui miseris includier artis.  
 Ludicra virtutis sed si te fallit imago &

Vana,

*Vana, vel hoc statuis precium persolvere merci  
 Decocta . cui nullus adhuc successerit emptor ;  
 Quo te poeniteat facti minus , est mihi cura ,  
 Ut , qua nunc levis est , sit pondere laudis onusta.  
 Vive diu , servique tui non immemor esto ,  
 Qui tibi nunc meritas tanto pro munere grates  
 Persolvit sermone rudi , musaque pedestri.*

## X I.

Doctissimo religiosissimoque viro ,

T Y R R H E N O .

**P**Ergratum me tibi esse facturum existimo , Tyrrhe-  
 ne religiosissime , si hoc tempore , quo Christi Sal-  
 vatoris nostri Passio , solemnī ritu ac peculiaribus cere-  
 moniis , celebratur , tecum de ea per literas loquerer.  
 Non enim tu ex eorum numero es , quos vulgo poli-  
 ticos vocant , qui ejusmodi sermonibus nolint personas  
 graves , & in maximis de Rep. negociis occupatos , illi-  
 gari . Quasi vero indecorum sit habendum , missis ad  
 clarissimos viros epistolis , aliis de rebus cum ipsis age-  
 re , nisi ad publicas vel privatas utilitates pertinentibus ;  
 quæ omnes utilitates nugæ sunt meræ , præ ut nobis  
 Christi passio quæ dedit . At ego , cum omni tempore ,  
 tum hoc in primis , nullos sermones , nulla colloquia ,  
 optimo atq; amplissimo viro convenire magis arbitror ,  
 quam de eo judicio , quo ab inimicis suis , perditis ac  
 sceleratis hominibus , circumventus est Christus ; quo ju-  
 dicio , scimus , nullum , post homines natos , factum  
 fuisse scelestius , neque injustius . Sed tam pauci inveni-  
 untur , qui animum ad illud cogitandum instituant , ut  
 verissima & justissima sit illa Dei Patris querela , *Ecce ,  
 quomodo moritur justus , & nemo percipit corde !* Duo que-  
 ritur à cogitatione nostra repellī ; Christi videlicet in-  
 nocentiam , & eorum , à quibus ad mortem datur , per-  
 fidiam ac scelus . *Ecce , quomodo moritur justus !* ille , in-  
 quit , justus , ad quem ne tenuissima quidem levissimi  
 cujusquam errati suspicio pervenire potuit ; ille , inquit ,  
 justus , qui est fons & origo omnis innocentia , sanctitatis  
 atque

atque justitiæ, qui animam suam preciosissimam, pro injustis, pro sceleratis, pro impiis, ad mortem acerbissimam atque indignissimam, tradidit; qui iniquissimis perditorum judicum sententiis oppressus interiit. Et quomodo moritur? Exquisitis atque acerbissimis omnium tormentis suppliciisque necatus, omnibus verborum factorumque contumeliis ignominisque vexatus, crudelissimo turpissimoque servitutis supplicio mactatus. *Ecce*, inquit, *quomodo moritur justus!* Verbum *Ecce*, eam ni fallor vim habet, ut, quod cogitandum à nobis sit, non, tanquam absens, animo repræsentetur, sed, quasi præsens, oculis subjiçiat. Videtur enim dicere, Hoc tam atrox facinus, hæc tam inaudita crudelitas, hæc tam insignis atrocitas, non fama solum ac literis ad vos perfertur, verum etiam, ad contemplandum, ante oculos ponitur. Neminem enim Christianum virum, paulo salutis suæ studiosiorem, esse arbitror, qui non aliquem domi suæ Christi crucifixi imaginem habeat, in qua, cum velit, tanquam in aliquo speculo, & Christi ejusdem innocentiam, & ipsius acerbitatem inimicorum, aspiciat. Sed, de Christi innocentia velle plura commemorare, tam esse superfluum ac non necessarium existimo, quam, multis argumentis ac longa oratione contendere, solem hunc meridie lucere. Incredibilis vero Indæorum iniquitas, in irroganda vitæ auctori crudelissima morte supplicioque, quamquam ex Christi innocentia satis superque se prodat, attamen non inutile, immo plane necessarium existimo, ad intima iniquitatis ejusdem cubilia penetrare, atque, unde ea ortum, vires, & incrementum habuerit, investigare. Etenim, non aliunde, quam ab ira, invidia, crudelitate, superbia, pessimis animi impulsoribus suavoribusque, prodiisse reperietur. Hinc discernimus, nunquam animum cupiditati permittere, quæ radix omnium malorum est, quæque Dei filio mortem inferendi causa fuit; sed in omnibus, tum dictis tum factis, rationis imperia persequi, cum eaque conjuncti, illud unum, ad virtutem ad laudem, directum iter arripere. Ita enim nihil temere, nihil perverse, nihil confuse, sed contra, omnia constanter, omnia ordine, omnia considerate ag-

grediemur. Et sane ea, in quibus, ad procurandam Christi mortem, lapsi sunt Iudæi, usque adeo omnem rationis modum excedunt, ut mirum sit, fuisse unquam homines, qui in tanta inconstantia, levitate, stultitiaque, versati fuisse dicantur. Quamobrem, ad demonstrandum, quam multis animum tenebris & erroribus, expulso rationis imperio, cupiditas implicet, nullam Iudæorum insaniâ, in tanto scelere ob iram atque invidiam perpetrando, doctrinam efficaciorē esse constituo. Primum, nihil tam probari omnibus cupiebant, quam Christum jure damnari. Quam id assequantur, attende. Concilium, ex principibus sacerdotum & senioribus populi, convocant; quærunt, quid de Christo fieri placeat. At quænam erat causa cogendi concilii? Lazarus, ab inferis excitatus. Quodnam crimen in medium adducitur? Multarum rerum mirabilium magnarumque patratio. *Quid facimus, quia hic homo multa signa facit?* Demonstrant, nisi præsens cautio sit atque provisio, in summum discrimen omnia esse ventura. Primus Caiphas sententiam dicit; in quam postea omnes quasi pedibus eunt; videri sibi hominem esse morte multandum, quo, unius supplicio, pene innumerabilium salus in tuto constituatur. Quæ sententia quemadmodum propositis rebus conveniat atque cohæreat, est operæ precium agnoscere. Quam culpam, quod facinus tantum admisit, unde illud in eo exemplum constitui debeat? Nullum aliud subjici video, nisi quia claudis gressum, cæcis visum, mortuis vitam restituerit. O cæcas hominum mentes! o stulta consilia! Quis unquam, nisi ingratus, nisi perfidus, nisi inhumanus, nisi sævitia feras & immanes bestias superans, in referenda gratia injuriam, pro beneficio perniciem, pro salute interitum, pro vita mortem tribuendam esse decrevit? Quis unquam, nisi stultus vel insanus, rationem conclusit hoc modo, Quod aliquis, verbi causa, utilitati suis civibus fuerit, idcirco excruciatum, morti tradatur? Immo ex eo, quod tot homines miseros, afflictos, opis egenos, servaverit, adjuverit, beneficiis ac muneribus locupletarit, illud effici & consequens esse dicat, ut retineatur in civitate, conservetur, insuper honoribus ac præmiis afficiatur;

afficiatur; ut sit, quo quis confugere in suis periculis, ad quem deplorare de suis calamitatibus, ubi opem invenire in rebus dubiis atq; arduis possit. At respondebunt; ideo id à se consilium, de Christo è vivis eximendo, susceptum esse, quod verebantur; ne divinus illi honor à populo tribueretur, atq; hæc officiosa hominum credulitas ipforum Reip. exitium ac pestem afferret. Sed quæro; utrum, Christum esse hominem, an Deum, arbitrabantur? Si hominem, cur res, ab eo patratas, idoneas esse censebant, quibus Deus ab omnibus existimaretur? Si Deum, cur eatenus stultitia progrediebantur, ut velent, more gigantum, bellare cum Deo? Sed sit hic stupor in verbis. At, quemadmodum re ac factis secum ipsi pugnaverint, accipe; ac mecum animum paulisper attende. Illud in primis, Iudæorum ac principum sacerdotum animos in Christum concitaverat, quod sacerdotium, divinarumque rerum procuracionem ab ipsis ad gentes transferendam esse, ab eodem acceperant; seque in iis colonis designatos esse non ignorabant, qui propterea quod domini vineæ servos plagis ac verberibus male multassent, ejusdem filium interfecissent, ac fructus vineæ ad se domum avertissent, extra vineam ejiciendi essent, atque alii in ipforum locum subrogandi. Quid igitur accidit? Non expectavit Caiphas, qui erat Pontifex anni illius, dum loco submoveretur, dum honore, quo fungebatur, ejiceretur; sed eodem se sua sponte abdicavit, ac se suosque in perpetuum omni dignitate spoliavit. Quo vitio animi percitus? Furore nimium inemptis, ira atque odio concitata. Nam cum ante ipsius tribunal Christum, satellitum turba stipatum, catenarum nexu constrictum, accusantium vocibus verberatum aspiceret; rogavit, numquam esset Christus, filius Dei vivi? Qui cum se esse non negasset, tum etiam aliqua de futuro judicio addidisset, in quo divina ejus majestas perspicua futura esset; non tulit ille, sed hoc responso sic exarsit, ut pontificiam sibi vestem à pectore discinderet distraheretque. Quid potuit facere elegantius pontifex, in retinendis suis ornamentis nimis acer ac vehemens? Habebat in potestate eum, unde se gentemque suam omni dignitate spoliatum iri perceperat:

perat: non quærit, cur, vel quando id futurum esset, sed statim manus dat, cedit, contra suas fortunas suæque nationis utilitatem iudicat, dignitate se abdicat, ac rei controversæ possessionem, quasi caducam & vacuam, deferit, quam nullo fere negotio, quos minime volebat, acciperent. Nam, de sella, de tribunali profiliens, vestem, atque ipsa sibi pontificia ornamenta, ut paulo ante dixi, à pectore diloricavit atque dirupit. Etenim, tum Matthæus, tum Marcus, scidisse illum vestimenta sua, & Christo præsentî blasphemi calumniam imposuisse, testatur. *Tunc princeps sacerdotum, ajunt, scidit vestimenta sua, dicens; Blasphemavit, quid adhuc egemus testibus? ecce, nunc audistis blasphemiam.* At imprudens huc decedit, insciens tantum sibi posterisque suis mali creavit. Quid imprudens? quid insciens? Homo Iudæus, ac pontifex, qui legis cæremonias, eo anno, tuendas conservandasque susceperat, debuit in præcipuis ejus legis capitibus hæsitare? At, quænam in ea imperabantur? Multa sane; sed illud in primis, quod ad Pontificiam ipsius personam pertinebat; in quo ipsius existimatio, dignitas, salus continebatur; ne sacerdos cidarim de capite suo deponeret, neve vestimenta sua dirumperet. Quamobrem igitur est in hanc frandem, tam importunam, tam impiam, tam sibi suisque perniciosam, prolapsus? Ejus rei nulla potest afferri certior ratio, nisi quod iræ invidiæque stimulis, tanquam furiis, agitatatus; non modo à memoria prolapsus sit, verum etiam à se ipso deciderit. Accipe, vel potius reduc tibi in memoriam (non enim magistro ac monitore me eges,) illam principum sacerdotum ac seniorum populi, in hac eadem causa, non minus superiore insignem impudentemque stultitiam. Illos triginta denarios, quos ob mercedem parricidii acceptos, Iudas retulerat, venterunt in ærarium referri; ne videlicet funesta illa pecunia reliquum æs sacrum, quod attigisset, cruentaret. Quæ cantio, tam aliena, tam inepta, tam levis, quam multa stultitiæ ipsorum argumenta contineat, numeremus. Vtrum ad justam, an ad injustam causam, eam ab ipsis pecuniam numeratam esse existimabant? Si ad justam, videlicet ad hominem sacrilegum; impium, scditio-



ditiosumque tollendum; cur eam verentur ad reliquum æs sacrum adungere? Si ad injustam, nimirum ad virum sanctissimum; ac bene de Rep. ipsorum meritum, extinguendum; cur non etiam se ipsos una cum pecunia, ab altari, à templo, atque adeo à communione hominum ac societate, sejungunt? Deinde, si argentum, pro capite iusti repensum, ita est corruptum ac pestilens, ut ejus contagio reliquis etiam nummis, quos attigerit, obsit; quomodo ii, qui tanto se participio contaminarunt, nullam impuritatis ac corruptionis notam contraxisse dicantur? Quid? pecunia, animæ, sensus, ac rationis expers, tantopere alterius sceleris invidia laborabit, ipse vero auctor injuriæ, sceleris, perfidiæ, sensu ac ratione præditus, divinis & humanis legibus ab injuria alteri inferenda prohibitus, nullum ex suo scelere vitium & damnum accipiet? Postremo, vide varietatem & inconstantiam sententiarum. Pecunia, ad proditorem & interitum Christi erogata, improbat; proditio & interitus ejusdem laudatur. Sed epistolæ inodum nimis excederem, si vellem ea omnia complecti oratione, quæ Judæi in Christi causa improbe, stulte, & inconstanter admiserunt: ex quibus manifeste colligitur, in eorum animis, & Christi innocentiam, & summum in eundem odium invidiamque, pugnasse. Verum, ne longum faciam, neque te, innumeris prope negociis obstrictum, diutius detineam, neque, tot tantarumque ægritudinum mole oppressum, legendi etiam labore defatigem; unum eligam, quo breviter explicato, totum hunc locum perorabo atque concludam. Nihil Judæi tam misere cupiebant, ut diximus, quam Christum, supplicio ac morte affectum, sibi ab oculis remove: sed illud simul laborabant, ut necis ejusdem culpa, ab ipsis ejiceretur, atque in alios refunderetur: idque eventurum ex sententia putarunt, si ille prætoris auctoritate jussuque sublatu fuisset in crucem. Quæ eorum cautio duo nobis subjicit; primum, Christi Domini innocentiam, quæ apud inimicissimos homines tantam vim habuit, ut, ob ejus cruciatum & mortem, in summum hominum odium se incursum arbitrentur; deinde, novum quoddam & inauditum Judæorum in Chri-

in Christum odium crudelitatemque proponit, quæ tantas eorum animis tenebras offuderat, ut, quemadmodum de Ægyptiacis illis proditum memoriæ ac literis est, propemodum comprehendere, ac teneri manibus, possent. O stultos homines! ô ineptam vestram rationem! ô scelerata consilia! Tantæne erant apud vos tenebræ, ut in illa nequissima Prætoris sententia, vestra vi coactaque expressa, obscuram vestram cupiditatem fore existimaretis, neque totam ejus sententiæ invidiam, in vos redundaturam, quoniam esset alterius ore prolata? Nam quis est princeps atque auctor injuriæ habendus? numne ille, qui coactus & invitus injuriam fecit, an ille, qui eum coëgit ut faceret? Huic omnes, sine dubio, acceptam eam referent; in illo altero vix invenient, quod reprehendant: quid enim interest, utrum quispiam per se, an per alterum, impium atque atrox facinus, conceptum mente, perficiat? Sed quid opus est verbis? Exitus ostendit, num, per hanc rationem, tantam infamiam effugerint. Etenim ab ea die, usque ad hanc diem, majore, ob Christi mortem, sunt apud omnes homines odio, quam si suis ipsi manibus tanto se facinore contaminassent. Quotus enim quisque est, qui eorum meminerit, quorû manibus acerbissimo omnium supplicio affectus est Christus? Et merito: nam cum vestro coactu, vestra vi, ô Iudæi, tantum scelus perpetratum sit, non tam est querendum, quorum manibus, quam quorum cupiditate impulsuque, perfectum illud extiterit: itaque cohors illa prætoria, quæ volentem eum invasit; comprehendit, catenis vinxit, vestra erat manus; milites, qui nudarunt, vestræ item erant manus; lictores qui verberarunt, carnifices, qui in crucem egerunt, manus vestræ, sine controversia, fuerunt. Sed quoniam me doloris æstus abripuit? Paulo ante verebar, ne hæc meæ literæ longius excurrerent, quam epistolæ ratio patiatur: at nunc sciens prudensque, dum Christi causam ago, dum eorum iniquitatem coarguo, insaniam exagito, dum vehementius, in eorum sævitiam, invehor, pene orationem in epistolam inclusi. Sed æquum est, te mihi ignoscere, si quid hoc tempore, quo, anniversariis sacris, ad memoriam passionis Christi revocamur, tanti sceleris atrocitate commotus, pietatis,

veritatis, ac misericordiæ causa, epistolæ modum, scribendo, finesque transferim. Sed ut me revocem eo, unde discesseram; Iudæi in eo, quod videri vellent à Christi morte alieni, singularem ejus innocentiam vel inviti testantur; in eo, quod ejus sanguinem tantopere expecterent, suum in illum odium crudelitatemque declarant: quorum furore, tanquam tempestate aliqua, abrepta universa civitas, in eam insaniam delapsa est, ut omnes prope furentibus similes, quem paulo ante faustis acclamationibus, tanquam ovantem, in civitatem reduxerant, quem divinis honoribus dignum judicaverant, in supplicium, in crucem rapi postularent, ac prætori, qui tanti facinoris invidiam formidabat, responderent, ne cunctaretur, neque metueret; sese enim omnem invidiæ tempestatem, si qua orta esset, in suum ac suorum filiorum caput excepturos. Venit mihi in mentem, hoc loco, veteris illius Aristidis, qui ob singularem innocentiam, unus post hominum memoriâ, in Græcorum Rep. cognomine Iustus est appellatus. Hic, cum à concitata multitudo in exilium ejiceretur, ac quendam animadverteret scribentem ut patria pelleretur, quæsisse ab eo dicitur, quare id faceret, aut quid Aristides commisisset, cur tanta pœna dignus putaretur; ille respondit, se ignorare Aristidem, sed sibi non placere, quod cupide elaborasset, ut, præter ceteros, Iustus appellaretur. Non equidem ausim Aristidem Christo in comparatione conjungere; neque enim ullo modo ille comparandus ad Christum est; fuit ille quidem insignis, abstinentia, probitate, justitia, sed nihil ad Christum, præ cujus sanctitate atque justitia ceterorum omnium sanctitates, justitiæq;, iniquitatum instar habere videantur: at si concitata in Christum multitudinis causæ investigentur, non aliæ, sicut in Aristide, reperiuntur; nisi quod vitiis hominum exagitandis, ac rebus mirabilibus patrandis perfecisset, ut omnium justissimus, denique ut Dei filius haberetur; quod principibus sacerdotum, Scribis, Phariseis, perpetuis Christi inimicis, minime placebat, ac propterea civium suorum animos in illum inflammarent. Atque hæc sunt, quæ nos est æquum, hoc tempore, de Christi innocentia, & Iudæorum iniquitate, medi-

tari; ne incurramus in eam reprehensionem, *Ecce, quomodo moritur iustus, & nemo cogitat corde!* Fructus autem hujus meditationis erit, ut in deliberationibus, atque in omnibus actionibus suscipiendis, perturbationes animi à nostris consiliis repellamus. Ita enim omnis semper levitas ac temeritas aberit; contra, summa illis prudentia atque constantia aderit. Sed hæc hætenus. Aloysius Card. Cajetanus, homo, ut nosti, tenui, ac nulla ferme valetudine, quippe cui nihil tam familiare erat, quam ægrotare, tandem VI Idus Aprilis est paucorum dierum morbo consumptus. Verum aliquot ante dies, quam in morbum, quo periit, incideret, cœperat aliter se illi corpus habere, quam consueverat; quod ab Hippocrate inter signa adversæ valetudinis futuræ numeratur. Nam, ut animadvertere potuisti, cum esses hinc Romæ, erat homini corpus gracile, tenue, infirmum; facies macilenta, squalida, ac prope cadaverosa; sed repente plenior, speciosior, & coloratior, factus est; adeo ut omnes admirarentur. At, cui hæc contingunt, jubetur à medicis, suspecta habere bona sua; quæ, cum ad eum pervenerint locum unde ultra progredi nequeant, retro, ut medici iidem ajunt, quasi ruina quadam, revolvuntur. Attamen erat omnium opinio, cum diutius fuisse victurum, nisi, alieno tempore, (nihil enim tum ea re opus erat,) potione medicata, quam medicus illi diluerat, purgare corpus voluisset: cujus medicaminis, simul ac in venas sese diffudit, ea vis fuit, ut non modo, non integram illi valetudinem, quemadmodum in primis optabat, sed exitium ac pestem, id quod minime volebat, attulerit, tanta celeritate, ut nullum eidem spacium, saltem ad peccata, confessionis Sacramento, delenda, reliquerit. Quamquam fit credibile, hominem illum pium, sacris Episcopalibus initiatum, atque in Patrum purpuratorum senatum adlectum, qui ordo vacare vitio ac ceteris specimen esse debet, non imparatum, à morte fuisse oppressum. Fertur Iulius Cæsar, in sermone, nato super cœnam apud M. Lepidum, quisnam esset vitæ finis commodissimus, repentinum inopinarumque prætulisse. Sed habeat sibi ille, ac sui similes, talem exitum vitæ; neque tu, neque ego, neque Christianus

nus quispiam, cui cor sapiat, mortis suæ tempus compelli in eas angustias velit, ut, de statu animæ suæ in perpetuum constituendo, ne cogitandi quidem spacium obtineat. Vale. Romæ, I I I Idus Aprilis C I O I O C X L I I.

## XII.

Doctissimo præstantissimoque viro,

T Y R R H E N O.

**G** Vilelmus Moonsius, plurimum se tibi debere, fatetur, pro tua singulari in ipsum voluntate; deque ea incomparabiles tibi gratias agit; ac pro certo existimat, ubi usus veniat, te sibi nunquam defuturum, opera, auctoritate, & gratia. Atque utrique nostrum jucundissimum accidit, eos inorbos, qui tibi negotium facerent, mensem jam integrum magnopere molestos non fuisse. Atque optandum est maxime, perpetuo secundam tibi valetudinem contingere. Nam scito, hic Romæ grata esse, quæ facis, quæque feceris, omnia. Narrat enim idem Moonsius, Pontificem max. summe ipsi laudasse ingenium, eruditionem, probitatem, aliasque eximias animi tui dotes, & in primis prudentiam, industriam, diligentiam, ac dexteritatem in negotiis, seque iis adeo delectari, ut nihil desideret melius: Franciscum vero Card. Barberium palam omnibus audientibus dicere, ex iis, qui foris cum imperio ac potestate aliqua sint, neminem se videre, quem tibi, in Rep. bene gerenda, anteponat. Quamobrem est quod gaudeas, tua illis merita nota esse atque perspecta, quibus referendæ illis gratiæ facultas datur. In Eudemia, P. Monstrum, qui librum diligenter evolverat, nihil deprehendit contineri, quod cujusquam famam lædat, vel Principis alicujus majestatem iniuat, vel fidei sanctitatem offendat, vel mores hominum corrumpat; immo multa afferri, lepida, jocosa, quæque possint, feriato à negotiis publicis, animum relaxare. Et Card. Barberius, sumto in manus libro, sensit, ex ejus lectione, ea se voluptate perfundi, quam ipsi prædixerat P. Monstrum. Quod ego ut audiui, bono animo fui. Carmina vero, mihi abs te missa,

missa, sapius legi; ac satis verbis dici non potest, quam ea mihi visa sint lepida, elegantia, docta, atque venusta. Sed quid vis dicam? nisi, te tui semper similem inveniri, sive sumto spacio ad cogitandum, sive imparatus, ad scribendum accedas? Equidem ego hac tua ingenii celeritate, quæ longe diuturnam aliorum diligentiam superat, prope deterritus, multo magis hæreo in sententia, ut omnino à scribendis versibus animum avocem; idque non faciam, quod non optime possim; ejusque non imprudens consilium persequar, qui

*Indoctusque pila discique trochique quiescit,*

*Ne spissa risum moveant impune caterva.*

Vale. Romæ, Kal. April. C I O I O C X L I I.

### XIII.

Clarissimo eruditissimoque viro,

T Y R R H E N O.

**N** Arrat mihi Moonsius, vicinus ac familiaris meus, fere se nunquam ad Franciscum Card. Barberinum accedere, ut mandata sibi à Principe isto negocia referat, quin secum ille longos & honorificos de te sermones habeat, & ingenium in primis tuum, eloquentiam, probitatem, eruditionem, ac bonarum artium studia laudet: proximis vero diebus, cum eadem de causa ad illum venisset, atque injecta esset mentio de te, disertis eundem verbis dixisse, neminem ex iis esse, qui aliquam Sedi Apostolicæ operam domi forisve navarent, quem tibi, studio, sedulitate, prudentia anteponeret: sed cum addidisset Moonsius, mihi tecum amicitiam usumque literarum intercedere, castigasse illum, gravissimis verbis, immodestiam meam, qui tibi, tot adversæ valetudinis incommodis pene circumvento, auderem morbi augendi causam afferre, propterea quod homini humanissimo, & in persequendis officiis diligentissimo, meis literis respondendi vim propemodum ac necessitatem afferrem. Quamobrem à tanto viro, ac salutis tuæ in primis studio, admonitus, vel potius objurgatus, statueram,

tueram, omnino quiescere, nec, nisi à te iussus, vel re aliqua necessaria coactus, verbum posthac unum ad te scribere. At, cum fere in id tempus, quo hæc mihi proponerem, incidissent feriæ, Christo ab inferis resurgenti sacra, paululum me illæ, à suscepto consilio depulerunt, compuleruntque, ut ipsas tibi, per literas, quando coram non licet, fastidas atque felices à Deo precarer. Tum, sensi, me ad id literarum officium tibi præstandum, hoc tempore, quadam quasi religione incitari: quod verrer, si illud prætermitterem, ne contra consuetudinem, contra mores, atque adeo contra humanitatem, venirem. Quamobrem patere, vel potius concede hoc amanti in te meo, tuisque in me singularibus meritis, ut tibi paululum his literis sim molestus: cum hac tamen conditione, ut nullam, ad respondendum illis, operam sumas. Scio, te mihi bene velle, omnia bona cupere, optareque, ut hæc feriæ sanctissimæ religiosissimæque, peræque ex sententia mihi contingant, ac tibi. Itaque summa esset impudentia, postulare, peculiaribus hoc etiam literis mihi esse testatum. Ac si antehac, mearum literarum frequentia, tibi satietatem & fastidium exhibui, scias, id me tua voluntate ac iussu fecisse: nam memini, te mihi imperare, ut sæpe, quam longissimas possem, ad te literas darem. Simul illud memoria teneo, te valetudine minus prospera uti, ac noris, me cum audivi, rogasse, ne ullum meis epistolis responsum dares, neve ea de causa animum sollicitares. Nam, quamvis tuæ mihi literæ voluptatem incredibilem afferant, fiunt tamen minus jucundæ atque suaves, si aliquod ex iis valetudini tuæ incommodum vel minimum accadat. Te igitur cura diligenter, ac Reip. bonis artibus, & amicis, perquam diutissime incolu- mem serva; &, si quando, vel à te iussus, vel ab amore, quo te prosequor, impulsus, literarum ad te aliquid dederò, quæso, ne, iis legendis, oculos defatiges, quæ mihi scribenda visa sint, sed tuorum ad id quempiam adhibeas. Mihi enim abunde satisfactum erit, si alienæ vocis auxilio, quod scripserim, per aures tibi in animum immigrare patiaris. Vale, atque in tuis, caritate incensis, ad Deum sacrificiis ac precibus, aliqua tuum animum mei, peccatorum omnium deterrimi, memoria subeat.

Hoc



Hoc nihil mihi gratius accidere poterit. Romæ, xv  
Kal. Maji cico cxlii.

## XIV.

Doctissimo, atque omnium virtutum laude  
cumulatissimo viro,

T Y R R H E N O.

**M**agna primum voluptate atque lætitia tuæ me li-  
teræ affecerunt, quarum erat initium, te non ita  
acerbe crudeliterque ut antea, ab illis morbis, à quibus  
oppugnaris, distrahi atque cruciari; quamquam iden-  
tidem aliquid tibi negotii exhiberent: nam spes erat,  
fore ut tandem dilaberentur, atque evanescerent. Sed  
postea prope exanimatus sum, cum legi, medicos ali-  
quot, certis quibusdam signis adductos, opinari, inflam-  
mationem istam, & urinæ reddendæ difficultatem, plu-  
ribus à calculis oriri, qui itineri urinæ sese intus oppo-  
nant, qui calculi Spadanis aut Andernacensibus aquis  
sint in arenam redigendi, vel, si nihil sit præsidii in illis  
aquis, sectione extrahendi. Quamobrem, *quasi solstitialis  
herba*, ut Calidorus ille Plautinus ait, *paulisper fui; re-  
pente exortus sum, repentino occidi*. Verum admiratus sum  
magnum & excelsum animum tuum, qui nullis dolo-  
rum vel mortis terroribus permoveatur, sed, si ita Dei  
voluntas ferat, ad omnia perferenda sit paratus, quan-  
tumvis aspera atque acerba. Qui quidem animus non  
potest aliunde, quam à recte factorum conscientia, tan-  
tam firmitatem ac robur accipere. Sed re vera, si cni-  
quam tantum mali subest, ut, nisi sectione, succurri non  
possit, hic, non est, quod magnopere commoveatur.  
Nam hæc curatio, quæ olim à veteribus medicis, non  
procul à periculo abesse, existimabatur, quæque illi tan-  
tum corpori adhibebatur, quod jam novem annos, non-  
dum quatuordecim excessisset, nunc medicorum nostro-  
rum industria, prope tuta est, & convenire omni ætati  
putatur. Novi ego hic Romæ senes, annos sexaginta &  
eo amplius natos; qui cum pluribus calculis laborarent,

atque omnia essent experti, demum ad hoc ultimum confugerunt, ac brevi sanitati redditi sunt: præter admodum paucos, qui, magis quod sibi temperare nequiverint, quam quod medici diligentia, cura, studiumque defuerit, sese in interitum præcipitaverunt. Itaque hæc curatio, quæ olim temeraria, ut dixi, existimabatur, jam, ut considerata atque salubris, cujusvis ætatis calculosis adhibetur. Excellit, in hoc genere curationis, hic Romæ Ioannes quidam Verulanus; qui quoniam plures annos fuit in Gallia, unde etiam disciplinam arripuisse dicitur, & quia Gallica utitur veste, Gallus vulgo appellatur. Huic omnes fere istiusmodi curationes prospere feliciterque succedunt. Exortus est paucis ante mensibus alter, ex oppido Albani, qui longe minori negotio calculosis opitulabatur: non enim plagis factis, iter calculis, unde extraherentur, aperiebat, sed medicatam nescio quam portionem concinnabat, qua ab ægris hausta, calculi, tenuissimas in partes comminuti, una cum urina reddebantur. Sed neminem, ejus opera, audivi, ad sanitatem fuisse perductum, præter civem Romanum unum, ex Tedellina familia, honesta ac generosa. Sed quia, ante curationem, multos ab ægrotis aureos nummos exposcebat, ad res coëmendas, potioni illi conflandæ necessarias, tanquam veterator est explosus, atque ejectus. Atque hæc hæcenus. Legi relegiq; sapius Choræ Pelusiorum tuum, verborum splendore, ac sententiarum gravitate atque frequentia, tragici carminis majestate dignissimum. Sed in Oda, qua equitis Alphonfi, consobrini tui, mortem desles, commotus sum inagis. Nam, præterquam quod sermo in ea est, supra quam dici potest, elegans atque venustus, ita est dolenter ac flebiliter scripta, ut mihi legenti lacrimas non parum multas excusserit. Utinam sæpe doctissimis hisce carminibus mihi animum expleas. Sunt enim ingentis muneris cuiusdam instar: neque ea, nisi cum probis, doctis, tuique similibus viris communico: Aristarchos istos invidos, derisores, flocci non facio; & si quando in eos incido, ab eo, sermonem segreco, meque ab eorum consuetudine, quantum potest, abstineo. At vide, obsecro, quod donum, contra, tuo isti dono comparem. Mitto ad te

episto-

epistolam, quam nuper ad Silvestrum Colliculam medicum scripsi, qui me officiis beneficiisque omnibus complectitur. Ridebis; ac carbones tibi missos dices, pro auro. Sed fieri aliter non potest. Musas accusa, quæ ad me, nullius precii senem, non audent accedere. Vale. Romæ, 15 Kal. Iunii C15 15 CXLI1.

Ad Silvestrum Colliculam, Urbani VIII  
— medicum.

**D** Vm latis animum Sophia, Silvester, in hortis  
Oblectas, doctaque manus per compita passim  
Et per quadra legis flores herbasque virentes,  
Quæ formosa salus agros revocetur in artus;  
Ianiculi positus viridanti in vertice tristis,  
Vsq̃ue premor. duplicis laceratus verberare cura,  
Quod subeunt animum male gesta tempora vita,  
Et mutata oculis offert se collis imago.  
Heu quam diversa, heu, quantum nunc distat ab illa,  
Quam Dryadum cupiere chori cupiere Napæ,  
Ianiculus, Musarum olim Phæbique voluptas,  
Præ quo contempsit nemorosa cacumina Pindi,  
Castalios fontes, Zephyris agitataque Tempe;  
At nunc Bellona & sævi domus horrida Martis,  
Castra magis, quam lata refert spectacula ruris!  
Ante quidem, tenero mulcentes æra cantu,  
Dulcibus implebant volucres concentibus auras;  
At nunc armorum sonitus, clangorque tubarum,  
Horribili strepitu, timidas se fundit in aures;  
Quo pelluntur aves & amantes ocia Musa.  
At tu. Paonias docuit quem Cynthius artes,  
Fragrantes herbas medicos componis in usus,  
Navis pulcra tibi quas, colle virentis Hymetti,  
Textilibus fert lata manus onerata canistris,  
Vt, te præsertim placito curante magistro,  
Annosam numerosa trahat per lustra senectam  
URBANI virtus magni; quo sospite jactat  
Se pia libertas, & pax redit aurea terris.  
O te felicem merito, cui contigit uni,  
Post superos, summi regum, custodia regis,

*Pandere cui soli fulgentis limina cœli,  
 Claudere & imperio, horrendi datur ostia Ditis.  
 Non opus hoc sortis fuit, aut dedit obvia casus  
 Munera tanta tibi; medica sed gloria laudis,  
 Ac veneranda fides, meruit, quod lividus odit,  
 Qui tibi se nequeat meritis conferre minorem.  
 Ad tua nam veniunt properantes iussa decora  
 Cum calathis florum Nympha; tibi monstrat Apollo,  
 Qua casia virtus, qua sint olidique cyperi  
 Vires, Niliaca & quidquid colocasia possint;  
 Tum, qui lethales valeant depellere morbos,  
 Expressi in latices, formoso è gramine, succi.  
 Quare age sollicitus, cari, sine fine, parentis  
 Irriguos nitidosque frequens te confer in hortos;  
 Serius ut ad superos migret, saturatus & annis.  
 Ipsa salus aderit, lepido nitidissima vultu,  
 Quæ tibi se jungat, tecum qua diluat aque  
 Alma salutiferi spumantia pocula roris,  
 Ne sacris ausint membris accedere morbi.*

## XV.

Clarissimo, atque omnium virtutum laude  
cumulatissimo

T Y R R H E N O.

**Q** Vis ingenium tuum non admiretur, ad omnia  
 summa natum? Nam quamcumque in partem se  
 dat, sui semper simile invenitur. Hendecasyllabi tui, ut  
 sunt blanduli, elegantuli, venustuli! ut eorum similes,  
 quos olim Catullus effudit! Tritura vero, quo nomine  
 elegans illud æstivum de messe carmen inscribis, præter  
 sermonis venustatem atque nitorem, quo nullus ne ex-  
 cogitari quidem maior potest, ut delectat! ut sensus affi-  
 cit! ut rem ipsam ante oculos statuit! Equidem ruri  
 tecum esse, atque ad pellendos solis ardores, *Herculeæ re-*  
*dimitus tempora fronde*, rusticanos homines, opus in  
 sole facientes, videor aspicere, atque ea omnia cernere,  
 quæ versibus, quasi coloribus depicta, in pagella, tan-  
 quam

quam in tabula, expressisti. Quam ego sum cupidus Hugonis Vbaldini, Basilicæ Vaticanæ Canonici & Archidiaconi, qui nunc abest, quique te facit plurimi, aspicendi, ut, cum à prandio, animi causa, per amœna ac proxima Vtbi loca, rheda vecti circumferimur, tua hæc carmina legenda tradam, eumque exclamantem audiam, Pulcre, bene, recte, non potuit melius! Quas ab eo voces non eliciet ambitio, ut videlicet per hanc rationem à te gratiam ineat; non spes utilitatis aliqua exprimet, qui rei nullius est cupidus; non tibi assentandi studium auferet, quem haud scio an unquam viderit; sed ratio ac veritas extorquebit. Atqui nunquam æque ac modo, ingenii inopia atque tenuitas, mihi onus visum est & miserum & grave, cum nihil à me possim sumere, ad te remunerandum, si non pari, at grato tamen munere. Cui enim, vel mediocriter literis imbuto, pedum tibi, omnium doctrinarum ornamentis instructo, gratum potest esse, quidquid à me prodierit? Sed vide, quo me referendæ gratiæ studium impellat, ut, ne immunes meæ ad te literæ veniant, eo audaciæ procedam, ut non verear, pauca quædam ad te disticha mittere; quæ mihi heri ac nudius tertius necesse fuit, Patrum S. Honuphrii, cui hodiæ natalitia dantur, precibus, scribere; quorum singula singulas spirituales sententias, simpliciter ac dilucide explicatas, continent; magis id adeo, ut animum legentis moveant, quam ut capiant, atque delectent. Præfigenda sunt cellulis novitiorum, ita ut unaquæque earum suum distichum habeat: quibus illi distichis, quotidie lectitandis, earum in ipsis virtutum amorem excitare conentur, quæ in illis commendantur. Sed hæc hæc hactenus. Nihil à te mihi poterit gratius accidere, quam si interdum, quod tuo commodo fiat, carmina isthæc, à te olim scripta, mittantur. Sunt enim mihi thesauri cuiusdam instar, unde divitias eloquentiæ depromam. Vale. Romæ, prid. Idus Iunii C I O I O C X L I I,

## Pax animi.

*Dulcia pacata succedent ocia vita :  
Cui Christus cordi, pacis amator erit.*

## Castitas.

*Mors, & iudicium, & Christi patientis imago,  
Si tibi sis prasens undique, castus eris.*

## Studia literarum.

*Diligit innocuos, odit sapientia pravos.  
Ut tibi se jungat, sit probitatis amor.*

## Mensæ frugalitas.

*Qui mensas refugit modicas, sectatur & amplas,  
Hic ventri natum se probat esse suo.*

## Otii fuga.

*Otia si fugias, fugient te Damonis artes,  
Namque operi intento vertere terga solent.*

## Silentium.

*Sape tibi magnos peperere silentia fructus.  
Nec mala magna minus, garrula lingua dedit.*

## Paupertas.

*Si Christo careas, inopem te crede ; sed illo  
Si frueris, regum sperne beatus opes.*

## Obedientia.

*Rectius ille sui peraget mandata magistri,  
Illius ore Deum qui dare iussa putet.*

## Humilitas.

*Excidet elata tumidaque superbia menti,  
Si recolas, quid sis, quidque futurus eris.*

## Oratio.

*Orantem fugiet, si te conspexerit hostis.  
At secus, invadet, decipietque dolis.*

Monita.

## Monita.

*Num feret horrendas divini judicis iras ,  
Qui fugit , atque odio verba monentis habet ?*

## Modestia.

*Contrahat informem ne pulcra modestia labem ;  
Omnia cernentem , sis memor , esse Deum .*

## Patientia.

*Quem pigeat , tolerare breves minimosque labores ,  
Tartareus subeat perpetuusque dolor .*

## Solitudo.

*Turba frequens plures dedit Orco ; sed loca sola  
Innumeros superis inferuere choris .*

## XVI.

Religiosissimo , atque omnibus eruditionis doctrinæque laudibus ornatissimo

T Y R R H E N O .

**D**ies Dominicus est, Deo trino & uni festus ac sacer: modo redii è re divina : domi sum solus : multa occurrunt animo , quæ audiui ; sed in primis illa , tanquam cygnea , Christi Domini vox & oratio , quam, evolaturus ad superos, suos ad discipulos habuit, *Data est mihi omnis potestas , in calo , & in terra.* At non possum, quin his literis tibi , quæ mihi ea de re veniunt in mentem, exponam. nam, quem ad potius referam, quam ad te, cui datum est, nosse mysterium regni Dei ? nam, si effundam ad eum , cujus cordis quasi palato terrena tantum, nec cælestia, sapiant, jure ab eo irridear, atque audiam, Quid mecum lingua, quam non noverim, loqueris ? si vis intelligi, dic aliquid, quod plane à meis auribus non abhorreat ; secus, fabulam, ut dicitur, surdo narrabis. At, quinam, inquires, tu es, qui audeas aliis, de Christi potestate, aliquid tradere ? etenim *quis loquetur*  
potem.



*potentias Domini, auditas faciet omnes laudes ejus?* Vera loqueris; sum pulvisculus sum, terra sum cinis: at canales interdū lateritii, vel fictiles, liquores lucidissimos fontium, ad usus hominum afferunt. Quamquam, non est mihi propositum, de divina Christi potentia, omnia persequi, neque, quibus ea rebus contineatur, exponere; verum pauca quædam, ex illis Christi verbis, *Data est mihi omnis potestas, in calo, & in terra, &* proxime sequentibus, notatione digna excerpam. Quibus verbis omnem vim suam Christus voluisse experiri videtur, ut nos, à rebus humanis abductos, ad sui amorem & cultum attraheret. Nam, quid est causæ, cur homines tanto studio principibus viris se in clientelam tradant, eorum tempori serviant, studiis obsequantur, nisi quod eos, magnitudine potentix, ac præstantia dignitatis, ceteris anteire conspiciant? Putant enim, sub illorum præsidio atq; tutela, omnia sibi prospere eventura, nec minimam futuram accessionem honorū ac divitiarum. Christus, ut majorem in ipso, quam in ceteris omnibus, spem utilitatum esse significaret, *Data est mihi, inquit, omnis potestas, in calo, & in terra.* Eam videlicet sibi potentiam obtigisse confirmat, quæ per omnes cæli tetraque regiones pertingat, iisdemque, quibus illæ, terminis definia-  
tur. Qui igitur posthac alterius cujusquam opibus niti se postulet, cur alterius cujusquam sibi potentiam adoptet, cum audiat, tantum in Christo sibi esse opis atque præsidii, ut nihil sit in cælo, vel in terra, quod non ejus arbitrio imperioque subjiciatur? Hoc interest inter principum aliorum & Christi potentiam, quod illi non omnia, quæcunque in animum incidunt, possunt, sed pluribus in rebus à sua potentia destituuntur; at nihil est, quod Christi potentiam effugiat, nihil, quod non præsto sit eidem, ad nutum. Tum alii potentiores, ut omnia possint, non possunt animabus nostris salutem dare; sed possunt corpori mortem afferre: at quænam, obsecro, ea est potentia, quæ, ut Theodorus Lysimacho, mortem minitanti, respondit, cantharidis vires non excedat? sed ut, quos lucis hujus usura privaverint, æternis pœnis addicant, vel cælestibus præmiis afficiant, id abest ab eorum potestate longissime: at in Christi manu est,

nu est, eos, qui secus quam decuit vixerint, ad inferos  
 detrudere, æternis ignibus tradere, quique recte factis  
 sibi in cælum aditum aperuerunt, in beatorum sedes ex-  
 cipere, ac pro ratione meritorum, sempiternæ felicitatis  
 præmiis ornare. Deinde potentioribus aliis, non suppe-  
 rit semper, omnibus benefaciendi voluntas & copia, nam  
 facultates illorum non patent in immensum, sed, cum  
 Christi copiis divitiisque collatæ, exiguis quibusdam fi-  
 nibus terminantur; itaque paucos quosdam habent exi-  
 mios, ac cognatos præsertim, quos divitiis & honori-  
 bus expleant; satis, & plusquam utile fuit Rebus publi-  
 cis, inhonestos homines vidimus, prætermisiss bonis, in  
 altissimo dignitatis gradu locari; satis, & plusquam sa-  
 tis, noster in propinquos & consanguineos amor & stu-  
 dium in offensionem hominum incurrit; quibus, si fas  
 esset, vellemus, Regibus ac Tetrarchis Regno everfis,  
 regale fastigium vindicare, vel potius, superis è cælo  
 pulsiss, divinum principatum asserere. At Christi beni-  
 gnitas, utpote infinita, in neminem clauditur, omni-  
 bus patet, in omnes, qui velint, peræque diffunditur;  
 ille omnes diligit, omnes habet eximios, omnes in co-  
 gnatorum numero ducit, immo nulla re alia, ut ista  
 nobiscum consanguinitate & cognatione, gloriatur;  
 nam quod aliud in Evangelio frequentius, quam filii ho-  
 minis, nomen usurpat? Postremo, nihil fere de aliorum  
 in nos Principum amore potest esse exploratum ac cer-  
 tum; tor enim sunt in hominum animis latebræ, tanti-  
 que recessus, ut non facile statuere possis, qua quisque  
 sit in te voluntate studioque, nec possis agnoscere, quid  
 ille amet, quid simulet: dixit olim Philosophus nescio  
 quis, bene actum fore cum genere hominum, si latam  
 nobis natura in pectore fenestram aperuisset, unde  
 oculorum acies ad cordis penetralia perveniret; at ille,  
 mea sententia, inepte est imprudenterque locutus; nun-  
 quam enim pejus consultum fuisset cum rebus humanis,  
 quam si aliquis ad intima cordis nostri cubilia aditus  
 patuisset; nam, quam multæ ibi insidiæ, in nos com-  
 paratæ, conspicerentur? quam ibi multa, simulata ac fi-  
 cta, sese in conspectum darent? quam multa, simulatione  
 amicitia oblecta odia, rejectis involucris, nuda atque  
 aperta

aperta paterent ad oculos ! siquidem, ut Psalmographus inquit, *prævum & inscrutabile cor hominis* : quæ omnia, ad notitiam nostram adducta, incredibili nos molestia complerent. At Christi in nos amor, tam est apertus, tamque perspicuus, quam quæ oculis cernuntur : quamobrem, cum nihil in eo esset simulatum ac fictum, cumque ejus curæ, cogitationes, operæ, ad nostram utilitatem omnes referrentur, passus est sibi pectus perforari, & latam in eo fenestram, unde cor introspecti posset, aperiri. Verum (quod ad cognationem attinet, quæ nobis cum illo intercedit, ) si tantam nobis indidit natura cupiditatem, filios, fratres, ac nepotes nostros, ornandi, locupletandi ; qua Christum in eos indulgentia esse oporteat, quos eo cognationis vinculo sibi habet annexos, quo nullum ne excogitari quidem possit adstrictius ? Nam quod vinculum inveniri potest majus illo, quo humanâ sibi naturam una colligavit hypostasi ? Profecto, nullû neq; modum neq; finem faciet eos augendi, locupletandi, ornandi, donec supra omnes cæli orbes, supra omnes Angelorum ordines, evectos, secum ad Dei patris dexteram ducat, in eoque, quo ipse sedet, solio collocet, atque constituat. Iam tibi, Tyrrhene, in cursu honorum, ad summam amplitudinem properanti, potentiorum hominum gratia non deest, quorum arbitrio Resp. geritur, & imperia magistratusque mandantur ; cumque, vera ad honores via, hoc est, virtute nitaris, nihil in te desideratur, quod à natura, doctrina, studio, & exercitatione suppeditetur : verum illud nobis persuasum esse debet, immo deliberatum ac fixum in animo hære, cujusvis potius vel potentissimi hominis gratiam contemnere, abjicere, pro nihilo ducere, quam illam vel cum levissima Christi contumelia conjungere. Neque dubitemus, neque animum despondeamus. Christus dives est, qui potest nos ab inopia ad summas opes divitiasque perducere ; Rex est, ac Rex ille, *per quem reges regnant, & legum conditores jura decernunt* ; qui potest nos honoribus ac dignitatibus omnibus ornare ; delectationes in dextera habet, qui potest nos voluptatibus solidis ac veris explere. Ad ejus igitur amicitiam & clientelam nos aggregemus, ejus ductum sequamur,

ejus

ejus gratiæ dediti sinus. Nam cui Christus inest, quamvis omnia alia desint, continuo est dives, est Rex, delictis omnibus affluens: contra, cui Christus deest, etsi reliqua omnia adsint, illico est inops, inglorius, miser. At postquam, ita magnas, atque ita late patentes, potentia suæ vires esse, Christus ostendit, rem totam conclusit, hoc modo: *Euntes ergo, docete omnes gentes, baptizantes eos, in nomine Patris, & Filii, & Spiritus sancti; docentes eos, servare omnia, quaecunque mandavi vobis.* Quæ Christi ad Apostolos oratio tribus ex præceptis omnino constatur. Primum, jubet eos proficisci; tum gentes abluere; postremo docere, ut iis vitam legibus instituerent, quas ab ipso acceperant. Quæ tria fecisse legitur populus Israel, cum, Deo propitio, acerbissimum illud servitutis jugum à cervicibus suis excussit. nam primum, ex Ægypti finibus, quantum potest, excessit; tum, pedibus rubri maris undas evasit; postremo, leges à Deo, quibus subjectus esset, accepit. Itaque, ut hæc omnia, ex proposita materia, ad nos transferamus; primum abire jubemur, *Euntes ergo, docete;* at qui abit, locum, ubi erat, relinquit; quis autem erat locus, qui nos antea recipiebat? Ægyptus, nimirum peccatum; Ægypti igitur derelictio discessionem à peccato significat, quæ, ut ait Augustinus, baptizandi profitentur. Deinde, de baptismo præceptum accipimus; videlicet, de mari rubro pedibus ineundo. Vtrumque breviter complexus est, cohortatione sua, Petrus Apostolus. nam quid aliud est dicere, *Pœnitentiam agite; & baptizetur unusquisque vestrum, in nomine domini nostri Iesu Christi,* nisi, Recedite ab Ægypto, & per mare rubrum iter habete? Ab Ægypto igitur, hoc est, à peccandi consuetudine recedendum est, omnes peccandi illecebræ respiciendæ, omnes honorum divitiarumque cupiditates compescendæ, ut, per maris rubri transitum, in numerum filiorum Dei veniamus; hoc enim in primis ex baptismo consequimur; quem locum ac numerum amittimus, quoties in aliquod vitium pravitatemque delabimur, quæ nos à Dei similitudine prorsus abripiat. Theologi plane omnes, interrogati, cur Spiritus sanctus, cum, æque ac Filius, à divina Patris natura procedat; nomen Filii non habeat; inter alia, quæ

docte acuteque respondent, ideo, ajunt, Filium non appellari, sed Spiritum sanctum, quod non, ut intelligendo mens, sic etiam voluntas amando, similitudinem aliquam informat ejus, quod amatur, sed abrepta, velut spiritu quodam vehementi, impellitur, ad potiundum ac fruendum. Summa denique huc redit, ut in Filio similitudo quædam Patris & imago debeat inesse; at Dei similitudinem nihil à nobis æque repellit, ut peccati deformitas turpitudeque. Postremo, cum jubet nos doctoris & magistri partes suscipere, ac docere populos, servare ea, quæ ipse mandaverat; non illud intelligit, ut unusquisque nostrum incendat suggestum, ac de superiori loco, acri ac vehementi oratione, populos ad studium virtutis ac probitatis impellat; sed, ut exemplo, quod omnium magistrorum præcepta superat, quod omnium eloquentium disertam orationem evincit, à noxiis eos inanissimarum rerum cupiditatibus avocemus ad divinarum legum amorem, atque ad omnium laudabilium studiorum voluntates. In hoc unusquisque potest esse eloquens; immo tanto ceteris eloquentia præstabit, quanto anteibit exemplo. At si tanta est in divinis legibus gravitas, ut humanæ eam vires ferre non possint, si tanta in eisdem obtemperando difficultas, ut dixerit ipsemet Christus, *Sine me nihil potestis facere*, hoc est, sine mea ope auxilioque vestri omnes ad virtutem labores atq; conatus in irritum recident; ergo quid fiet nobis, cum Christum abesse contingat, cum jam cælo receptum, beatissimæ illæ mentes, & felicissima gaudia detineant? nonne abjiciamus animum oportet? nonne, oneris magnitudine oppressi, legum earundem gravitati succumbeamus? Nihil, inquit Christus, hic vos metus exterreat, nihil hæc cogitatio perturbet, nihil vestra studia retardet; ego nunquam vos deferam, nunquam à mea ope auxilioque destituam; sed *ero vobiscum, omnibus diebus, usque ad consummationem sæculi*. Vale. Romæ, xvi Kal. Julii CIOIOCXLI.

## XVII.

Doctissimo religiosissimoque domino

T Y R R H E N O.

**P**roximis superioribus meis literis, inagno à te opere expetebam, ut interdum, quod commodò tuo fieret, ne gravareris, carmen ad me aliquod mittere, ex iis, quæ olim fecisses. nam ea me ingentis cujusdam beneficii ac muneris loco ducere, aiebam. At tu, quasi divinares, quid cuperem, vel potius, quasi mihi in animum penetrares, measque in eo voluntates & studia omnia perspiceres, in votis ac postulatis, mihi ultro occurristi, & antequam meæ ad te literæ pervenirent, atque adeo antea quam Roma discederent, duo dulcissime elegantissimeque scripta epigrammata ad me misisti; unum, de Albani pictoris tabula, ubi puer Iesus se Patri voto obstringit, atque Angeli, ejus cruciatuum instrumentis, quasi pueriliter ludunt; alterum, de Roma, ab Arnulpho Germaniæ Rege, per occasionem leporis fugientis, capta. Quod munus copulasti cum epistola, humanitatis, elegantiae, sanctimoniaeque plenissima; in qua tui mihi cordis arcana consilia detegis, nimirum, ardens illud desiderium, quo flagras, ecclesiæ, cui præses, adeundæ, & gregis tibi à Deo commissi, ea quæ pastorem bonum decet cura, sedulitate, ac diligentia, regendi tuendique, præterea, omiſſis ceteris studiis, in lectione sacrorum librorum, iisque, quæ à sanctis Patribus singulari doctrina, eruditione, ac pietate scripta sunt, perpetuo hærendi. Quod vereor ut tibi unquam facere liceat. Nam quemadmodum tu ipse scribis, cum summo Pontifici voluntatis tuæ regendæ moderandæque quasdam quasi habenas tradideris, nunquam ille tantam vim doctrinæ, eruditionis, sapientiæque, patietur intra angustos unius ecclesiæ fines, tanquam aliquam aquulam, contineri, sed ad Ecclesiam universam irrigandam exhilarandamque permittet effluere. Quod vero meam opellam, ad idem sacrarum literarum studium conaris abstrahere traduce-  
reque, atq; ad hortationes preces etiam adjungis, tuum

in me amorem, & honoris, existimationis ac salutis meæ studium, agnosco; deque eo maximas tibi gratias ago habeoque. Sed nolim me tibi, de Eudemia, Pinacotheca, aliisque ejusmodi nugis, penitus esse notum atque perspectum. Etenim hæc per ludum jocumque composui; atque eo facilius ad hanc animi hilaritatem ludumque descendi, quod viderem, ludicras res ac leves in honore & gratia esse, omnium ad se voluntates allicere, emptorem invenire; graves vero & serias, tanquam tristes, molestas, odiosas, atque invendibiles merces, fere ab omnibus rejici. Verum, scias velim, jam inde ab adolescentia, sacrarum rerum notitiam, magis quam cetera studia, mihi cordi fuisse. Argumento sunt ea, quæ in hoc genere scripsi; quæ si omnia extarent, neque ingenioli mei foetus, quos semper contemsi neque volui aspicere, tanquam parens inhumanus, exposuissem, vel mea ipse manu discerpendo enecassem, aliquot, in bibliotheca mea, loculamenta implerent. At quædam sævitiam meam effugerunt, amicorum misericordia, qui ea decreverunt tollere, & adversus vim meam suis custodiis clausa habere, parati etiam reddere, si sit ipsis cautum à me, fore ut ea filiorum loco ac numero habeam, atque aliquam communis lucis usuram usurpare permittam. Hæc autem, nisi memoria me fugit, sunt Homiliæ, in omnes fere anni Dominicos, & in plures alios Christi, & Sanctorum, dies festos; in quibus data est à nobis opera, ut sermo esset purus ac Latinus, eaq; sententiæ continerentur, quæ magis animum moverent, quam delectarent. deinde, volumen Exemplorum recentium, quæ partim meis ipse oculis vidi, partim à viris gravissimis, qui ipsi vidissent, ac rebus omnibus interfuissent, accepi; quod opus, si exeat in publicum, ad deterrendos à peccatis homines, plurimum posse valere existimo. tum brevis ac dilucida Canonis Missæ interpretatio; quæ etsi nihil fere contineat, quod non ab aliis sit dictum, ordo tamen, & sermonis perspicuitas atque concinnitas, potest hominum sibi favorem ac studium conciliare. huic adjunctum est opusculum, de officio ac dignitate Sacerdotis, ac brevis, totius Missæ sacrificii, explicatio. Scripsimus etiam, D. Augustinum imitari, confessiones nostras, ac de pœnitentia



nitentia in supremum diem non differenda. Aliquot etiam sanctorum virorum vitas scriptis mandavimus, ut B. Stanislai Kostka, & Iuvenalis Ancinæ, Saluciarum Episcopi, ex Congregatione Oratorii Romani. At nunquam operæ precium existimavi, quæcunq; ab aliis, quovis sermone, sive eleganti sive rudi, quavis lingua, sive vernacula sive externa, confecta essent, attingere; quod me operam lusurum sum arbitratus, si meum eas ad res laborem ac studium adjunxissem, in quibus alii elaborassent. Postremo id quod pene fueram oblitus, est dialogorum liber, qui Dialogos duodecim continet, de rebus sacris, atq; ad mores emendandos & componendos utilis. Hæc eo scripsi, ut intelligeres, me nunquam alienum ab iis studiis animum habuisse, ad quæ meam cogitationem atq; operam advocas, verum, multum eidem laboris ac temporis tribuisse. Sed, his omissis, venio ad literas tuas, in quibus admiratus sum præter modum, pacem illam animi, & tranquillitatem, qua in acerbissimis istis doloribus, quibus frequenter premeris, te sustentas. Quæ pax præcipuus est Spiritus sancti fructus. At commodum, tuæ mihi literæ redditæ sunt diebus Spiritui Paraclito sacris; quo tempore, in sacrificiis, atque in horariis precibus frequenter fieri mentionem audiavi de pace, illis Salvatoris nostri verbis, *Pacem meam do vobis, pacem meam relinquo vobis, sed non, quomodo mundus dat, ego do vobis.* Et recte. Nam quæ pax nobis à mundo contingit, pacis tantum nomen extrinsecus retinet, sed intus in corde seditiones ac tumultus maximos habet inclusos; qui nullam nos partem quietis & ocii patiuntur accipere. Verum, pax Christi, tanti tamque inæstimabilis precii est, ut in suprema cœna discipulis eam suis, hoc est, iis omnibus qui dicto sibi audientes sunt, quasi testamento reliquerit, & postea, revocatus ad vitam immortalem atque beatam, nihil habuerit prius, quod illis precaretur, quam pacem. Nam *stetit*, inquit Lucas, *in medio discipulorum suorum, & dixit eis, Pax vobis.* Quem locum, quoniam sermonem hunc, de Christi pace, qua fruëris; cuiusque ego sum avidissimus, lacessivi, paulo fufius explicare non dubitabo; fretus fiducia literarum tuarum, quibus significasti, eas tibi epistolas fore non ingratas,

quæ de rebus divinis loquerentur. Ait, igitur Lucas, Christum, ab inferis excitatum, in medio discipulorum suorum cœtu constituisse, iisque, ex indignissima ipsius morte perturbatis atque perterritis, pacem attulisse. At istuc idem, quod tum re ipsa gestum fuisse narratur, spiritualiter nobis accidere, testes sunt ii, qui in acerrima atque attentissima Christi crucis ac mortis meditatione versantur. Nam tum præsertim se intus sentiunt Christi præsentia mirabiliter refici, ejusque pacis suavitate perfundi, cum antea, revocatis sibi ad memoriam acerbissimis ejusdem cruciatibus ac morte, dolori inærioriq; sese tradiderint. Habet etiam anima hominis spacium, in cuius medio consistat, conquiescat, seque hilaritatibus oneret Christus; qui delicias suas memorat, esse cum filiis hominum. Etenim, nisi in latitudinem pateret, non diceret Spiritus Sanctus de eo, cui fixum ac deliberatum est, millies antea per summos cruciatus vitam amittere, quam ne minimum quidem à religione officii discedere, *Deus in medio ejus non commovebitur*. Medium enim extremas quasdam oras habeat necesse est, à quibus æquo sit intervallo disjunctum. Cum autem dicat Lucas, Christum stetisse in medio discipulorum suorum, ostendit, eos non dispersos, non dissipatos, non disjunctos, sed concordēs, sed coactos, sed unum in locum congregatos fuisse. Itaque, si cupimus, ad nos Christum venire, in medio cordis nostri vestigia defigere, sermones nobiscum miscere, optatissimum pacis nuncium nobis asferre, necessarium est, cogitationes nostras, quas semper in Christo defixas esse oportet, non palantes, non vagas, non in varia studia distractas, hac illac excurrere, sed intra cordis nostri claustra cohibitas, atque constructas includi. At si eas fortasse contingat errare, atque à nobis abesse, quisnam eas revocet? quis reducat in viam? quis intra cordis septa compellat? Idem ille, qui Christi discipulos, undique ex fuga retractos, uno in cœnaculo conclusos habuit; nimirum metus; qui adeo eorum animos occupaverat, ut non satis illi habuerint, cœnaculi unius parietibus sese committere, verum etiam pefulum ostio obdiderint. Nam Ioannes ait, *Cum fores essent clausæ, ubi erant discipuli congregati propter metum Iuda-*

*Judaorum, venisse Iesum, stetisse in medio eorum, ac dixisse eis, Pax vobis.* At undenam hic metus, qui cogitationes nostras dispersas cogat, ac se sequi compellat, arcescebatur? Non aliunde, quam ex Christi passionis mortisque memoria. Etenim, cum omnis Christi vitæ pars, frugifera ac fructuosa sit, tum nulla in ea feracior est, neque uberior, quam extremus actus, qui illius cruce supplicioque concluditur. Inde enim innumerabiles utilitates fructusque ducuntur. Verum, ex uberrimis ejus fontibus, utilis in primis, divinæ severitatis quidam metus, ac terror, emanat. Nam si ita graviter, ita sæviter, ita atrociter, Deus ultus est peccatum in Filio, in quo netenne quidem levissimi cujuscumque errati vestigium apparebat, non aliam ob causam, nisi quia ad translationem criminis, nomen suum accommodaverat, ac turpē peccati personam induerat; qua severitate, quibus judiciis, quam acribus, quam pertimescendis, nostra in nobis peccata persequetur, pœnis suppliciiisque constringet! quibus exemplis, se esse illis infensum, ostendet! Nonne, qui se attente in hac meditatione defixerit, magno terrore metuque corripietur? nonne cogitationes suas, antea in omnes inanum atque inutilium rerum libidines, ut sunt honores, voluptates, divitiæ, tanquam in varias ac longinquas regiones, immissas, revocabit, ac secum esse compellet? Quod ubi erit factum, continuo Christus, in earum cogitationum conventu medius existens, hanc ad nos orationem habebit, *Pax vobis; ego sum; nolite timere.* At, per Deum immortalem, quodnam potest peccatori homini nunciū Christus asserre, cujus ille se magis participem fieri cupiat, quam certiozem eum facere, se reducem esse factum in Dei amicitiam & gratiam? Quid mirum est igitur, si gavisi sint discipuli, viso Domino? Itaque, quemadmodum illorum animi, ex mœrore atque tristitia, traducti sunt ad hilaritatem lætitiæque, ita etiam nos, ex tam admirabili nuncio, mirabiliter excitari ad lætitiā sentimus. At, cum acceperimus, Deum injurias, sibi à nobis factas, oblivione sempiterna deleisse, atque insuper, suam nobis amicitiam & gratiam detulisse, quid vicissim à nobis præstandum est Deo? Illud nimirum, nisi ingratissimi, vel potius, nisi,

in humana figura , tetra immanesque belluæ simus , ut omnes eidem ad nostram amicitiam aditus apertos , atque adeo patefactos esse , patiamur ; ut eundem intra penitissima cordis nostri penetralia receptum, ita caritatis vinculis constrictum teneamus , ut ea nunquam vincula solvere , nunquam fugam meditari jure conetur. Sed, quanam ratione hæc pax nobis cum Deo continget? Eadem, qua à Christo conciliata est, quam nobis, re magis quam verbis , exemplo efficacius quam voce, significavit, vel potius ante oculos posuit , cum Apostolis manus ac pedes ostendit. Manibus, manibus inquam, & pedibus nos in amicitiam cum Deo reduxit. Nam , manibus opera , pedibus animi affectiones designari , nemo est, paulo in sacris literis exercitatus, qui nesciat. Utraque autem re, operibus videlicet, atque omni ardore animi impetuque adhibito , tantum nobis bonum peperit. Nam , ad opera quod attinet , qua assiduitate, qua diligentia, qua sollicitudine, negotium redemptionis nostræ, à Deo sibi commissum & traditum , inchoaverit , persecutus sit, ad absolutionem perfectionemque perduxerit, illa ejus ad Patrem oratio demonstrat , *Opus consummavi , quod dedisti mihi , ut facerem.* Quod vero studium, quem ardorem animi, ad illud attulerit, tum multa, tum ea in primis verba , ardentissimo amoris igne succensa, declarant, quibus olim discipulos suos affatum esse legimus, *Baptismo habeo baptizari, & quomodo coarctor, donec perficiatur?* Iisdem plane artibus, Dei amicitiam & gratiam nobis comparemus oportet. Tunc enim, compositas inter nos ipsumque discordias, ac pacem conciliatam esse , existimare poterimus , cum animum induxerimus, ejus mandatis obtemperare, eisdemque , quibus ille studiis exardescit, incensum & inflammatum animum gerere. Etenim sicut nullum est majus conciliatæ inter aliquos gratiæ argumentum , quam similitudo studiorum ; ita etiam , nullum est dissidii certius indicium, quam contrariæ hominum sententiæ, ac dissimilitudines studiorum & voluntatum. *Pacem*, inquit Apostolus, pro recuperata ejus amicitia & gratia , *habeamus ad Deum.* At quænam , Leo Pont. max. ait , potest esse pax illi ad Deum , cui ea placent quæ Deo displicent , & displicent ea quæ

ea quæ Deo placent ? Hæc igitur contraria studia atque sententiæ, ut cum maxime, inter ipsum & Deum discordias esse, convincunt; contra, voluntatum animorumque concordia, eisdem pace amicitiaq; invicem conglutinari demonstrat. Quod erit magis testatum, si Christo, prandium à nobis poscenti, duo illa obsonia anteposuerimus, quæ ab Apostolis eidem, reliquiarum aliquid quo vesceretur poscenti, exhibita fuisse traduntur. *Habetis hic, ait ille, aliquid, quod manducetur ? At illi obtulerunt ei partem piscis assi, & favum mellis.* Pisces, ex Gregorii Magni interpretatione, sunt curiosæ hominum cogitationes, quæ per fluxas hujus vitæ vias cursitant, & tanquam in altum impulsæ, ibidem, quasi in concitato mari, vehementibus actæ tempestatibus, fluitant. At, quemadmodum pisces, quo sint ad cibos hominum apti, primum è mari extrahuntur, tum igni torrentur; ita etiam cogitationes nostræ, quo, tanquam obsonium aliquod, in Christi pectus abeant, & cum ejusdem voluntate copulata, vel potius unum atque idem cum illa effectæ, perpetua nos in pace cum Deo constituent; antea sunt ex negociosæ perturbatæq; vitiis ac cupiditatibus vitæ quasi fluctibus extrahendæ eripiendæque, deinde ardentibus divini amoris prunis tradendæ, ac demum Christo in prandium anteponendæ. Deinde apposuerunt ei *favum mellis.* Sed cur non ipsum mel potius? nam excerptum aptius in epulas Christi venisset. Nihil est, quod tam facile expedire possimus. Nam huic dubitationi ita occurrit Augustinus; qui tum in melle, tum in mellis favo, nos omnes, qui pacem cum illo habere cupimus, eleganter designari demonstrat, qui tum mellis, à favo sejuncti, similes erimus, cum, hujus corporis custodia liberati, Deo convivæ, quasi dulcissimæ quædam epulæ, dabimur; at interea dum, mortalibus membris circumplicati, in hac vita detinemur, favi cujusdam inaginem ac similitudinem gerimus, atque Christo, cibum de nobis poscenti, inel simul & favum, hoc est, animam & corpus, offerimus. Qua in re nonne illud, optime Tyr rhene, docemur, quod tu egregie præstas, ut, quemadmodum mel, dum favo concluditur, neque ceræ permiscetur, neque cum illa confunditur, sed apud eam, ve-

lur hospitio diverit , ita etiam , dum carne circumtecti sumus, nullum ejus ad nos cupiditatibus aditum præbeamus, nihil earum in nos influere permittamus? Interea, quoniam fieri aliter non potest, corporis hospitium tantum, non autem consuetudinem, usurpemus ; imitemurque in primis hirundines , quæ ita in urbibus , ita in domibus versantur , ita nidos in eis construunt , ut neque assuescant ad homines, neque mansuescant. Quod autem una tantum piscis parte contentus fuerit , neque , integrum sibi illum apponi poposcerit , illud potest causæ afferri , quod , cum pisces animi nostri sollicitudines curasque designent, non fert moleste Deus , partem earum aliquam à nobis in necessarios vitæ usus derivari ; reliquum vero in ipso consumi requirit ; ita tamen , ut ea etiam pars , quæ ad vitæ necessitates reservatur, sit divini amoris igne succensa ; videlicet, ut B. Gregorius explicat , nostram ad se fiduciam non attrahat , sed tota in Deo collocetur atque hæreat ; qui favum mellis ; corpus nimirum atq; animum hominis, totum ducit suum, nihil ex eo mundum, nihil sibi Dæmonem, nihil carnem, decerpere patitur. Nam totus ad Christum homo , hæreditatis jure ac nomine , pertinet. Hæc est illa hæreditas , quam suo sibi sanguine peperit , quam habet se ipso cariorem, quam dulciorem super mel & favum appellat. Origenes, locum illum Proverbiorum exponens , *Vade ad apem*, (quod legitur in quibusdam Græcis exemplaribus , ac citatur etiam à Clemente Alexandrino , Hieronymo, aliisque, ) aperit aliquid, quod inire locum hunc, quem tractamus, illustret. Quærit enim, cur sit eundem ad apem , & non ad apes ? Quia, inquit , Christus, qui potissimum apis nomine significatur, est princeps apum ; & merito inter apes, nimirum inter eos, qui circum virtutes , quasi flosculos , exeunt , ad opera atque labores, principatus atque admiratio Christo tribuitur : nam omnibus quidem vitæ suæ diebus , sed præsertim passionis ac mortis tempore, ex virtutibus omnibus, tanquam ex floribus , mella contraxit , succosque dulcissimos , ex iisque favum præstantissimum , novum videlicet hominem, confinxit, qui totus est suus ; neque alius , juris in eo quidquam habet : quod si quispiam aliquid sibi ex eo decer-

decerperit, hic tanquam ex jure, manuconfertus, appellandus erit, quod in alienas possessiones tam temere irruerit. Habes epistolam bene longam, ab homine, ocio diffuente, ad hominem innumeris implicatum occupationibus. Sed non debet esse nobis molestum, interdum ab ejusmodi interventoribus, cujusmodi sunt meæ liræ, occupationibus nostris moram & impedimentum afferri, cum mors instet, negotium omnium maximum, neque senibus modo, & infirmis, sed juvenibus etiam ac robustissimis. Ac nudius tertius Cardinali Burghesio, populari ac ut arbitror affui tuo, exequiarum munus persolutum est, qui in ipso pene ætatis flore sublatus, utinam in ea cum Christo pace decesserit, de qua sumus locuti. Sed tempus me admonet, ut scribendi finem faciam, atque me conferam, ubi præsentibus Episcopis, Cardinalibus, atque aulicis pene omnibus, cum accensis cereis, atque agmen claudente Cardinali Lantes, sacrosancta Christi corporis mysteria gestante, (nam Pontifex, utpote infirma valetudine, non audet se matutino ac frigido celo committere,) *It per velatas ætnæ pompa vias.* Vale. Romæ, x i i i Kal. Iulii  
C I C I O C X L I I.

## XVIII.

T Y R R H E N O,

omnibus excellentis viri ornamentis  
illustri.

**P**roximis tuis litteris mihi significasti, me tibi gratum esse facturum, si mitterem, brevem Canonis Missæ interpretationem, à me olim ex D. Thoma aliisque doctissimis viris collectam, una cum opusculo de officio ac dignitate Sacerdotis, deinde Io. Juvenalis Ancinæ Saluciarum Episcopi vitam; quod diceres, magno hæc tibi esse usui posse ad pietatis studium augendum, & ad munus, quod sustines, rite administrandum. Tibi dicto sum audiens; atque, ex præscripto tuarum literarum, mitto jam quidem duo prima ad te, tibi que do, dono, dico; mox deinde missurus quoque tertium. Cui enim mea magis tradenda existimem, quam tibi, qui illud in primis



primis scribendi genus probare videris, quod sequimur;  
 ac puram, dilucidam, & sine offensione euntem orationem, obscuræ, contortæ, atque ineptiis claudicanti, antepone; in qua hodie adolescentes & imperiti admirantur, obstupefcunt, clamores extollunt, perspicuitatem vero sermonis, in qua tantum veteres ponebant, & pro qua adipiscenda tantopere elaborarunt, tanquam pueriles nugas, nugatores ipsi omnium maximi, irrident atque contemnunt. Atque utinam, ad hanc tuam erga mea scripta humanitatem, censoria etiam auctoritas tua accederet, quæ severe in eorum vitia animadverteret, eaq; à virtutibus, si quæ insunt, tanquam à senatu, amoveret atque repelleret. profecto, nihil esset, in quo tuam in me benevolentiam mihi magis testatam esse optarem. Itaque, non modo non ægre fero atque moleste, in eam à docto illo viro, de quo scribis, opellam expoliri ac corrigi, verum etiam maximo beneficio me ab eo esse affectum, existimo. Quid enim liberis suis mater à Deo majus potest optare, quam ut à vitiis vacui, & à virtutibus instructi, in publicum prodeant? Quamobrem deleat, mutet, detrahat, addat, faciat quod lubet: non enim se mihi, quasi adversarius, opponet, sed, tanquam Deus, in votis & optatis occurret. Cui si digneris, meis verbis, gratias agere, erit mihi gratum in primis; ac longe gratius, si à tristibus cogitationibus animum abdukeris, & ad hilaritatem traduxeris. Non enim, ab assidua & attempta mortis meditatione, hic à nobis fructus exigitur, ut in aliquam animi perturbationem ægritudinemque labamur; sed ut potius lætemur, fore aliquando finem hujus exiguæ & ærumnosæ, & initium æternæ, & cumulatæ bonis omnibus, vitæ: illudque præsertim ex ea requiritur, ut omnes nobis res humanas, utpote fluxas & caducas, in odium & contemptum adducamus; quarum vanitatis quamam major vel fortior potuit esse disciplina, quam ultimus Reginæ Galliarum casus, quæ istic diem clausit extremum, cuique, jam desperatæ atque depositæ, totum continuum triduum, interfuisti? quam, primum florentissimam, ac redimitam auro gemisque, pulcherriam nobilissimæque Europæ parti longe lateque imperitantem, tum adversæ fortunæ fluctibus

bus actam, ac subinde sedes mutantem, demum in externo solo, communi omnium hominum lege, societatem carnis dimittentem, agnovimus. Verum te, communis condicionis memoria, & infirmissimæ valetudinis tuæ incommodo, non gravius commoveri, quam fortem virum & Christianum deceat, argumento est studium & diligentia, qua vetustissimæ nobilissimæque familiæ tuæ monumenta interpretaris, ac posteritati committis. Et sane ego quoque, una cum aliis, in illo, vestro egregio insigni P O R V N, tanquam in re obscura, hærebam; & adhuc hærerem, nisi interpretationis tuæ lumen accessisset, quod omnes mihi, ab animo, ignorantie tenebras depelleret. Intrabam sæpe, ob loci vicinitatem, ubi habito, ædes illas amplissimas, quæ, quamquam dominum mutaverint, ab Augustino, earum auctore, veterem adhuc appellationem retinent, &, quoad hujus Urbis nomen extabit, quod quidem erit, Deo approbante, sempiternum, vestræ familiæ ædes nuncupabuntur: cum eas, inquam, ædes intrarem, ut tabulis pulcherrime pictis, Raphaelis Sancii Vrbinatis, Iulii Romani, Balthasaris Senensis, aliorumque summorum artificum manu elaboratis, oculos pascere, atque animum exsaturarem, cumque in illud insigne incurrerem, quod nemo esset, qui ejus mihi notitiam aperiret, tanquam ignotum hominem præteribam. Nunc autem capio voluptatem, mihi ex obscuro perspicuum esse factum; multisque præstantibus viris, qui in eadem ignorantie caligine versabantur, tuæ interpretationis lumine instructus, ad eam depellendam, atque ad intima ejusdem insignis intelligentiæ cubilia penetrandum, tanquam facem prætuli; idque deinceps faciam, cum in aliquem ejus rei rudem incidero. Hæc interim à me opuscula, ad sacrosanctum Missæ Sacrificium spectantia, ut postulaveras, accipe. Neque ea, molis exiguitate tenuitateque, contempnas. Nam summani earum rerum amplectuntur, quæ ab aliis fuscæ, & fortasse etiam suboscure, tractantur. In quo memoriæ hominum consultum est maxime; quod nihil ad retinenda ea, quæ tibi nunquam velis excidere, ita memoriæ adjuvat, ut brevitatis Vale. Romæ, x i i Cal. Sept. c i o i c x l i i.

BREVIS SVMMMA ET COMPENDIVM  
eorum, quæ in Sacrificio Missæ con-  
ficiuntur.

**Q**uo majores uberioresque, ex sacrosancto Missæ sacrificio, utilitates & fructus percipiamus, & ad augendam in nobis erga tanta tanque divina mysteria pietatem ac religionem, multum sane refert, singula, quæ in eo fiant, agnoscere, & diligenter mandare memoriae.

Atqui omnia, quæ in eo Sacrificio peraguntur, ad quatuor præsertim capita revocantur.

Nam quædam, ad præparandos tantæ rei animos spectant;

Quædam, ad nos erudiendos pertinent;

Quædam, circa consecrationem versantur;

Reliqua, in Sacramenti perceptione consistunt.

CAP. I. *Quæ ad præparandos animos adhibeantur.*

**A**C primum tantæ rei animus præparatur Introitu; qui Dei laudes in primis continet. Decet enim, à divinis laudibus Sacrificium illud inchoare, quod, proprio etiam nomine, sacrificium laudis appellatur.

Tum, ad illud magis magisque disponimur, memoria & commemoratione earum calamitatum, quibus in hac vita conficimur: à quibus nos eripi ac liberari, supplicibus ac demissis illis precibus, novies repetitis, exposcimus, *Kyrie eleison*. Quibus verbis, tum Patris, tum Filii, tum Spiritus sancti personam, exoramus; singulis personis ternas ejusmodi preces adhibendo, ut in unaquaque earum, alias etiam duas, ejusdem unitate naturæ, inesse significemus.

Postremo ad istuc idem sacrificium idonei magis effici-mur, desiderio felicitatis æternæ, quam demum vitæ hujus molestiis ærumnisque perfuncti, speramus. Quod desiderium excitare conamur in nobis, cantico illo Angelico atque cœlesti, *Gloria in excelsis Deo*.

CAP. II.

CAP. II. *Qua, in hoc Sacrificio, erudiendi docendique vim habeant.*

**P**rimum, erudiunt nos Prophetarum & Apostolorum libri. Qui quoniam rudem & adumbratam rerum divinarum notitiam continent, ideo à ministris inferiorum ordinum, nempe à Lectoribus & Subdiaconis, recitantur. Quibus subjicitur Graduale, cum canticò Halleluja, vel Tractu. Quorum alterum significat, ut spirituali gaudio repleti, alterum, ut intimo scelerum nostrorum dolore affecti, ad absolutionem perfectionemque virtutum omnium contendamus.

Deinde, magnam ad docendum vim habet Evangelium. Quod ideo Diaconi, superioris ordinis ministri, voce recitatur, quia perfectam absolutamque fidei nostræ doctrinam habet, ab ipsomet Christo explicatam & traditam.

Tertio loco, docendi gratia, subjicitur Symbolum Apostolorum; quod breviter & dilucide, & tanquam per capita, totius fidei Christianæ summam amplectitur.

CAP. III. *De ea parte hujus Sacrificii, quæ Consecrationem continet.*

**C**um, duabus de causis, sanctissimum Eucharistiæ Sacramentum à Christo Domino institutum sit; altera, quo Ecclesia perpetuum Sacrificium haberet, quo peccata nostra expiarentur; altera, ut caeleste pabulum, ad spiritualem vitam conservandam necessarium, nunquam nobis deesset: ideo illud primum à populo, summa cum alacritate animi, divinæ majestati offertur, & Christi, tum divinitas illis vocibus, *Sanctus, Sanctus, Sanctus*, tum humanitas illis aliis, *Benedictus, qui venit*, celebratur.

Postea, Sacerdos, revocatis sibi in memoriam iis, pro quibus illud Sacrificium offert, atque implorato divino præsidio, ut, eo adjunctus, Sacramenti fructus consequi possit, consecrationem perficit, verbis à Christo domino relictis ac traditis,

Postremo,

Postremo, excusat se, quod, humilis & indignus, ad tantam rem perficiendam accesserit: nunquam enim se tale aliquid ausurum affirmans, nisi Christi præceptum urgeret; qui mandavit hæc fieri in suam commemorationem: ac petit à Deo, ut ejus Sacramenti fructus hac vita functis sibi que uberrimi copiosissimique contingant.

C A P. IV. *De perceptione Corporis & Sanguinis Domini.*

**P**rimum, Sacerdos præparat se, ac populum ibi præsentem, ad percipiendum hoc Sacramentum; tum certis quibusdam precationibus, & in primis oratione Dominica, tum detestatione cujusvis simultatis atque odii; cum istud Sacramentum symbolum sit Ecclesiasticæ unitatis & conjunctionis.

Deinde, Corporis & Sanguinis Domini mysteria suscipiuntur.

Denique, totum Sacrificium in agendis Deo gratiis, pro ejus in nos beneficiis, concluditur; ac præsertim pro ea gratia, quæ nobis in Sacramento communicatur.

*Oratio.*

**C**lementissime Iesu; qui sacrosancta Corporis & Sanguinis tui mysteria in memoriam passionis tuæ, & in remissionem peccatorum instituisti; præparo me ad ea recolenda atque sumenda, commemoratione laudum tuarum, imploratione divinæ misericordiæ, desiderio felicitatis æternæ, eaque firmiter constanterque credendo, quæ à Sanctis Prophetis & Apostolis scripta sunt, & in primis quæ in Euangelio & in Symbolo continentur. tum, ita præparatus & instructus, offero Deo Patri æterno, te Filium suum unigenitum, verum Deum & hominem, in hoc Sacramento latentem, primum pro salute animæ meæ, & N. N. N. atque omnium propinquorum & benefactorum meorum; deinde pro animabus N. N. N. atque omnium fidelium defunctorum, ut, à peccatis expiati, de tenebris in lucem sanctam, ac de pœnis purgatorii ignis ad æterna gaudia, transferantur.

per

per hujus igitur virtutem Sacramenti , me tibi totum inferre , & una cum Sanctis & electis tuis tecum unum corpus atque unum animum effice: denique fac me tibi, pro acceptis beneficiis, debitas in perpetuum laudes gratesque persolvere. Qui vivis & regnas in sæcula sæculorum. Amen,

## DE NOBILITATE ATQUE EXCELLEN- tia Sacerdotis.

**C**VM Sacerdos, sacris vestibus indutus, rei sacræ faciendæ gratia, ad aram accedit, legati personam sustinet, missi à populo ad Deum, ut nostram causam cum eo potissimum agat: sicuti concionator est quidam quasi Dei interpres ac nuncius, qui, ejus nomine, divinam legem, ac vitæ præcepta, homines edocet.

In hac igitur legatione Missæ, quatuor occurrunt in primis, quæ diligenter & attente considerentur.

Primum, quam personam Sacerdos adeat, ut cum ea loquatur;

Tum, quo genere sermonis apud eandem utatur;

Deinde, quid petat, vel deprecetur;

Postremo, quid agat, quidve perficiat.

### CAP. I. *Quicum Sacerdos in Missa loquatur.*

**S**acerdos Denm alloquitur, & pro nobis deprecatur. Magna profecto res est, cum Deo sermones conferre; quod in singulis colloquiis spiritualibus, nobis fero contingit. Verum, id Sacerdos, in sacrificio Missæ, singulari atq; mirabili quadam ratione præstat ac perficit. Nam Deum præsentem, sibi que operam dantem, appellat: neque id ad brevè nescio quod tempus, ut fit in horis canonicis, quas brevi, conversa ad Deum, oratione concludimus; neque ut accidit in meditationibus, quarum exiguam partem colloquium occupat; sed quam longissime & quam diutissime eundem affatur. Etenim divinum istud Sacrificium, perpetuus est quidam sermo cum Deo, ad eum nobis placandum, atque ad intimos mentis nostræ recessus eidem aperiendos adhibitus. Id

E e

quod

quod indicant omnes orationes secretæ, omnes collectæ, ipsa denique oratio Dominica. Quid multa? Præter Evangelium & Epistolam, totum illud unius semihoræ curriculum in maximis atque gravissimis cum Deo colloquiis sermonibusque conteritur: neque siletur, nisi ad brevissimum tempus; nempe tantisper, dum ipsi, nos in memoriam vivorum ac mortuorum inducimus. O rem maximam ac præstantissimam, tam multis verbis, tamdiu, tanta cum majestate, hominem loqui!

C A P. II. *Qua ratio sermonis in Missa adhibeatur.*

**R**atio sermonis, quæ ad Deum precandum affertur, est plane singularis & eximia; idque multis de causis.

Primum, quia Sacerdos Deo familiariter, secreto, & tanquam in aurem loquitur. Ideoque, magna ex parte, submissa utitur voce, ut est mos inter amicos. Quemadmodum Moyses fecisse legitur, cui loquebatur Dominus facie ad faciem, sicut solet loqui homo amicus ad amicum suum.

Deinde, quia non sua, sed Ecclesiæ universæ postulata, cujus ille personam refert, exponit; ejusque voces perinde à Deo accipiuntur, ac si à populo universo mitterentur. Neque, quod hanc ad rem attinet, multum sane refert, qualis sit Sacerdos, utrum bonus an malus. Vnde ejus orationis vis & efficacia perspicitur, simulque colligitur, quam eadem attente ac benigne à Deo exaudiatur.

Tum, quia nihil Sacerdos suo Marte loquitur, sed conceptis utitur verbis, ab Ecclesia & Spiritu sancto sibi relictis & traditis. Etenim, quæcunque ab eo narrantur, vel sunt à sacris Conciliis excogitata diligenterque examinata; vel à Christo composita, ut oratio Dominica; vel à sacris litteris excerpta, cujusmodi sunt Evangelia, Epistolæ, Psalmorumque versus; vel ab Ecclesiasticis canonibus jussa atque decreta. Quamobrem non est verendum, ne ea minus grata & jucunda Dei auribus accedant, vel, tanquam à divina ipsius majestate aliena, rejiciantur,



ciantur, vel propter ineptam petendi rationem, minus nobis, quam volumus, impetrent. Id quod, in privatis postulationibus ac precibus, non parum sæpe contingit. Nam ideo D. Iacobus inquit, *Petitis, & non accipitis, eo quod male petatis.*

Deinde, quia nobilis hic populi Christiani legatus, missus de rebus magnis ad Deum, non privatum, ac remotis arbitris, sed publice, ac coram universis cœli militibus, verba facit. Id quod statim in ipsis Missæ initiis ostendit; nimirum cum peccata sua, tum Deo, tum B. V. Sanctis, atque Angelis omnibus, confitetur; quos etiam, una cum iis, qui præsentés adsunt, sibi patronos ac precatores apud Deum adoptat. Qua re eam Ecclesiæ unitatem conjunctionemque demonstrat, quæ ex beatis & ex nobis efficitur. Atque multo id clarius ostendit in Præfatione, ubi suas cum Angelorum laudibus voces jungi copularique postulat, illis verbis, *Et ideo cum Angelis & Archangelis*; & rursus, cum dicit, *Cum quibus & nostras voces ut admitti jubeas, deprecamur*; neque in his duntaxat duobus Missæ locis, sed deinceps in aliis pluribus, hanc cum Angelis atque Sanctis societatem & communioem supplicibus verbis efflagitat.

Postremo, quia Sacerdos verba facit Deo præsentí, seque audienti, non solum de cælo, sed ex longe propinquiore loco, nempe ex altari; atque adeo ex hostia, sub qua delitescit. Quamobrem omnis fere est illi sermo cum Deo.

### CAP. III. *Qua de re Sacerdos cum Deo sermonem instituat.*

**M**ulta sunt, de quibus cum Deo agere, ad Sacerdotis officium diligentiamque pertineat. Nam ille de collatis in nos beneficiis Deo gratias agit, laudes eidem tribuit, cultum & honorem impertit, animorum vulnera detegit, medicinam exposcit, peccatorum veniam deprecatur, nullum denique officii genus, divinæ à nobis majestati debitum, prætermittit.

Deinde, vivorum mortuorumque omnium, qui sunt ubique locorum ac gentium, postulata precesque ad

Deum exponit. Vnde supplicibus prope libellis onustus, ad Dei colloquium accedit. Quocirca, nullus est pupillus, nulla vidua, nemo æger, inops, afflictus, nemo qui, ingressus mare, navi vehatur, nemo qui, coniectus in vincula, squalore luctuque afficiatur, nemo mortuus, qui, in purgatorio igne, peccatorum maculas eluat, denique nemo, sive vir sive mulier, cuiusvis sit ætatis & ordinis, in Ecclesia, necessitate aliqua premittitur, qui supplicem suum libellum in manibus Sacerdotis, ad aram sacrificantis, non habeat. Neque hoc mirum videri debeat; cum ipse calamitosorum sese omnium patronum ac ducem profiteatur, ac præbeat.

C A P. I V. *Quid in Sacrificio Missæ potissimum agatur.*

**N**Eq; solum Missæ Sacrificium intra verba concluditur, sed res in eo longe omnium maximæ sanctissimæque præstantur. Nam hic nobilis Ecclesiæ legatus, nempe Sacerdos, unicum Dei filium, Iesum Christum Dominum nostrum, agnum immaculatum, una cum omnibus ejus meritis, opibus, atque virtutibus, Deo hostiam offert; illum, inquam, eundem agnum, qui se ipsum, in ara crucis semel tantummodo cruentum, immolavit. Quo tum munere si ita delectatus est Deus, cum omnibus vexabatur injuriis atque doloribus, eo quod esset filius suus dilectus, in quo sibi bene complacuit; quam id illi gratum acceptumque nunc fore existimamus, cum defunctum ærumnis ac laboribus, summa cum religione ac reverentia, gloriosum & immortale deferatur? Neque existimare debemus, minus multos ad nos fructus ab hoc Sacrificio defluere, quia sanguine careat. Nam, ad remissionem peccatorum quod attinet, perinde illud valet, ac si nunc pro nobis cruentum in ara crucis immolaretur.

Deinde, non modo in hoc Sacrificio, Christus verus agnus immolatur, verum etiam panis & vinum in Corpus & Sanguinem Christi convertitur. Itaque duplici in eo Sacerdos munere fungitur. Nam, & Christi Corpus conficit, ac nobis exhibet, & Deo illud Patri, pro suis  
atque

atque omnium hominum culpis & sceleribus, immolat. Quæ sane potestas, summo atque admirabili Dei beneficio ac munere, soli ipsi, neque alteri cuiquam præterea, tribuitur.

Postremo, in hoc eodem Missæ Sacrificio, cui, sicut hætenus diximus, nihil in terris par & simile invenitur, inilitans Ecclesia cum triumphante conjungitur, atque ex utraque unum atque idem corpus efficitur. Quod aperte verba illa demonstrant, quæ leguntur in Canone, *Communicantes, & memoriam venerantes*. Ac, ne multis morer, tum præsertim illud manifeste declaratur, atque adeo proponitur, quod in Symbolo, de sanctorum communione, profiteamur ac credimus.

*Conclusio ac peroratio.*

**E**X iis, quæ hætenus dicta sunt, constat, qua veneratione cultuque dignum sit hoc Sacrificium: quod nihil, ne excogitari quidem potest angustius, neque præstantius. Quid mirum igitur est, si tantus eidem honos ab omnibus Christianis hominibus habeatur! Etenim, quis Princeps, quis magistratus, quis superior, sive sit secularis, sive Ecclesiasticus, sive religiosus, si Sacerdotem accersiri ad se jubeat, atque eum audiat ad altare rem divinam facere, non continuo vetet, eum interpellari? Par eidem honos à summo Pont. exhibeatur necesse est; qui nulla unquam ratione committet, ut ille, in re tanta occupatus, accitu suo evocetur, atque ad se venire cogatur. Quod longe secus accideret, si aliud quodvis vel religiosum vel pium opus instituisset; si videlicet oraret, horas canonicas recitaret, confessiones audiret, aut aliquid ejusmodi aliud efficeret. Nam liceret superiori, si ita sibi res poscere videretur, mittere Sacerdoti, qui diceret, ut, relictis rebus omnibus, statim ad se veniret. Vnde licet intelligere, nihil vacui ac liberi temporis Sacerdoti contingere, & quod vere possit dicere, totum esse suum, neque aliquid in eo juris quemquam habere, præter id tempus, quo Corpus & Sanguinem Domini, in Sacrificio, ad altare conficiat. Quin etiam Deus ipse, hoc tempore, nullum ab eo externi

cultus & honoris signum efflagitat. Nam si illac, ubi res divina fiat, sacra hostia deferatur, vel eadem, in proximo altari, signo campanâ dato, in altum extollatur, vetat Deus Sacerdotem, adorandi gratia, se commovere, atque id, quod agat, omittere. Quod si Deo est tam eximius, cujusmodi sanctis Angelis erit! qua demissione animi, qua reverentia, beatissimæ illæ mentes sacris altaribus aderunt! Quid agis, ò Sacerdos? quid cogitas? cur non sedulo tibi in animum subjicis, qua probitate præditum, quibus virtutibus ornatum eum esse oporteat, qui ad faciendam rem sacram accedat; quæ animadversio, quæ demissio animi, qui ardor, quæ fiducia, quæ pietas, quæ caritas in eo requiratur, qui se tantæ rei ministrum exhibeat?

His igitur in mente & cogitatione defixis, &, si ita videatur, ad numerum dierum hebdomadis distributis atque descriptis; facile Sacerdos assequetur, ut intelligat, cujusmodi oporteat esse eum, qui vocatus est à Deo in sortem hujus ministerii: ceteri vero fideles habebunt, quid attente ac religiose meditari in iis sacris possint, in quibus intersint.

## XIX.

Longe præstantissimo viro,

T Y R R H E N O.

**P**roximis meis superioribus literis, pollicitus fueram, Io. Iuvenalis Ancinæ Saluciarum Episcopi vitam me tibi missurum. Quod autem non servaverim, in eo quod promiserim, fidem, non id quidem mea culpa contigit; sed eorum, quibus eam commodaveram, factum est causa. Nulla enim vi, quamvis omnia conatus sim, extorquere ex eorum manibus potui. Primum, qui nunc illis præest, repetenti mihi eam, humaniter respondit, ut solet; daturum se operam, ut mihi satisfaceret. Deinde, cum acrius instarem, rem se ad quatuor viros illos relaturum ait, quorum consiliis, in rebus difficilibus, uteretur. Iubet me reverti postridie, Revertor.

Mittit

Mittit ad unum ex illis quatuor, cui partes datas esse narrabat, me conveniendi, mihiq̃ue animum explendi. Accurro hilaris, ut librum exciperem, ac meos ad lares, tanquam ab exilio, reducem facerem. Sed hunc me laborem lucrifacere bonus ille vir, qui mihi expleturus erat animum, iussit: nam summa oris verborumq̃ue gravitate nunciavit, omnes uno ore auctores fuisse, ne liber ille regionem commutaret, immo ut custodiis omnibus vinctus teneretur, ne qua foras exiret. Cumque ego tam severi S. C. causam exquirerem, Quia summi Pont. decreto cautum est, ait, ne res miræ & supra naturæ vires, quæ patrata dicuntur ab iis qui nondum in Sanctorum numerum relati sunt, literis mandentur, & in publicum efferantur; ne videlicet probis ac simplicibus viris falsa miracula pro veris obtrudantur. Bene agis, inquam; ergo, ne legi fraus fiat, hæc me omnia prætermisurum, & reliqua persecuturum, polliceor. At, illis detractis, ait, quid reliquum erit, quod de illo scribatur? Multum sane, excipio; atque, in eorum quæ detracta fuerint locum, longiores de illius virtutibus logos substituam, iisque spirituales sententias plures intexam; adeo ut non modicum corpus, ex earum rerum explicatione, conficiam. Ad eundem scopulum, inquit ille, revolveris; an legem nescis pari eos jure comprehendere, qui nova ac mira, atque eos, qui egregia eorum facta, conscripserint, de quibus, tanquam de optimis atque sanctissimis viris, bene vulgus existimaverit, & si quis ejusmodi liber in publicum prodeat, fore ut illico inter vetitos numeretur? Tum ego commotus, Adigis me quidem, ajo, ad insaniam; quid audio? licet, semperque licitum fuit, turpia improborum hominum, non modo facta, sed dicta, quæ penitus evelenda essent ex hominum memoria, literis mandare, & tanquam posteritati consecrare; quæ vero viri, omnium sanctissimi, pie, religiose, vel cum aliqua virtutis laude fecerunt, quæque ad æmulationem similium exemplorum, non modo typis imprimenda, verum etiam in animis omnium desigenda essent, ea silentio obrui, atque à notitia hominum removeri mandantur, non aliam ob causam, nisi quia, de illorum hominum probitate atque

justitia, magna fuerit opinio multitudinis? Tenes, ait ille. Sed, cum id verisimile non videretur, mihi que ab eo verba dari suspicarer, Cedo, inquam, librum; jam, si quæ tempestas ex illius editione orietur, in me hærebit, atque ea, ut dicitur, faba cudetur. Hic ille, Impudentiam hominis, clamat, qui eo se crimine alligare non dubitet, cujus pœnæ dedecus, tum in nostram familiam, si liber proscribatur, tum in sancti viri existimationem, si ejus laudibus fides detrahatur, redundaturum sit. Ne multa; ita tum discessi ab illo, ut qui librum se daturum negaret, diceret tamen, se atque suos mihi omnia cupere, non tamen posse hac in re gratificari; proinde quiescerem, aliisque in rebus, quæ ad ipsorum existimationem, è quorum numero Iuvenalis fuerat, minnendam non spectarent, ingenii laudem quærerem. Hæc eo longius tibi narranda esse duxi, ut causa pateret, quamobrem mihi ejus, quod promiseram, faciendi facultas non suppeditaverit. Vale. Romæ, 15 Non. Septembr. C10 10 CXLII.

## XX.

Præstantissimo nobilissimoque viro,

T Y R R H E N O.

**S**atis dici verbis non potest, quam ego sim avidus cognoscendi ex te, de morbis tuis, quos adeo te sollicitum habere narrabas; num tecum mitius agant, vel potius, id quod maxime cupio, prorsus abscefferint. Audivi de Equite Cassiano Puteo, te fuisse profectum in Galliam, ut optimis illis secandi magistris calculum, qui tantum tibi negocium exhibet, sectione discludas. Quod si est ita ut dicit, curationem istam tibi feliciter evenire exopto. Nos hic Romæ in magno terrore metnque versamur; quem nobis metum Parmensium Dux conficit, qui, cum equitum quatuor millibus, in agrum Bononiensem, nemine prohibente, invasit; quamquam exercitus noster, ad eum repellendum ibi in præsidio collocatus, non procul abesset; qui si ausus esset obistere, facile illas desperatorum hominum turmas, imbri, lassitudine, ac

dine, ac fame confectas, deleffet. Inde per Æmiliam, Castilionum, quod est Etruriæ oppidum, venit Dux, octo millibus peditum, ut dicitur, auctus; unde nihil, præter bombardas quatuor, & magnum frumenti numerum, cujus maxime erat indigens, abstulit. Prædicare ipsum, ajunt, se non adversus Ecclesiam, cujus ipse propugnator sit atque vexillifer, sed contra inimicos suos, bellum gerere, qui, plus iræ suæ quam æquitati tribuentes, bonis ipsi suis everterint. Interea magnus fere omnes Romæ timor invasit; quem timorem auxit Pont. qui duobus mensibus celerius, quam superioribus annis consueverat, è Quirinali in Vaticanum se contulit; secutus, ut sui prædicant, & ut ego arbitror, mitioris aëris oportunitatem; quem sibi longe illo salubriorem expertus est esse. Sed populus, utpote meticulosus, suspicatur, ut, si rumor sit, hostem adventare, illico in arcem, Vaticano proximam, confugiat; quam in arcem, frumentum, vinum, casum, laridum, pernam, ligna, & alia, tanquam ad longam obsidionem sustinendam, comportari videas. Artifices, qui sint ferendis armis idonei, describuntur, ut manualia eisdem tormenta dividantur. Romanorum nobilissimi locupletissimiq;, mulieres præsertim, aurum, vestem, atque alia pretiosa, arcis inclusa, ad amicos in urbem Leoninam mittunt; quæ urbs, quoniam undiq; vallo ac fossa munitur, contra hostium incurfus satis tuta fore existimatur. Quamobrem fossæ, quæ circa ipsam sunt, exhauriuntur, quo aqua, è Vaticanis fontibus ducta, possit excurrere; munitionibus inuri adduntur, foraminibus æquo intervallo distincti, unde propugnatores tecti ferire hostem possint; in eis milites, custodiæ causa, collocantur; portarum transitus pontibus ligneis conjunguntur, quibus detortis, hostibus aditus intercludatur; per totam Urbem vigiliæ habentur; denique nihil prætermittitur, quod ad propugnandum ac repellendum hostem pertinere videatur. Consilia fere quotidie, apud Pontificem, de belli administrandi ratione habentur. Et quamvis excelsus Pontificis animus nihil præsentibus periculis frangatur, civitas tamen nihilo segnus permovetur, trepidat, atque ex vero periculum æstimat. Aliquot ex vicinis meis, auro



argento, aliisque carioribus rebus convasatis, aliis alio, profectum adornat. Mihi quamvis, in urbe Leonina, amici cujusdam mei domus pateat, tamen certum est, locum non mutare, sed, quicumque acciderit casus, hunc quieto & æquo animo ferre. Sed hæc hætenus. Dialogi duodecim nostri, Gabrielis Naudæi opera, jam sunt Parisiis impressi; quos arbitror celerius in isthæc loca, quam Romam, perventuros. Scripsit ad me Naudæus, eum, cujus sumtibus prælo traditi sunt, optima esse in spe, ut liber eintorem inveniat, quod stylus iis, qui sunt ejus rei intelligentes, probetur. Tu, velim, me in tuorum numero habeas, ac de recuperata valetudine certiorrem facias. Romæ, Kal. Octobr. c i o i o c x l i i.

## XXI.

## T Y R R H E N O.

**H**Eri redditæ mihi sunt à te literæ, duos ferme post menses quam datæ fuerunt, fumo ac sordibus obstitæ, ac propemodum laceræ. Quem habitum situmque, ex illius, qui eas mihi reddendas acceperat, sacculi tenebris, in quibus diu latuerant, contraxisse existimo. Qui quidē capital fecit, cum me tam diu tuarum literarum suavitatis expertem esse voluerit, &, quod refert, cognoscendi facultatem ademerit, ubi esses, ut valeres, quid ageres; quæ vehementer scire cupiebam. Scribis, postridie istic Parisiensem chirurgum adfuturum, qui sectione calculum, qui tantum tibi negocium exhibet, abstrahat. Iam cum operi manum admovisse credo, teque, periculis omnibus defunctum, integrum ac validum in ocio ac tranquillitate ævum exigere. Quæso, si te à me coli, obfervari, ac diligere, quemadmodum tuæ eximiæ virtutes postulant, arbitraris; ut jubeas, tam optati nuncii me quamprimum per literas participem fieri; ut mihi gaudeam, tibi gratuler, Deoque immortales gratias agam. Pergratum mihi fuit intelligere, Pinacothecam jam esse in Belgio editam: ac miror, Dialogos, jam pridem Parisiis impressos, istic nondum comparuisse; sed diutius esse in mora non possunt. Si memoria tenes, in nostra,  
apud

apud patres Soc. Iesu, Sodalitate mos est, ut Dominicis diebus collationes, ut nunc loquimur, fiant; cum Sodales aliquot, qui sint eam ad rem apti, à Patre, qui illis præest, interrogantur, ut, si quid ex Evangelio, quod eodie in Sacrificio Missæ audierant, sibi proficuum ac notatione dignum acceperint, ad utilitatem aliorum in medium proferant. Ego, ab initio superioris mensis, his productioribus noctibus, cœpi terna ex singulis dierum Dominicorum Evangeliiis; quæ mihi usui sint & aliis prosint, puncta colligere, eaque Latinis mandare litteris. Quod opus, simul ac erit absolutum, ac tibi commodam valetudinem obtigisse cognovero, si videbitur, nec tibi erit ingratum, continuo mittam ad te, ut legas, (non enim erit, ut arbitror, tua lectione indignum,) atque aliis legendum tradas. Nos hic à belli ac direptionis metu, Parmensis Ducis abitu, liberati, in ocio vivimus. Quam direptionem hæc civitas perterrita, atque omnibus fere rebus ad resistendum imparata, non potuisset effugere, si Magnus Etruriæ Dux, cui omnia bona Deus det, suum peditatum, quem in propugnaculis imperii sui collocatum habebat, cum Parmensibus copiis, quæ magna ex parte ex Venetum auxiliis constare dicebantur, conjunxisset. Sed optimus Princeps non est passus, tantum in se dedecus ac crimen admittere. Plures militum cohortes, atque equitum turma, ab Vrbe dimissæ, sunt aptis in locis, unde statim, si usus veniat, contrahi in unum possint, in hybernis dispositæ; diurnæ nocturnæque in muris vigiliæ haberi sunt desitæ: Urbis tamen portæ adhuc à militibus custodiuntur; &, quod mihi ægre est, adhuc hic collis, ab una equitum turma obsidetur, quæ illius amœnitati ocioque non minimum detrahit. In proximo Consistorio, quod post triduum habebitur, Cardinalium comitia futura dicuntur, in quorum Collegium cooptabitur Thaddæi Barberini Principis filius natus major, qui iam clericalem habitum induit, & duobus insignibus sacerdotiis, Sublacensi nimirum ac Farsensi, ornatus est. Vale; nam plura scribere prohibeor, horribilibus canum ululatus, ad viginti, quos in ædibus, domi meæ proximis, vicinus meus alit. Romæ, prid. Idus Decemb, C I O I O C X L I I.

Clariss.

## XXII.

Clarissimo, atque omnium præstantissimarum  
virtutum notis insigni viro,

T Y R R H E N O.

**E**X omnibus, amicitiae vinculo tibi devinctis, quos  
nuper tuus iste morbus, tam atrox tamque anceps,  
habuit anxios atque sollicitos, præcipuo quodam animi  
dolore metuque me fuisse distractum, facile tibi persua-  
debitur, si tuorum in me meritorum veniat in mentem.  
Etenim mihi, homini, tibi ferme ignoto, quod nulla  
commotus re alia, nisi laudum tuarum splendore ac fa-  
ma, tui nobilitatem generis, splendorem familiae, atque  
olim, in summa rerum omnium abundantia, præstantem  
florentemque fortunam, tum, quod tibi proprium est  
maxime nec cum aliis commune, magnitudinem ingenii  
tui, ac vim varietatemque doctrinae, nescio quo libello,  
sane exiliter tenuiterque narraſsem; mihi, inquam, spon-  
te, humanissimis literis, atque omni Latini sermonis ele-  
gantia refertis, gratias egisti, latum ad tuam ipsius ami-  
citiâ aditum aperuisti, tua doctissima carmina, in qui-  
bus omnis flos venustatis, omne poëticae facultatis lumen  
eniteat, legenda ac degustanda tradidisti. Atque, si ex  
magnitudine doloris, quem ex amissa tua valetudine mi-  
hi contigit experiri, de voluptate, quam ex eadem à te  
recuperata percepi, liceat existimare, profecto erit cui-  
vis perspicuum, eam esse tantam, quantam maximam  
capere animus possit. Verum, legendis tuis literis, qui-  
bus cruciatus maximos, qui tibi fuerunt perferendi &  
carnificinam, ad extrahendum calculum, qui fuerat in  
frusta dilapsus, tot ferramentorum generibus adhibitam,  
narras, sane vehementer exhorui, ac vix lacrimas tenui.  
At spes est, fore, ut maximi dolores tui, in quibus, pro  
virtute animi constantiaque tua, te ita fortem præbuiſti,  
longissimæ, nullaque interruptæ ægritudine, valetudinis  
fructu compensentur. Pinacotheca nondum comparuit.  
Dialogi vero nostri, Gabrielis Naudæi, amicissimi ho-  
minis,

minis, opera, Parisiis impressi, non diu est cum Romæ cernuntur, ab eodem Naudæo mihi, Leoni Allatio, & Cassiano Puteo missi; sed singula eorum exempla singulis reddita. Sed in eo, quod traditum mihi est, solum unum desideratur; itaque pūduit me illud, ita obtruncatum ac mancum, cuiquam ostendere. At Cassianus miros de illis cum omnibus habet sermones: eosque Eudemæ antepōnit. Sed vereor, ne sit illius benevolentia potius, quam iudicii, testimonium. Scripsi ad Naudæum, ut plura eorum exempla istuc ad te mittenda quam primum cūret; ut, cum pristinas plane vires fueris affectus, atque ocio abundaveris, quod tibi arbitror vix posse contingere, perlegas. Sed typographum, Latini, ut opinor, sermonis inscitia, pluribus in locis fuisse mendosum invenies: nam, si quod verbum occurrerat, minus sibi antea notum, librarii mendum putavisse, ac pro eo aliud, quod sibi esset familiare, substituit: quod, exempli gratia, in verbo nautea commisit, quæ est aqua de sentina, male olens, ut nosti; at hæc vox, cum sibi insolens ac nova accideret, ejus loco, nauscam, quæ sæpius ejus in aurium ædes immigraverat, posuit. Quam vellem, hic liber Bartoldo Nihusio, cujus mihi nuper amicitia conciliata, veniret in manus; quem ego, ex suis literis, virum esse probum, doctum, tuique in primis studiosissimum novi; cui, cave quidquam de me, vix nauci homine, prædices: ne deinde, cum aliter se rem habere compererit, dependendum tibi sit, quod illi pro me spoponderis. Crebriores deinceps à me literas, quoniam ira jubes, expecta; quas etiam, si nihil sit novi quod ad te scribam, dabo. Neque verebor, ne mihi verba non suppetant. Nam lusciniolæ, ut est in proverbio, cantio deesse non potest. Vale. Romæ, Kalend. Februarii  
CIC IO CXLIII.

## XXIII.

Clarissimo, omniumque virtutum laude præstantissimo viro,

T Y R R H E N O.

**I** Am pridem, ut nosti, induxit in mores ambitio, ut summatis, omnique dignitate principibus viris, coram, si adsint, secus, per literas, dies festos, Christum nascenti tum ab inferis resurgenti sacros, faustos à Deo precemur. At me, quem dudum vitæ ratio, atque exacta ætas, ab omni ambitione prorsus abstraxit, quique re magis, quam inanibus hisce significationibus, officiorum momenta persequor, hic usus, qui invaluit, non potest attrahere, ut cum amicis, divitiis, opibus, & honoribus, longe præstantibus, ad declarandum meum erga illos cultum & observantiam, hoc signi genere utar. Quo fit, ut neque ad aliquem absentem, hac de causa, veniam; atque animo magis quam externa re aliqua, & dies festos, & omnia, evenire illis ex sententia, cupio. Veram, quia te genus, ingenium, eloquentia, omniumque elegantia literarum, mihi conjunxit, sed multo arctiori vinculo virtus, sanctitas morum, tuusque mihi ultro delatus amor, & is in summis quidem gravissimarum rerum occupationibus, in acerbissimis corporis doloribus, atque in extremo vitæ periculo conservatus, implicant atque constringunt; efficiunt, ut, non sine nefario scelere, aliqua à me occasio prætermittatur, tibi declarandi, quantum debeam, quamque alte tuorum erga me beneficiorum memoria mihi hæreat in animo; utque nullum sit honoris genus, ita magnificum, ita edito in loco situm, quod non tuis summis virtutibus, & egregiis in Reip. meritis, jam diu deberi existimem. Sed ad summam illam voluptatem, qua ex singularibus tuis in me beneficiis officiisque perfundor, aliquid influit, quod puram ac liquidam eam mihi abire non patitur; mea, inquam, prostrata & afflicta fortuna, qua, video, nulli me tibi esse usui posse. Quamobrem, licet mihi quidem

quidem latari tuis omnibus ornamentis & commodis, non tamen gaudere, ad ea consequenda, aliqua ex parte meam tibi operam idoneam atque utilem extitisse. Hujus tamen mei doloris acerbitas non parum ea, quæ in te redundat, gloria mitigatur. Tibi enim esse gloriosius existimo, amandum, tuendum, ornandumque suscepisse eum, unde nulla tibi spes utilitatis commoda ostendatur, quam si te illi dedisses, cujus opera tuis maxime rebus oportuna esse potest ac commoda; quod istud videatur hominis, magis se ipsum amantis, quam amicum, illud solius proprium sit Dei, cujus in nos beneficia sunt gratuita, neq; ullius antecedentis meriti rationem, aut spem utilitatis futuræ, sequuntur. Superest, ut tuum mihi amorem, & commodandi studium, esse perpetuum cupiam. Id quod etiam „ pro tua animi magnitudine atque constantia, mihi eventurum existimo: Vale; atque hos dies sanctissimos ac celeberrimos, hilares in Domino sume. Romæ, x i i i Kalendas Aprilis C I O I O C X L I I I.

Pinacotheca, nondum est ad nos allata. Hermannus, bibliopola Romæ in primis nobilis, qui, cum omnibus fere Europæ impressoribus, magnæ pecuniæ rationem habet, tres ferme ab hinc menses, mihi dixit, multa ejus exempla esse Liburni, ab eo, qui illam imprefferat, sibi missa; sed adhuc, propter navigandi difficultatem, Romam pervenire non potuisse. Nescio, an Dialogi sint adhuc istuc allati. Scripsi ad Naudæum, ut eos quamprimum ad te mittendos perferendosque curaret; sed nondum, cum sæpius scripserim, ne unam quidem ab eo literam, postquam abiit, potui exsculpere. Iterum vale.

## XXIV.

Singulari doctrina atque sapientia  
viro,

T Y R R H E N O.

**S**I me, ex longo & ancipiti morbo, convalescere, vel potius si mortuum ab Orco revocari contingeret, non ita exultarem gaudio, ut nunc efferor, cum te, quem prope extinctum luximus, ex præcipiti levatum, & in veterem pristinae valetudinis locum, restitutum fuisse comperio. Quod mihi gaudium tuæ elegantissimæ, omnique suavitate refertæ ad me literæ cumularunt: ex quibus intellexi, curationis illud genus, quod, propter ejus acerbitem diritatemque, sub manus raro succedit, tibi ex sententia evenisse. Et sane est, quod maximas Deo immortalī gratias agamus, quod nobis, tantopere de salute tua sollicitis, in precibus ac votis occurrerit. Nondum domo pedem extulisse te arbitror, ac populo isti, qui, tam egregiis amoris in te sui significationibus, salutem tuam sua sibi cariorem esse ostendit, vultum tuum ostendisse; idque ob anni tempus tam adversum. Nam, si Romæ, ubi hyems, ob cæli tepiditatem, florum multitudinem, herbarum viriditatem, veris cujusdam speciem præfert, nunc Idibus Aprilis aër, ex lenissimo mitissimoque, ita factus est acer atque asper, ut non alias majore, quod meminerim, frigoris acerbitate defævierit; quid istic esse oporteat, ubi debacchantur frigora, dominatur Aquilo, ubi nives tempestatesque, tanquam in suo regno, omnia propemodum anni tempora moderantur ac regunt? Verum, ubi aspectus jucundissimus tuus, quasi faustum aliquod sidus, affulserit; jam, credo, venti conticescent, imbres nivesque receptui canent, contractæ hyemis sævitæ, hilaris, verni temporis, frons & mansuetudo succedet. Tum, quanta omnium animi voluptate perfundentur! quibus gaudiis exultabunt! quibus lætitiis incedent! Ac videre jam videor concursus ad te omnium omnis ætatis atque ordinis hominum, gratulationes, plausus, amplexus, honores, quibus illi  
clan-



clausum pectoris in gremio gaudium, vel potius pectus ipsum apertum ac patens, conentur obijcere. Nam, si antea, cum emanasset in vulgus, lethali te correptum morbo, ad extremum fere casum esse adductum, in moerore fuerant, lacrimas non tenuerant, supplicationes pro salute tua decreverant, vota fecerant; si deinde, cum esset auditum, te, periculis omnibus defunctum, in portu, ut dicitur, navigare, oculis, ore, verbis; lætitiā suā explicaverant; quid reliquum nunc est, nisi ut præsentī tibi cor ipsum, unde fons omnis & origo lætitiæ promanat, aperiant? Quo nihil tibi potest, nec honestius nec honoratius, accidere. Siquidem ille verus est honor, qui à caritate ac benevolentia civium profiscitur; non autem ille, qui ambitione, vel gratia, vel precio comparatur: quique hac viā ad honores nititur, honoris nomen, non autem honorem, consequi studet. Quamquam communis sit omnium opinio, te celeriter esse, maxime cum gratia & gloria, ad summā amplitudinem perventurum. Non enim nunc Ephesi vivimus; ubi præstanti sapientia cives à Repub. pellebantur; ubi etiam, cum Hermodorus juberetur in exilium ire, ea audita vox est, Nemo de nobis excellat, sed si quis extiterit, alio in loco & apud alios sit; ob quam vocem Heraclitus Physicus Ephesios universos ait fuisse morte multandos: neque Athenis atatem agimus, ubi omnis exuperantia virtutis in odium & invidiam vocabatur: sed versamur cum iis, qui egregia cujusque in Remp. merita honoribus ac præmiis afficiunt, quibusque tua singularis virtus atque præstantia optime nota est atque perspecta. Sed, ut eo revocetur, unde huc declinavit, oratio; communem istam hominum de te lætitiā, facit mihi quodammodo peculiarem ac propriam, tum egregius tuus in me amor & studium, tum magnitudo beneficiorum, quibus à te auctus ornatuque sum. Atque ut prætereā, quod me sponte tua ad tuorum amicorum numerum aggregaveris, quod sæpius, datis ad me literis, de tuis rebus certiore feceris, quod tua elegantissima mecum carmina communicaveris; quale est illud beneficium & quantum, quod in tuis maximis occupationibus, in lethali morbo, in acer-

bissimis vesicæ doloribus, qui non solum nos abstrahunt ab omnibus aliis curis & cogitationibus, verum etiam pene à mente consilioque deducunt, neque mei absentis in memoriam ejeceris! Pinacotheca non illepidos summo Principi ludos dedit, qui interdum ab orbis terræ procuratione feriatns, ad hanc animi remissionem, humanissimam liberalissimamq; descendit, quæ ex elegantium litterarum studiis percipitur, quod eos, quorum in illa imagines, tanquam suspensæ, cernuntur, partim ipse viderit, partim amicitia comprehenderit, partim, de eorum ingeniis, auditione & fama acceperit. Nec minor Francisci Card. Barberini, & eruditorum, favor ac studium enituit; quos neque precium ab emendo deterruit, neque labor à legendo detinuit, sed habent eam, legunt, & sunt iis, qui non habent, (nam carior est ejus exemplorum annona,) in commodando gratiosi. Quæ omnia, cum ad decus & existimationem meam redeant, incredibili, me tibi, qui præsertim, ut ederem libellum, snator impulsorque fuisti, amoris & obligationis nexu devinciunt. Illud mihi ægre est, quod verba, quibus tibi gratias agam, non suppetunt: sunt enim omnia infra tua erga me merita. Quamobrem patere, me silentio, quæ oratione explicari non possunt, involvere, ne, dum ea conor exponere, minora verbis efficiam. Statui, posthac meum ocium in gravioribus studiis consumere, neque committere, ut, dum studiosius aliorum voluptati consulo, indiligentius salutem meam, quæ ceteris mihi rebus carior debet esse, prospiciam. Iamque cœpi, ut Sodalitytis nostræ mos est, terna singulis ab Evangeliiis, quæ Dominicis diebus leguntur, puncta decerpere, ad compouendos mores utilia. Quod opus, simul, ac absolvero, mittam ad te, ut, si tibi sit voluntas vel ocium, legas. Eques Puteanus, & P. Fuligattus, quos per me tuis verbis salvere iussisti, mutuam tibi salutem referunt, ac fausta omnia à Deo precantur. Vale. Romæ, Idibus April. C I O I O C X L I I I.

## XXV.

Clarissimo doctissimoque viro,

T Y R R H E N O.

**N**Vllas à te unquam literas accepi, quibus, pluribus verbis, responsum non dederim. Non enim fuisset tam superbus vel potius inhumanus, ut paterer, accusari abs te officium meum. Quod autem meæ ad te literæ aliquantulum conticuerint, argumenti fecit inopia. Nam, quod scriberem, non habebam. Nunc autem, cum desiderare te significes meas literas, posthac optatis tuis diligenter occurram; & cum nihil erit quod scribam, faciam id, quod olim imperavit Attico Tullius, ut istuc etiam scribam, me nihil habere, quod scribam. Quamquam literæ, quas proxime ad me dedisti, uberem mihi atque amplam longissimæ epistolæ materiam exhibere videantur, qua sine fine tibi gratias agam, de ea cupiditate, quam præ te fers, nomen ut nostrum scriptis, quæ apud nos jacent in tenebris, in conspectum lucemque proferendis, clarius ac celebrius evadat, tuamque ad id commendationem polliceris. Quæ tua singularis in me humanitas & studium adigit me, ut tibi, plus quam parentibus meis, debere profitear. Illi enim exiguis inclusam mihi finibus vitam pepererunt: tu vero, nominis nostræ memoriæ non breve nescio quod tempus sed multa sæcula, propagare conaris. Illi, corpus mihi fragile, & innumeris obnoxium casibus, tradiderunt: tu ingenii famam, monumentis ejusdem ita prodendis, quam neque inimicorum vis ulla, neque imbrium ventorumque injuriæ, neque, ut ille de se cecinit, *innumerabilis annorum series* possit evertere, quod in te est, æternam mihi studes efficere. Illi non potuerunt aliam mihi patriam constituere, præter ejus urbis ambitum, ubi me genuerunt: tu elaborando, ut lucubrationes meæ in lucem exeant, dare videris operam, jam ut mea patria, non certis oppidi unius finibus terminetur, sed ut

pene iisdem, quibus orbis terræ, regionibus definiatur. Hos ego conatus si in quovis homine, quantumvis tenui obscuroque, laudarem, diligerem, magni æstimarem; quanti eos me æquum est facere, in Tyrreno, tali viro, tamque præstanti, tot rebus gestis claro, tot honoribus functo, tot nobilitatis, ingenii, doctrinæ, industriæ prudentiæque laudibus eximio, qua eosdem me benevolentia complecti, quibus studiis, quibus gratiarum actionibus, prosequi! Dixeram antea, tuas mihi literas magnam longæ epistolæ conficiendæ materiam suppeditare, eo quod pluribus verbis, eisdemque ornatissimis, de tua ista egregia in me voluntate tibi gratiæ sint agendæ. Sed longe aliter evenire nunc sentio. Nam verba, quibus tibi gratias agam, non invenio; nec orationis vim aliquam habeo, qua id, quod dicam, perinde à te percipi intelligentia possit, atque ipse cogitans sentio. Quo fit, ut, in magna rerum abundantia, dicendi paupertate laborein, meque, qui tibi quondam non plane infans visus sum, verba deficient. Quamobrem oro te obtestorque, ut si tibi, ita ut par est, gratias non agam, ne id ingrati mihi animi vitio attribuas, sed magnitudini tuorum in me beneficiorum assignes, ac satis officio meo factum existimes, si verbo ac simpliciter ponam, beneficia illa talia esse, quæ exæquare dicendo, neque in ea neque cuiusquam posset oratio. Iam vero, ad mea scripta quod attinet, non alia sunt apud me reliqua, (nam Epistolas & Orationes secum Naudæus attulit,) nisi de rebus sacris ac divinis. In quibus imprimendis, sumptus atque opera luderetur, quod neque emptorem neque lectorem invenirent; quia homines, ut nunc sunt mores, à rebus gravibus atque severis abhorrent, & amœnis ac levibus inhiant. Est tamen liber Exemplorum, quæ nemo adhuc, quod sciam, literis tradidit, quæque ob rerum novitatem, gravitatem, varietatemque, non mediocrem lectoribus possint utilitatem ac voluptatem afferre. Mittam ad te librum, per partes, ut, cum legeris, de eo quidquid tibi videbitur statuas. Vidi nuper, Romæ, tui oris imaginem, egregia delineatam arte, & in pagina impressam, à P. Silvestro Petrasancta Soc. Iesu mihi ostensam. Quod si contingeret, me saltem unum  
ejus

ejus exemplum imaginis habere, nihil mihi gratius accideret. Vale. Romæ, viii Kal. Maji C I D I C X L I I I.

## XXVI.

Doctissimo eloquentissimoque viro,

T Y R R H E N O.

**N**vdus tertius redditæ mihi sunt alteræ à te litteræ, ut aliæ omnes, omni verborum splendore perlucidæ, omnibus eloquentiæ ornamentis refertæ, omnis humanitatis sale conspersæ; quibus respondes iis, quas ad te proximè dederam, cum Paschales ferias tibi felices ac faustas à Deo precabar. Sed non minima earum litterarum pars in meis laudibus recensendis consumebatur: quas laudes, quia in me non agnosco, sed tuas esse omnes intelligo, in te, unde ortæ sunt, regeo. Nam, quid potest epistolis tuis dulcius, quid ornatius, quid elegantius inveniri? Ita sunt puræ, ut nihil liquidius; ita Latinæ, ut, eas cum lego, Ciceronem vel Cæsarem mihi videar legere; ita colorem quandam urbanitatis retinent, ut Romam ipsam, tum cum Latine loquebatur, redolere sentiam, neque veterem quispiam, si revivisceret, & in eas incideret, aliquam illis posset peregrinitatis notam objicere; quemadmodum vetula illa, Athenis, Theophrasto, quamvis ille elegantissime loqueretur, atque à sermonis divinitate nomen invenisset. At mæa scripta, quæ tu, benevolentia credo ductus, quasi Latina, in calum effers, non possent effugere hospitis speciem. Atque utinam hic solus urbanitatis color à meis scriptis abesset, neque in aliis multo majoribus vitiiis ea invenirentur; bene cum illis actum esse existimarem. Nam, si non plane Romana, saltem civitate donata fuisse, gloriarer. Atqui, ut de ceteris taceam, singularis in eis inertia ac negligentia deprehenditur. Nam, simul ac scribendi ardor atque impetus arripit, eo me deferri sino; quo natura ipsa impellit. At non esset hoc reprehendendum, si, cum motus ille animi me, tanquam ventus, defecisset, vela colligerem, & ociosus, ad ea quæ scripsissem, mentem oculosque converterem, censoris par-

tes susciperem, in unamquamque rem animadverterem, quæ sese nimium profudissent revocarem, quæ angustius comprehensa essent dilatarem, quæque vitio aliquo laborarent emendarem atque corrigerem. Sed ita laborem hunc, tam necessarium, refugio, ut mori videar, si quando, re necessaria coactus, eum sumere debeam. At vide, quanto mea mihi scripta sint odio; ut ea ne relere quidem sustineam, & procul ab oculis facessere jubeam. In quo feras ipsas immanitate superare convincor, quæ partus suos diligunt, alunt, fovant, ad maturitatem perfectionemque perducunt. Ut autem describam, nulla condicione possum adduci. Quid mirum est igitur, si sit mendis referta, si unum aut alterum in eis verbum desit, si plures abundant, si nomen unum loco alterius positum inveniatur! O si ego à te impetrare possem, ut, quæ istuc mitto, siue sint imprimenda siue non, cuipiam mediocriter literato legenda traderes, ut, si quid peccatum esset, corrigeret: nihil mihi gratius posset accidere. Sed hæc hæctenus. Rumores, de nova tibi provincia decernenda, hic Romæ nulli circumferuntur. Ego illud velim, quod in rem tuam sit. Et quamquam ardeo desiderio incredibili te videndi, hunc tamen ardorem mitigabit magnitudo præmiorum & gloriæ, quam in hac luce orbis terrarum, ex repub. bene gesta, consequeris. Sed, ubivis fueris, siue istic, siue Venetiis, siue Romæ, me tibi, arctissimo benevolentiae vinculo, ob magnitudinem tuorum in me beneficiorum, obstrictum, & præconem laudum tuarum, habebis. Doleo, scriptorum meorum genus non esse ejusmodi, ut parere cuipiam nominis immortalitatem possit. Sed non est tibi quærendum foris, quod abunde sit domi. Ea enim tui vis est ingenii, ea etiam, tum in soluta oratione, tum in versibus, verborum copia ac splendor, ut tui aliorumque commemorationem nominis adæquare, cum omnium sæculorum posteritate, facile possis. Interea valetudinem tuam cura diligenter; quam, Dei beneficio, & anni tempore mitissimo operam dante, esse arbitror in vado. Nam, quæ vos intempestiva istic frigora, Aprili mense, vexarunt, nos etiam hic Romæ, peræqua proportionem, cruciarunt; adeo ut nunquam

majora me fuisse expertum meminerim. Etenim, cum iisdem plane vestibus uterem, quibus tota superiore hyeme usus fueram, adeo me nihil ab iis, ad frigus propulsandum, adjuvari sentiebam, ut nudus viderer incedere, ac sæpe, tanquam si meis ipse oculis non crederem, corpori inanus admoverem, quo experirer, num sagum, thoracem, femoralia, mecum afferrem, an domi reliquissem. Quamobrem bene mihi à natura fuisse prospectum existimo, quod istic nasci non contigit, ubi tantopere frigus defecit; præsertim cum isthac corporis constitutione, qua præditus sum; cui nihil est tam inimicum, quam frigus. Quod si istic ab iis, qui me genuerunt, collocatus fuisset in vita, statim, ab eadem devolutus primo, ut ita dicam, ventorum atque nivium impetu essem; ac, si hyeme hujus me lucis usuram contigisset accipere, connumerari inter insecta illa potuissem, quæ ephemera appellantur: nam, quo spiritum die hausissem, eodem exhalassem. Sed omissis jocis, Bartoldus Nihusius suam mihi, in lucubrationibus meis edendis, fidelem, assiduam, ac diligentem operam ultro pollicetur. Cujus tam propensam in me voluntatem illustissimo Nuncio Chisio acceptam referendam esse, fateri compellor. Ejus enim commendatione, quæ plurimum apud omnes potest, sum illi traditus. Et quia se esse mea rum literarum cupidum ostendit, dedi operam, ut homini animum explerem; & sumpta occasione à quadam epistolæ, quam proxime ad me dederat, particula, dialogum, quem ad eum mitto, conscripsi. Rem mihi gratissimam feceris, si semel, quodcommodo tuo fiat, percurreris, & si nihil habere ineptiarum compereris, obsignatum, ad amicum perferendum curaveris. Vale. Romæ, IV Idus Maji  
CIC ID CXLIII.



## XXVII.

Summa ingenii , doctrinæ , & humanitatis  
laude præstanti viro,

T Y R R H E N O.

**N**Ovi , quod ad te scribam , nihil habeo. Sed , quoniam pollicitus sum , quoties occasio se dederit , quamvis nulla ad scribendum materies suppeditat , tibi literas mittere ; ut servem , in eo quod promiserim , fidem , id ipsum scribo , nihil esse , quod scribam. Nisi aves scire de bello , quo tota nunc ardet Italia. Verum , ab eo , utpote pacis ociique studiosus , ita abhorreo , ut inde , ubi de hac re , mihi in primis odiosa , sermones conventusque habeantur , me surripiam , domum abeam , ac sermonem segregem. Tantum dicam , nihil tam Romæ conspici , quam pedites equitesque decoris armis instructos ; nihil tam audiri , quam strepitum tympanorum , clangoremque tubarum. Sæpe pars aliqua copiarum , in platea , quæ principis Apostolorum Ædi subijcitur , se ludicra armorum tractatione exercet : fit illuc populi concursus : summates ipsi eò spectaculo suos oblectant oculos , ac militum virtute , & ad pugnandum alacritate lætantur. Ego me domi contineo , vel eo abeo , quo ne eorum quidem armorum strepitus , populique clamor plaususque perveniat. Dicitur summus Pont. peditum viginti , equitum quinque millium , numerum habere : nec minorem , juncti adversus eum fœdere Principes , armatorum multitudinem obtinent. Nullum adhuc commissum est prælium. Quod ne fiat , summis à Deo precibus expetendum est , orandumque , ut sedatis discordiis , rebusque coinpositis , ab armis discedatur , vel eadem , communi consilio , in Turcas convertantur ; quorum magna classis Tarentum prætervecta esse dicitur . Interim via longa , quæ collem , ubi nos habitamus , amplectitur , vallo munitur . Munitionibus præest Card. Firenzola ; qui traditam sibi provinciam , summa cum diligentia , vigilantia , & assidui-

& assiduitatis laude, administrat. Iamque pene perfectum est opus. Qui Cardinalis, quo ad munus suum, tum mane tum vespere, diligenter obeundum, sit promptior atque celerior, cœnobium S. Honuphrii, munitio-  
 nibus illis proximum, ubi una cum suis habitet, sibi delegit. Vrbs minore civium frequentia habitat, quam antea; & ager minus multis jugis aratur; cum autem per Vrbem incedas, nihil frequentius, quam ædes, vacuas inquilinis, aspicias. Cujus rei causam fortasse belli metus sustinet: nam sunt hic homines valde meticulosi. Accedunt tempora, sive hominum injuria atque malitia sive caritate pecuniæ, difficillima solutionis; neque creditor à debitore nummum unum, nisi summa vi summoque labore, potest exigere. Itaque tota est Italia fides angustior. Sed his omissis, inveniendus est titulus aliquis, quem libro *Exemplorum*, quem institui ad te mittere, præfigamus: ac vellem eum maxime, qui esset speciosus, quique legendi curiositatem excitaret. Hunc ego laborem, nisi si sim nimis audax, velim à te suscipi, qui ita ingenii judicii-  
 que acumine præstas. Quæso, da hoc meo in te amoris atque observantiæ, Romæ, Idibus Maji *CICERO* CXLIII.

## XXVIII.

Clarissimo sapientissimoque viro,

T Y R R H E N O.

**Q**uid ais nunc jam? Nonne tibi morem gero? nonne tuis imperatis, plusquam opus est, servio? Poterisne amplius accusare me inertiae vel negligentiae? audebisne queri, me raro vel nunquam ad te literas dare? Iam diu factum est, postquam nullam ad te scribendi occasionem abire vacuum sino. Et quo mihi scribendi facultas non deesset, hæc fuit causa, ut statuerem, ad te mittere, quæ notatione ac memoria digna collegissem; unde, qui legerint, aliquid, ipsis quod ex usu sit, vel ad vitam recte instituendam pro-  
 fit, arripiant. Iam credo, in multitudine literarum mearum, tui te consilii po-  
 niteat, ac tibi venisse in mentem pigeat, ad me scribere,

quod nihil ad te scriberem ; jam te , arbitror , mei mearumque literarum odium cepisse ; jam te opinor , fastidio & satietate à me abalienatum , dicere , Ohe jam satis est , ohe jam desine . Sed studium & assiduitatem in scribendo meam tantisper suffer , dum opus , quod cœpi per partes mittere , totum ad te perveniat ; tum mihi præscribe , quando & quantum me velis scribere . Etenim ne latum quidem nnguem à tuarum legum præscripto recedam . Id quoque , quod tibi , Bartoldo Nihusio evenisse existimo , ut ine measque literas fastidiat & oderit ; tam crebras , tam longas , ad eum misi . Sed hoc humanitati suæ adscribat , qua me complecti videtur ; cujus in me voluntati non possum , nisi multis verbis , gratias agere . At si quæras , quemadmodum ego me habeam , respondebo , Recte , pulcre , basilice . Ac si pergas exquisere causam , Quia , inquam , Regum fortunas videor esse adeptus . Vbi enim regalis amplitudo ac dignitas magis elucet , quam in armatorum præsidio , quo domus regia munitur ? ubi dispositi milites vigilias agunt , atque aliis alii succedunt . Domui istuc meæ contingit ; ad quam , ex cohortibus quæ sunt in Vrbe , milites quotidie plures , custodiæ causa , mittuntur , ut , lanceis & sclopis majoribus armati , suos , qui fugam adornant , ad cœnobium proximum non sinant accedere ; unde , munitionibus nondum perfectis , latus ad exeundum ex Vrbe abitus patet . Itaque præ foribus domus meæ , unde necessario transeundum est ) quibus consilium est fugere , sedent , vel fusi , ut est illorum mos , jacent , lanceas & sclopos parieti commendant , discedenti mihi ac redenti omnes assurgunt , decedunt , honorem & salutem impertiunt ; ut , qui videat , & causam ignoret , honoris mei gratia illis meam domum custodiis asservari , vel strenui cuiuspiam ducis illud esse domicilium , existimet . At ego , Regnum obtinere , & exercitibus imperare me , fingo , ac magnifice circumspicio . Sed vix clamor ac strepitus , quo illi inter se litigant , vel cantant , vel saltant , vel omnibus verborum contumeliis se invicem vexant ac lacerant , ita ut meis non liceat dare operam studiis , mihi venit ad aures ; cum ine Regni illius pœnitet , illudque libenter

ter deponerem, si possem. Verum id ludus jocusque est, præ latratibus ululatibusque canum ad triginta, quos in ædibus, quæ contiguæ meis, alit homo dives ac gratiofus: qui latratus ululatusque, cum non magis in aures quam in viscera mihi atque in animum penetrent, rum, non Regem me amplius, militum custodia stipatum, regali in folio sedere, sed damuatorum sedes, horrendis illorum vocibus percrepantes, incolere arbitror. Sed quid faciam? Ferendum est. Plus potest; & homini, in venationibus occupato, non minus multis opus est canibus. Nunc ædificat, altius ædes tollit; jamque in eam altitudinem perductum est opus, ut meæ illi ædes longissimo intervallo subsideant, & tanquam potentiore cedant, fastigiumque summittant. Vale. Romæ, v Kal. Junii C I O I O C X L I I I.

## XXIX.

Clarissimo atque omnibus in rebus præcellentissimo viro,

T Y R R H E N O.

**N**Vper est ad nos allatum de morte omnium fere sæculorum clarissimi nobilissimique Regis Galliarum, Ludovici x i i i. eaque multorum jam literis & nunciis ita confirmatur, ut de ea dubitare non liceat; quamquam Regius apud Pontificem max. orator, rogatus, respondeat, id sibi non liquere; quod nullorum literis ea de re certior sit factus. Interea, credo, quo adeuntium se molestiis eripiat, secessit in villam Farnesiorum, quæ excelsa, ainceno, & ab arbitris remoto loco, prætis Neronianis imminet. Atque esset maxime optandum, Regem illum clarissimum potentissimumque, diem non obiisse supremum. Sed quid, inquam, potentissimum? Quanam est ista potentia, quæ non potuit, paucorum, mensium an dierum? morbo resistere, atque ab eodem sit victa? O fallaces hominum spes! & inanes nostras contentiones! Potuit ille quidem ingentes hostium exercitus fundere, potuit urbes expugnare, arces situ man-  
nuque

nuq; munitas capere; potuit Regum finitimorum regna  
 suæditioni subicere, atq; imperii fines late proferre: sed  
 morbi vim ferre, sed morti par esse, non potuit. Vt volat  
 ætas! ut fluunt anni! Hic Rex, me vivo, est natus ac mor-  
 tuus. Heri, sed quid inquam heri? nuper modo audivisse  
 videor, Henrico IV ex Maria Medicea natum esse filium.  
 Atq; in hoc Rege illud Iacobi præsertim usurpare licet,  
*Qua est enim vita nostra? vapor est, ad modicū parens; & de-  
 inceps exterminabitur.* Nam vix ille, quasi fulgur, illuxit,  
 cum extinctus evanuit. Quod si, tam angustū in gyrum,  
 Regum maximorū fortuna compellitur, jam nihil eam  
 moror: si Regum eorundem majestas amplitudoque in  
 vermes ac saniem recidit, etiam exhorreo. Nam audio,  
 Regis corpus, cum exenteraretur, plenum vermibus  
 fuisse repertum. Valeant igitur Regum opes atque di-  
 vitia; quarantur ex, quæ magis sint propriae, neque  
 paucorum annorum ambitu contineantur. Vix annus  
 integer unus excessit, cum tria Galliæ clarissima extin-  
 cta sunt lumina; primum, cui tu morienti adfuisti, fœ-  
 mina præstantissima, Henrici Regis, de cujus laudibus  
 nulla unquam conticescet ætas, conjux gloriosissima, in  
 cujus capite diadema regium, auro gemmisq; distinctum,  
 effulserat, quæ Regnum amplissimum atque omnium  
 maximum Regina, summo cum imperio ac potestate,  
 administraverat; sed quæ deinde, ut sunt rerum vicissi-  
 tudines, exul, ejecta, opis aliorum indigens, coacta est  
 regiones subinde mutare, ac modo Belgas, modo An-  
 glos, modo Germanos adire, jam ut nullus toto orbe  
 terrarum locus inveniretur, ubi illa posset consistere:  
 cum Cardinalis Richelii secuta mors est, quem omnes,  
 propter præstantem vim animi atque ingenii admiraban-  
 tur, qui tanquam in puppi sedens, Galliæ Regni navis  
 clavū tenebat, qui Regi imperabat, cujus ad nutum & ad  
 voluntatem omnia fiebant, qui eam sibi vim auri argen-  
 tique paraverat, ut ad vices decies centena aureorum  
 millia pervenisse dicatur, neque ex tantis divitiis terun-  
 cium unum secum potuit asferre: postremo, majores den-  
 sioresque Galliæ, atque adeo terræ totius orbi, tenebras  
 attulit, clarissimi omnis fere memoriæ Regis, tanquam  
 solis, occasus. Quis ergo, cui cor sapiat, isto modo  
 Rex,

Rex, isto modo dives, fieri appetat? quis thesauris tam fluxis tamque caducis postmodum inhiat? Et tamen hodie non desunt, qui, thesauri vana spe ducti, caput suum ad incertos casus obijciunt. Proximis diebus, risu digna res accidit; quam, non possum, quin ad te scribam. Est Romæ forum, in quod, cum esses Romæ, non parum sæpe venisse te arbitror, ubi olitores, lanii, fartores, cupedinarii, ponnarii que habitant plures, Scrofa nomine, à scrofa marmorea, versuræ cujusdam domus hærente, sic appellatum. Illuc noctu quidam veniunt, cum operis, vectibus, ac vehiculis; ac signum illud evertere ac demoliri conantur. Quo strepitu excitata vicinitas, ad fenestras accurrit. Quæ, cum videret homines operi intentos, arbitrata est, eos esse parietum perfossores; & clamore sublato, fures, fures, exclamat. Ad quam illi vocem exterriti, protinus in pedes sese conjiciunt. Revertuntur postera nocte; sed eodem modo ejiciuntur fuganturque. At operarum illarum conductor, qui erat Gallus quidam thesaurorum indagator & effossor, cum videret, se nihil clam posse proficere, palam Cameræ Apostolicæ Commissarium, quem vocant, adit; quærit ab eo, quid velit sibi dare, si locum commonstret, unde ingens thesaurus erui possit. Qui, ne longum faciam, quartam ejus, quod inventum esset, partem Gallo promisit. Odorati sunt istuc quidam, ex Porcariis, nobili ac vetere familia homines, ad quos ea porca pertinebat. Qui statim demoliendam eam, suamque in domum exportandam locarunt. Quod ubi Gallus accepit, ex ægritudine in morbum incidit: ac nihil propius esset factum, quam ut ex eo moreretur, nisi Commissarius, & utilitatis suæ gratia, & ut fidem cum Gallo servaret, prospexisset. Nam scrofam referri, & certo in loco asservari jussit. Atque in eo res est, ut ferri cujuscumque acumine tentetur, num quid ea intus habeat inclusum. Sed thesaurus erunt carbones. Illud vero ridiculum, quod, cum Gallus malleo, scrofae latus percussisset, illudque resonare visum esset, Audite, inquit, ut resonat! ergo scrofa intus est vacua; ergo aurum continet. O stultum! o bardum! Profecto non plus sapis, quam lapis ille. Quis unquam conclusit hoc modo, Quia hæc nimirum inanis res est, ergo intus aliquid habet? Immo quia

quia vacua est, illud sit consequens, inaniis arancis eam esse oppletam. Sed ego te nimis obtundu. Vale. Romæ, III Non. Iunii c i o i o c x l i i i.

XXX.

Clarissimo humanissimoque do-  
miño,

T Y R R H E N O.

**E**Cquando mihi, Tyrrhene clarissime, tribuet Deus, ut tibi, pariter pro meritis, referre gratiam possim? Sed quid, inquam, referre, cum id fas esse non ducam? Ecquando contingeret, ut iis saltem tibi verbis gratias agam, ut ii qui audiunt, quantum tibi debeam, perinde intelligant, quemadmodum ipse cogitans sentio? Tua causa factum est, ut meum in Vrbe nomen pluribus sit notius, quam antea erat. Nemo enim est, vel honore ac dignitate aliqua præditus, nemo vir doctus, vel saltem literis tinctus, qui Pinacothecam, operam te plurimum dante, seu honeste de me sentiente, non habuerit, legerit, laudaverit. Ac summus ipse Pont. ea in legendo se voluptate perfundi significavit, ut, in Zoilo, multisque in aliis, quos olim amicitia usque comprehensos habuerat, ridiculos sane homines atque facetos, quo posset quam effusissimos risus efferre, ab oculis conspiciat, ne caderent, sibi sæpe detraxerit. Itaque, cum per Urbem incedo, multorum, quos non alias me vidisse memini, gratulationibus excipior: alii domum ad me, salutandi gratia, veniunt: alii meam sibi amicitiam ultro expetitum accedunt. Quocirca, qui meo antea ingenio nihil tribuebam, qui me nullius esse precii deputabam, nunc mihi esse aliquid videor, nunc facultati meæ precium aliquod statuere pene compellor. Et sane, si inani gloriola ducerer, si existimarem, id meo libro, sermonis elegantia, ac verborum sententiarumque splendore, non autem ex tui nominis claritate contingere; facile me aliquo laudis æstu abripi sinerem. Sed, cum mihi  
pulcre



pulcre sim conscius, quidquid meum opus, ceteroqui obscurum ac leve, splendoris ac luminis habeat, id totum à tuis apud alios prædicationibus corripere, cupiditatis meæ vela contraho, neque ea flatui, qui sese dat, pando. Præterea, non me fugit, historiæ eam vim esse, ut, quovis ea modo tractetur, legentes audientesque detineat. Quid mirum est igitur, si in eorum quasi imaginibus, delectati sint homines, quorum mores rudi oratione, tanquam penicillo, descripserim? præsertim, cum eorum aliquos notitia perceptos, aliquos etiam amicitia conjunctos habuerint. Verum, utut sese res habeat, quidquid à meo mihi libello laudis proveniret, totum humanitati tuæ acceptum refero, maximasque tibi gratias ago habeoque. Si de bello scire expetis, horret animus scribere. Nam, spe pacis exclusa, malorum montes, miseræ Italiæ atque Urbi impendere video. Fœderati adversus nos Principes, oratores ad Pontificem suos revocarunt; armati, cædem, vastitatem, exitium, quocunque venerint, minitantur: atque aliquot equitum illorum turmæ, multa cum nostris prælia committunt: utrum secundo eventu, an secus, non audeo scribere; quia adhuc certi nihil affertur. Vtinam Deus, peccatis nostris iustus, tandem aliquando illorum obliviscatur, iram ponat, ac tot tantisque malis, quæ, volucris cujusdam instar, cœperunt late cursum extendere, ne longius progrediantur, tanquam alas evellat. Equidem augor animi, cum cogito, Italiam, quæ sola, ex omnibus orbis terræ partibus, in summo ocio & tranquillitate vivebat, nunc Principum suorum animis in ipsius perniciem conversis, eidemque discordiarum faces subjicientibus, ardere bello; cujus belli incendium, non aliter, nisi ipsius ruina, opprimatur. Plura scribere prohibet dolor. Vale. Romæ, Idibus Junii

CICERO CXLI II.

## XXXI.

Clarissimo doctissimoque viro,

T Y R R H E N O.

**Q** Vos Pinacotheca nostra successus hic Romæ habuerit, quodq; fuerit de ea eruditorum fere omnium iudicium, satis superioribus meis ad te literis scripsi; & fortasse nimis elate tumideque omnia narravi. Itaque non repetam; ne videar imitari militem gloriosum, cuius omnis est de suis laudibus oratio. Lucas Holsternius miris etiam laudibus extulit, mihiq; amantissimis verbis gratulatus est laudem, quam apud omnes, ut aiebat, meruisset. Magno est apud suum Principem in amore & gratia; interioribus ejus consiliis adest; & saepe in eadem cum ipso rheda conspicitur. Neque Philosophiam; neque Græcas literas, in Gymnasio Romano docet, sed locuplete sacerdotio, in Basilica Vaticana, præditus, summa illud cum diligentia ac sollicitudinis laude administrat. Nam cum possit, summi Pont. privilegio, laborem veniendi in Ecclesiam, & cetera, quæ sunt ejus muneris, exequendi, lucri facere, nec quidquam ex nummis deperdere, qui distribuuntur, in viros, præsentibus, nulla tamen in re patitur desiderari à se præsentiam atque operam suam. Scribis, istuc pervenisse Dialogos; ac jure queres, nec eleganter, nec nitide, nec emendate fuisse impressos. Et sane, vir doctissimus Nihusius rei humanitate sua dignissimam faceret, si eos in Belgio rursus imprimendos curaret. Quibus posset addere alios duos, nomini inscriptos suo; quos ad eum misi. Quam vellem, epistolis meis contingeret, ut elegantissimis illis typis impressæ cernerentur! Multa sunt in eis scripta lepide, multa graviter, multa facete, quæ lectorem possent vel delectare vel juvare. Eas secum attulit Naudæus: at si cupiditati huic meæ commoda spes aliqua, tanquam benignum aliquod sidus, affulgeret, scriberem ad illum, ut eas ad me quamprimum mittendas referendasque curaret. Gaudeo vehementer, in veterem te optimæ valetudinis statum fuisse

fuisse revocatum, jamque viribus plane recuperatis, ex domesticis parietibus, tanquam è tenebris, foras in lucem exire, rheda per urbem vehi, ad amicorum ædes, salutandi eos gratia, venire: ac Deum rogo, qui te, superiore anno, acerbissimis illis doloribus satis habuit exercitum, ut tantum tibi bonum velit esse perpetuum. Oris tui, venerabilis cujusdam venustatis elegantiaque referti, imaginem, à te missam, accepi: de qua maximas tibi gratias ago. Et sane digna est, cui omnes illos honores, clarorum virorum imaginibus haberi solitos, adhibeam: ut nimirum rosis violisque, omnique florum genere, perpetuo eam coronandam excolendamque procurem. Scripsi, tuo mandato, ad eruditissimum virum Puteanum, jam ex eo tempore mihi fama notissimum, quo tempore Iusto Lipsio in docendo successit. Legi etiam doctissimos libros, ab eo editos. Cui si quid de me spondesti, dependendum tibi erit. Novi enim humanitatem tuam, novi ardorem animi, quo servis & amicis tuis faves, mihi præsertim, quem amandum orandumque suscepisti. In qua voluntate ut perseveres, te etiam, atque etiam rogo. Romæ, 17 Idus Junii  
CICERO CXLIH.

## XXXII.

Omni humanitatis omniumque elegantium literarum genere excultissimo viro,

T Y R R H E N O.

**Q** Vaternio, qui proxime ad te mittitur, nescio quo casu aberravit à ceteris. Quæso te, ut mandes cuiquam è tuis, ut eum in ordinem redigat, & locum, quem amiserat, obtinere procuret. Credo, jam mearum epistolarum tædeat; jam te arbitor scriptorum meorum, vel ineptiarum potius, satietatem fastidiumque cepisse; jam hiuc audire te arbitror, me tuam molestiam, tuum odium, tuam pestem appellare; ac fortasse millies diei illi male precaris, quo die tibi venit in mentem, ad me scribere, ut sæpius ad te literas darem. Sed humanitati tuæ culpam assigna, quæ, gratiæ scilicet causa, se largius in

eum effudit, qui modo continere se nequeat, sed longius progrediatur, & urbanitatis modestiæque fines excedat. Expectatur Romæ Octavius Piccolomineus, popularis tuus, ac fortasse etiam vel cognatus vel affinis; ille, inquam, Piccolomineus, qui in Germania simul rem & gloriam, armis belli, tantam reperit, ut nullus sit in toto orbe terrarum locus, vel tam disjunctus vel tam remotus, quo non ejus nominis fama pervaserit. Dicitur excepturus eum hospitio, apparatu ferme regio, Card. Sacchetti. Expectatur ab omnibus vehementer; qui os illud laudabile & honestum videre cupiunt; quem, tam sæpe audierint, tot secunda prælia fecisse, tot hostium copias profligasse, tot urbes manu cepisse. Atque arbitrator, cum auditum fuerit, eum ad Urbem adventare, universam hanc civitatem, prope ex suis sedibus evulsam, obviam illi iuram. Tantum eidem amoris benevolentiaque concitavit, in hominum animis, virtutis splendor ac gloria. Et sane est, quod plurimum vestra illi patria debeat, quæ nunc, eo præsertim nomine, omnium linguis ac literis celebratur, quod talem ex se civem genuerit, cui nemo hodie, bellicæ virtutis laudibus, aut feratur. Cui patriæ ego quoque faveo, cum in ea Germanico Ptolemæo, viro primatio, nupta fuerit, ibique diem suum, obierit soror mea germana. Atqui, si talis nobis dux in eo, in quo hunc premimur, bello contingeret; profecto, qui illud nobis habent indictum, profligati atque deleti, tam præcipitis sui consilii poenas darent; qui, ut privatas injurias, si quæ tamen ipsis factæ sunt, persequantur, conversis in Ecclesiæ Romanæ viscera armis, ejusdem patriæ nonium, cujus tutores fideles esse deberent, ipsi diripiunt. Vbi pietas? ubi Dei immortalis metus? Ecquando audivimus vel legimus, Christianos Principes universos contra Ecclesiam conjurasse, servos contra dominum, filios contra parentem? Quæ jam propagandæ religionis ratio relinquitur, cum ea ibi, unde tanquam à capite diffundi in omnes orbis terræ regiones oporteat, quasi exarnisse videatur? Illud vero, quod nunciatur nobis, execrabile atque horrendum, quod, cum Mutinæ indulgentiæ quædam essent promulgandæ, atque usitatum illud esset ap-  
positum

positum, ut pro matris Ecclesiæ exaltatione ad Deum preces effunderentur, quidam qui ibi erat, (si vera sunt, quæ dicuntur,) cum imperio iussit illud quantum potest, removeri, quod precationem illam diceret, fœderatis Principibus esse contrariam, qui ad Ecclesiam opprimendam arma conferrent. Et, quod dolorem in primis augeat, illud est, quod ita omnia turbata atque permixta esse cernuntur, ut, quinam sit futurus tantorum malorum finis, vix quisquam conjectura assequi possit. Summa atque præsentis Dei ope auxilioque opus est nobis; quod nisi præsto sit, intelligimus, omnia ad extremum casum esse ventura. Vale. Romæ, VI Kal. Iul. CIO IO CXLI II.

## XXXIII.

Clarissimo doctissimoque viro,

T Y R R H E N O.

**V** Ereor, ut meæ ad te literæ perferantur. Nam duobus ferme ab hinc mensibus hebdomadem nullam prætermini, quin aliquas dederim. Neque dubium est, quin, si eæ tibi fuissent redditæ, tu, vir in his officiis persequendis diligentissimus, unis saltem earum, responsum aliquod dedisses; præsertim, cum earum nullæ non aliquot Exemplorum quaterniones adjunctos habuerint, quos nollem antea interiisse, quam tuis sese oculis subiecissent. Verum, quæcunque eos fortuna vel casus exceperit, in eandem ceteri, qui apud me reliqui sunt, aleam eunt. Accepi à quodam, qui se vidisse affirmat, fuisse Romam missa tria Endemiæ exempla, denuo, cum auctario duorum librorum, qui desiderabantur, in Belgio impressæ. Hunc ego librum, ob locorum propinquitatem, celerius quam ad nos, pervenisse istuc arbitror, jamque palam omnibus esse venalem. Nobis ab amcenioribus his libris animum avocat belli gravitas atque acerbitas, quod infertur à Sedis Apostolicæ hostibus. Quamquam se appellari nolint hoc nomine: de quo quid ad te scribam, non habeo; nam certi quidquam sciri non potest. Illud vere tibi posse affirmare videor, plena esse omnia timoris, ac, nisi nos Deus respiciat, magnam Ecclesiæ

Rom. oppidis, atque in primis Vrbi Romæ cladem instare. Tanta, in fœderatis Principibus, adversus eam consensio atque ardor inspicitur. Principis Etrusci triremes ante Tiberis ostia navigant; quidquid illis occurrat, deprædantur; vinum, frumentum, salsa mæriatica, aliaque ad vitæ usum necessaria, quæ à mercatoribus Romanam advehuntur; suos quoque piscatoribus lembos adiungunt: itaque magnam Neptuni pecudum caritatem, vel potius nullam earum copiam, fore nobis hoc anno, omnes existimant. Ideoque necesse erit, quibus diebus de more jejunium indicitur, coenam asperam atque terrestrem inire; nisi forte Tiberis, ac vicini Vrbi lacus ac rivuli paucos, minutos, & insuaves gutturi pisces supeditaverint. Bellatores nostri nihil ferme adhuc egregium ac magnum ex se dedere. Nam si secundæ, de illorum præliis, res essent, continuo per ora omnium tota Vrbe circumferrentur. Illud potius ad nos perfertur, quodcumque illi amicorum in oppidum veniunt, tanquam si hostes essent, statim illud diripere, cædem hominum facere, pecus abigere, agros vastare; atque alia flagitia, contra jus fasque, committere. Quæ, quamquam nemini sit dubium, invitis atque etiam insciis iis qui Remp. administrant fieri, tamen cum rerum statum, in quo versamur, nobis ante oculos statuunt, sine dolore audiri commemorarique non possunt. Quid aliud dicam, nescio; nisi, advenisse tempus, quo peccatorum nostrorum pœnas luamus. Vale. Romæ, Kalend. Iulii  
C I O I O C X L I I I.

## XXXIV.

Clarissimo doctissimoque viro,

T Y R R H E N O.

**N**E tibi mirum videatur, si breves hæ tibi à me literæ veniant. Iam pridem enim tuæ, quæ longissimarum mihi epistolarum argumenta præberent, conticuerunt. Quod qua ratione sit factum, satis percipere nequeo. In tanta argumenti inopia, ad te scribendi occasionem sumerem ex bello, quod, cum magna totius  
Christiani

Christiani orbis offensione, à Principibus, Ecclesiæ Romanæ infertur : sed certi nihil, quod affirmare audeam, suppetit ; ita incerta & ex cujusque libidine ficta ad nos omnia perferuntur : quædam vero pauca, quæ dubitationis nihil habeant, sunt ejusmodi, ut sine lacrimis audiri non queant. Quam esset optandum, ut mendaciorerentur, quæ modo sunt nobis allata ! primum, de Venetum classe, quæ ad portum Cæsennaticum appulit, & classiariis, qui in terram egressi, oppidanos, omnia magis quam prælium expectantes, aggressi, oppidum illorum ceperunt, diripuerunt, inflammaverunt : deinde, de magni Ducis exercitu, qui Castilionum, loci natura egregie munitum, obtinuit. Exercitus noster, in agro Perusino, idoneo castris loco delecto, iis se continet, neque hostem prælio laceffit ; interim loca amenissima ac fertilissima, arboribus cæsis, vitibus amputatis, ædificiis corruptis ac pene dirutis, ita fœda atque horrida reddidit, ut prata collesque, qui antea nitidi cultique ridere, & suas jactare opes, consueverant, nunc squalore situque horridi, lugere, sibi que inflicta ab iis, à quibus conservari deberent, vulnera demonstrare ac lamentari videantur. Eadem, atque etiam major, à nostris agro Ferrariensi ac Bononiensi calamitas accidit ; quos, eorum duces, vel quia aliter fieri non possit, vel ut eos sibi obnoxios faciant, luxuriose nimisque liberaliter habent. Sed hæc hætenus. Heri, pridie Non. Iulii, duo notissimi homines morte extincti subita sunt ; nobilis quidam Gallus, Bulgarinus, qui erat Pontifici Max. ni fallor, à supplicibus libellis referendis, & alia publica munera administrabat ; ac summo vir ingenio, singulari eruditione, ac præstanti doctrina, Lælius Guidiccionus, quicum tibi, homini perfecto in literis, ac literatorum omnium studio, usum amicitiamque fuisse, non dubito. Magnum profecto, improvise ejus interitu, damnum elegantissimarum artium studia fecerunt. Et quamquam tibi mihi que, quibus ob singulares ejus virtutes erat unice carus, mors ejusdem luctui sit, tamen non immodicam debet perturbationem asferre. Satis jam satis nota nobis est humanæ vitæ condicio. Non enim ea donata nobis est à Deo, sed credita : quam, cum vult, repetit. Im-



alibi &  
xerat.

mo, si ex Iulii Cæsaris sententia, finis vitæ repentinus inopinatusque præferendus est lento tardoque, est quod illi magnopere gratulemur, qui, celeri ac subita morte, molestissimis, quas longa ægritudo habet, incommodis atque doloribus sese subtraxit: præsertim cum ille optimo vitæ genere, ac sanctissimis moribus, quibus erat præditus, omnibus horis, ad mortem æquo animo obcundam, se esse paratum ostenderet. Tu vero, valetudine tua studiose diligenterque curanda, te nobis quam diutissime incolumem serva. Romæ, VIII Idus Iulii C I C I O C X L I I I.

## X X X V.

Clarissimo, omniumque virtutum laude præstantissimo viro,

T Y R R H E N O.

**S**I meis ad te literis recreari te ac reficere dicis, ego viciissim, tuis reddi mihi animam, sentio. Ita sunt lepida, elegantes, venustæ; ita redundant humanitate, benevolentia, amore. Illustrissimi Chisii narrationem de puella Sicula, à te mihi missam, summa legi cum voluptate, ac totidem plane verbis in meum librum transfuli; neque quidquam sum illi ausus addere vel demere; quis enim speret, se posse nitidius, limatius, elegantius, & ornatus dicere? Afficio illam injuria, quod meis illepidis, inveniustis, indifertis narrationibus inseram: verum hæc injuria, ea utilitate & commodo compensatur, quod inter orationis meæ tenebras, clarius Chisianæ splendor elucet. Reliquum est, quemadmodum superioribus meis ad te literis scripsi, ut de specioso aliquo titulo, eidem præfigendo, cogitemus, qui hominum ad se studia, legendi cupiditate, impellat. Peto à te, pro tua singulari humanitate, ut, in tuis maximis curis, aliquid impertias temporis huic quoque cogitationi. Nudius tertius, I I I Idus Iulii, habita sunt Cardinalium Comitia, & quindecim numero in eum ordinem relati; quorum nomina, & insignia, ab iis qui tua hic negocia

negocia procurant, accipies. Spero, quamprimum fore, ut mihi liceat, hunc tibi honorem, ~~tuis~~ in maximis in Remp. meritis debitum, gratulari. Varie, per omnem civitatem, lætitia, mæror, tristitia, atque gaudium agitur. Qui fuerunt cooptati, tum ipsi, tum eorum propinqui, amici, clientes, famuli, suos ad lætitiæ animos excitant, atque onerant se hilaritate. Qui vero fuerunt præteriti, una cum iis, quos aliquo necessitudinis vinculo sibi habent adjunctos, tristantur, dolent, incærent. Ego, quem ætas, voluntas, professio, ab omni ambitione prorsus abstraxit, mecum tacitus rideo, & tanquam in portu sedens, istorum sollicitudines, quasi fluctus, quibus agitantur, aspicio; neque ineptam hominum quorundam rationem satis inirari jam queo, qui tanta cupiditate studioque ferantur in ea, quæ ventis ac flamma citius evolent, nec vestigium aliquod sui relinquant. Ipse, mea ætate, Cardinalium collegium renovatum instauratumque decies vidi; neq; ex tam multis, qui deinceps adscripti in hunc honestissimum ordinem fuerunt, quemquam meminimus, præter admodum paucos, quos ingenii sui monumenta, omnis posteritatis memoriæ commendaverunt. Qui ideo sunt illustres maxime, ac nobiles, quod literis doctrinaque floruerint. Itaque non est, neque cati neque sapientis, cogitationes suas in iis rebus habere definitas, quæ neque diutius esse nobiscum, neque propagare nostri memoriam nominis possint. Deum ac cælum, propositum ac meditaturn in perpetuum habeat oportet, qui solida, neque ullo unquam tempore interitura, desiderat. Virtuti ac literarum studiis det operam necesse est, qui aliquam in posterum nominis sui famam efflagitat. Sed jam videre te videor, stomacho & iracundia efferri, & loquacitatem meam oratione vultuque perterrere, qui, meis ad te literis, iis de rebus præcepta dare sustineam, quibus tu onerare alios possis. Quamobrem scribendi finem facio. Vale. Romæ, Id. Iul. c i o i o c x l i i i.

## XXXVI.

Clarissimo , omnisque elegantia doctrinæ  
instructissimo viro,

T Y R R H E N O.

**I** Am tibi mecum licet , non ut cum Rege vel Imperatore , agere ; sed cum privato , vel potius cum servo tuo , ut antea , loqui. Nam abrogatum est mihi imperium : nullæ militum custodiæ domum meam observant ; nullis ab armatis , domum veniens , excipior ; nullas lanceas , nulla tormenta bellica , domus meæ parietes sustinent ; omnis superbia , omnis fastus abscessit ; nullæ gloriandi , nullæ mihi , se aliis præponendi , causæ supersunt ; nisi illud justam gloriandi , meque magnifice circumspiciendi , causam dicas asferre , quod mea domus inter binas duorum Cardinalium ædes includitur , & quod paulo supra , in ( cenobio , Cardinalis item alius commoratur , ut sit novis Urbis munitionibus , quibus præest , ipse propinquior ; quodque fulgore purpuræ circumquaque præstinguor. At hoc , incommodo mihi potius ac servituti , quam honori & utilitati esse experior. Nam si quando huc illi se conferunt ; non enim , præter unum , eorum quisquam has ædes , quas dixi , perpetuo incolit , sed ex intervallo habitat , quod sint angustiores , quam ut Cardinalis unius familiam possint excipere : si quando , inquam , accedunt , eorum familiares atque pedissequi omnia turbant ac iniscent ; qui , dum domini descendant , expectant , perstrepunt , clamant , alii domus meæ limen inferum occupant , ibi alea ludunt , velitantur inter se , conviciis expetunt , neque solum egredienti regredientique mihi non assurgunt , decedunt , caput detegunt , salutem impertiunt , verum etiam vix tantulum loci aperiunt , unde pedem domo possim efferre , & ad mea negocia progredi. Interea canum ululatus latratusque non intermittuntur : qui canes , modo binis , modo ternis , modo senis choris , horribiles sonos edentes , meditant mihi impias inferorum sedes , damnatorum fletus  
& stri-

& stridores dentium referunt. Credideram, novæ dignitatis accessionem, omnem ejus, de quo sæpius questus sum, ab animo venandi cupiditatem & studium ejecisse; sed, ex canibus qui etiam nunc aluntur, facilis est conjectura, hac eum adhuc cupiditate teneri. Sed nimis quidem sum progressus. jam vereor, ne illud mihi obijciatur, *Hypocrita. ejice primum trabem de oculo tuo; & tunc perspicias ut educaas festucam de oculo patris tui.* quid tu? nullane habes vitia? immo alia, haud fortasse minora. Itaque capio vorsoariam, & ad alia me recipio. Inscripti-  
onem, quam Exemplorum libro præfigendam tradis, laudo; verum, & hauc, & quancunque aliam, quæ tibi magis placuerit, utpote ab ingenio tuo partam, quo nihil præstantius, nunquam potero non vehementer probare. Placet etiam exemplum, quasi symbolum, à te, tanquam à conviva, collatum; ac ceteris addidi, meo illo rudi incultoque stylo, quoniam vetas me tui vel cujusquam mentionem facere: nam si licuisset mihi, illud à te missum, dicere, non aliis nisi tuis elegantissimis verbis explicassem. Sed quoniam mihi narrantis persona incumbit, consilium fuit, ab aliis verba non mutuare, sed propriis, quamvis deterioribus, uti,

—ne, si forte suas repetitum venerit olim

*Grex avium plumas, moveat cornicula risum.*

Vale. Romæ, XIII Kal. Aug. CIOIO CXLIII.

### XXXVII.

Doctissimo clarissimoque viro,

T Y R R H E N O.

**C**onstans est hic omnium sermo, te Romam evocari, ut munus apprime honorificum geras. Qua fama mire sum recreatus, quod nihil mihi post hac literarum præsidio, ad te oratione mea compellandum, futurum sit opus, sed præsens præsentis omnes animi mei sensus, & in eum illud in primis singulare erga te studium, non quoquo modo expressum in charta sim explicaturus, sed, coram adductum, tuis ipsemet oculis subjecturus. Summa insuper affectus sum animi voluptate, novi

G g s

tibi

tibi honoris accessione, ad summam amplitudinem adiutum esse patefactum, si id, quod spero, eveniet. Quod duobus, qui deinceps eam provinciam administraverant, accidit; quos, proximis comitiis, in amplissimum ordinem cooptatos vidimus. Quamvis superfluum existimo, novis functionibus, tibi demandandis, industriæ tuæ, jam satis notæ atque perspectæ, amplius periculum facere. Iam pridem enim, si sit in Rep. bonis artibus locus, assecutus es, ut tibi ordo ille debeatur. Omnia sunt in te, neque me amor fallit, quæ in homine, honori illi inaturo, requiruntur. Mitto ea, quæ à nobis non pariuntur, sed à natura, vel à majoribus tradita, accipiuntur; patriæ nimirum nobilitatem, ingenii præstantiam, generis claritatem, opes, divitias. Nonne, ab ineunte ætate, omnia voluptatibus denegando, directum illud ad virtutem iter persequendo, omnium liberalium artium studiis operam dando, & postquam ad Remp. accessisti, labores pro ea plurimos suscipiendo, dubia longissimarum peregrinationum itinera atque pericula non reformidando, sed alacriter ineundo, commissa tibi munera, summa cum integritatis iustitiæque laude, administrando, denique fide, probitate, industria, prudentia, promeritus es, bonorum omnium suffragio, qui ampliora ista putant, quam quamvis mendacem inanissimi splendoris speciem ac fœdum, ut ea tibi virtutis insignia deferantur, quæ forsitan aliqui etiam sine virtute adipiscuntur? Et sane haud optimo more inductum in Remp. est, ut interdum sint, qui, ambitione vel gratia vel pecunia freti, ea præmia ereptum eant, quæ virtuti uni debentur. Hos ego soleo dicere, non honores, sed honorum insignia, fuisse consecutos: siquidem ille verus est honor, qui cuipiam, probitate, atque opera probata, & maximis in Reip. meritis, summo eorum, qui recte sentiunt, studio & approbatione, defertur. Sed his omissis, quæ nihil ad me attinent; ut ad id, unde digressus sum, redeam; gestio præ lætitia, diem illum esse venturum, quo (nisi quid interea mihi humanitus accadat) te mihi licebit aspicere, tuisque sapientissimis sermonibus interdum animum pascere, mentem formare, ac doctissimis præceptis imbuere. Neque me illud terret, quod eis, qui huic

— eidem

eidem muneri, cui nunc tu præficeris, sunt præpositi, tanta esse occupatio soleat, ut non multum, literarum studiis & consuetudini amicorum, ocii relinquatur. Nam spero, pro ea qua me benevolentia complecteris, subcisivi noui nihil temporis te esse mihi daturum, pro eoque, quo erga bonas literas studio flagras, ocii aliquid inventurum, quo animum, negotiorum occupatione districtum, doctrina relaxare, atque ex forensi strepitu pene confectum reficere possis, teque præterea auribus, quando perpetuis plurimorum querelis clamoribusque fuerint defessæ, quietem aliquam, mitibus amicorum colloquiis, esse allaturum. Interim Deum enixe rogabo, ut te, periculis omnibus, quæ à longis itineribus *vix* solent abesse, ereptum, saluum nobis & incolumem reddat. Vale. Romæ, VII Idus Aug. CIO IO CXLIII.

## XXXVIII.

Clarissimo sapientissimoque viro,

TYRRHENO.

**D**Ecem ferme ab hinc dies, acris atque molesta *me* lippitudo invasit, ac male habet. Cumque aliquid, post cibum præsertim, vel legere, vel scribere, vel etiam cogitare instituo; ea pituitæ vis ad oculos defluit, ut eisdem pene lumen eripiat. Itaque, de medicorum sententia, cogor avocare animum à literis, vel saltem tantisper, dum ejusmodi ægritudo abscedat, paululum ex studio detrahare. Ac Moonsius noster, (ita ejus est benignitas,) quo ego oculis meis parcam, neque molestiæ plus quam habeant addam, errata graviora, nam levia prætermisit, quæ, typographi incuria, in meos Dialogos irrepererunt, colligendi emendandique partes sponte suscepit. Nunquam enim ita fuisset audax, ut hanc tali viro provinciam imponerem. Quos *Dialogos* rursus, in Belgio, typis mandandos esse, est mihi gratum in primis: tibi que, cujus honoris gratia hoc fiet, immortales gratias ago. Et quoniam aliquod illis additamentum quæris, reperi inter paginas, quas Vulcano destinaveram, *tres alios*, quorum mihi memoria penitus ex animo exciderat;

ciderat ; quos ad te mitto. Vrinam dare possem illos etiam, duodecim numero, quos una cum epistolis, orationibus, ac versibus, Naudæus secum attulit in Galliam. Sed, quod ad versus attinet, posse arbitror, ex iis, quos post ejus ab Urbe discessum feci, breve aliquod corpus confici, & istic, si tibi videatur, imprimi. Sunt autem, primum Epistola Catharinæ Senensis, ad Christum sponsum ; quam dulcissime tibi scriptam videri dixisti : tum illa, quam anno superiore, satis longam ad Episcopum Neritonensem dedi, nec adhuc scire potui, tibi redditam fuisse, quod nullam, in tuis ad me literis, ejus mentionem facias : deinde illa, in qua Cardinali Cappono, pluribus versibus, ejusdem Nuncii Apostolici Chisii laudes narro : accedunt aliæ duæ ; una ad Silvestrum Colliculam, medicum Pontificium, quam summus Pontifex, quem ipsemet nosti quam sit elegans harum rerum æstimator, lectam, ita probavit, ut mirum sibi videri dixerit, id quod ego minime volo, me in Francisci Cardinalis familiarium numero non inveniri ; altera, ad nobiles pueros Accorambonos, referta omnibus iis præceptis, quibus ætas puerilis institui ad mores optimos solet. Verum, de tota hac re tu ipse statuas velim ; cujus auctoritatem non licet mihi defugere. Tui etiam juris volo esse, Exemplorum libro titulum, qui magis placeat, præfigere. Sunt etiam aliæ apud me quatuor, non illepidæ, narratiunculæ, à viro gravissimo mihi traditæ ; quas, oculorum morbo impeditus, adhuc non potui Latinas reddere : sed proximis ad te literis venient. Decrevi, nisi tu aliter censeas, novam alteram Pinacothecam exstruere, in quam eorum, qui prætermissi sunt, quorum magnus est numerus, imagines referam. Video enim, hoc scriptorum genus vehementer omnibus probari ; ac vix potest ejus, quam nuper edidimus, exemplorum haberi amplius copia, ob numerum emptorum, qui à mercatoribus arcessitus in Urbem confluit. Ut vendibilem hanc esse mercem oporteat. nam proba merx, ut inquit ille, facile emptorem reperit, tametsi in abstruso sita est. Sed antea absolvendum est aliud opus quod tibi promisi, ac jam ferme ad exitum perduxi ; quo in opere, ex singulis Evangelii capitibus, quæ omnibus



omnibus totius anni Dominicis in sacrosancto Missæ sacrificio leguntur, terna puncta excipio, moribus conformandis utilia. Sed, quod pene sum oblitus, epistola, qua liber Exemplorum, quem non minus gratum omnibus fore confido quam Pinacothecam, Illustrissimo Chisio inscribitur, nihil habeo quod addam vel detrahā; nec, si inaxime cupiam, possim; nullum enim ejusdem apud me autographum, quod ais, retinui, quoniam describendi ac relegendi, quæ scripsi, laboris impatiens, ipsamet soleo eorum exemplaria tradere: hinc fit, ut pluribus referta sint mendis. Quamobrem etiam atq; etiam à te peto, ut si quid in ea epistola perperam scriptum invenias, pro tua singulari in me humanitate, corripas, castiges, auferas, quodque sit aptius, reponas. Mittam oris mei imaginem, egregii delineatoris manu in pagella descriptam. Conabor etiam, cum aliquid aliud, tuo nomini dicatum, emittam, in epistola ostendere, illud insigne, quod vehementer mihi probari scripsi, iis omnibus refertum laudibus esse, quæ in inventionis genus conveniant. Nam librum scribere de Impresis, quas vocant, supervacaneum duco. Sunt enim multi, qui de hoc eodem argumento docte eleganterque commentati sunt. Vale. Romæ, v i i Kal. Sept. c i d i d c x l i i i.

## XXXIX.

T Y R R H E N O,

V. C. sapientissimoque.

**L**ippitudo, quæ me sollicitat, non modo non decre-  
scit, sed fit etiam molestior, quoties vel animum ad  
aliquid cogitandum instituo, vel oculos aut manus ad  
legendum vel scribendum adhibeo. Quamobrem non  
tibi mirum videatur, si posthac vel rarius vel pauciori-  
bus verbis ad te scribam: nullus est mihi domi, cujus  
oculis ac manibus legam ac scribam. Habeo tamen huic  
morbo gratiam, quod non antea me invaserit, quam  
librum Exemplorum abolverem. Nam nullum mihi  
amplius occurrit, nisi frigidum, aut nugatorium, aut  
vul-

vulgare. Ideo scribendi finem faciam. Accepi iterum familiae tuae, in primis nobilis, insignia, & symbolum, quo, apertum, nullisque simulationis vel dissimulationis involucris testum, tum semper sibi constantem animum tuum significare conaris. Nam is hodie mos viget, ut tecti ac prudentis hominis famam obtineat, qui perplexa uti oratione sciat, vel, si dicendum est apertius, qui lepide eleganterq; circumvenire in negotio aliquem norit, ut, cum aliquid cuiquam promiserit, nec manere in eo quod promiserit velit, ne fidem fallere videatur, aliquem in verbis recessum ac latebram habeat, quo confugiat, neque satis, quod dictum esset, illum, cui promissa facta sunt, intellexisse convincat. Quod hominum genus odi maxime, lingua factiosum, ut ait ille, iners opera, sublesta fide. Ut, si cum hominibus istis sit vivendum, jam me Remp. non attigisse, minus poeniteat. Placet mihi etiam vehementer symbolum, quod, insignis familiae tuae loco, in vestibus sacris usurpas, Christum crucifixum, cordi impressum, palmam inter & olivam, corona circumdatum. Utinam ille, exemplo tuo, cordi etiam in eo perpetuo infixus inhæreat; utinā solus mea sit pax, corona, atq; victoria; utinam, rebus omnibus humanis fluxis & caducis valere jussis, tota illum mente complectar: nam abunde mihi erunt omnia cum eo. Legi Episcopi Neritonensis nostri carmen, in eandem fere sententiam, elegantissimum, plenissimumque pietatis ac religionis, quod P. Benedicto Leodio misisti. Sed cum illud semel, iterum, ac saepius legissem, nec expleri satiarique possem, contigit idem mihi, Iano, Nicio seni, quod olim Achilli, summæ spei puero, contigisse narratur: qui, cum Chironis in antro canentem Orpheum audivisset, *dictum ex hoc, lenire tigres, rapidosque leones*, puerili quodam impetu, & egregio in Orpheum amore correptus, lyram arripuit, ad eamque cantoris præstantissimi laudes, rudibus & inconditis versibus, cecinit. Ita ego etiam, pari erga te amoris æstu percitus incensusque, non potui me continere, quin versibus, quibus jam diu abstinui, præstantissimum illum Antistitem Chisium, ut possem, celebrarem, eorumque te compotem redderem, Ac velim, mihi quoque idem evenire,

re, quod Achilli; qui, quamvis aliis, qui audierant eum, ridiculus fuisset, Orpheo tamen, illius in se amore delectato, gratissimus extitit. Scio, me aliis, quibus meus in te amor & observantia nota non sit, ineptum & inconcinnum visum iri: at id mihi minus molestum erit, si tibi gratum, & non leve amoris in te mei argumentum, quodcunque à me prodierit, accidisse cognovero. Vale.  
Romæ, Kal. Septembr. C I O I O C X L I I I.

Illustrissimo ac Reverendissimo D. FABIO  
CHISIO, Episcopo Neritonensi, & Se-  
dis Apostolicæ apud Vbios Nuncio.

**S** Temmata majorum, speciosaque nomina patrum,  
Quorum alius fulvo renitens se jactet in auro,  
Frontem alius Tyrio pratendat murice vinctam,  
Sitque alius tumidus fama & felicibus armis,  
Quod magnis olim legionibus imperitarit,  
Numine celesti doctus cum spernis & odis,  
Iure mihi sapiens, prudens, rectusque videaris.  
Non fugit insani speciem, quem gloria mendax  
Decipit, & tenuis fallax splendoris imago,  
Vel, circum validis oneratum colla catenis,  
Tradidit addictum vitiis damnosa voluptas.  
Maeste animo, Chise; maeste, inquam, ingentibus ausis,  
Cujus tanta replet magnum sapientia pectus,  
Ut satagas, stultos inter, non stultus haberi.  
Hac sedeat victrix alte sententia menti,  
Ut, præter Christum, nullus te torqueat ignis.  
Ille tibi sit solus amor, sit sola voluptas,  
Divitieque, decus. non se tibi præferet ullus,  
Non proprias jactabit opes, quas conteret usus,  
Prærodetque vorax, annis properantibus, ætas.  
Si Christum teneas, veniunt simul omnia secum:  
At si, quidquid arant Cilices quidque India mittit  
Auri, possideas, ac regum sorte beatus  
Sub tua jura trahas totum, quod continet orbis,  
Et Christo careas, fies jam vilior alga.  
O te felicem, claudis si pectoris arce  
Auctorem & dominum rerum cælique potentem.

*Non illum extremi veniens tibi temporis hora,  
 Non vis hostilis rapiet, non prava libido  
 Fortune, repetentis opes, quas caca ministrat.  
 Namque erit illa dies, tenebris adoperta capillos,  
 Cum cita mors veniet, tacitoque simillima furi;  
 Detrahet ac regum capiti, decora alta, tiaras,  
 Coget & indignos, ostro gemmisque superbos,  
 Non bene commissos, tristes, deponere honores;  
 Quæque, suum fraudans genium, compar sit avarus,  
 Dilaceranda gemens heredi tradet hianti.  
 Eja, age, sit Christus tua spes, tua maxima cura;  
 Sit pax, delicia, pugnarum palma, corona;  
 Ut tua promittunt lepidis nova carmina chartis.*

## XL.

Clarissimo doctissimoque viro,

T Y R R H E N O.

**M** Agnas, singulares, ingentes Nihusio, optimo viro; nec non omnium virtutum laudibus cumulatif-  
 tissimo Præfuli Chisio, à quo illi sum conciliatus; gra-  
 tias habeo: qui Nihusius tanta celeritate diligentia-  
 que Dialogos in eos, vix dignos, qui semel à vobis con-  
 spiciantur, nedum legantur, imprimendos edendosque  
 curavit, ut antea Romam impressi redierint, quam, il-  
 luc eos pervenisse, quisquam suspicari potuerit. Et sane  
 vobis, ne ii, quibus minus nota sit hominis humani-  
 tas probitasque, voluisse eum arbitrentur, quamplurimos  
 inscitæ infantiaque, meæ testes hac ejus sedulitate diligen-  
 tiaque colligere. Nam multa eorum vitia, quæ, si jace-  
 re potuissent in tenebris, acutorum hominum aciem ef-  
 fugissent; nunc, iis in luce collocatis, etiam nolentibus,  
 in oculos defiguntur. Quæ ut ita sint, ejus tamen miri-  
 fica in me voluntate mire delector, ineque ab eo amari  
 gaudeo; neque quidquam tam cupio, quam pari, atque  
 adeo majori aliquo munere, memorem me illi probare.  
 Præterea, quamquam, in hujus editione Tibelli, ingenii  
 mei existimatio non nihil agatur, hanc tamen existima-  
 tionis

tionis jacturam æquo animo feram, si argumenti gravitas, hominum offensionem, in quam, ob jocorum, quibus fortasse nimium indulsumus, levitatem, incurrimus, obliterare aliqua ex parte potuerit. Symbolum, à te missum, fuit mihi gratissimum: & quamquam res ipsa, quam ita eleganter narras, multo mihi esset antea nota, non audebam tamen meum in librum eam referre, quod nullum ejus auctorem, præter rumorem, haberem: nunc, quoniam eam auctoritate & probatione tua niti video, jam nullus mihi dubitandi relictus est locus, quin ea sit verissima, neque ab arguto aliquo homine, & ad jocandum in primis apto, joci causa, ad voluptatem aurium efficta. Cupio te Romæ, cum aliqua honoris accessione, quamprimum videre; quod brevi, quæ est hominum de te opinio ac sermo, futurum existimo. Et sane necesse est, ut tua virtus, in hac luce orbis terrarum, editiori in loco posita, ampliori præsit provinciae. Bono igitur publico valetudinem tuam cura diligenter. Proinde medicatas istas aquas, quas rursus tibi esse potandas dicis, laudo, immo necessarias duco, si renibus refrigerandis, novi semen calculi, ne iterum pullulet, possint elidere. Etenim vicinus quidam mens, cui, abhinc triennium, hac tam ancipiti sectionis curatione calculus, ovi cujusdam instar, extractus fuerat, nunc alterum, illi formæ & magnitudine parem similemque, contraxit; & quia jam ferme septuaginta confecit annos, omni ex spe salutis deturbatus jacet; quam Deus à capite tuo pestem avertat. Tu interim, ut instituiisti, me diligas velim. Vale. Romæ, x i i i Kalendas Septemb. c i o i o c x l i i i.

## XLI.

Doctissimo sapientissimoque viro,

T Y R R H E N O.

**M**agna me cura & solitudine afficit distillatio hæc, quæ tot jam dies meis negotium oculis exhibet. nondum enim assequi possum, ut exarescat. Quamquam

H h

in

in hoc mea culpa est aliqua, eaque non minima, qui ab  
 iis rebus abstinere me nequeo, quibus illa sustentari solet  
 ac crescere; nimirum à solis lumine, ab aëre nocturno,  
 & cibis quibusdam, qui lippis plurimum nocere dicun-  
 tur. Sed quid ego, in recensendis hujus ægritudinis cau-  
 sis atque fomentis, diutius immoror, cum vera atque  
 præcipua ante oculos sit, ac manu teneatur? nempe se-  
 nectus; quæ cum advenit, his atque similibus ad nos in-  
 structa malis accedit, immo ipsa per sese nihil est aliud  
 nisi morbus; cui qui conetur obsistere, perinde est, ut  
 inquit Cato, ac si, more gigantum, cum Deo bella sus-  
 cipiat. Itaque naturæ, ut æquum est, cedo; & insuper  
 magnas Deo gratias ago habeoque, qui me ad id ætatis  
 perduxit, quo pauci perveniunt; cum pleraque pars ho-  
 minum, in medio vitæ spacio, ac non parum multi in ip-  
 so aditu vestibuloque, revocentur. Quod autem nunc  
 ego senectutis, quoque premor morbi, meminerim, ino-  
 pia rerum, de quibus scriberem, fecit: non, quod non  
 sint plura, ac memoratu dignissima: sed ea sunt ejusmodi,  
 ut literis tuto committi non possint. Nam superfluum  
 duco ac non necessarium, scribere de Principe Casimiro,  
 Regis Poloniæ fratre, qui Societati Iesu nomen dedit;  
 quoniam hæc res, tam nova tamque admirabilis, notior  
 est vobis, quam nobis, qui absumus à regionibus il-  
 lis, ubi tantum ille aggressus est facinus, multo, quam  
 vos, longius. Hic jam Romam pervenit, ac nudius  
 tertius, ab Æde, nomini Iesu sacra, in Vaticanum,  
 ad Pont. Max. se contulit; non rheda vectus, sed pedes,  
 non regali habitu, sed simplici & obtrita veste, ut est  
 mos novitiorum ejus Societatis, indutus; non alio co-  
 mitatu instructus, nisi fraterculo uno, qui eidem ince-  
 debat ad dexteram. Exceptus est à summo Pont. perquam  
 humanissime, atque omnibus illis honoribus affectus,  
 qui Regis fratri debentur: nam amantissimis ab eo am-  
 plexibus circumplexus, non ad pedum sed ad manuum  
 osculam admissus, non stans sed sedens, quæ vellet, jussus  
 est dicere; præterea Celsitudinis cognomine cohonestatus,  
 discessit: quamquam omnes istos honores atque alios  
 constantissime repudiaret, rogaretque, ut non jam in  
 Principum, unde discesserat, sed in pauperum atque  
 ino-

inopum, ad quos transferat, loco ac numero haberetur. Quod illi Pontifex, deinceps se facturum esse, promissit. Duo etiam insignia duarum mulierum exempla proximis diebus contigerunt, quæ scribenda, atque ad te mittenda curavi; ut, si tempore venerint, reliquis adjiciantur. Vale. Romæ, VII Idus Octobris  
CICIDCXLI.

## XLII.

Omni*bus* ingenii, doctrinæ, probitatisque  
notis insigni viro,

T Y R R H E N O.

**N**imis profecto sæviter, atque atrociter, invida mors in rebus humanis debacchatur; quæ plerunque vilissimis ac sordidissimis quibusque relictis, quidquid est ubique carissimum ac bellissimum, carpit. Paulo ante, Francisci Balducci, Etrusci poetæ clarissimi, & Lælii Guidiccionii, docti sermonis utriusque linguæ, & in omni eruditionis genere præpemodum singularis, morte dolumus. Nunc, quasi parum damni bonæ literæ fecissent, Ioannem Ciampolum lugemus extinctum. Erat illi ingenium acré, sublime, acutum; scribendi genus altum, exaggeratum, novum, ac suum proprium; sententiæ argutæ, exquisitæ, & tanquam ex abdito erutæ. Hic primum in Io. Baptistæ Strozze cæci scholæ, eruditus, ejusque facultatibus educatus, ingenii & eruditionis famam est adeptus; quæ sublevatus, in principum virorum amicitiam gratiamque pervenerat; à quibus divitiis atque opibus auctus, facile ad summam amplitudinem fuisset evectus, nisi, magnis ad eam itineribus properans, in medio cursu corruisset; suo fortasse vitio: erat enim elatus, tumidus, gloriarum plenus, sui ipsius amator, ceterorum contemptor, præter eos, quos similis scribendi natura atque voluntas sibi junxisset. Sed, detractis his vitiis, erat omnino vir magnus; in inveniundo acutus; quod invenisset, omissis propriis, translatis explicans verbis; tum in soluta oratione, tum



in versibus, grande quiddam ac tragicum resonans : quo fiebat, ut, qui multum ab hoc ipsius genere distarent, postularet, eos sibi cedere, fastigiumque summittere. Quid multa? M. Tullium, & Pub. Virgilium, duo Latinæ eloquentiæ lumina, quorum temperata oratio, quæ nimirum humilia subtiliter, magna graviter, mediocria suaviter explicat, omnibus seculis admirabilis extitit, tales, inquam, tantosque viros, tanquam nullius homines ingenii, nullius ponderis, iuopes rerum ac sententiarum, sermone abjecto atque pedestri, irridebat. Sua dicitur scripta Regi Poloniæ testamento legasse; ex quibus, si edentur, cognosci poterit, qualis fuerit. Ex administrationibus oppidorum, quæ, per annos duodecim, invitus (nam ad Urbem, unde sub honoris specie fuerat ejectus, crebro spectabat,) gubernaverat, & ex fructibus, quos ex pinguibus sacerdotiis, quibus præditus erat, capiebat, multa aureorum millia consecerat: ex quibus millia decem & octo, quæ in officiis, ut vocant, una cum vita pereuntibus, collocaverat, ad Pontificem redierunt; ad quem etiam reliquorum bonorum possessio, spoliis jure, pervenit. O miseros mortales, in coacervandis divitiis occupatos, qui, suum sæpe genium fraudantes, nesciunt, cui congregent eas! Ille mihi videtur prudens, ac sapienter, ut ita dicam, avarus, qui, quod sibi ex suis usibus redundat, effundit in pauperes. non enim illud perdit, sed pauperum manibus tradit, deferendum in cælum: ubi, in omni æterni temporis spacio, quod in ipsis sumpserit, eo fruatur, nec cuiquam ad illud adspirare fas erit. Sed jam philosophatum est satis: pergo ad reliqua. Summæ mihi voluptati fuit, intelligere, quaterniones meos, una cum literis, ad te datis, non interiisse, sed salvos, ad unum omnes, pervenisse. Nam, si quod, eorum jactura, damnum fieri contigisset, nulla id ratione sarciri potuisset; quod, ob rationes quas me tibi sapius commemorasse memini, eorum, quæ scribo, nullum apud me exemplar relinquo. Quod autem ad bella attinet, laboratur hic vehementer: ac proximis diebus, non procul ab agro Perusino, male à nostris pugnatum est; qui, insidiis inimicorum oppressi, partim ferro deleti, partim, una cum eorum

omnibus

omnibus fere ducibus, sunt in captivitatem abducti. Tuæ sunt partes, in precibus ac sacrificiis, quæ Deo offers, eum rogare, ut sit propitius, & Ecclesiæ suæ causam defensione inque suscipiat. Reliquum est, ut de tua singulari erga me humanitate benevolentiaque gratias agam; quæ quamvis satis se mihi indicaverit, tamen non cessat, in singulis tuis ad me literis, ex omnibus partibus fere semper ostendere. Vale. Romæ, xvi Kalend. Octobr. C I D I D C X L I I I.

## XLIII.

Doctissimo clarissimoque viro,

T Y R R H E N O.

**I** Vbes me, Tyrrhene præstantissime, tuis longis iisdemque elegantissimis literis, quas proxime ad me misisti, alteris meis, æque longis, respondere. Quod non est difficile. Non enim cicadæ potest cantio deesse. Sed, ut illis æque bene, docte, eleganterque respondere liceat, tua opus est mihi eloquentia; quæ, ut tu optime omnium nosti, non in verborum tantum copia, & linguæ volubilitate consistit, sed aliis pluribus longeque maioribus virtutibus continetur: quarum in te nulla desideratur. Nam, si verba eloquentes facerent, quis non esset eloquens? Nemo enim, nisi sit plane elinguis ac stupidus, pluribus verbis animi sui sensa proferre non potest. Tum garruli, loquaces, atque adeo circulatores omnes, essent in eloquentium numero reponendi, qui multas quotidie horas in foris, celeri ac nusquam insistente orationis cursu, simplicibus ac credulis hominibus mercimonia conantur obtrudere. Dabo igitur operam, ut tibi faciam satis, ac verbis, quibus tuæ scriptæ sunt literæ, totidem pene verba rependam. Et primum, voluptatem mihi magnam nuncias; cum scribis, literarum opus ad te dederim, nullas interiisse, sed salvas, ad unas, omnes, pervenisse. Sed cum addis, non ineminisse te, eas legisse, quas ad Fabium Chisium anno superiore, scriptas versibus, misi; facis, ut verear, ne omnes tibi sint redditæ.

Mitto igitur earum exemplum; quas, summa ambitione, à te, summo sribendorum carminum magistro, legi ac corrigi cupio. Quibus accedunt alia, fratribus Accorambonis, optimis ac nobilibus adolescentibus data; in quibus Maria Isabella Accorambona, foemina lectissima, eorum amita, omnem spem familiae Accorambonae dignitatis collocatam habet: nam illi, pene infantes, intra septem dierum spaciun, utroque sunt parente orbari. Multa continent praecepta, ad mores recte formandos, ætati illi utilia ac salutaria. Superioribus diebus, aliam ad eundem Antistitem epistolam, versibus exarata, scripsi; quam accepisse, legisse, atque etiam emendasse te arbitror: id enim summopere à te expetebam. Commovit studium meum, ad versus faciendos, elegantissimum viri illius carmen, cum summa pietatis significatione conjunctum, in quo P. Capuccino Leodiensi cogitationes suas, de mundi contemptu, à Deo sibi immixtas, exponit. Placuit mihi argumentum; cui jam longa vita plus quam satis ostendit, quam sint fluxa, fragilia, caduca, inania, omnia ejus bona, quam sint fallaces hominum spes, fragilisque fortuna, quam sint inanes omnes nostrae contentiones, labores, & studia. Ac multa in eam sententiam dixi, non eadem eloquentia, qua ille, sed animi sensu propemodum pari. Ac, bonam istam mentem, qua præditus es, tibi vehementer gratulor, Deumque oro, ut sit perpetua. Verum, ex his versibus, aliisque, quos te habere fateris, simul collectis, posset unum corpus confici, typisque mandari. At erit exiguum. Fateor; non tamen propterea lectorum à se animos abalienabit, immo conciliabit sibi magis. Sentimus enim, librorum exiguitate nos vehementer, ad cognoscendum, quid illi afferant, allici; contra, magnitudine eorundem ac mole, à legendo deterreri. At quamvis hic liber, si edatur, juxta magnitudinis commendatione, opinioni hominum tradi non possit, saltem in iis numeraretur, qui re magis atque virtute æstimantur, quam pondere ac mole. Sed tantum illi laudis ac boni, ingenii facultatisque meae tenuitas invidet. Atque utinam omnia, quæ in hoc genere scripta sunt à nobis, proferre possemus, neque partim neglecta interissent, partim ab eo, qui secum attulit, detinerentur;

tur: profecto hæc ab eo magnitudo, quæ nunc abest, non desideraretur. Nunc meæ me inertiae pudet pigetque, qui tantopere semper laborem describendi defugerim, neque operum, in quibus desudassem, exemplaria servaverim; quibus operibus, tua auctoritate & gratia, in lucem proferendis, tam bella occasio deperit; cuius fortasse, ut omnes divi atque homines adjuvent, non alia post hac melior commodiorque se offeret. At si tibi, inquis, iste scribendi labor ita est odiosus atque molestus, amanuensis vel librarii cuiuspiam opera utere; ita enim laboris scribendi molestiam feceris lucri. Primum, non sum in tantis nummis, præsertim in his temporum difficultatibus, ac difficillimis solutionis, ut præter eam familiam, quam alo, possim etiam amanuensis, docti eruditique viri, qui ea, quæ scribit, intelligat, operas emere; cuius notæ homines & difficillime inveniuntur, & carissime conducuntur. Deinde, quos in librariis sumptus facias, perdis. Etenim, harum elegantium artium rudes, ita corrupte, ita inquinatæ, omnia describunt, ut in iis, quæ scripserint, corrigendis emendandisque, plus operis sumas, quam si ipse scripsisses. Verum, quamvis omnium mearum rerum jacturam æquo animo feram, earum præsertim quæ ingenio pepererim, nolim tamen epistolas interire; quæ propter styli & argumenti varietatem & copiam, non minimam possunt lectoribus voluptatem afferre. At ego Gabrielem Naudæum, ingenuum ac literatum virum, nunquam iis esse præditum prioribus credam, ut eas perditum ire velit. Nam quid illi lucri sit, eum, qui ipsius fidem secutus sit, fallere? Gaudio, tibi consilium probari meum, de altera Pinacotheca instituenda; cumque id opus, quod præ manibus habeo, absolvero, (quod jam in fine laborat,) nihil hoc esse faciendum prius existimo; si tamen vita suppeditaverit, ut cum superioris satietas ceperit, novam habeas deambulationem, ubi fastidium & satietatem possis abigere. Nam post illam editam, tria præclara, & immortalitate digna ingenia interierunt, Balduccius, Guidiccionus, Ciampolus; quos ego novi probe, atque etiam habui usu amicitiaque conjunctos. De aliis, qui mihi noti sunt minus, præsto sunt, qui me docere fideliter possint, quali

quisque fuerit ingenio, moribus, eruditione, doctrina. Neque quidquam est, quod expedire celerius, vel facilius, possim. Etenim in hoc opere, quod nunc urgeo, omnia sunt ingenio eruenda: quæ magni laboris res est, magnæque industriæ: in illo, quod aggredi meditor, parata erit materia, & ante oculos posita: neque in verbis inveniendis eligendisque magnus me labor & cura torquebit; quod longus scribendi usus exercitatioque id mihi attulit, ut verba, quæ sint apta, statim vocata respondeant, & sub acumen styli succedant, tum argutæ facetæque sententiæ, ad ornatum ac lumen orationis, sua sponte, cum est opus, occurrant. Sed, quo major ex nova Pinacotheca voluptas tibi contingat, prosperam ac secundam valetudinem evenire in primis cupio; sine qua, nihil cuiquam gratum, nihil jucundum potest accidere. Cui valetudini si incommodus est maxime cæli istius rigor atque sævitia, quæso, quod bona summi Pontificis cum venia fiat, eripe te, quantum potest, regionibus istis frigidissimis, & aërem mitiorem salubrioremque persequere; cujusmodi illum esse arbitror, quo sponsa, ut inquis, hoc est, Ecclesia tua te vocat. Quamquam, si meo arbitrato liceat, velim te hic Romæ, ex tuis virtutibus ornatum, aspicere, atque in eo dignitatis loco collocatum, quo tua te præclara in Remp. merita vocant, officiis omnibus amplecti, colere, ac venerari; præterea, magis ex me ipso, quam ex aliqua mei ipsius effigie, tibi notus atque perspectus existere. Quæ effigies, jam absoluta planeque perfecta, in æs inciditur, ut imprimatur. Quod ubi erit factum, continuo ad te plura ejus evolabunt exempla. Nec sine magno meo pudore ac verecundia. Nam quis ego sim, ut oris mei descriptio, cum veritate naturæ decertans, in paginis impressa, circumferatur, quæ non solum pictoris artificio, sed etiam commemoratione hominis, & cognitione formæ, delectet? Sed amicis, nimirum in hac re cupidis mei, postulantibus, vel cogentibus potius, obsisti non potuit. At, his omissis, amo pietatem tuam, ac laudo, qui à Deo tibi commissam Ecclesiam, adeo cordi tuo caram esse ostendis, ut omnibus tuis honoribus ac commodis anteponendam existimes. Ob cujus pietatis ac religionis ardorem

ardorem studiumque, illi tibi fructus contingent, qui maximi, omni ium opinione, censentur; summa apud homines laus, & ad honores ascensio. Atque, ut meritum tuorum sationi, iniquorum malignitate, hi fructus non respondeant, qui, quoniam fluxi sunt & caduci, cur tantopere sint expetendi, non video; certe te illi non decipient, qui, post decursum hujus miseræ & ærumnosæ vitæ spacium, iis à Deo proveniunt, qui creditam ac cominissam ipsis Ecclesiam, cum fidei, probitatis, justitiæque laude administrarunt. En tibi epistolam longam, tuæque verborum prope numero parem; quam, ob ejus longitudinem, me piget relegere. Vale; ac me, sicut facis, dilige. Romæ, Id. Octobr. CIO IO CXLIII.

Illustrissimo ac Reverendissimo Domino FABIO CHISIO, Sedis Apostolicæ apud Vbios Nuncio.

**G**randia semidei, dum te mandata remotis  
 Urbani retinent Vbiis, dum mole sub alta  
 Curarum premeris; Roma, securus inersque,  
 Longa nimis placidam duco per tempora vitam,  
 Ambitione procul; nec sævo viscera morsu  
 Corripit invidia, ex vicini rebus opimis;  
 Nec rapit ex oculis somnos ferus ardor habendi,  
 Nec lacerat mentem Veneris male sana cupido,  
 Turpis cuivis, ætati sed turpior acta.  
 Quocirca, Æmonio jam pene aequalis Olympo,  
 Ipse potens animi, celi de parte serena.  
 Cuncta feris cerno jactari flatibus infra.  
 Est mihi laniculi domus alto in vertice collis,  
 Quamvis parva, tamen qua non formosior ulla.  
 Hæc Tiberim late circum camposque virentes,  
 Et septemgeminos tollentem ad sidera colles,  
 Romulidum cupidus offert obtutibus Urbem.  
 Si domus illa placet, longos qua prospicit agros,  
 Quæ magis hæc placeat, quam fors mihi dextra paravit?  
 Innocui vero facies nitidissima cali,  
 Tum iuga Telegoni, blandas tum Tiburis udi  
 Delicias regum, ac veteris monumenta Sibyllæ,

Pra se pontinum, & fundos putat esse malignos.  
 Iungitur exiguus domui, sed fertilis herbis,  
 Vtilis & pomis, atque aptus vitibus, hortus.  
 Hic casia mites, & olentis vimen acanthi;  
 Rosmaris hic, betaeque, rumex, inulaque morantur;  
 Intybaque, erucaque, & spissis allia fibris,  
 Non desunt; hic ruta viret, coepaque rubescunt,  
 Nec non, lata sinum pandens, se salvia fundit;  
 Ac locus, his etiam plures, alit ubere foetus.  
 Arboribus ficus alba, biferaque, nigraque,  
 Ac tenui pendent obducta cydonia lana.  
 Ver hic perpetuum renitens, dat munera florum,  
 Herbarumque, sinu tellus quas foeta remittit.  
 Lacteolas violas, rubras, quasque inficit ille  
 Qui color insani faciem perfundit amantis,  
 Purpureas niveasque rosas, atque alba ligustra,  
 Coryciosque crocos, Salaminiacosque hyacinthos.  
 Est ubi plus tepeant hyemes, aut aura Favoni  
 Dulcius immodicos aestatis temperet ignes?  
 Namque ubi perrupto fremit Austro carcere savus,  
 Aut gelido immites strident Aquilone procellae,  
 Atque aer mugit, strepitant silvaeque sonantes;  
 Nil hyemi est nostro viridanti juris in horto;  
 Singula quaeque foris cum bello fervere cernas,  
 Intus cuncta silent, & verna pace fruuntur.  
 Vnde mihi, claro fax est mea prandia mane  
 Impune in sole ac calo celebrare patenti,  
 Dum septi domibus reliqui, clausaque fenestra,  
 Igni quisque fugat frigus, boreamque furentem.  
 At postquam glacialis hyems dat, pulsa sub arctos,  
 Aestati reparare vices, flammaque rapaci  
 Cum campis urit segetes Hyperionis ardor.  
 Argutis & cuncta fremunt ardore cicadis;  
 Ad mensam sedeo. densas praebeantibus umbras  
 Mollibus, ac pictis viridi pallore, corymbis;  
 Quos circum volitant aura, Zephyrique vagantes:  
 Hos comitantur aves, patulis quae dulcia ramis  
 Ludentes vario diffundunt carmina cantu.  
 Solus abest gelidis manans à fontibus humor,  
 Qui blandum referat decurrens murmur ad aures,

Irriget



Irriget & largo viridantes flumine plantas.  
 Sed quoque contingent hæc nobis dona, propinqui  
 Divitis auxilio, magnam qui ducit aquarum  
 Vim sibi; post refluas vicinis dividet undas.  
 Ac, ne summa domus sint imis forte minora,  
 Ardua sublimi pandit sese area tecto,  
 Vnde acies longe subjectos tendat in agros.  
 Dat sinuosa comis vitis frondentibus umbras  
 Frigidulas illi, solemque à sinibus arcet.  
 Insequitur canna, lentoque ex vimine texta,  
 Spelunca in morem, casula, & quo firmior imbri  
 Ventisque obsistat, fulcitur tota tigellis.  
 Hic mihi grata quies, veterum monumenta legenti,  
 Suppetit, & fesso solamen dulce laborum,  
 Ac memori illorum, quos antra domusque ferarum  
 Excepere olim, labentis tempora vita  
 Occurrunt animo, & patria caelestis origo.  
 Tum peregrinantem refero, qui fessus in umbra  
 Amissas reparat vires, quo promptior inde  
 Carpat iter reliquum, patriis avulsus ab oris.  
 Quos mihi dat risus, suprema qui immemor hora,  
 Sumtibus innumeris, vicinas nubibus ades  
 Ædificat, jam jam tenues abiturus in auras!  
 Illa viatori magis apta cubilia duco.  
 Mittitur unde mea scripta hæc tibi littera dextra.

Mario ac Roberto Accorambonis, fratribus,  
 magnæ spei adolescentibus.

**R**oberte, atque Mari, fratres, duo germina clari  
 Accoramboni generis, quos fervida virtus,  
 Per saxa & salebras, colsi perque aspera montis,  
 Alta trahit pueros supremi ad limen honoris;  
 Pergite, nec scelerum mater vos, blanda voluptas,  
 Ipsa suis cabiat laqueis, teneatque revinctos;  
 Pinguia nec variis depicta coloribus arva,  
 Densa quibus nimium stultorum turba pererrat,  
 Decipiant oculos specie, gressusque morentur,  
 Optatam valeant cursu ne tangere metam.

Nunc

Nunc opus est animis, pueri, nunc pectore firmo,  
 Cum vestra hac petitur tam multis hostibus aetas,  
 Flectere qui teneros vitiorum ad limina cogant.  
 Nam (moneo) falsa latitat sub imagine, dulcis,  
 Dira voluptatis tabes, tetrumque venenum,  
 Quod, simul infundit se animis, totosque peragrat,  
 Protinus, aeterno mactatos funere, ad ima  
 Tartara demergit, faucesque immitis Avernii.  
 Tum via, qua rutilis fulget violisque rosisque,  
 Et tenerum pedibus gramen substernit euntis,  
 Plena est insidiis: fugiat, velocius aura,  
 Blandimenta oculos inimica iuvantia molles,  
 Cui Deus & propria mens est & cura salutis.  
 Multo flore tegit, multumque virentibus herbis,  
 Mortiferos angues, laqueos, atque horrida Ditis  
 Ostia, sulphureos amnes, noctemque profundam,  
 Qua rapit incautos, raptosque in viscera condit.  
 Spreta voluptatis facies, & amoena vireta  
 Posthabita, & fontes, ac formosissima Tempe.  
 Inferuere astris, diram qui contudit hydram,  
 Stymphalidasque feras prostravit cominus arcu,  
 Quaque ipse indueret, detraxit terga leoni;  
 Remigium contra quivis Ithacensis Vlyssi,  
 Cui potior patria fuit interdicta voluptas,  
 Aeternis lacerat probris, ac sedulus urget,  
 Quod liquidi quondam captum dulcedine potus  
 In suis antiquam mutaverit ora figuram.  
 Credite, vos eadem tandem fortuna sequetur,  
 Cum similes illis contingat moribus esse.  
 Sed magis Herculeo submitтите colla labori,  
 Si vos ille potest facere & servare beatos.

## XLIV.

Singulari sapientia &amp; eruditione viro,

T Y R R H E N O.

**D**istillatio ista, quæ, menssem jam integrum meo à capite defluens, iter ad oculos habet, ita me ab omni animi contentione studioque, quæ lippis inimica esse ajunt, remotum habet, jam ut nihil fere scribam; nihil mediter, nihil legam: manus ipsa quodammodo, ex longa desidia ignaviaque, torpere videtur, ac vix audere calamum sumere. Omnino tali sum ingenio præditus, ut, nisi adsit usus & exercitatio, similis sim navigio, quod adverso flumine pellitur. Nam, si remiges paululum inhibuerint, continuo eum, quem tenet amnis, cursum repetet, intermisso impetu pulsusque remorum. Quamobrem si lippitudo ista pergat mihi molesta esse, vereor, ne illuc redeam, unde me magno labore vix abripui; nimirum ad inscitiam, ac Latini sermonis ignorantiam, terminos. Sed mea erga te observantia, ne id contingat, efficiet, & invita ac repugnante lippitudine, in aliquo me scribendi studio retinebit. Nam, quoniam ita tibi gratum esse video, nullam occasionem, ad te literas dandi, prætermittam, nec officii literarum intermissione, tuo in me amoris intervenire calamitatem aliquam patiar. Etenim nulla re alia, tam inter absentes amicitiam ab interitu vindicantur, quam literarum ope atque præsidio. Quamvis, dum ægritudo oculorum maneat, eo sim parcius usus, hoc est, minus longas ad te literas daturus. Neq; solum amicitiam tuendam gratia, epistolarum officium esse mihi necessarium existimo, verum ea etiam de causa, ne aliquod ingrati animi crimen incurram; quod tua in me beneficia ita magna sunt, ita perpetua, ut, nisi tibi sapissime gratias agam, non modo ingratus, verum etiam impius sum habendus. Nunquam enim illorum memoria mihi excidet: nunquam usurpare literis atque sermonibus desistam, tuam illam; quo nomine appellem nescio; nam si dixerò, be-

nevo-

nevolentiam, curam, ac diligentiam, vereor, ne id quod eloquar perinde intelligatur, atque ipse cogitans sentio; verum necessitatis & inopiæ causa dicam, summam illam sollicitudinem, ab incredibili quadam humanitate ductam, qua, in maximis tuis occupationibus, acerbissimis vesicæ doloribus, gloriolæ nostræ studiosus in primis, das operam per tuos, ut mea scripta elegantissimis typis mandentur. Et, quod ad dialogos attinet, multa jam errata collegi, typographi injuria commissa; eaque ad Nihusium misi; sed sum oblitus, epistolæ, qua fratribus Syris Dialogum convivii, in ipsorum villa celebrati, inscribo, addere, patriciis Savonensibus; ut ejus inscriptio sit, *Io. Baptistæ & Alexandro de Syris, patriciis Savonensibus*. Si nondum Dialogi sint impressi, esset mihi gratissimum, dno illa verba addi. Et cum nihil sit præterea, quod ad te scribam; finem faciam. Cnra ut valeas, meque tibi semper gratum, tuorumque in me beneficiorum memorem forè, existimes. Romæ, VI Kal. Octobr. C I D I O C X L I I I.

## XLV.

Clarissimo ornatissimoque viro,

T Y R R H E N O.

**Q**Uod breviores, quam vellem, hæc meæ ad te literæ veniant, temporis angustia, in quas coactus sum, faciunt. Nam cum tabellarius in eo jam esset, ut discederet, dedit mihi ad Bartoldum Nihusium literas Leo Allatius, Græcorum longe doctissimus; in quibus, ad quædam illius postulata, docte eruditeque respondet. Id ille serius fortasse, quam vellet, ab eo factum, queretur; sed injuria. Nam, nec majori celeritate, nec majori diligentia potuit; quod ea, de quibus doceri postulat, tam multa sunt, tam perplexa, tam obscura, ut ad ea explicanda, atque illustranda, multæ illi fuerint bibliothecæ adeundæ, multi codices evolvendi, multorum etiam sententiæ perquirendæ audiendæque. Præterea, tot negotiorum labore gravatus, atque aulæ occupatio-  
ne

ne (nam Francisco Card. Barberino operam navat, ) ita districtus est totus, ut non multum illi ocii actemporis ad literarum studia relinquatur. Expectatissimæ hæc ad Nihusium literæ perferentur: novi enim ego, ex illius literis, hominis ingenium, quem sit cupidum omnis eruditionis, omnisque doctrinæ, quamque harum literarum expectatione torqueatur. Tuæ erit humanitatis, tuique in illum amoris, perficere ut illi animus expleatur. Multa sunt, quæ scribi possent, præsertim de bello, quo multæ Italiæ urbes agrique vastantur. Sed inalo, ea te ab aliis audire, quam ex meis literis accipere. Statui enim omnino de Rep. silere. Nam plures mihi essent accusandi. Tantum satis sit scire, multa à nostris secunda prælia fieri, atque adversus hostes inalignos acriter vehementerque pugnari. Hoc enim nomine videor posse eos afficere, qui Ecclesiæ Romanæ, à qua nulla illis est orta injuria, bellum atrox habent indictum. Sed Deus, pœnas ab illis debitas justasque repetendo, vim suam numenque declarabit. Vale. Romæ, v i i i Kal. Novembr. c i o i o c x l i i i.

## XLVI.

Clarissimo sapientissimoque viro,

T Y R R H E N O.

**A** Vdio, tibi succedi. Quod, si in rem tuam est, gaudeo. Quamquam, quantum ex superioribus tuis literis intellexi, profectionem ab regionibus istis tibi non ingratam, vel saltem valetudini tuæ non incommodam fore video, idque ob cæli sævitiam; quæ tantum, superioribus annis, tibi morbi creavit, unde vix vivus emerferis. Sed non perinde ac tibi, civibus istis gratus tuus discessus existet; qui te, quem ob vitæ innocentiam, ob singulares animi dotes, ob morum suavitatem, ita diligunt, ut nihil sit in amore ardentius, ægre à se divelli patientur. Mihi vero, non ita commodum eveniet: nam, ut me tibi aperiam, optabam summo-pere, ante tuum ab urbe ista diceßum, fretus occasione, quam

quam Nihusii benignitas præbet, epistolas, quas istuc ad te misi, impressas aspicere, quæ perpetuum essent meæ in te observantiæ, tuæquæ in me benevolentia, monumentum. Etenim, nulla re ita sum alacer animo, quam ut ceteri, viventibus nobis, ex nostris ad te literis cognoscant, & omnis posteritas seculorum intelligat, tecum nobis amicitiam usumque literarum intercessisse. Hoc nihil mihi, vel ad existimationem honestius, vel ad læticiam animi jucundius, vel ad memoriæ dignitatem oportunius evenire posse existimo. Deinde, cum hæ literæ non minimam partem laudum tuarum attingant, incredibili me cupiditate inflammabant, procurandi, ut ederentur; quo hac gloriola fruerer, meam etiam opellam, illis celebrandis, alicui usui fuisse. Non tamen unquam sperare sum ausus, me, in te sempiternæ gloriæ commendando, propriam ingenii gloriam consequi posse: ad illud solum spectavi, ut hoc meo conatu fieret omnibus palam, quantam ego, una cum aliis, virtutum tuarum vim esse intelligam; cum me non potuerim continere, quin eas, quoquomodo possem, exponerem. Præterea augebat hoc desiderium in me officiosa multorum sedulitas, qui me, tanquam flagitatores assidui atque molesti, circumstant, rogantque, ecquando volumen epistolarum perventurum ad ipsos sit, quod Naudæus, se quamprimum Romam, typis impressum, missurum esse, sponderat: cupere enim se, ajunt, meum illud scribendi genus, in quo naturalis quidam inest, ut ipsi dicunt, non fucatus nitor, ac sine molestia diligens elegantia, in epistolis, quarum illud magis est proprium, degustare. Sed cum Naudæus, multarum litium plurimorumque negociorum occupatione distractus, adhuc promissi sui summam explere non potuerit, fuisset mihi vehementer gratum, posse me, literis ad te missis huic illorum erga me voluntati facere satis. Neque in eo Naudæus offendi potuisset; neq; hæ literæ iis, quas ipse postea edidisset, novitatis gratiam eripuissent. Nam illæ multum ab his distant, in quibus est genus orationis fusum ac profluens, quod est epistolis familiaribus aptum. In quo vereor, ne modum exceßerim, tecumque nimis familiariter egerim, ac jure illud mihi possis

possis objicere, quod olim Augustus illi, qui cœnam ipsi dederat, nec cerealem, nec pollucibilem, nec imperatoria illius majestate dignam, *Non putabam, me tibi esse tam familiarem.* Tua enim dignitas & honores acti, exquiritius & enucleatus scribendi genus efflagitant. Et quoniam videbam, mearum ad te literarum non eum esse numerum, qui justum aliquod corpus efficeret, cogitabam, posse iis adjici eas, versibus scriptas, illasque ad Nibesium datas; ac præterea nonnullas alias, quas domi habeo. At vide, quam ego cogitationi huic meæ assentabar, & faciliora omnia finge-  
bam. Occurrebat mihi primum, Nihusii humanitas, ac propensa, in hæc studia, voluntas, quæ non gravate dedisset operam, ut illæ imprimerentur: tum, egregium illud erga te studium, quod nihil tibi postulanti dene-  
gasset, sese aperiebat: postremo, ut ad hanc spem, quæ mihi à Nihusio ostendebatur, vela darem, ea etiam cogitatio me, tanquam flatus aliquis, impellebat, quod eum arbitrabar, non solum honoris tui gratia, sed sua etiam causa, ad hanc provinciam suscipiendam descen-  
surum, quod meæ ad ipsum litteræ, quæ una cum aliis essent imprimendæ, meritissimo, magnam ingenii, do-  
ctrinæ & eruditionis, commendationem habeant. Ve-  
rum, cum hæc spes occisa propemodum sit, eam di-  
mittam; eoque magis, quod hanc rationem mecum tantum inibam, non autem tecum; quem præsertim ad-  
hibendum esse oportuit. Quis enim scit, an tu meum istud consilium fuisses approbaturus, an illud potius, tan-  
quam ineptum, vel inane, repudiaturus? Quamobrem, ab hac cogitatione me totum avoco, & ad eam revoco;  
ut, simul ac operi inchoato, prope tamen absoluto, tan-  
quam fastigium imposuerim, alteram Pinacothecæ par-  
tem, te in primis hortante ac suadente, instituiam. Vale.  
Romæ, v r Idus Novembr. c i d i o c x l i i i.



## XLVII.

Nobilissimo præstantissimoque viro,

T Y R R H E N O.

**S**cribis ad me, te istic futurum hac hyeme; quam, ut initia se dant, acerrimam fore non dubito. Quod valetudinis tuæ causa, quæ mihi carior est mea, minime vellem; cum cælum istud frigidissimum, ut magno tuo cum malo expertus es, tibi adversarium sit inaxime. Verum, cum ita summæ Pontificis voluntas ferat; cuius voluntati, pro ea qua præditus es erga Sedem Apostolicam reverentia atque observantia, tuæ fastigium fascesque summittis, sine ulla exceptione loci, temporis, ac valetudinis; aliquam in spem venio, fore, ut mihi contingat, quod maxime cupio; nimirum, ut ea qua apud Nihusium auctoritate & gratia polles, statim post Exemplam, meæ ad te literæ imprimantur, una cum iis, quas ad ipsum Nihusium dedi, aliisque nonnullis, quas dispersas & vagas, hic Romæ collegi; idque iis de causis, quas pluribus verbis, superioribus meis ad te literis, scripsi. Etenim Naudæi, qui tot pollicitationibus volumen à me literarum, una cum aliis quæ scripsimus, abstulit, & secum in Galliam asportavit, sua promissa excidisse ab animo, video.


*Vt missum sponsi furtivo munere malum*

*Procurrit casto virginis è gremio,*

*Quod misera oblita, molli sub veste locatum,*

*Dum adventu matris prosilit, excutitur.*

Quamquam dignus est excusatione. Nam in asportanda ordinandaque insigni bibliotheca, quam Cardinalis Mazarinus, cui ille inservit, cõemittit, tanta homini occupatio incidit, ut non liceat, alieno dare operam negotio. Verum, quamvis hujus rei sim maxime cupidus, totam tamen in tuum arbitrium voluntatemque rejicio; à qua vel latum quidem unguem recedere, mihi fas esse non duco. Illud fortasse, ut totum hoc meum postulatam contemnas, efficiet, nempe epistolarum ipsarum ratio,

ratio, quæ omnes diligenter scribendi laude carent. Sum etenim revera, tum in epistolis, tum in aliis scriptionibus, admodum iners ac negligens, qui eas, inertiae causa, ne relegere quidem audeo; quam meam inertiam, elegantissimo illo symbolo, quod ad me misisti, verberari sentio; nam, tam inconditis & inquinata loquentibus literis, tui nominis claritati tenebras obduci putabis. Sed, neque tibi neque mortalium cuiquam displicere debeat, in ea rudi impolitaque oratione, tanquam tenebris, mei erga te officii, vel pietatis potius, lumen enitere. Sed de his nimis multa. Statueram, simul ac opus, quod nunc urgeo; exædificassem, aliam Pinacothecam instituere, in quam eorum, qui prætermissi essent, vel postea interissent, imagines referrem; sed, cum multorum, enixe eam postulantium, studiis non possit obfisti, est mihi in animo, omissis aliis omnibus, quamprimum illi manus admoveere; ac, si paratam habnero materiam, non ita multis eam mensibus absolvam. Quamobrem, rem mihi gratissimam feceris, si uniuscujusque popularium tuorum, de quibus ad me scripsisti, genus, studium, ætatem, mores, tum prava, tum bona, exitum vitæ, atque alia, quæ sint illius propria, non fuscæ, neque Latine, (nolo enim tibi homini occupatissimo id laboris imponere,) sed breviter, ac vernacula lingua, describenda, atque ad me perferenda curabis. Quibus, in nonnullis, pace tua, ea addam, quæ ipse audiivi ac vidi. Etenim non pangimus panegyricos, sed animi cujusque vultum, qui ingenii laude præstiterit, oratione, tanquam penicillo, describimus. Oris mei imaguncula nondum advenit; cum aderit, properabit ad te, ventis atque avibus citius. Quam cum aspicias, exclamabis, Cadaverosam hominis faciem, dignamque, quæ in literatis fictilibus urnis, joci causa, depingatur! 

Vale. Romæ, XII Kal. Decemb. C I O I O C X L I I I.

## XLVIII.

Laudatissimo, omnique honore cultuque  
dignissimo viro,

T Y R R H E N O.

**I** Am Nihusio redditum esse arbitror fasciculum literarum, ab Allatio missum; quibus doctissimis illius postulatis respondet. Neque dubito, quib animum illi expleverit. Ita est Allatius earum rerum peritus, de quibus ille doceri volebat, ut paucos habeat pares, superiorem fortasse neminem. Ac forsitan serius, quam vellet, sibi responsum, queretur; sed non debet nimium, ex suo ocio, alienum spectare. Aulicus ille est, & multarum rerum occupatione districtus. At ego Nihusii, in me diligendo, & in curando, ut mea opuscula quam nitidissime & quam celerrime typis excudantur, in ipsis literis, quas mittis, benevolentiam, curam, assiduitatem, diligentiam, mirifice laudo. Sicut etiam tuam erga me benignitatem humanitatemque satis mirari non possum: nam quamquam tibi, homini occupatissimo, remiserim, nisi quid necesse esset, necesse ne haberes scribere; tuæ tamen ad me literæ nunquam conquiescunt. Quibus literis, noli existimare, quidquam mihi vel optatius vel iucundius posse contingere. Iis enim legendis, non modo vocem tuam, absens, audire videor, verum etiam in eis, quasi in quadam tabula, elegantissimi ingenii tui imaginem expressam aspicere. Utinam tu quoque intueri in meis epistolis posses, amoris in te mei formam, & obligationis magnitudinem, qua tibi devincior: magnus profecto voluptati, quam ex tua amicitia capio, cumulus accederet. Verum non ea mihi orationis facultas, non ea ingenii vis obtigit, quæ utrique rei explicandæ par esse possit. Sed tamen si tuis literis incredibiliter delectari & allevari me sentiam, si molestia aliqua premar; tamen, si illis, publicis negotiis, quibus istic præes, fraus aliqua fiat, hanc delectationem & allevationem, præsertim si scribendi necessitas

sitas nulla sit, publicæ utilitati, quamvis iniquo animo,  
 remitto atque condono. Etenim laudo te, ac beatum  
 judico, cui, quidquid inest ingenii, doctrinæ atque pru-  
 dentia, quod tantum est, ut non videam, cui debeas ce-  
 dere, totum libeat ad commune aliorum bonum uti-  
 litatemque conferre. Neque eos unquam laudavi, qui  
 cum instrumenta rerum gerendarum, à nativitate accepis-  
 sent, privatum ocium publicis negotiis anteposuerunt.  
 quod si optimo ac sapientissimo cuique persuasissent, ci-  
 vitates ac Resp. nullas haberemus; jampridem enim ea-  
 rum interitus consecutus esset. At, si tu hoc, inquires,  
 isto pacto arbitraris, ut prædicas, cur te avocasti à ju-  
 diciis, à foro, à curia, & ab omni republica? cur in  
 hortulis, ut ita dicam, quievisti tuis, ut ibi, Epicuri  
 discipulus, vitam in ocio ac voluptate, hoc est, in lite-  
 rarum studiis, quibus nulla major voluptas est, ageres?  
 ut in ea esse sententia videaris, quæ negat, versari in  
 Rep. esse sapientis. Vera loqueris; neque illud me pu-  
 det confiteri, procul à Rep. ætatem egisse, & ubi ado-  
 lescentiam habuerim, ibi senectutem exigere. Verum id  
 magis fortunæ injuria, qua semper iniqua & adversa u-  
 sus sum, quam voluntate mea, factum est: ea enim me,  
 summo Resp. capeßenda studio incensum, repulit inde,  
 quo aggredi cupiebam: itaque, quod erat necessitatis,  
 coepit etiam esse voluntatis; omnemque publicorum  
 inunerum cogitationem meo ab animo ejeci. Quod si sit  
 aliquis, cui vera potentissimi illius Regis sententia vi-  
 deatur, qui laudat senem, & fortunatum esse ait, qui in-  
 gloriùs sit & ignobilis ad supremum diem perventurus;  
 ecce me, quem probet, ac beati nominè, si velit, affi-  
 ciat. Verum, hanc habeo huic meo ocio gratiam, quod  
 te mihi, dominum, patronum, amicum, de me optime  
 meritum, obtulit. Nam nisi Eudemia ocii mei fructus  
 extitisset, nunquam tanto bono auctus ornatusque fuis-  
 sem. In quo ego tantum lucrì pono, ut non solum illud  
 mihi velim, usq; ad exitum vitæ, integrum inviolatum-  
 que permanere, sed etiam posteris notum esse atque te-  
 statum, me usum te esse amico, atque patrono. Quod  
 mihi posse contingere existimo, si, quemadmodum sæ-  
 pius ad te scripsi, litteræ, quas tibi misi, vel istic Co-

loniæ, vel uspiam in Belgio, imprimantur. Sed pudet me de hoc plura scribere, ne tu, qui meam stultitiam adhuc pertulisti, stomacheris, ac me non minus insanire dicas, quam Ciceronem, qui de filiæ apotheosi sollicitus, tantam Attico suo molestiam exhibebat. Salvere cupio, viribus animi perquam venerabundi omnibus, Illustrissimum Nuncium Apostolicum, Fabium Chisium, patronum meum ingentem: ad quem scribi à me sæpius, te non latet. Vale. Romæ, pridie Nonas Decembris  
C I O I O C X L I I I.

## XLIX.

Clarissimo ornatissimoque viro, domino  
& patrono singulari,

## T Y R R H E N O.

**C**Um inaximo à te opere petii, ut, si quod in meos versiculos mendum irrepsisse cognosceres, emendares atque corrigeres, vel si qua in eis syllaba, humanæ imbecillitatis vitio, me peccasse constaret, ad rectam carminis rationem revocares ac redigeres; factum est à me serio, ac more majorum, sine fūco ac fallaciis; nec veritus sum assentandi suspicionem, quia probe sum mihi conscius, nihil in me prorsus inesse, quo signa conturbentur, quibus voluntas à simulatione distingui possit. Et quamvis viginti ferme annis in aula versatus sim, feci tantum in ea temporis, rei omnium preciosissimæ, jacturam, non autem pessimis aulicorum vitiis animum oblinivi, neque impetrare à me unquam potui, ut falsus fierem, atque aliud clausum in pectore, aliud in lingua promptum haberem. Iis vero, apud quos, in sermonibus familiaribus, summam tibi eruditionis eloquentiaque laudem attribuo, ne quidquam à me, amicitia vel gratia, fictum ac simulatum existiment, tua carmina in medium afferro. Quibus lectis, non solum te illi, inagnum faciendi poliendique carminis artificem fatentur esse, dignumque, ad quem alii, in scribendis versibus, consilium opemque expetitur, adveni-

ant; verum etiam, in eo carmine exhorrescunt, in quo pulcherrima non pauca nobis enarras. Ita enim, tot in eo; nomina tam absona, tam absurda, tam barbara, tam ab usu aurium nostrarum abhorrentia, eleganter versibus illigas, ut ne latum quidem unguem à legitimo numero ac sono recedas. Quod si Horatius in uno oppidulo Egnotutio ita hæsit, ut confusus sit, multo illud posse facilins signis, quam versibus dici; quid facturum enim fuisse arbitramur, si in tot enormia incidisset vocabula? Profecto hastas abjecisset, seque omnino posse eas versibus complecti desperasset. Pergratum est mihi, quod scribis, eam te literarum exemplum accepisse, quibus voluptates expono, quas ex ædium earum amœnitate ocioque, quibus nunc habito, cepi. Cepi, inquam; quia ab illis exennndum est mihi: pelior enim ab homine potenti, vicino meo; qui ab invito eas domino coëmit, ut domui, magnificè à se exædificatæ, conjungat. Quod eo mihi molestius accidit, quia plures ibi annos habitaverat, atque etiam mortuus est, Iulius Sanfedonius Episcopus, vir sanctissimus, popularis tuus. Cupiebam enim, in eisdem ædibus, & in eodem cubiculo, extremum meum diem obire, ubi ille suum obiisset. Sed ita sunt res humanæ, atque ea lege nati sumus, ut nullum cuiquam perpetuum sit bonum. Nam vix aliquod datur, cum eripitur. Propterea ipse me sedulo & hortor & moneo, ut abducam animum à rebus tam incertis, tam fluxis, tamque fugacibus, atque ad ea adjiciam, quæ uno eodemque tenore semper fiunt, neque eorum cursus, calamitatis cuiuspiam interventu, revocatur, vel interrumpitur. Placet mihi vehementer, quod scribis, posse eam epistolam, una cum aliis versibus exaratis, libro, cujus impressio ad exitum festinat, adungi. Neque id futurum arbitror ab re; sunt enim omnes fere de rebus seriis & utilibus scriptæ. Doleo, reversionem tuam ad nos, in vernum tempus differri; ea in primis de causa, quod mansionem istic valetudini tuæ incommodam maxime experiri esse. Verum obedientia, qua voluntatem tuam, summi Pont. voluntati summittis, ab omnibus morborum periculis te eximet, & saluum atque incolumem ad nos remittet. Quamvis is nunc

rerum est status, ut tibi non modo non sit dolendum, verum etiam lætandum, quod hinc absis. Nam multa tuis oculis surripiuntur, quæ tibi, Rom. Ecclesiæ, ejusque dignitatis in primis studio, dolorem acerbissimum inurerent. Non vides ardentem bello præcipuam Italiæ partem; non urbium nobilissimarum agros, incendiis, direptionibus, cædibusque vastatos; non sceleris nefarii reos viros spectabiles, non fidem, tota Italia, angustam, solutiones difficiles, annuam caram, aliaque etiam pejora, quæ belli calamitas affert: &, quod autimum vehementius excruciat ac lacerat, nullus adhuc horum malorum finis, nulla pacis & compositionis spes; sed contra, majorum incommodorum metus ostenditur. Utinam nobis Deus, ob peccata nostra iratus, reconcilietur, ac sit propitius. Proxima Cardinalium comitia incredibili bonos omnes voluptate affecerunt, Ioanne de Lugo in illud Collegium cooptato. Tota enim urbe lætitia agitabatur; quod videbatur, virtuti, ac bonis artibus, patefactum ad summam amplitudinem aditum esse. Hic, quemadmodum uovisse te arbitror, cui enim ille notus non sit? ex nobili Societatis Iesu familia, jampridem doctrinæ, eruditiois, ac probitatis propemodum singularis fama, tanquam fax quædam elucet. Annos quatuor & viginti in Gymnasiis Soc. Iesu Theologiam docuit; multos, de eadem disciplina, egregios edidit libros; in his, volumina aliquot, de Iustitia & Inre, quæ ceteris autem dicuntur: concionator adeo præclarus, ut ego, qui concionatores plerosque jam prope fastidio, quod eorum oratio fere vel cincinnulis fucoque puerili conspersa, vel sententiarum ineptiis referta, mihi stomachum moveat, hoc uno audiendo expleri satiarique non possem. Mei oris imaginem, simul ac ea mihi reddetur, quod fore propediem spero, mittam ad te. Nam eam impense ab illo, qui in æs incidendam curat, exigere, pudore deterreor; verens, ne, si flagitator molestus interveniam, aliquam apud eum vani vel ambitiosi hominis notam incurram. Vale. Romæ, xv Kal. Jan. c i d i c x l i i i.

L. Doctissimo



L.

Doctissimo religiosissimoque viro ,

T Y R R H E N O.

**H**odie Christo Domino , qui pro nobis homo nasci dignatus est , natalitia dantur. More , à majoribus nostris jam pridem inducto , fit , ut amicis ac patronis hos dies , illius nascentis memoriæ celebres atque solemnes , faustos atque felices , à Domino , una cum reliqua vita , precemur. Sed , pleraque pars hominum , qui nihil animo videre possunt , sed , tanquam pecudes , ad oculos omnia referunt , eam illis felicitatem deprecantur , quæ ipsa per se veræ felicitatis rationem non habet ; eam nimium , quam in opibus , honoribus , divitiis , longa ac referta voluptatibus vita collocamus ; fructus vero & utilitates , quæ ex diebus his festis maximæ & innumerales percipi possunt , nec ipsi intelligunt , nec amicis exoptant. Mitto errorem , in quo versantur , cum felicitati nostræ , quæ stabilis & æterna esse debet , tanquam solum & fundamentum , substernunt res fluxas atque fugaces , quæ , quidquid ipsis sustinendum creditur , evertunt ac diruunt. Mitto hoc , inquam ; nonne , cum ea amicis cupiunt , ( si illi sint ignari , quemadmodum rebus secundis uti conveniat , ) non tam , miseris ad felicitatem aditum aperiunt , quam ruinæ periculum struunt ? Ego iis , quos diligo , colo , quosque mihi patronos adoptavi , quamquam illa quoque , si sint viri boni , evenire cupiam , ( sunt enim , ut placere Peripateticis video , ad usum virtutis idonea , nec sine illis obtineri ea vita , quæ ab ipsis beatissima dicitur , potest , vere an secus , nihil ad hoc tempus , ) attamen multo velim illa magis contingere , quæ divinus hic magister , cujus hodie natalis est dies , non solum verbis , dum vixit , in hominum aures infudit , sed suo etiam exemplo , in eorum oculis atque animis est conatus infigere ; videlicet altissimam animi demissionem humilitatemque , incredibilem rerum omnium humanarum contemptum , summam cælestium æternorumque bonorum cupiditatem , implacabile pec-

tendis ea prima ducunt, summaque ambitione perquirunt, quæ utrum sint ipsis utilia nec ne, funditus ignorant: ut jure possit illis objici, quod Christus Dominus Zebedæi liberis inquit, *Nescitis, quid petatis*: quod illi postea, malo suo edocti, fateri coguntur, nihil ipsis minus expediens fuisse, quam id, ad quod obtinendum, studio omni, enitendum esse existimassent. Ac multos proferre possem, quibus, nostra memoria, id, quo adepti se beatos fore putabant, infelicititer cesserit: sed uno Octaviano Raggio ero contentus, cui hodie in *Æde, sacrosancto* nomini Iesu sacra, iusta persolvuntur. Hunc amplitudo illa, cujus erat incredibiliter cupiens, quamque multorum annorum laboribus, inanibus, ut est mos aulae, officiis, & quod rem continet, multis aliis impensis obtinuit, paucorum dierum lætitia affecit, magnis laboribus ac sollicitudinibus auxit, ac celerius, quam per ætatē convenire videri posset, mortem obire coëgit. Nam, cum in Corsicam navigasset, ubi insignem ac locupletem cathedram obtinuerat, paucos post menses revocatus est Romam, cujus ingens desiderium illū tenebat. Cumq; satis feliciter, anni tam adverso tempore, Ianuam pervenisset, ac posset, quod reliquum esset itineris, terra conficere, maluit se mari fluctibusque committere: ac, subito coorta tempestate, triremis, qua venebatur, periclitari adeo cœpit, ut ille certo, haud arbitrario, de se actum esse existimaret, ut etiam Sacerdoti, qui ibi aderat, peccata confiteretur; cum indecorum Cardinali esse diceret, sine Sacramento Pœnitentiæ ex hac vita decedere. Sed postea, tempestate sedata, Romam reversus, siue maris agitatione, siue metu, quo fuerat concussus, siue navigationis incommodo, paucos post dies lethalem in morbum incidit, cujus vi oppressus interiit. Hæc cum video, & audio, fit ut jam minus inemet mei pœniteat, ac minorem in dies dolorem capiam, quod fas mihi non fuerit, ad divitias pervenire, vel ad honores ascendere; cum in rebus istis, ad quas, tanquam ad summum bonum, gregatim homines conflunt, multo plures insint causæ dolendi, seque excrucianti, quam lætandi gaudendique: ac denique beatos eos judico, qui, virtute armati, omnia præsidia habent in se, bene beateque vivendi. Sed

di. Sed ex hac maris tempestate, de qua diximus, quæque Raggium afflixit, unum exortum est bonum, quod divinam in homines providentiam mire declarat, & illam Christi edictionem commendat, qua præcipit, ne nimia rerum, ad vitæ usum necessariarum, solitudine nos premi sinamus; quoniam, si mentem nostram totam in Deum, atque ad divina ejusdem mandata exsequenda, conjectam habuerimus, ille dator sit operam, ne quid nobis desit; immo etiam ut supersit, è quo vivamus. Erat in eadem triremi vir nobilis ac locuples, qui periculi magnitudine exterritus, cum existimaret, nihil fere in humanis auxiliis esse præsidii adversus vim tempestatis, ad preces, ut in extremo casu sit, & ad vota confugit, vovitque, si incolumi sibi pedem è triremi referre liceret, se virginem pauperculam indotatam ducturum uxorem domum. Cum igitur Romam venisset nudius quartus, propè D. Petri Ædem in Cardibalem nescio quem, rheda vectum, incurrit, ac, ne haberet necesse consistere, atque hominem salutare, in proximam ibi constrinam se recepit; ubi miles quidam levis armaturæ, è custodia Pontificis, caput molestò ac supervacuo capillorum pondere exonerabat: à quo ille petiit, num equum aliquem, qui alicujus esset precii, haberet: qui se habuisse respondit, sed haud ita multo ante interiisse; quod factum omnes domesticas suas rationes contrabasse; nam statuisse se, ex mercede, quam ex eo vendito collegisset, tres filias nobiles, quas ex uxore sua suscepisset, tribus honestis viris nuptui dare. Quod ubi homini ad aures venit, venit etiam in mentem voti, quod Deo nuncupasset; decrevitque, ea illud occasione persolvere; atque, Duc me, ait, sodes, ad eas; eamus visere. nam si ita est ut dicis, ad eas honeste collocandas usui tibi esse possum in primis. Nulla est in me mora, ait miles; præeuntem me sequere. Ille it, venit, videt virgines honesta facie; capillus incomtus, nudus pes; texebant una omnes, pannis obsitæ, eoque artificio se tuebantur; unde sciri poterat, quam pudice, parce, ac duriter vitam exigerent. Placuit illi, qui spectatum venerat, una præter ceteras; ac seductum parentem rogavit, eam sibi uxorem ut daret. Parens primo, se irrideri, existimavit; quod

quod videbat, suam cum illius non æquam esse factionem: neque tam filiam in matrimonium, quam in concubinatum posci suspicabatur; ac, Vide, inquit, quid agas; quamvis res nostræ sunt pauperculæ, attamen existimationis bonæ ita sumus cupidi, ut quivis alius. Sed cum ille persancte affirmaret, se non derisum eum venisse, unumque instaret, ut condicionem acciperet, atque filiam desponderet sibi; credidit parens; despondit; atque in hunc diem dictæ sunt nuptiæ. Verum ab illo, simul ac domum se recepit, nihil factum est prius, quam ut virgini duo aureorum millia muneri mitteret, unde sumtus in nuptias faceret. Quid credis animi fuisse virgini illi, cui vix antea obolum unum licebat aspicere, cum tantam vim auri sibi ante oculos positam cerneret, ut ea uteretur ac frueretur? Credis, potuisse eam verbum ullum proloqui, quo illi, cujus tantum erat in se meritum, gratias ageret? Obstupuit, hæsit; quid diceret, non habuit: potius factum est etiam, ut incerta animi esset, num vigilans, an in somnis, ut sæpe accidit, thesaurum invenisset. Mater virginis, præ gaudio, nihil nisi lacrimarum imbrem ab oculis dabat. Hæc eo scripsi, ut Dei in homines providentiam, quanta sit, admiremur. At vide, quam multa in hanc rem concurrerint, ex quibus, tanquam anulis inter se nexis, Dei consilium, quo virginis illius inopiæ subveniret, quasi gemma dependeat; tempestas, hominis illius metus, quo periculi magnitudinem est coactus voti mercede redimere, Romam accessus, Cardinalis interventus, in constrictam receptus, miles qui capillum & barbam tonsori secandam præbuerat, virginis aspectus in quo ille commotus est. Hæc mihi scribenti nunciatur, venisse ad me domum, humanitatis & officii scilicet gratia, virum optimum, studiosissimum atque amantissimum tui, equitem Puteanum. Accurro; prodeo illi obviam; gratias ago. Post mutuas salutationes & amplexus, ius sessum; & continuo ab eo injecta est mentio de te; cœpitque miris in cælum laudibus efferre singularem animi tui præstantiam, suavissimarum artium scientiam, in rebus agendis dexteritatem, tuum denique excellens ingenium, ad omnia summa natum; quibus artibus, mihi istorum hominum voluntates

Iuntates & studia promeruisses ; adeo ut nemo in isthæc loca venerit , cum ea potestate , qua præditus es , quem pluris illi fecerint, quemque ardentiori, quam te, amore complexi sint ; ploravitque , tuis non respondere favorem speratum meritis. Cui ego, Hui, inquam, tu mihi eum laudas, cui isthæc, quæ de illo prædicas, sunt notissima ? sed novi animi ipsius inoderationem, novi hominis sapientiam, qui ita directum illud ad virtutem iter habet, ut eam propter se ipsam expetendam ducat, non ob aliquod præmium ; ut, qui aliter sentiant, ac propter virtutis præmia putent esse sibi recte honesteque vivendum, hi non tam virtutem expetere videantur, quam velle eam suarum cupiditatum famulam atque administram habere. Denum ita tum eques discessit à me, ut opere petierit maximo, suis ut verbis salutem tibi plurimam dicerem, ac veterem suam erga te observantiam commemorarem. Vale. Romæ, iv Non. Ianuar. **CICICXLIV.**

## LII.

Clarissimo doctissimoque viro,

T Y R R H E N O.

**P**roximas tuas ad me literas, simul ac legi, nulla interposita mora, Leoni Allatio, summo viro, legendas misi. Nondum videre hominem potui ; sed eum arbitror incredibili voluptate fuisse perfusum. Erat enim præter modum cupidus cognoscendi, num fasciculus literarum suarum, in quibus componendis mensem unum & eo amplius elaborasset, ad Nihusium pervenisset. Cum vero intelligat, non solum, eum pervenisse, verum etiam illi gratissimum acceptissimumque extitisse, fieri non potest, quin incesse rit omnibus læticiis. Epistolam ab Allatio tuam, flagitator molestus, recuperavi ; cum nullam tuarum epistolarum, diem unum patiar domo mea abesse : quas ego, thesauri cuiusdam instar, avare constructas ac reconditas habeo, ac fidei cuiusquam vix credo. Venio ad me, Nulla est cuiusquam oratio, quæ possit  
tux

tux in me humanitatis indulgentiæque magnitudinem verbis comprehendere: nam, quidquid dixerit, minus erit. Equidem, cum in hanc cogitationem ingredior, ad incredibilem admirationem traducor. Quam enim rem, joco, à te tandem volui, quin perfecerim? Taceo alia: non me deterruit pudor, quin à te poscerem, ut epistolæ, quas ad te misissem, ederentur; ac vix hoc petii, cum mihi morem esse gerundum existinasti. At, noli putare: me ulla unquam cupiditate vehementius exarsisse, quam, ut esset omnibus notum atq; testatum, tecum mihi amicitiam usumque literarum intercessisse. Nam, quid mihi, vel ad existimationem honestius, vel ad nominis famam diuturnius, potest accidere, quam sciri, talem ac tantum virum, omnibus naturæ bonis, omnibus omnium virtutum ornamentis instructum, tot provinciis atque muneribus, summa cum fidei, probitatis, justitiæque laude, administratis, toto orbe Christiano notissimum, privati hominis amicitiam non esse aspernatum, sed potius etiam literis ultro citroque dandis accipiendisque, perpetuam esse voluisse? Et quoniam tantum amicitiae nostræ indulgendum esse statuis, velim, si fieri possit, epistolis illis adjungi eas, quas Nihusio, Mario, & Puteano dedi. Cujus quidem Puteani me pudet; quod ingenii vires mei minores sint, quam ut cognitorem tantum sustineant. Qui, in Michalori effigie, quid de me possit queri, non video: hominem enim illum antea, ne tantum quidem esse, noveram; de quo ea scripsi, quæ didici ab eis, qui pulcre eum sibi notum esse aiebant. At si volumen istud epistolarum futurum est nimis exiguum: quod ego non arbitror; augeatur literis, versibus scriptis: sin minus, ad ferendum libri Exemplorum tenuitati auxilium opemque, mittantur. Atque exemplum earum literarum, quas scripseras te non habere, statim misi: quod miror te non accepisse. Neque, ut tu suspicaris, epistolæ tuæ sententiam non sum assecutus; non enim tu is es, qui, ut plerique faciunt, obscure ac perplexe loquaris, sed complecteris verbis, quod vis, ac dicis plane, quod intelligam. Quod scribis, ut ad alios epistolas, à me collectas, mittam; superfluum esse ac non necessarium existino, si, quemadmodum ex schedula, ab

la, ab Allatio hodie ad me scripta, licet intelligere, Natus, una cum orationibus, omnes meas epistolas, in quibus, præter admodum paucas quas mitto, illæ numerantur, Cælio tradidit; quod poterit ex Nihusio sciri; cuius eas censuræ subijcio, ut, me inconsulto, detrahat, addat, mutet, corrigat, faciat, quod lubet; nihil enim hoc mihi gratius ab eo potest accidere. Verum, quod ad orationes attinet, si sint imprimendæ, maxime cuperem, eas illis accedere, quas olim adolescens edidi, atque eas legendi potestatem vix paucis feci, quod pluribus essent mendis deturpatæ atque corruptæ. Nam, quamvis verbis effervescentibus consent, ac paulo nimium redundantibus, quod erat ætatis, denique si sint in eis multa, quæ amputes; quædam tamen ex iis ad eloquentiam indoles, ut multi ajunt, elucet. Eas ego, cum tempus poscet, ad vos mittam, optime expurgatas emendatasque, P. Jacobi Syrinundi V. C. beneficio; qui tunc temporis, cum esset Romæ, hanc sibi operam, honoris mei gratia, sumpserat. In iis epistolis, quæ ad te veniunt, sunt quædam jocosæ: ut proximis his Dionysiis habeas, quod ridere possis. Quarum una est, ad Moonsum scripta, de cuiusdam vicini nostri, Trocho, hoc est, Rora nomine, vita ac moribus, qui bona obligurierat sua, & aliorum, qui suam illi pecuniam crediderant. In ea epistola notatur Ecloga quædam, ab aliquibus, quos non est necesse nominare, festis Bacchanalibus data, quæ turpis etiam visa fuisset, si in lupanari aliquo acta esset, ad scorta sordida, diobolaria, quæque, ut Adelphasium illa apud Plautum loquitur, cœno delibuta, oleant stabulum, statumque, sellam, & sessibulum merum. Inducebatur in ea fabula, qui, nullum esse suaviorem sibi cibum ajebat, quam mulierem, quam, ut magis animo suo lubeat, verset, ac vel assam vel madidam sumat. Sed auctor fabulæ, homo senex, pœnas dedit, quamvis non meritis illius pares. At multo majores gravioresque persolvit Trochus, itidem senex, sed magis, quam quisquam adolescens, flagitiosus ac voluptarius. Nam sapientis consilii immemor, qui jubet nos, memores esse paupertatis, tempore abundantia, primum, Roma abiens, in itinere crus fregit; postremo, alienata mente, in quadam villula agri Florentini, in sum-



in summa rerum omnium egestate atque inopia, diem obiit supremum. Huic epistolæ accedit alia, qua respondemus reprehensoribus Ignatii nostri; quod est drama, Etrusca lingua à nobis compositum, & à Patribus Soc. Iesu, regio apparatu sumptuque, populo datum, in Æde nomini Iesu sacra, mense Iulio CIO IO CXL, qui fuit annus, à Societate fundata, centesimus. Illud etiam in tuis literis significare videris, tibi esse in animo, non solum epistolas, verum etiam puncta moralia, ex Euangeliiis Dominicorum dierum excepta, quæ præ manibus habeo, commendare per alios typographis. Quod sane mihi perquam gratum; deprehendenti videlicet amoris tui, quoquo me verto, vestigia. At, quoniam scire postulas, in quam molem evasurum sit illud opus, si imprimatur; superabit, ut opinio mea fert, magnitudine Pinacothecam & Exempla. Nam, quamvis puncta ipsa breviter explicentur, accesserunt tamen ad ea Homiliæ, & sermones nonnulli, habiti à me in Sodalitate nostra, in qua tu olim dicendi laude floruisti. Superest, ut de oris imagine tibi respondeam. Ego, quantum pudor meus patiebatur, institi, ut ea, delineatoris artificio, tanta subtilitate, ad similitudinem veri expressa in æs incidere-retur, ut illam animi quoque picturam esse diceres. Sed, qui negotium suscepit, homo, in aliis quoque rebus occupatus, atque ita tardus, ut ex ipsa mora natus videatur, diem ex die ducens, me vana spe lusit, & usque ad hoc tempus, promissis oneratum attraxit. Sed cum mihi reddetur, à nemine admonitus, mittam eam ad te. Verum, est aliquid, quod volui scribere, & sum oblitus; de eo nimirum quem, proximis superioribus literis narra-vi, votivam & indotatam uxorem duxisse; cuius rei, tum multos graves viros, tum rumorem ipsum auctorem habebam. At vetus est, quod dicitur, rumorem semper vero aliquid addere. Sed in hoc nimis ille quidem est progressus: nam cum percrebuisse, sponsum duo aureorum millia muneri novæ nuptæ misisse, inventum est, fuisse ducenta. Quamobrem, ne mendacii aliquando argui possim, jube meas literas corrigi, & pro duobus mil-libus ducenta scribi. Vale. Romæ, pridie Id. Ianuar. CIO IO CXLIV.

## LIII.

Clarissimo viro,

T Y R R H E N O.

**H**occine credibile est, aut memorabile, (liceat mihi, ab his Poëtæ comici verbis, scribendi exordium capere, cum id, quod narrandum est, possit frustrationes in comœdiis dare; ) hocce, inquam, credibile est, tantus cuipiam innatus ut sit astus & malitia, & tam astutum & callidum, ad eludendos alios dolis, ingenium! Nam nisi id illi à natura contingeret, nulla posset arte ac disciplina, non solum dolos atque fallacias, verum etiam os, colorem, ac linguam sibi parare, qua aliis verba per ridiculum daret, ac pecuniam, inulierem, vel aliquid aliud; aut, quod astute voluisset in corde, pulcre explicatum reddere. Sed hic philosophandi non est locus: ad fabulam venio. Ille, de quo antea scripseram, vir domi suæ nobilis, Cardinalem Raggium propinqua cognatione contingens, ille, qui tantas se divitias habere jactabat, ut nesciret quid faceret auro, ille, qui adversa maris, quod nunquam fortasse ingressus fuerat, tempestate jactatus, ad virginem ignobilem, pauperculam, ac sine dote, secum matrimonio jungendam, voti se religione obstrinxerat, ac tam bonam tamque locupletem conditionem, ad militis illius prætoriani levis armaturæ filiam detulerat, qui primum dictus est, puellæ aureorum duo millia, deinde ducenta, sed in somnis, misisse, quibus acus, ligulas, flores, & alia capitis ornamenta coëmeret; hic, inquam, demum inventus est nebulo, in primis malus, callidus, doctus, ac nimis graphicus sycophanta. Nam, ea ipsa hora, qua miles suam ipsi gnatain despondit, cum nullam haberet domum, præter tabernam diversoriam, nullum cubile, nisi mercede conductum, se in illius domum immerfit, neque antea pedem inde foras extraxit, quam ut aliam urbem persequeretur, in quam suas fallacias afferret, alios palumbes exquireret, quos dolis deciperet; simulans, id se cognatorum causa facere, quibus si quid oboleret, illico nuptiis illis vastitas, perniciēs, exitium

exitium instaret. Sed quia necesse est aucupi, facere sumptum, avibus cibum offundere, neque is sumptus est ab re aucupis, quod aves, si semel sint captæ, rem illi solvunt; ideo quotidie inducebat, in domum soceri, bajulum, onustum œnophoris vini præstantissimi, & opiparis delicatisque obsoniis; quæ omnia, credita pecunia, à caupone emebat: cui os postea cum aliis una sublevit. Itaque omnes, ociosi ab animo, se apud mensam plenam nitide lepideque curabant: quo fiebat, ut pleniores indies coloratioresque evaderent: quæ res, multorum, ad invidendum, animos commovebat, qui eandem sibi fortunam expeterent: nam rebus aliorum secundis invidetur. Interea, in Æde Vaticana D. Petri, à Parocho edictiones ad populum habebantur; ut, si quid compertum cuipiam esset, quod obstaret, quo minus illæ nuptiæ fierent, id celatum ne haberet, ac palam efferret. Quibus habitis, cum nemo accederet, Parochus erat auctor homini, ut virginem, sibi desponsam, matrimonii nexu constringeret, atque operi extremam manum imponeret. Verum ille, variis excusationibus rem prolatando, ac diem ex die ducendo, Parochi dicta eludebat. Sed cum ille instaret, urgeret, ut nuptiæ fierent, pollicitus est tandem, nullam in ipso moram futuram; sed quatrimum concederet solum; nam sibi transcurso opus esse in portum Centumcellarum, quo navem pervenisse acceperat, quæ aurum, & vestem sponsæ, & celatum argentum optimum, præterea stragulam vestem, aliaque non parum multa afferret, quibus ades, quas esset conducturus, instrueret, ac pro sui nobilitate generis exornaret, vestem etiam, unde Parochus malacum à se pallium & tunicam, ex tenuissima lana Hispanica confectam, acciperet; quæ mercedem illi esse volebat assiduitatis & molestiæ, si quam susceperat. At Parochus, cui nunquam evenirent tales hereditates, omnes illius excusationes recepit, & ut quamprimum se itineri commendaret, oravit. At malus, sponsæ digito, quæ illi dederat anulum, detraxit, velle enim eum aurifici tradere, quo, interea dum abesset, quatuor aliis adamanribus augeretur: tum, quia erat hyems, ne viaticatus æstive illud iter arriperet, mutuas à pluribus pecunias

accepit, ab nno scuta decem, ab alio quinque, ab alio sex, & ab aromatario quodam octuaginta; cui, quoniam sibi cautum esse volebat, arculam quandam pignori oppositam reliquit, in quo plura continebantur, seorsum singula suis involucris contexta, ac pluribus vinculis arcte colligata atque constricta, tum nominibus rerum, quæ in eis continebantur, inscripta; verbi gratia, Hoc integumento clauduntur toruli, sive orbiculi aurei ducenti, Hoc torques triginta auro gemmisque distincti, Hoc uniones trecenti, orbe, candore, ac lævitate præstantes: ac, ne ille fucum sibi fieri existimaret, solutis vinculis, rejectisque involucris, sarcinulæ unius ex illis, serica tibialia ibidem constructa ac seposita profert. Aromatarius credit, nec sibi amplius esse quærendum putat. Ille arculam claudit, obsignat, pecuniam accipit, discedit, equum à focero poscit, impetrat; quin etiam focer, honoris ejus gratia, famulum sua mercede conducit, qui se eidem comitem addat, omnibus in rebus morigerus sit, equumque procuret. Sed paucos post dies famulus redit, sine sponso, &, quod refert, sine equo; nunciatque, hominem, intempesta nocte, clam omnes surrexisse, ac fecisse id, quod olim servi nequam facere soliti erant; & cum mane illuxisset, neque ipsum neque equum esse visum, neque potuisse sciri, quonam versus castra movisset. Quibus auditis, tum demum, qui aderant, magnum illum sycophantam, se vero fungos, bardos, stipites fuisse, intellexerunt, qui ab eo se, tanquam pecudes, duci sustinuisent. Sed miser in primis miles vicem suam dolebat, cui nulla censoris animadversione, sed furis improbissimi opera, equus fuisset ademptus, atque inde ab equitibus ad pedites rescriptus. Solus aromatarius nihil plane commotus est, qui se arcula illa prædivite, quasi altera Euclionis aula, tutum esse arbitrabatur: ac secum, Nisi mihi, inquit, recte cavissem, in eadem, qua miles iste, ac ceteri, qui mutuitanti crediderunt, iniquitate hæsissem; ò quantum est, sapere in loco! non enim passus sum mihi verba dari, sicut isti: quibus non plus sapientiæ adfuit, quam sui occisæ; cum homini externo, ignoto, fidem habendam esse duxerunt, quod bene vestitus incederet, ac magnifice de se loqueretur. Verum,

cum

cum daret operam, apud iudicem, ut, testibus præsentibus ac scriba, aula recunderetur, inventum est, integumentis illis, partim lapillos, partim vitri fracti frustula, partim scœnum, ac laceros pannos includi. Itaque sapiens aromatarius, suam sibi sapientiam decoxisse, omnium cum risu, cognovit. Hem tibi omnem fabulam. Ac, ne me existimes sapientiore aliquando fuisse, quam istos, quos ludos factos esse ajo; velim scias, ad eundem scopulum me navem olim offendisse, cum in aula Card. Peretti versarer. Nam cum mane quodam in proœtione solus inambularem, sit mihi obvius quidam, cujus cum faciem, incessum, vestitum aspiceres, videbatur esse quantivis precii. Rogat me, num Iulius (is erat Cardinali à cubiculo) esset domi. Respondeo, si tantulum ibi manere voluisset, se eum esse visurum. Interea cœpit ille mecum sermones variis de rebus habere, sed ea sententiarum gravitate, eo verborum pondere, eo oculorum conjectu, ut Tit. Coruncanium, vel Catonem, vel Scævola, vel aliquem alium ex veteribus illis, qui sapientes habiti sunt, tecum loqui dixisses. Denique, se virum esse patricium dixit, Veronæ ortum, ac velle à Iulio illo scuta quindecim mutua petere, quo salinum argenteum, pulcherrime factum, ac pignori oppositum, redimeret, ac venderet; jamque emptorem esse inventum. Sed dum sermones cœdimus, adest quem volebat; ac vix tria inter ipsos verba faciunt, cum copulati ad me veniunt; loquitur Iulius, sibi non esse argenti copiam, quod mutaret amico, verum, magnam me ab illo gratiam initurum, si illud dedissem: nam statim, vel argentum, vel salinum reddidisset. Poteram illi his verbis respondere, Quæ tibi est, item mihi est, argenti inopia; sed non sum ausus hoc facere: ac meo famulo pecuniam enumeravi, imperavique, ut cum illo iret, nec inanis domum reverteretur, sed vel argentum, vel salinum referret. Abiit, redit, pecuniam refert. Tum cœpit me mei ipsius pudere, quod viro fidem non habuissem, ac vehementer optare, beneficio aliquo, factam illi injuriam emendare. Sed non fuit mihi expectandum diutius; paucos enim post dies venit ad me, ut alia scuta quindecim sibi mutuo oranti dem, quibus patellam argenteam, cum emblematis

egregio opere factam, redimeret, quæque mihi ante noctem redderet. Quid multa? non ita ille malebat accipere, ut ego dare. Itaque gaudens, oblatam mihi esse occasionem, qua possem illi gratificari, confestim argentum, quod poscebat, sine ullo teste numero. At videre erat oris illius contumaciam, & contemptorem animum. Ita pecuniam illam accipiebat, ut me beneficio videretur afficere, quod eam mihi eriperet. Vesper adest; maturius, quam antea, me domum recipio, ne sim in mora, utque argentum, mihi renumerandum, accipiam. Sed nihil erat me necesse ea causa currendo rumpere rami-ces: nondum enim pecuniam redditurus advenit. Abiit unus dies, alter, multi: convenio hominem; rogo, quid agat, ut valeat, num ægre sibi fuerit eos dies, quibus non est visus. Ille, O te, inquit, quærebam; jam ostendam, quanti te faciam: volo tecum bonum quoddam communicare, cujus ne parentem quidem meum, si revivisceret, participem facerem. Admotaque ad sacculum manu, libellum foras extraxit, ac, Cape, ait: hic continentur signa ac notæ, quæ in iis deprehenduntur, qui supplicio sunt afficiendi; ac Vegeronæ, ubi ob meam nobilitatem, omnium mihi carcerum fores patebant, in omnibus, qui suspendio necabantur, vera ea esse cognovi; accipe igitur thesaurum hunc, atque in secretiore aliqua arca abstrusum ac reconditum habe, ne cujusquam insidiis pateat. Ceterum de argento verbum nullum. Tum ego commotus, Quid mihi, ajo, cum iis, qui crucibus dantur? quid tunc mihi opus est libro, quasi ego physionomon esse velim, qui me profitear, hominum mores, naturas, vitæ exitus, ex corpore, oculis, vultu, fronte pernoscere? ego, cum primum manum ad crumenam admovisti, putabam, te velle mihi pecuniam, quam debes, exsolvere: sed nihil nisi verba à te mihi dari video, eaque quæ nihil ad rem attinent. Verum ille, paulum elatus ira, Quasi, inquit, tuis ego nummulis indigeam; post triduum ea mihi argenti copia erit, qua tibi, non modo pauxillulum istud nummorum quod petis, exsolvam, verum etiam centies tantum dono dem. Atque eadem opera epistolam mihi legendam tradidit, in qua erat scriptum, proximis literis, scuta quingenta ipsi esse mitem-

mittenda, ex fructibus, nescio cujus fundi, collecta. Credo; ab eo; neque quidquam domum nisi spem refero. Sed hæc quoque occisa spes est: nam cum scuta illa essent lymphatica, in itinere hac illac dilapsa sunt, nec Romam pervenire potuerunt. Vix, ab hoc meo cum illo sermone, dies viginti intercesserant, cum est ad me allatum, eum fuisse conjectum in vincula, accusatum, quod Paulo v. Pont. Max. venenum parasset: nam veneficus esse dicebatur. Tum vero plane vehementer extimui, verens, ne, quo me argento defraudaret, tunicam mihi aliquam, vel subuculam, sanguine centauri tinctam, mitteret, quæ, sicut Herculi, visceribus inhærens, cum cruciatu vitam adimeret. Sed aliquanto post eundem audio, quæstione habita, cum nihil confessus esset, è vinculis exemptum fuisse, ac brachiis fere comminutis, in malam rem abiisse, neque potuisse sciri, quonam fuga se contulisset. Habes epistolam plenam inaniis, cum seriis, quod scriberem, nihil occurreret. Reliquas epistolas non antea mittam, quam quis certum faciat mihi, num Cæsius à Naudæo epistolas omnes acceperit. Vale; atquo hos dies, amœnitati lætitiæque dicatos, hilares sume. Romæ, x Kal. Febr. c i c i o c x l i v.

## LIV.

Clarissimo doctissimoque viro,

T Y R R H E N O.

**S**chedula, tuo chirographo scripta, ac Nihusii literis, ad me & ad Leonem Allatium datis, inserta, longæ cujusdam epistolæ mihi instar fuit. Nam paucis verbis multa complectitur: quorum singula miram mihi voluptatem afferunt. Primum, quod caput est, cum tua manu exarata sit, indicat, te bene valere: cumq; te maximis & gravissimis oocupationibus esse districtum narret, quā istic utilis ac necessaria tua opera sit, prorsus enunciat. Deinde, cum Exemplorum impressioni extremā manum additam fuisse referat, summam tuam erga me humanitatem & studium, in suscipiendis iis, quæ ad existi-



mationem meam tuendam augendamque pertinere videantur, ante oculos statuit. utinam hic liber, cum in ejus, cui est inscriptus, nomine apparebit, atque in hominum manus perveniet, juventuti utilitatem aliquam afferat. & certe sumus conati prodesse. neque melior ad id ratio occurrit, quam si iis, qui legerint, proponeremus, quid malis mali, & quid bonis boni eveniret; ut, tanquam in speculum, in aliorum facta inspicerent, & ex aliis sumerent exemplum sibi, illudque præsertim intelligerent, ut unusquisque sementem fecerit, ita metere. per hanc rationem, multos audivimus ac legimus, ad frugem rediisse, quorum antea vitæ vitia multis postea sunt emendata virtutibus. Tum, in eadem scriptum est schedula, ubi plus ocii nactus eris, curaturum te, ut popularium tuorum notitia, quorum vita digna est, quæ, in exemplum alicujus virtutis, posteritati tradatur, ad me perferatur. quamquam in hac re nihil est opus festinatione: non enim istud vel aliud opus antea exordiar, quam ea, quæ sunt exorsa, detexam. Postremo in ea additur, scriptum à nonnullis esse ad Nihusium, de epistolis ad te meis, typis imprimendis; de quo magnas illis gratias ago; neque dubito, quin illud, ab eo responsum sint ablaturi, quod sit voluntati nostræ accommodatum. ita ejus est benignitas. Næ ego longius impudentia progredior, qui tantum optimis istis oneris audeo imponere. At vide, quantum succi in tua illa brevi schedula insit; cui si volui respondere, tot mihi verbis necesse fuerit uti. Neque verendum est, ne illa, quamvis exigua ac minuta, dispereat; nam eam volumini epistolarum tuarum adjungam, quod ego sub signo habeo, servoque diligentissime. Vale. Romæ, i v Non. Febr.

C I O I O C X L I V.

## LV.

Clarissimo doctissimoque viro ,

T Y R R H E N O.

**C** Vin mihi tuæ semper literæ gratæ sunt atque jucundæ, tum, quas proxime ad me dedisti, voluptatem prope maximam attulerunt. Eam enim rem nunciant, cujus eram in primis avidus cognoscendi, quamque superioribus meis ad te literis significaveram; num videlicet Cæsius à Naudæo epistolas & orationes meas, sicut ille ad Allatium scripserat, accepisset. Nunc autem, cum ita se rem habere intelligam, vehementer gaudeo, tibi que gratias ago, qui primus hanc mihi voluptatem objeceris. Scripseram, ut orationibus, si eas prælo dare consultum esset, illas Cæsius adjungeret, quas olim adolescens, juvenili audacia ductus, Romæ imprimendas curaveram, quasque innumeris prope mendis deturpatas, etiam nunc domi meæ finibus clausas habeo, ne foras egrediantur, suisque sordibus vomitum aliis excutiant. Quæ orationes, quamvis non tam re, quam spe & expectatione, laudem aliquam mereri videantur, ea tamen, quæ in illis ad eloquentiam indoles enitet, non nullam potest lectoribus voluptatem afferre: quam ego indolem si usu & exercitatione excoluissem, neque incultam reliquissem, fortasse, si non ad eloquentium, ad disertorum tamen numerum aggregarer. Ab omnibus eas mendis expurgatas mittam, ut in viri cujuspiam eximii nomine appareant. Epistolas quidem ad te meas, cum eo auctario de quo scripsi, cupio, seorsim ab aliis, typis mandari, si placeat; ut sint æternum, meæ in te voluntatis, officii, ac reverentiæ monumentum. Petis deinde, ut, crebris ac longiusculis literis, tibi esse voluptati non desinam. At hic mihi locus videtur esse apertus, me tibi purgandi, vel potius à te postulandi, ut mihi ignoscas, si interdum epistolas ineptiis, aut inaniis, tua gravitate & negociis, quibus distineris, indignis oppleverim: nam, tecum ut quasi loquerer, tibi que, qui longas à me epi-

stolas postulabas, facerem satis, illud nescio quid nugarum scribere institui. At, si genus hoc scribendi tibi esse invisum, vel saltem ingratum, agnovero, totum abjiciam, eoque amplius non utar; neque committam, ut jure accusare me possis. Liber Exemplorum, cum Romam mitteretur, expectatus adveniet. Utinam eo plausu excipiat, quo Pinacotheca. Sed nomen Illustrissimi nostri Chisii, apud omnes notum & clarum, quo ille cohonestatur, non minimam eidem, ut spero, omnium benevolentiam & gratiam conciliabit. Vale. Romæ, Non. Febr. C I D I C X L I V.

## LVI.

T Y R R H E N O,

Clarissimoque doctissimoque viro.

**C**Redo ego, te mirari, me, qui tot annos tam crebras tamque longas ad te epistolas scribere solitus sim, jam diu nihil literarum dare. Sed literarum notæ, quibus hæc epistola exarata est, quæ sunt ita inconcinnae, ita distortæ, quivis ut, qui aspexerit, non minus facete, quam Plautinus ille Pseudolus in Phœnicii epistolam lussit, suspicari possit, gallinam, si habent quoque, gallinæ manus, eas scripsisse; hæc, inquam, tam invenustæ literarum notæ, veram tibi silentii mei causam aperient; eamque non pigritiam, aut negligentiam, sed adversam valetudinem sustinere probabunt. Quæ adversa valetudo, non caput, non renes, non latera, non pedes, sed dexteræ manus indicem, cujus præsertim opera ad scribendum utimur, est aggressa; in eoque ita pertinaciter hæret, ut ejus excrucianti finem nullum faciat. Ac, si aves scire, quisnam casus tantam vim morbi in digitum illum invexerit, breviter dicam. Cum vellem tegmen ex corio, libro, unde ruptis vinculis fugerat, acu rursus adungere, & corium illud esset durius, quam ut acu illa trajici posset, cœpi ego, homo ad sutoriam artem non aptissimus, dexteræ manus indice eam impellere. Sed foramen acus, qua eam parte impellebam, se immergens in digitum,

tum, non leve eidem vulnus infixit. Quod ego statim sensi; sed vitiosa quâdam mea ad medicos offensione atque fastidio, nolui, in eo vulnere curando, cujusquam illorum opera uti. Sed me temeritatis meæ non leviter postea pœnituit. Nam, biduo post, digitus præter modum intumuit, ac febres mihi molestissimas, doloresque non ferendos adduxit; adeo ut neque interdiu neque noctu pars quietis ulla contingeret. Sed aliquot post dies febris abscessit, digiti tumor paululum desedit, dolores mitius inecum agere cœperunt. Verum digiti durities ac rigor, ad scribendi munus adhuc nequit infecti. Ac vereor, ne hac corporis parte perpetuo futurus sim mancus, ac debilis; nam fieri vix potest, quin illius foramen acus, dum digitum penetraret, in aliquem nervum incurrerit, eundemque gravi quapiam injuria affecerit. Illud vero ridiculû, quod magna manus pars, in quam, cognationis, vel potius vicinitatis, ut ita dicam, jure, digiti calamitas influxerat, tanquam proserpens bestia, priori pelle rejecta, novam induerit. Verum cum hoc loco res esset, neque ferre possem, me tecum diutius in hoc silentio manere, quod vererer, ne apud te, hominem in persequendis officiis diligentissimum, aliquam rusticitatis vel inurbanitatis notam subirem, volui experiri, num, si non eo, quo par est, alterius saltem digiti ope auxilioque, possem ad te scribendi munus explere; atque digito medio, indicis partes attribui, ut, una cum pollice, tanquam societatem ad scribendum iniret: atque multo malui tibi in formandis delineandisque literis insulsus ridiculusque videri, quam in suspicionem inurbanitatis rusticitatisque venire. Verum, non hac tantum in re, sed in aliis pluribus, hic mihi annus fuit adversus. Etenim jurare liquido possum, me scelestiorem rebus meis annum nunquam vidisse, quam hic mihi annus obtigit. Primum, digiti me dolor, de quo dixi, percussit: tum, in rustici hominis, vafri ac veteratoris, fraudibus hæsi; qui mihi mistum pro mero, vel potius aquam pro vino, ingenti precio vendidit. Sed ego simplex, quique in eo ex ingenio alios æstimarem, Patri cuidam, ex Congregatione Oratorii, notissimi nominis, credidi, qui prædonis mihi impurissimi integritatem

ac fidem miris in cælum laudibus extulit. Sed fortasse bonus ille vir existimabat, rem agi Ravennæ, ubi mistum quam merum, aqua quam vinum, carius multo divenditur. Illud mihi ægre est, quod hoc ejusmodi infortunium in summa rei nummaria difficultate obrigit; nam alia cella vinaria exornanda est, siquidem ea uti velim. Deinde, meus famulus, cum maxime ejus mihi opera necessaria esset, ex scala lignea, quam inconsulte conscenderat, decidit, & aliquot in locis caput atque os hami perfregit. At longum esset omnia enumerare, quæ mihi hoc anno tetre & infelicitè ceciderunt. Sed æquo animo sunt ferenda. Nam infinitis prope passibus graviora atque acerbiora multa pro nobis passus est Christus; cujus cruciatuum ac mortis hoc tempore festos dies anniversarios agimus. At vide, quam levibus in rebus, quæque ad rem nihil attineant, insuetum operi ac labori digritum defatigem; quem, ob eam tantum causam, indicis muneri vicarium succedere volui, ut te statui mei certiore faceret, atque ipse interruptum amoris nostri & officii mei iter aliqua ratione reciperem. Quamobrem fessum jam, omni illum labore exsolvo; & à te, quanta maxima vi potest, efflagito, ut amorem mihi tuum sanctum rectum, nulla ex particula imminutum exhibeas. Vale. Romæ, x i v Kalendas April.  
C I D I D C X L I V.

## L V I I.

Clarissimo doctissimoque viro,

T Y R R H E N O.

**N**Ovam provinciã, à summo Pont. tibi commissam, vehementer gratulor. Atque haud scio, an major tibi ab eo honor haberi hætenus, aut gravius de tua virtute judicium fieri potuerit. Neq; spem ullã video, qua te celeriter, ut cupis, expedire ex istis occupationum laqueis, in quos conjectus es, possis. Nam aliis nullam esse voluntatem audio, se istuc quamprimum conferendi; credo, quod hyemis sævitiam metuant, atque itineris longissimi pericula pertimescant. Molestum est mihi ve-  
hemen-

hementer, librum Exemplorum adhuc Romæ non conspici; qui efflagitatur à multis, ac præsertim à viro docto, tale opus quoque moliente, quem tibi notum esse arbitror. Literarum notæ, ineptæ ac pueriliter ductæ, tibi erunt indicio, nullum adhuc mihi dextræ manus indicis usum posse contingere. Atque major mihi metus impender, ne, quod reliquum est vitæ, hujus sit digiti usu carendum, quam spes in posternum salutis ulla ostenditur. Sed, quidquid Dei voluntas tulerit, æquo erit animo accipiendum, atque ferendum; neque, inanem ad repugnandum operam sumendo, committendum, ut, more gigantum, velle cum eo bellare videamur. Interim hos dies, Christo ab inferis resurgenti sacros atque solemnes, tibi evenire feliciter cupio. Vale. Romæ, VII Kal. April. C I O I O CXLIV.

## LVIII.

T Y R R H E N O,

Viro longe clarissimo.

**P**rofectionem tuam, in Westphaliā, fortunare Deum volo, perficereque, ut te quamprimum, re confecta, ad nos recipias. Quod si contigerit, eum reliquis tuis egregiis in Remp. cumulum meritis addes, vix ut quidquam illis adjici possit: neque, cum ornatus eris ex tuis virtutibus, (nam honor, virtutis est præmium,) audies populum admurmuranti indignanteque, eos, quos minime deceat, honoribus amplificari; sed faustis omnium acclamationibus excipieris, neque quisquam erit, qui non fateatur, quidquid in te ornamentorum sit collatum, digno in loco collocatum ac positum esse: quo, nihil tibi honestius potest accidere. Nobis tandem, ut ex aliis accepisse te arbitror, pax atque ocium contigit, Cardinalis Bichii, popularis tui, opera atque labore, ex Regiæ Galliarum auctoritate, comparatum; qui, anni tam adverso tempore, atque hyeme summa, nulla salutis suæ ratione habita, longis ac periculosis itineribus, communis utilitatis gratia, non

non dubitavit sese committere; ac sapius, ex Italia in Galliam, ex Gallia in Italiam, est profectus, ac modo Venetias, modo Florentiam, modo Mutinam, modo Parmam, modo Romam, se contulit; ut, æquis conditionibus, pax componeretur. At quanto fuisset satius, has turbas neminem commovisse, sed nos multa dissimulasse, non nihil prætermisisse, non necesse habuisse omnia pro nostro jure agere, pacem bello, ocium negotio, anteposuisse! At quid est actum his tragædiis? nihil, nisi ut pulcherrima orbis terræ pars, summa Christiani nominis & Catholicæ religionis hostium cum voluptate, cædibus, incendiis, rapinis, vastaretur, æraria exhaurirentur, populi acerbissimis exactionibus, capitum atque ostiorum, funditus fere perderentur. Nemo enim eorum, qui inter se armis decertarunt, palmo uno agri factus est ditior; sed in pacis conditionibus actum, ut, quæ ab unoquoque fuerant occupata, veteribus dominis restituerentur; sed, ut ex terræ solent, in quibus bellum acerbum diuturnumque versatum est, deserta, horrida atque deformia, sed minus multis colonis & habitatoribus belli, ejusdem calamitate sublatis, celebrata, denique ita affecta, ut vix, ac ne vix quidem, centum annorum opera atque labore, recreari ac refici queant. Atque, hæc ita fore, facile erat cuique mediocriter prudenti conjicere. Verum Deus, peccatis nostris vehementer infensus, passus est eos, à quibus cupiditates nostræ infringendæ sunt, iræ, quæ ulciscendi libido est, sese permittere. Sed, ut, ab hac tristitia sermonis, paulum ad hilaritatem animi avocemus; superfluum ac non necessarium existimo, te, singulari frugalitate ac prudentia virum, commonefacere, ut, cum in Westphaliam veneris, à cœnis illius regionis caveas: quæ ita sunt, cereales, ita opiparæ, ita saliares, ita struicibus patinariis refertæ, ut Sybariticæ mensæ, quas in exemplum prodigiosæ luxuriæ prodidit antiquitas, neque pleniores neque uberiores fuisse perhibeantur; ita in longum productæ, ut, quos plerumque sol occidens convivium ineuntes aspiciat, eosdem exoriens, graviter illud prosequentes, intueatur. In una harum cœnarum hæsit, hic Romæ, amicus quidam meus. Nam invitatus à Barone quodam ex Westphalia, quem,



quem, in suo ludo, saltationibus ac ludicra armorum tractatione exercebat, (erat enim lanista, ac saltator in primis,) promisit, magis id adeo, ut cognosceret, quidnam cœnæ illæ, ad quas ille Baro nostras ne comparandas quidem ajebat, afferrent, quam ulla edendi bibendique cupiditate. It, venit, accumbit; atque ecce tibi, longa ferculorum pompa se offert, à vespere usque ad mane alterius diei. Ferebantur in patinis obsonia, ex omni fere genere terrestrium bestiarum ac Neptuni pecudum, quas anni tempus dabat, non ea ratione condita, qua vulgus cocorum utitur, sed novis & nobis incognitis condimentis. Narrabat ille mihi sigillatim omnia; sed ego homo, qui nullum in istis rebus sensum habeo, quique dignus fui, qui tum nascerer, cum nondum fruges essent inventæ, neque potui, neque operæ precium esse duxi, ea memoria excipere, atque complecti. Ordinem etiam, quo edulia veniebant in mensam, enumerabat: non enim temere alia aliis succedebant; sed ea, quæ possent superioris fastidium abigere, ac convivæ, ut facetissime Horatius inquit, in morsus reficere. Quid vero dicam de vino, quod convivii caput est, & in quo, apud istos homines præsertim, fere sunt omnia? Sed, ut de eo nihil loquar, facile sit cuivis existimare, non minorem in eo comparando, quam in ceteris rebus, diligentiam sumptumque fuisse adhibitum. Nam tot erant vinorum genera numero, quot eduliorum; neque liberum erat cuiquam poscere, sibi dari quod vellet; sed illud erat bibendum, quod singula fercula comitabatur, atque aliquam cum illis suavitatis rationem habebat, lene, asperum, leve, dulce, atrum, album. Ac nihil in eo convivio desideratum est, quo proxime ad veterum magnificentiam videretur accedere, præter ministros coronatos, tibicines, & funalia. At, quid negotii fuisset, isthac quoque præstare, si temporum istorum mos ita ferret? Denique, ne te diutius teneam, exitus fuit ejusmodi, ut ille miser, qui fuerat cupidus cognoscendi, quid sibi cœnæ ex Westphalia darent, inter manus, è convivio, sine mente ac sine sensu, auferretur. Nam tantum vini hauserat, tantum cibi adhibuerat, ut necesse habuerit, octo dierum inedia,

crapulam exhalare, & quod crudum habebat in ventre, concoquere. Sed næ ego impudens, qui, ocio abundans, tibi, homini occupatissimo, tam diu meis ineptiis jociſque moram objiciam. Quod de ſcriptis meis imprimendis me admones, ut occaſionem tam bellam, mihi oblatam, arripiam, urgeam, atque uti ſciam, ut dicitur, foro; pergratum mihi eſt in primis: ac, Nihufio adjutore, qui, quæ ejus eſt benignitas, ſuam ad hanc rem mihi operam pollicetur, in id ſtudium vehementer incumbam. Et æquum eſt, nos, qui laudis cupidi ſuimus, quoniam, ut memoras, poſt cineres gloria ſera venit, omni ope eniti, ut vivi gloriola noſtra perfruamur. Quatum frui nos exiſtimabimus, cum epiſtolæ, quas ad te dedimus, à ceteris ſeorſim impreſſæ legentur. Nihil enim tam me ad ſpem quandam immortalitatis rapit, quam, omnium ſeculorum poſteritati eſſe teſtatum, tecum mihi amicitiam interceſſiſſe, ejusque conjungendæ cauſam non aliam fuiſſe, niſi virtutem. Vale. Romæ, prid. Idus Aprilis C I O I O C X L I V.

## L I X.

Clariffimo ſapientiffimoque viro,

T Y R R H E N O.

**M**onaſterium Weſtphaliæ ſalum & incolumem perveniſſe te gaudeo; atque, ſi nos conjecturis moveri fas eſt, ex die quo iſtuc acceſſiſti, quo die, olearum, in quibus pax deſignatur, rami parantur, ut poſtridie poſt ſacras illis preces, ſanctiſſimis ceremoniis, adhibitas, populo in Eccleſiâ diſtribuantur; ex hoc, inquam, die licet conjicere, atque in ſpem magnam venire, negocium, de pace, inter Chriſtianos Principes, proſpere ac feliciter ſucceſſurum. Atque nihil eſt tam optandum, quam ut Deus, in cujus manu eſt, voluntates Regum, quamcunque velit in partem, impellere, (nam *cor regis in manu Domini,*) eam Principibus iſtis, quorum animi, ſtudiorum ac voluntatum diſſimilitudine, inter ſe diſſident, mentem injiciat; ut belli, intus  
à cu-

à cupiditatibus suis, ipsis illati causas evellant, ut sedata & tranquilla sint omnia, ac ratio præsit, appetitus obtemperet: nam continuo pax illa, cui conficiendæ tanta à vobis istic opera datur, terrarum orbi succedet: Sed interea, dum animi sunt in motu suarum cupiditatum, unde omnia in nobis bella oriuntur, dum perturbationum tenebris obducti, à rationis lumine deseruntur, quænam, potest pacis ocique lux fulgorque splendesce-re? Sed ego stultus, qui tecum hac de re philosophari audeam, qui præceptorum istorum plenus es totus. Itaque ad me venio; ad quem scribit Nihusius, epistolas & orationes, Parisiis Io. Cæsio allatas, se legisse, quas sibi dignas videri ait, si ita mea voluntas ferat, quæ ante alia opera typis excendantur. Cui ego respondi, non solum eandem mihi esse sententiam, sed etiam ita facto opus esse, quo meæ ad te literæ, unde mihi, quia sunt ad te scriptæ, nominis immortalitatem auguror, vel una cum aliis epistolis, vel, quod malim, seorsim à ceteris imprimantur. Quæso te, si me amas, si meus tibi honor est cordi, ut hac in re omnes nervos auctoritatis industriaeque tuæ contendas, mihiq; famæ, ex hominis clarissimi amicitia adipiscendæ, in primis cupido, animum expleas. Binas alias literas mitto, quæ illis, augendi voluminis gratia, jungantur: unas, ad Stephanum Vajum, episcopum Cyrenensem, atque hospitalis domus S. Spiritus in Saxia Præceptorem, ac modo Basilicæ Vaticanæ Canonicum, in locum Cecchini, in Collegium sac. Rotæ Auditorum cooptati, subrogatum; ad quem scribo, de incredibili hominum concursu, in Ædem D. Mariæ in Vallicella facto, cantuque symphoniæ, quo die Eques Loretus Victorius, meus vicinus, musicus omnium præstantissimus, ac pene divinus, primum sacrum fecit: alteras, ad Marinum Villanum I. C. & olim Quæstoris pontificii à cognitionibus, scriptas. Vale; ineique, qui cælestis opis auxiliiq; in primis egeo, in tuis sacrificiis, & incensis caritate precibus, esto memor. Romæ, xiiii Kalendas Maji  
C I D I O C X L I V.

## LX.

Clarissimo sapientissimoque viro,

T Y R R H E N O.

**N**Æ ego non solum incommodus, verum etiam inhumanius, si habendus, si tibi, gravissimis in rebus occupato, hoc est, pacis communis procuratione districto, longis, ut antea, literis moram ac molestiam exhibeam. Quamobrem posthac paucis officium, quod tibi à me debetur, exsolvam. Doleo vehementer, negotium in quo verteris, tam multis difficultatum nexibus implicari, ut, quemadmodum etiam hic à prudentissimis viris dici audio, aliqua humana ratione explicari vix queat. Superest exorandus ille, qui est pax nostra, qui fecit utraque unum, quique solus potest voluntates hominum, quamcumque velit in partem, impellere; ut belli cupidos, ab armis ac dimicationibus, ad pacis otiique studia convertat. Sæpius fueras mihi auctor, ut facultate, à Nihusio ac Cæsio mihi oblata, mei propagandi nominis, uterer. Tandem, auctoritate tua impulsus, feci, quod jusseras; atque hominum illorum animos mire in me propensos invenio. Nec mora ulla in iis est; immo, ut, proximis ad me literis significavit Nihusius, epistolæ cceptæ sunt typis excudi. Instant, urgent, ut, si quæ sunt mittendæ, mittantur. Vtrum eæ, quas ad te scripsi, ad illos pervenerint, nec ne, certi nihil potui scire: sed si adhuc sunt apud te, præsertim illæ sex, versibus scriptæ, peto à te maiorem in modum, ut eas, quamprimum poteris, mittas, quo una cum ceteris imprimantur: intemperans sum enim in hujus rei cupiditate, ut nosti. Rumor, de Legati ad vos profectio, adhuc perseverat: ajuntque, eorum, qui dominantur, hanc esse sententiam, omnino ut abeat; ideoque quamprimum, nisi si quid inter cæsa & porrecta, ut veteres ajebant, occurrat, eum, communis boni causa, mandata facturum. Quod præterea ad te scribam, non habeo; nisi, hic Romæ, à Fratribus Dominicanis, novi  
Gene.

Generalis creandi causa, comitia haberi, cum summus Pont. P. Nicolao Rodolphio, per epistolam cui Brevi nomen est, magistratum illum abrogaverit. Vale. Romæ, VII Kal. Maji C I O I C X L IV.

## LXI.

Clarissimo doctissimoque viro,

T Y R R H E N O.

**R** Eddita mihi sunt uno tempore à te epistolæ duæ, quarum in altera dies erat adscripta XVII Kalend. Maji, in altera, quæ erat recentior, XIII Kal. ejusdem mensis. Respondebo igitur superiori prius. In qua scribis, te mirari, quod jam diu nihil à me literarum accepisses. Quæ res quamvis negligentia desidiaque me videatur arguere, ea tamen accusatio, atque querela, magnum mihi cedit in bonum. Est enim indicio, quanti me facias. Nam quod precium, in æstimatione tua, habeat is, cujus gratia ab iis curis, quibus premeris, aliquid spaciū surripias, ut de eo cogites, ut ad eum scribas, ut crebras ac longas ab eo literas exigas? At quibus negociis, Deus bone, distineris? Iis nimirum, quibus nulla, neque graviora neque majora, esse possunt, ut orbi terrarum, jam diu variis bellorum motibus exagitato atque concusso, consilio tuo atque prudentia opem feras, atque perpetuam eidem pacem ociumque, sublatis discordiis, parias. Atque utinam non id benevolentia sit potius tuæ, quam judicii, testimonium. Nam qui modus est amoris, idem est æstimationis. Sed, siue error siue veritas hanc mihi apud te æstimationem pepererit, non esse quærendum arbitror, cum utrumque sit mihi honestum atque gloriosum. Cuiusnam futurus sit vilis ille, qui tibi, tanta apud omnes existimatione, aliquo esse in precio videatur? Itaque non eam tibi opinionem conabor adimere, & quanti vere sim, aperire; sed ipse mihi assentiar, eaq; in me fingam, quæ à te tribui video. At tuum erit cavere, ne, quantum mihi precii conaris adjungere, tantumdem tibi, si verum aliquando detega-

tur, tanquam non æquo alienæ facultatis æstimatori, detrahatur. Illud mihi dolet, non eam vim ingenii, non eam orationis facultatem & copiam fuisse concessam, qua tuas in cælum laudes efferre, meisque scriptis mandare omnium seculorum memoriæ possim. Verum, ad id neque alterius cujusquam opera à te magnopere desideranda est. Quid enim quæras foris, quod abunde habeas domi? Etenim tu, non solum recte faciendi sed & bene dicendi magister, melius quam quivis alius potes, quæ cum aliqua summa prudentiæ, integritatis, continentiæ que laude præstiteris, literis consignata posteritati relinquere. Nunc ad alteram epistolam venio, in qua multa, quæ mihi hoc anno gravia contigerunt, cohortatione tua facere leviora conaris. Et sane assequeris id, quod vis. Nam ita me comparavi, ferre æquo animo, quæcunque Deus adversus animi mei sententiam immiserit; eoque magis, quo propius absum à morte, quæ cuncta mortalium mala dissolvit. Sed, ut verum fatear, cetera omnia adversa, quæ tecum in epistola mea conquestus sum, atque alia etiam nonnulla quæ tacui, ludus jocusque fuerunt, præut, quam acus illius malignitas meo digito calamitatem invexit. Etenim non potest adhuc inflecti; sed riget: ac vereor, ne id, quod reliquum erit vitæ, in hac sim incommoditate hæsurus. Sed, ut antea dixi, ac tu etiam sapienter admones, quidquid à Deo immittitur, est ferendum. At, si quid, joci causa, petulantius scripserim, ejus nunc pœnas pendo. Quod ad mei oris imaginem attinet, quoniam ita expeti video, ex archetypo, qui in bibliotheca Equitis Cassiani Pnteo-  
lani servatur, eam brevi in pagella describendam, atque ad te mittendam curabo. Nam delineator ille Germanus, qui anno superiore, octo vel decem dies continuos, quinas singulis diebus horas, quo me, quam maxime ad similitudinem veri posset, exprimeret, omnibus crucibus exercitum habuit, atque opus tunc egregie quidem perfectum reddiderat, nunc variis me promissis & excusationibus duxit, nec adhuc præstare, quod promiserat, voluit: & quod mirum magis videatur, Syrii fratres, quorum sumtibus, delineatoris illius opera fuerat conductæ, cum idem sapius, à me rogati, promississent,

fissent, in eadem sunt mora, ne dicam vanitate, versati.  
Vale; & memor nostri, sicut facis, vive. Romæ, V I I I  
Kal. Iunii C I D I D C L I V.

## LXII.

Clarissimo sapientissimoque viro,

T Y R R H E N O.

**P**Lane dō est, quod scribam. Quod non abs re mihi  
contingit, quoniam ad te brevior jam in scribendo  
cupiam fieri; dubitans, ne tibi, homini occupatissimo,  
longitudine mearum literarum, quæ nihil ferme nisi pu-  
gas habent, non solum molestiam afferam, verum, im-  
pudentiæ meæ odio, stomachum etiam moveam. Esset  
mihi pergratum in primis atque jucundum, te curis illis,  
quibus istic implicitus detineris, solum ac liberum,  
hic Romæ conspiciere, amplecti, colere, ac venerari:  
sed, si isthac tibi provincia amplitudini gloriæque futu-  
ra est, hac me voluptate carere, a quo animo patiar.  
Card. Legatum, vulgo ajunt, in Vrbe manere, nunc  
præsertim, cum, quotquot sunt ubique terrarum Car-  
dinales, Romam confluunt, ex Hispania, Germania,  
Italia, inimo, quod non spero, in morbum incidisse. Sed,  
per Deum immortalem, quid est, in quo gloriosius no-  
stra consumi possit industria, quam ut orbi terrarum, tot  
jam diu bellorum tumultibus exagitato, pax, tranquil-  
litas, ociumque reddatur? Quam pacem, Dei benefi-  
cio, Italiæ partam, si quis est, qui conetur dirimere, ac  
rem rursus ad certamen contentionemque deducere,  
huic profecto mens superbissima & carnifex animus  
inest; cum sine ulla spe emolumenti cujuspiam, quod  
reliquum nobis superioris belli calamitas fecerit, eripe-  
re, nosque fundis, familiis, ac vita ipsa everfos, fundi-  
tus ire perditum properet. Tu, cui ob insignem probita-  
tem, justitiam, ceterasque bonas artes, Deum obtempe-  
raturum arbitror, (nam ejusmodi generis hominum de-  
precatio multum valet,) illum comprecare, ut id nobis  
bonum, quod elargitus est semel, velit esse perpetuum,



neque cuiusquam malignitate intercipi sinat. Sed ego rationem promissi mei, de brevitae literarum, non exsolvo, sed longius in scribendo, quam pollicitus fueram, prodeo. Meum igitur cursum inhibeo, ac, ne mendax inveniar, me ad promissi mei terminos revoco. Vale. Romæ, Kal. Iunii c d c x l i v.

## LXIII.

Doctissimo clarissimoque viro,

T Y R R H E N O.

**B** Revissimis tuis literis breviter respondebo. Quamvis ætas mea decursa, jam diu me à scribendis versibus avocet; quamvis deforme mihi videatur, canis annisque obstitum, se festivissimis lepidissimarum Virginum choris inserere, & stellis nebulam spargere candidis; quamvis, id quod meæ ætati conveniens est magis, soluta orationi meum omne studium dederim, omnisque mihi cum Cicerone res sit, nec Poëtas, tanquam alia quadam lingua locutos, audeam attingere: tamen, quo tibi obtemperem; à cuius iussis recedere, nefas esse existimo, intermissam exercitationem paululum repetam, ac Musas orabo, ut tantisper me, capite candido, inter ipsas versari patiantur, dum studiis tuis obsequi conor. Non possum, quamvis brevis esse cupiam, quin tibi rem admirabilem, quæ nuper Romæ contigit, cuiusque ego sum testis, exponam his literis. Inventum est, quemadmodum calculosis, sine ulla ferri ope, succurratur: quæ res, omnes eorum rationes evertit, qui ab illis calculum manu moliantur extrahere. Est quidam è familia Hospitalis domus S. Spiritus in Saxia, ex eo Pistoriensium genere, quos Plautus, per jocum, Paquiceos vocat, mihi ob vicinitatem longe notissimus. Huic, septem ab hinc annis, calculus mali tantum invexerat, ut medicamentis vinci non posset. Itaque statuit, se Io. cuidam Trullæ, qui magnam, ex calculosis sectione curandis, famam sibi confecit, curandum committere. Quæ res illi feliciter atque ex sententia successerat. Verum, aliquot post annos,

nos, ad eundem scopulum navem affixit, ac laborare periculosius cœpit. Quamobrein cum acerbissimis vesicæ doloribus ita premeretur, ut ferre non posset; statuit, homo jam prope decrepitus, rursus opem à sectione deposcere, atque ultima experiri; &, quamvis, in ea curatione, vita sibi esset ponenda, mortem in lucro, non in damno, putare; quod præstaret, semel antea, quam millies, mori. Itaque jam illi cum chirurgus de mercede convenerat, jam testamenti tabulas obsignaverat, jam aliquot diebus, victu corpus præparaverat. Sed pridie quam secaretur, in variis Urbis ecclesiis, plura Sacra facienda curavit, in primis in æde, D. Francisci stigmatibus sacra. Quo cum sacerdos quidam, sacrum facturus, casu venisset, rogatus est ab adituo, ut pro calculoso ad Deum preces effunderet, cui postridie ferro calculus esset extrahendus. Cui ille, Postquam sacrum confecero, duc me, ait, ad illum; nam volo experiri, num, sine hac tam præcipiti medicina, possim homini subvenire. Eunt, veniunt, ac summis hominem doloribus conflantem inveniunt. Cujus ille, qui eò se jusserat adduci, misertus, Age, inquit, da mihi cyathum, vini plenum. Inbet statim æger proferri, existimans, ad sedandam sitim ab eo deposci. At ille, nescio quid pulveris, in vinum immisit, atque ægro hauriendum tradidit. Res mira; non ita multo post soluta est homini alvus; ac, doloribus omni ex parte sedatis, urina, cui plurimum arenæ subsideret, emissa. Nimirum, pulveris illius vi, calculus fuerat minutatim concisus, & simul cum urina redditus. Proxima nocte, altus eum somnus excepit, nec, ad auroram usque, dimisit. Quæ postquam illuxit, validus vegetusque surrexit, ad Ædem D. Petri se contulit, scalas ascendit, cum antea, ne digitum quidem, pedem posset altius efferre; ac, positis humi genibus, Sacro interfuit. Hæc volui te scire, ut, si quando, quod Deus avertat, rursus hoc morbo tentari te sentias, scias, unde, contra illud, auxilium petendum sit. Vale. Romæ, III Non. Junii c 15 15 c x l i v.

## NICIVS TYRRHENO.

**H**odie à prandio, quo tempore, nullum audiui esse ad impetrandum aliquid aptius, Musas conveni, rogavi, obsecravi, tuum etiam nomen interposui, ut mihi, ad id quod esset à te imperatum, operam darent. Nihil vidi illis fastidiosius, nihil à me alienius. Vt multa verba fecerunt! ut lenta materies fuerunt! Tandem, tundendo, atque odio, perfecti, ut se mihi darent, ad ea qua vellem. Tum capita argumenti, à te missi, ostendo; rogo, ut eorum singula, singulorum distichorum ambitu, complecterentur. Sumunt, legunt; ac pene stomachantes, Na tu es impudens, ajunt, qui illud postules, quod vix concessum sit Deo, ut tam multa res, ex tam lato campo, in brevem gyrum compellantur. Sed cum instarem, urgerem, ut experirentur, ut mihi oranti, si non mea, tua saltem causa, non deessent; Vt lubet, ajunt, absolvamus hunc vomitum; sed ea lege nostram tibi operam pollicemur, ut eligamus ea, qua in singulis capitibus sint potiora, cetera omittamus. Atque hos versiculos, quasi ludentes, effuderunt. Quos amico tuo tibi que minime placituros scio: sed id tibi erit exemplo, ut, si quid posthac, in hoc genere, recte curatum velis, iis mandes, qui majori sint apud Musas in amore & gratia; non mihi, qui me illis esse invisum & odiosum sentio. Vale.

## Primus dolor.

*Sisit Olympiade Firminam licitor; at ille,  
Dum studet amplecti, protinus obriguit.*

## Primum gaudium.

*Sanat Olympiaden sacroque in fonte lavatum,  
Gaudet, pro Christi nomine, obire necem.*

## Secundus dolor.

*Mœsta dolet, quod turba, colens simalacra deorum,  
Ad Stygias, recto tramite, currat aquas.*

## Secundum gaudium.

*Se plures, Firmina, Deo peperisse, triumphat;  
Praefectique domum, carnificemque suum.*

Ter-

## Tertius dolor.

*Virginis innocuum nudatur corpus amictu ;  
Oraque purpureis erubuere rosis.*

## Tertium gaudium.

*In cruce nudatum Christum, cum nuda tuetur ,  
Nudari , pro illo , jam putat esse decus.*

## Quartus dolor.

*Proh dolor ; impetitur pugnīs, quod castra recuset ,  
Quem prece comminuit , se dare thura Iovi.*

## Quartum gaudium.

*Latatur, crebro faciem sibi verbere tundi ,  
Quo Christum referat , livida facta magis.*

## Quintus dolor.

*Discerpi virgis magno sibi membra dolore ,  
Fractaque mortifera sentit hiare plagis.*

## Quintum gaudium.

*Verbera cum subeunt Christi , virgaeque, flagella ;  
Gaudia succedunt ; cura dolorque fugit.*

## Sextus dolor.

*Rursus nuda datur , flavos suspensa capillos ;  
Membra dolor macerat ; corripit ora rubor.*

## Sextum gaudium.

*Vt pennis, elata comis , ad sidera ferri  
Se putat , & sponso jam propiore frui.*

## Septimus dolor.

*Lampadibus , nivei laxantur pectoris artus ,  
Ast anima in caelum , qua via facta, fugit.*

## Septimum gaudium.

*Lata est in flammis , quod sit iungenda Maria ,  
Qua septeno itidem functa dolore fuit.*

## LXIV.

Maximo clarissimoque viro,

T Y R R H E N O.

C Vm te scribis , per partes , datas à me tibi literas , Nihusio edendas mittere , magna me ac propemodum incredibili voluptate perfundis. Inest enim in hoc nuncio lepos , plane magnus atque jucundus ; quod nihil tam impense unquam optaverim , quam extare apud omnes perpetuum aliquod meæ erga te observantiæ testimonium , simulque esse omnibus notum atque perspectum , quantum me tibi debere profitear. Quod si persuaderi etiam possit , ut illis velis eas etiam , quas versibus scripsimus , addere , explebis omnem desiderii mei expectationem : nam hæ quoque , quamvis poetico stylo exarata , epistolarum nomine signantur. Quibus hæc velim accedat epistola , quam ad Nihusium scribo ; si tamen ea tibi digna videbitur , quæ in tuum atque illius conspectum veniat : secus autem , ea auctoritate imperioque , quod in me meaque omnia habes , censoris severissimi partes suscipias volo , ejusque audacia atque impudentia graviter acerbique cohibita , probri causa , de aliarum quasi senatu amoveas , neque ad Nihusium eam pervenire patiaris. Quamquam jam prope statuerim , omnino à scribendis versibus abstinere ; quod totum hoc scriptionis genus sit planè alienum ab ea ætate , ad quam me natura perduxit. Etenim alia ætas , ut alios mores , ita etiam alia studia postulat. Deinde , cum me noverim ad poëticæ facultatis studia non aptissimum , sapienter faciam , si me contineam , & ad alias artes , quibus sum aptior , transferam , Horatiani illius præcepti memor , *Tu nihil invita dices faciesque Minerva*. Sed , si te arbitris , inquires , isto pacto ut prædicas , cur ea , quæ inepte scripseris , tantopere mandari typis exoptas ? Vt niimirum appareat , me , omni genere monumentorum meorum , esse conatum , addictum tibi , ob tua maxima in me merita singularesque virtutes , animum meum , omnium

secu-

seculorum memoria significare. Quod, qui resciverint, improbaturos non esse confido: nam, si artem ridebunt, conatum laudabunt, voluntatem extollent. Liber Exemplorum, cujus frontem, graphice eleganterque delineatam, aspexi, nondum apparet. Quod satis mirari non possum; præferim, cum jam sex menses facti sint, postquam fuit impressus. Doleo, Daniæ Regis causa, in nova bella distracti, intermissum esse agi de pace; quam cupio, in leges omnibus Christianis Principibus æquas, perquam celeriter confici; quo te, cui omnes homines favent, ex tuis virtutibus ornatum, quamprimum Romæ videre possimus. Vale. Romæ, xvii Kal. Iulii  
CICIO CXLIV.

## LXV.

Doctissimo clarissimoque viro,

T Y R R H E N O.

**H**Eri, ego & Hugo Vbaldinus, Basilicæ Vaticanæ Archidiaconus, profecti sumus ad cœnobium Carmelitarum discalceatorum, ut F. Io. Baptistam Vrsinum, Ducis Brachiani fratrem, salutaremus: quicum unâ horam, & eo amplius, fuimus. Et sane navavi operam, quod illuc venissem. Nulla enim cujusquam oratione ita recreatus sum, ut illius sermone: nulla unquam voluptas bene de me meruit magis, quam ea quæ ex morum illius suavitate mihi contigit. Nunquam memet mei magis pœnituit, quam cum, tanquam in aliquod speculum, in illum inspexi, qui, etiam tum adolescens, cum posset in summa rerum omnium abundantia vivere, in maximis voluptatibus esse, ac nitidissime se curare, relictis rebus omnibus, spretis ac contemptis voluptatibus, neglectis opiparis cœnis, arctissimum illud vitæ amplexus est genus, in quo, non modo non quidquam genio concedat, sed multa naturæ ac necessitati denegat; ubi, si sit iter faciendum, non rheda vel equo vectus, sed pedibus ipse suis incedat, ubi, si sit corpus cibo reficiendum, non delicatis obsoniis, non nitidiusculis illud epulis

lis, sed oleribus ac leguminibus, quorum ne nomen quidem ferre antea poterat, curet; si sit cubandum, non lectulo, serica vel aurea veste contexto, non ebore fulto, non culcita plumea strato, non linteis, tenuissimo filo contextis, instructo, sed rudibus ac brevibus tabulis contexto, stramenticia culcita constrato, ac suis vestibibus indutus, utatur. Res plane mira, & in qua Dei in nos misericordia & virtus in primis eluceat: qui antea, cum opulento opibus, cum delicato deliciis, cum elato superbia, contendebat, nunc mutatis moribus, cum abstimente, frugalitate, cum paupere, inopia, cum humiliori, omni demissione animi, certat; neque alia re magis reprehenditur, quam quod sit nimium in se asper ac durus. Atque hoc est cæli regno vim adhibere; cuius, violenti, non segnes, non remissi, potiuntur. Nam quæ major inveniri vis potest, quam cupiditates frangere, libidines domitas habere, animum ab his rebus avellere, quæ, arctissimis eum vinculis captum, sibi que implicitum detinent? Neque dubitandum est, quin hac vi, cæli arces expugnaverit Fr. Io. Baptista, Capuccinus, qui 1x Kal. Iunii, huius anni, est mortuus. Hic, olim Dux Mutinæ, paupertatem divitiis, imperium obedientia, aulam cœnobio, preciosas vestes cilicio, mutaverat. De cuius extrema ægritudine, ac morte, hæc à Fratribus sui ordinis, qui eidem ægrotanti morientique adfuernnt, ferme narrantur. Cum, Idibus Maji, incidisset in febrem, statim lethalem eam esse intellexit; tum quod omnes cibos fastidiret, ac respueret; tum quia Fratri cuidam Iosepho Mariæ, ipsi socio, ex acuta febris laboranti, omnia caritatis officia præstitisset. Quæ febris cum nulla medicamentorum vi minui posset, sed quotidie amplior fieret, medicus, jam ad ultima ventum, nec spem salutis reliquam esse, pronunciat. Quod cum ille recepisset, adeo commotus non est, ut totus hilaritate redundaverit; &, convocatis Fratribus, omnibus audientibus dixit, nullum sibi unquam nuncium fuisse allatum, cuius magis particeps fieri cupierit, & in quo maior lepos inesset. Tum, cœnobii custodem, quanta maxima potuit ope, rogavit, ut vestem, quæ esset ceteris attritior atque vetustior, afferri sibi juberet, in qua Deo spiritum redderet,

ac se-



ac sepultura afficeretur: velle enim se, quantum fas esset, Sancto Seraphico Patri suo Francisco similem esse. Quod factum est statim. Sed cum ille manum ad cucullum ad-  
 movisset, ut eam, qua erat indutus, sibi vestem extrahe-  
 ret, idque ægre, amissis magna ex parte viribus, faceret;  
 voluerunt eam fratres vel conscindere vel dissuere. Id  
 quod ille non est passus: quod diceret, æquum non esse,  
 eo damno pauperem illam domum affici; tum, mirum  
 videri non debere, si cum, una cum Imperio, tot facul-  
 tates & comoda posuisset, illud nescio quid incompo-  
 di laborisque susciperet: & qua vi potuit, eorum quæ  
 aderant ope adjuncta, eam sibi detraxit, atque alteram  
 induit. Sed (mirum) alvus, quæ largius antea fluxerat,  
 suppressa est statim. Tum, peccata quadam, palam ad-  
 missa, deprecatus est; quamvis à nonnullis, in quibus il-  
 li offensi essent, mala mens ac malus animus abfuisse;  
 quorum illum maxime pœnituisse, illud præsertim indi-  
 cio est, quod hebdomade sancta, longo quatuor millium  
 itinere, summoque incommodo, quod flumen, frequentibus  
 imbribus vehementer auctum, esset transeundum, ad  
 egregium quendam sui Ordinis concionatorem, eruditum  
 in primis ad doctum, se contulit; cui totius antea actæ vi-  
 tæ peccata, intimo animi dolore, aperuit. Verum, cum  
 rursum peccata sua Patri alteri confessus esset, quem, ex-  
 tremo illo casu, sibi confessarium elegerat, quemque ro-  
 gaverat, ut sibi, supremo illo tempore, non deesset, sa-  
 cram Eucharistiam sumsit, cum antea summissis ac pe-  
 ne interinortuis vocibus confessionem recitasset; quod  
 etiam fecit cum sacro perunctus est oleo. Inter hæc ad-  
 monitus est ab illo confessario, ut Iosephum à Leonissa,  
 cujus & B. Felicis imagines ante oculos depictas habe-  
 bat, deprecatorem sibi, apud Deum, valetudinis impe-  
 trandæ gratia, adhiberet. Qui negavit, id fieri ullo mo-  
 do posse, quod summa ejus Patris voluntas esset, ad cæ-  
 lestem ipsum gloriam socinum & consortem adhibere in  
 posterum diem. Nondum fuerat illi allatum de socii  
 morte, jam in sepulcro conditi, cum, Vnus, inquit, est de-  
 functus, in templo, cui ego mox futurus sum comes; sed  
 antea, nimirum post horam, P. Sextulam videbo. Nec  
 dicto fides abfuit: nam vix hora intercesserat ab hoc ser-  
 mone

mone prædictionis illius, cum P. Sextula adest, quem cum introentem cubiculum aspiceret, plenus gaudii lætitiæque, Bene, inquit, sit P. meo Sextulæ, qui mihi omnibus in rebus præsto fuit: etenim, quemadmodum è seculo ducem ac magistrum se mihi præbuit, ita nunc, è corporis custodia discedenti, societatemque carnis ejicienti, parat iter in cælum. Multisque verbis ultro citroque habitis, psalmos hymnosque concinens, septimam circiter horam noctis, sine aliquo doloris sensu, extremum spiritum suo edidit creatori; annos natus tres supra quinquaginta; in castro S. Ioannis, quod est oppidum Carfenianæ seu Graphenianæ vallis, sub Apennino, Non ita multo post, venit Regium Lepidi, ad P. Viceprovincialem Bononiæ, Canonicus quidam regularis, Bernardo nomine, religiosæ sacrarum Deo virginum familiæ à Confessionibus, ob probitatem bona apud omnes existimatione; qui juratus affirmabat, superioris diei Dominici nocte, cum iam ferme dies appeteret, se vidisse, per quietem, Capuccinum quendam, lanea indutum veste candida, sibi terga obvertere; sed cum exspectatus lecto desiliret, tandem novisse, eum esse P. Io. Baptistam: qui, conversa in ipsum facie, multa luce coruscante, gratias ipsi agebat; & cum accurre-  
ret, ut, positus humi genibus, ejus sese pedibus advolveret, evolasse illum ab oculis, neque amplius esse visum; verum tantam ipsi vim divinæ dulcedinis in animo reliquisse, tantamque lætitiā, ut ea totus diffunderet, nec posset consistere: deinde, volventi secum in corde, quodnam ob meritum ipsi gratias egisset, nihil occurrebat, nisi quod in confessionibus eos graviter objurgasset, qui minus commodos de illo sermones habuissent; id quod etiam pridie ejus diei fecerat. Hæc, inopia argumenti, scripsi, quod nollem mei oris imaginem, quam mittō, sine meis literis ad te venire. Vale. Romæ, v i i i Kal. Julii c i o i o c x l i v.

## LXVI.

Clarissimo præstantissimoque viro,

T Y R R H E N O.

**H** Eri, XIII Kal. Augusti, redditæ mihi sunt binæ à te literæ, cum mensem jam ferme integrum nullas accepissem. Quod miratus tum fui valde; & quoniam res plena timoris est amor, cœpi subvereri, ne incommoda utereris valetudine: interdum veniebat in mentem, eam tibi negociorum molem objici, ut non esset spacium de me cogitandi, nedum ad me scribendi. Sed tandem, ancipiti cura distractum, fecerunt me tuæ literæ certiores, & te bene valere, neque, quo curis, quibus premeris, locum des, mei memoriam ex animo ejecisse. Quorum utrumque incredibili me voluptate complevit. Fuit mihi gratissimum munusculum tuum, imaguncula S. Ioseph, animam agentis; cujus aspectu illa me cupiditas acrius incendit, quæ sola, extinctis ceteris, animum urit; nempe ut moriatur anima mea inorte justorum, & fiant novissima mea illorum similia. Cui rei nulla alia ratio ostenditur, nisi, ut eundem vitæ cursum teneamus, quem illi, nihil cupiditatibus suis largiendo, in summo corporis labore atque animi contentione confecerunt. Nam nemo est, qui justorum sibi similem exitum vitæ non concupiscat: sed paucos invenias, quos illorum vitæ ratio delectet. Exigis à me præterea crebras ac longas literas; neque excusationem posthac aliquam te accepturum, vel occupationum tuarum, vel rerum, quæ scribantur, inopia, dicis; perinde quasi mihi non defutura sit oratio, ac lusciniolæ cantio. Quod ego, qui pulcre me novi, secus esse intelligo: tamen, quo tibi animum expleam, inaniis chartas implebo, iisq; quæ nihil ad rem pertineant. In præsentia nihil subvenit quod scribā, nisi, eos esse in urbe calores, quorum similes se fuisse in vita expertum, nemo meminerit. Interdum iimbres maximi decidunt, qui paululū æstus relevare videntur; sed statim, majore vi, quasi flammæ agens, æstus regreditur, nosque qui nullum ab ejus sævitia tutum locum invenimus,

mus, violētius aggreditur. Ac proximo die Dominico, qui fuit dies D. Alexio sacer, ex improvise, obducto nubibus caelo, tanta aquarum vis cecidit, ut nullas, hoc anno, majores fuisse constaret. Sed antea, ita validus & vehemens exortus est turbo, ut obvium quemq; abriperet, & aliquot passuum via delatum, humi affligeret atque prosterneret; tum pulverem, cujus plenissima erant via, ita in altum elevaret, ut oculis, cæli lucem & aspectum eriperet. Deinde ingentem animis terrorem incutiebat, inter, torrentis modo, effundentem sese imbrem, horribilis cæli fragor, & passim cadentium fulminum species, & ab omni parte cæli emicantia fulgura, gladii illius simillima, quo Angelus, in ipso Paradisi aditu vestibuloque, submovere dicitur audentes adire. Et, quod magis inireris, quodque non magis ad naturales causas, quam ad divinam rationem, referendum existimes; tam repentinus, tam tristis, tam prodigiosus imber tum exitit, cum universa pene civitas, ex suis sedibus evulsa, testaceum tumultum, & editiora circa pratum illud loca occupasset, quo pasceret oculos ludicro certamine, quod maxime ad similitudinem veri edituræ essent omnes, quotquot sunt Romæ, tum equitum tum peditum copiar. Ac videre licebat, omnes cujusque ætatis atque ordinis homines, adolescentes præsertim mulieres, tenuissimis vestibus, ut anni fervidissimum tempus suadebat, indutæ, cum nullus perfugio locus esset, totum illum imbrem excipere, qui, ad corpus usque permanens, ab eo, tanquam flumen, in rivulos discretum, efflueret. Neque magis tutæ ab imbris injuria fuerunt novæ nuptæ, ac matronæ nobiles, quæ, rhedis inclusæ, se fore eximias putabant: nam magna vis aquæ, ventorum impetu delata, in rhedas irrumpebat, os illis, caput, ac totum sinum implebat. Itaque, quotquot illuc confluerant, curiositatis suæ pœnas dederunt: neque, eo die, voluissent pedem de tecto foras efferre. Atque, ut ego interpretor, mihi visus est Deus, qui pax est, quisque cœlitus nobis hanc, quam habemus, pacem conciliavit, stomachari hominum pertinaciam, qui omnibus iis malis erepti, quæ secum belli calamitas affert, adhuc in armorum cogitatione & tractatione versentur; ideo tempestatem illam ab eo fuisse immis-

immissam ; præsertim cum ille dies , trans Tiberim à Sodalitate Deiparæ Virginis , cujus in monte Carmelo magna est religio , sacra ac solemni pompa celebraretur. Vale. Romæ , xii Kalendas Augusti  
C I O I O C X L I V .

## LXVII.

T Y R R H E N O ,

Viro Clarissimo.

**I**N singulas horas, vel potius in singula temporis puncta, expectamus, dum de morte Pontificis, qui jam diu animam agit, fiat palam. Scribere hæc ad te cœperam : nec perperam scripsi illud. Nam hoc ipso momento emanavit in vulgus, hora nempe diei undecima, Urbanum VIII, qui tam diu præfuit Reipub. Ecclesiasticæ, diem obiisse supremum. Nec rumpor est inanis: nam, quæ assolent, quæque oportet signa hanc ad rem esse, omnia adfunt; strepitus populi & admurmuratio, civium hac illac discursantium fragor, signum ære Campano, ut moris est in morte Pontificum, datum à Capitolio; cujus magistratuum vigilantia diligentiaque, Urbis cura committitur. Utinam Sanctorum Pontificum choris inferatur. Gaudeo, mea amico tuo Disticha non displicuisse. Oris mei imaginem jam ad te pervenisse, atque in tuis manibus esse, existimo. Vir nobilis, doctus, mihiq; ante tuam commendationem amicissimus, Calanius de Aciaria, domum ad me venit, mihiq; tuas literas reddidit. Quem ego diligebam, faciebamque plurimi, quod sæpius, in nostræ Sodalitatis Sacello, pie docteq; verba facientem audieram. Nunc plaris hoc mihi erit, quod à te diligitur, laudatur, eumque, tanquam alterum te, mihi jubes esse. Sed adhuc perfectum non reddidit, quod promisit. Promiserat enim, se breviter in pagella descripta tuorum popularium, qui in Pinacothecam referendi essent, dicta factaque præcipua ad te missurum. Quod si, fortasse, labore deterritus, quem plerique fugimus, non præstitit, ego ad illum veniam; quæque mihi

M m

opus

178 IANI NICII ERYTHREI  
opus erunt, ex ejus ore excepta, mea manu describam.  
Nain propero, quod à me inceptum est opus, absolvere.  
Vale. Romæ, IV Kal. Augusti C D C XLIV.

LXVIII.

T Y R R H E N O,

Viro Clarissimo.

**E**cclēsia Rom. suo sibi duce ac pastore morte nuper erepto, in squalore luctuque versatur. Civitas, sine ullo jure est; sine dignitate Resp. Tantus, in Vrbe, armatorum numerus cernitur, quantum me alias vidisse, non memini. Nulla domus est, paulo locupletior, quæ non militum multorum præsidio muniatur. Ac si in unum omnes cogerentur, magnus ex eis exercitus confici posset. Summa, in Vrbe, armorum impunitas, summa licentia: passim cædes hominum fiunt: nil ita frequenter auditur quam, Hic, vel ille, notus homo, est interfectus. Patrum amplissimorum Senatus, de eligendo novo Pontifice, in quo sunt omnia, consultat. Ille enim solus tot malis potest occurrere. Atque utinam eum det, qui tanto muneri par esse possit. Qui, si suum officium velit facere, non eum in tanto dignitatis gradu constituet, qui unum aliquod afferat, ut juris scientiam, aut aliquem Reip. usum, aut solam castitatis virtutem; sed eum, qui sit virtutum omnium princeps. Nam quamvis, ut in ceteris rebus, sic etiam in virtutibus, alia species sit aliâ formosior atque illustrior, non tamen intrinsecus vel alterius virtutis terminos compellendus est ille, qui excurrere per omnes debeat: non præfiniendum est illi, quatenus progredi in bonorum operum profectum debeat, cui, pro viribus, danda opera sit, ut unusquisque ita directum illud ad omnes virtutes iter teneat, ut earum perfectionis metam attingat. Quid multis moror? omnibus virtutibus excellat oportet, qui omnibus specimen esse jubetur; Deo quam simillimus judicetur necesse est, qui sit in loco, Deo in terris proximo, constituendus. Non potest id, quod dicimus, tam diserte oratione cujusquam explicari, quam est à Deo re ipsa  
ad

ad vivum expressum. Qui Deus, daturus populo suo Regem, repudiatis omnibus aliis, Saulem potissimum, quem eo fastigio dignissimum arbitrabatur, Regem elegit. Qui ea corporis forma atque statura fuisse traditur, ut altior esset omni populo, *ab humero & sursum*. In humero, probitas, Sophoniæ voce, designatur; qui de populis Deo subjiciendis ait, *Servient ei humero meo*, hoc est, pari probitate atque justitia. Itaque cum de Pontifice in demortui locum subrogando consulitur, ille præferendus est ceteris qui altior sit omni populo; hoc est, qui communem usitatamque ceterorum hominum probitatem & sanctitatem excedat; qui, rerum divinarum ac cælestium contemplatione, sese ceteris altius extollat. Quod si, ad hanc ejus qui ceteris imperaturus est normam, à Deo nobis præfinitam, Romani Pont. electio dirigenda est; cogita tecum ipse, num in id fastigium recipiendus sit ille, qui solum in eo sit omni cura & cogitatione intentus, ut familiæ suæ opes ex minimis maximas faciat, ut suos omnes divitiis expleat, imperiis augeat, amplitudine Regibus, si fieri possit, exaquer? Merito igitur, ab humero sursum, sit ceteris ille major oportet, à quo, tanquam à capite spiritus in reliqua membra, ita bonorum operum exempla in populum defluunt. Hinc licet intelligere, quanto se peccato alligent, quantum in se hominum odium struant ii, ad quos Principis eligendi jus redit, si fasces indigno detulerint. Magnum irarum irritamentum, magna odii fax est, Principis non boni electio. Hoc enim inter parentem atque electorem Principis interest, quod ille naturæ vitio, hic judicio, peccat. Ille si minus utilem Reip. filium genuit, non continuo id ipsi vitio datur, non continuo civium odio premitur; quoniam non est in potestate nostra, nobis liberos ex animi sententia gignere; immo, nemo est, quin filios quam optimos velit: at, qui male elegit, quia omnis in ipso culpa residet, cum bene potuerit; illico omnium divum atque hominum odium incurrit, illico diris & imprecationibus omnibus expetitur, exagitur, laceratur. Accedit, quod non eadem est ratio ejus, quem parens minus feliciter genuit, ejusque, quem intemperans eligentium



cupiditas, vel temerarius favor, principem declaravit; quod illum æquiore homines animo ferunt, quoniam talis erat habendus; hunc perpeti ac tolerare nullo modo possunt, quod hominum improbitate atque nequitia contigerit, ut sub malo principe essent. Quid si novi Principis comitia incidant in id tempus, quo rebus afflictis ac perditis succurrendum sit maxime? quantam in se culpam concipient ii, quibus ejusmodi electio commissa est, si non, quantum student, & quantum possunt, conferunt ad communem salutis voluntatem, si non omni studio sibi enitendum putent, ut talis rebus afflictis ac perditis moderator existat, qui eas consilio sublevare, opera recreare, sapientia reparare ac reficere valeat! Atque haud scio, an ullum unquam tempus fuerit, quo tempore, pejore loco, Ecclesiæ Romanæ res fuerint. Summi Pont. majestas ubique terrarum imminuta; Ecclesiastica potestas iniquis Principum legibus oppressa; libertas sub jugum missa: civitates ab iis, à quibus minime æquum erat, afflictæ, vexatæ, ac perditæ; earundem agri, antea viridissimi nitidissimique, nunc belli, quod in illis acerbum diuturnumque versatum est, calamitate vastati atque deserti; miseris mortalibus, qui sub ecclesiasticæ ditionis jure imperioque sunt, acerbis exactio- nibus, & ante hoc tempus inauditis vectigalibus, emun- ctis & expressis, vix anima relicta est. Itaque, concus- sa Rep. ruens pene orbis terrarum, confugit in sinum Patrum amplissimorum; orat, obsecrat, clamat, fidem eorum implorat, ut eum publicæ salutis gubernaculis admoveant, qui possit succurrere, qui, justitia, aucto- ritate, prudentia, prospiciat, ne in perpetuum pereat. At ubinam, inquires, hic, qui sit talis, quæratur? num inter eos, qui sint nobis, vel mutuo amicitia vinculo juncti, vel arcto cognationis nexu constricti? Mini- me quidem. Nam Christus, qui futurus erat Pontifex in æternum, inter cognatos ac notos noluit inveniri. Quamobrem hoc? Quia voluit nobis, per hanc ratio- nem, insinuare, non eum esse in comitatu amicorum cognatorumque petendum, qui successurus esset vica- rius sui muneris, qui esset alter ipse futurus. Tum illè, disertis verbis, omnem amicitia, omnem cognationis

necessitudinem respuit, præter eam, quam Dei amor-  
 ejusque divinarum legum obedientia cultusque, conjun-  
 xit. Nam, Qui fecerit, inquit, voluntatem patris mei  
 qui in cælis est, hic mater mea & frater vocabitur. At,  
 si sola cognationis amicitiaque ratio non debeat enim  
 nobis Pontificem dare quem quærimus, dabit saltem  
 spes privatae cujuspiam utilitatis, vel potentia, vel di-  
 vitiarum. O semper humi defixas nostras cogitationes!  
 ô terrena consilia! Ergo, orbis terrarum imperatoris,  
 Ecclesiæ universæ moderatoris, animarum nostrarum  
 pastoris, Christianorum omnium magistri ac domini  
 comitiis, utilitatis privatae ratio dominabitur? Ergo  
 ille magis vel minus dignus, qui ceteris præsit, habeatur,  
 ille magis vel minus idoneus, qui successor Petri, qui  
 summæ potestatis Antistes sit, declarabitur, quem, plus  
 minusve è re nostra sit, in tanto dignitatis gradu locari?  
 Ergo illi tutius Christianorum omnium salus committi  
 declarabitur, qui utilior ac fructuosior nobis futurus  
 existimetur, contra, in eo omnium fortunas agi, com-  
 munem salutem periclitari, orbis terræ interitum me-  
 tui, unde parum vel nihil sit ad nos lucri redundaturum?  
 Velle autem pluribus verbis demonstrare, quam hæc  
 partim sint levia, partim intolerabilia, non modo super-  
 fluum ac non necessarium, verum etiam ineptum, exi-  
 stimo. Vbinam igitur is, quem quærimus, invenietur?  
 Vbi inventus est Christus. Nimirum in templo. Ac, si  
 ibi repertus fuerit, retinendus est, neque dimittendus,  
 etiam si recuset, etiam si nolit, etiam si conetur elabi  
 è manibus. Nullum enim bene imperaturi signum est  
 majus, quam si imperare recuset. E templo igitur, hæc  
 est, ex eo hominum genere petendus & constituendus  
 est Pontifex, quibus templi Dei honor, cultus, ac di-  
 gnitas, magis sit cordi, quam privatae cujuspiam utili-  
 tatis & commodi ratio; quibus, in sacerdotiis deman-  
 dandis, ii sint in primis eximii, qui sanctitate, doctrina,  
 fide, atque prudentia, adsint, tanto oneri pares, non au-  
 tem ii, qui, sacrosanctis illis muneribus, luxuriæ, avari-  
 tiæ, omniumque vitiarum materiam sibi esse oblatam,  
 existiment: ex iis Pontifex sumendus, qui, tota ex civi-  
 tate, atque adeo ex toto orbe terrarum, officiis atque

honoribus ecclesiasticis dignos eliciant, non autem ex  
 suarum eos ædium ministris, virtuti non maxime de-  
 ditis, experant; qui magis vitæ dignitate, exemplo, san-  
 ctimonia, abstinentia, iustitia, operam dent, ut corrupti  
 hominum mores ad frugem revocentur, quam ut urbes  
 fossa, vallo, atque lapidum mole sepiantur; (nam illud  
 pulcre munitum est oppidum, unde fraudes, avaritiæ,  
 libidines, injuriæ, ac scelera exulatum abierunt; cetero-  
 qui, ut in quodam poëta me legisse memini, centuplex  
 inurus rebus servandis parum est;) qui magis solliciti  
 sint, quemadmodum Catholica ac Christiana religio  
 longe lateque propagetur, quam quemadmodum fines  
 imperii proferantur; quorum magis omnis in eo cura  
 versetur, ut, sublati discordiis, toto orbe terrarum pax  
 agitur, quam ut, à libidinis iracundiæque suæ æstu  
 abrepti, summo cum Reip. damno, ac pene interitu, o-  
 mnino bello, (quod deinde, re necessaria coacti, compo-  
 nant,) turbent atque permisceant; denique, qui jure,  
 legibus, ratione, prudentia, atque auctoritate eorum,  
 qui consuluntur, non temere, neque ex suo Marte, ne-  
 que ex animi sui libidine, Remp. gerant. At vide, quo-  
 nam me vehemens mandatis tuis obtemperandi ardor  
 studiumque provexerit, ut longam iis de rebus episto-  
 lam sim ausus intexere, in quibus ego rudis, tu excel-  
 lens in primis; atque, ut dicitur, doctum docere, Ita-  
 que jam me ipse cohibeo, ac longius ferri non sino. Ille  
 pulvis, cujus vi calculos, tenuem in arenam redactos,  
 excerni scripseram, cujusque potiundi, si bene litera-  
 rum tuarum sententiam novi, es cupidus, auctori suo  
 decollavit, atque decoxit: ac nemo fere calculosus in-  
 venit, qui eo audeat uti. Ac furnario illi, quamquam,  
 eo sumto, non minimum morbo, quo premebatur, re-  
 levare visus sit, tamen nunc pejor quam antea est, neque  
 usquam potest, præ dolore, consistere; quod animad-  
 versum sit, eam ardoris magnitudinem pulverem illum  
 invehere, ut quidam, cum ejus vim ferre non posset,  
 vita decesserit. Quibus autem ex rebus pulvis ille con-  
 sietur, auctor non dicit; sed istud tacitum, tanquam  
 mysterium, tenet. Quamobrem, cum paucis profit, ob-  
 fit autem pluribus, ejus pulveris usus auctori suo remit-

tatur. Qui etiam ait, eum se, pharmaci cujusdam loco ad omne genus ægitudinis propulsandum, adhibere. Tu vero ab ejus cupiditate te avoca; atque, ad valetudinem tuendam, studium ac diligentiam confer. Vale. Romæ, III Non. Augusti C I O I O C X L I V.

## LXIX.

T Y R R H E N O,

Viro Clarissimo.

**S**chedula ad me tua, longæ cujusdam epistolæ loco fuit: magno enim honore ac beneficio me à te esse affectum existimo; cum tibi dignus videor, ad quem, unico tantū versiculo comprehensum epistolium mittas. Hodie mane, v Id. Augusti, D. Laurentii pervigilio, sacris antea, quibus Spiritus Sancti auxilium implorabatur, à Cardinali Lante Decano peractis, Cardinales sex & quinquaginta numero, Cruce à Magistro carimoniarum delata præcedente, bini incedentes, Conclave sunt ingressi, novi Pontificis in demortui locum subrogandi gratia. Nunquam eorum plures, ad ejus functionem muneris, coisse perhibentur. Tota Vrbe rumor increbuit, hoc paucorum diurnum, vel unius diei potius, negotium fore; quod jam convenerit inter eos, quem potissimum eligant: ac nomen etiam illius palam enunciant. Quod si rumor ille vernus, isque electus fuerit Pontifex, cujus nomen totâ aulâ dissipatur, scribam. Sed quamvis verisimile sit, rumorem istum non levibus conjecturis ac rationibus niti; tamen sæpe vidimus, eos, qui, opinione omnium, Pontifices ita proclamati, Conclave ingressi sunt, inde non nisi Cardinales exiisse, neque quidquam tam illis, quam hanc de ipsis opinionem ac famam, obfuisse. At, si iste, quem dicunt, est ejusmodi, ut Ecclesiæ usui sit futurus, quique iis incommodis ac malis, in quibus fuimus ac sumus, possit ac velit occurrere, quid reliquum est, nisi ut, quod vulgus ominatur, evenire cupiamus? Sed his omissis, nihil est tam optandum, quam ut negotium celerrime conficiatur, ne-

que, distractis in varias partes voluntatibus Cardinalium, res in longum protrahatur. cui rei operam dare videtur mensis Augustus, præter anni rationem ac temporum ordinem, sane frigidulus. nam, ex summis mensis Iulii caloribus, quibus non meminimus fuisse majores, tanta repente aëris temperies oborta est, ut leonis sævities, & canis rabies, in ovis mansuetudinem conversa esse videatur. Hac igitur occasione alliciente, nisi statim inter se convenient, potest accidere, ut variae Cardinalium sententiæ, & contraria studia, dies, ac fortasse hebdomadas aliquot auferant. Vaticanum, multis peditum millibus, atque equitum turmis, præterea validis ad omnes viarum aditus cancellis, atque exstructis ex tabulis domibus, ita munitum est ac septum, ut si jam jam hostium adventus metuatur. Quod non alias in morte summorum Pontificum, qui mea ætate desceſſerunt, factitatum esse vidi. nam tum, quatuor vel quinque peditum centuriæ, magis decoris cujusdam gratia, quam quod ita necesse esset, ad Conclavis custodiam conscribebantur. Sed arbitror, visum Patrum amplissimorum Senatui, majoribus se copiis, ad hujus muneris opus, munire, ne à nonnullis, externa aliqua vi, ipsorum comitiis impedimentum, vel mora afferretur. Ego epistolam hanc (quod ex die, illi adscripto, qui est tertius ab eo, quo Cardinales ingressi sunt Conclave, potes cognoscere,) obſignare distuli, ut, si quid novi interea contigisset, possem ad te scribere. Sed necdum accidit peculiare quidquam. Tota Vrbe delectus habentur. Quid timeatur, nescio; nisi, propinquus Parmæ ac Placentiæ Ducis adventus, sit in metu; ad quem etiam à collegio Cardinalium certos homines adlegatos esse dicunt, qui suis eum verbis hortentur ac moneant, ut iter supprimat, neque propius ad Urbem conetur accedere. Multa alia divulgant curiosi homines, qui, ut est in proverbio, quicquid rex reginæ in aurem dixerit, se scire profitentur. Sed, quid attinet, ea referre? Epistolam clando & obſigno. Vale. Romæ, prid. Id. Augusti, c i o i o c x l i v.

## LXX.

T Y R R H E N O,

Viro Clarissimo.

**C**ardinales, xv Kal. Septembris, convenisse, jam noris. Ab eo die, usque in hunc diem, nihil actum est dignum, quod scribatur. Sed si quid deinceps erit certi vel incerti, de quo homines loquantur, faciam te de eo certiozem. Interea nulla voluptas est major hinc Romæ, quam in ea area dies consumere, quæ à foribus Palatii Vaticani venientibus prima objicitur: eo enim convenit quotidie, quicquid est in Vrbe, Episcoporum, Antistitum, aulicorum, omniumque qui vespere vivunt suo; nam est, ut nosti, satis ampla; neque inde discedunt antea, quam nox terras opacaverit. ibi sermones conventusque habentur de iis rebus, quæ fiunt intus & non fiunt: ibi variæ hominum audiuntur opiniones de eo, qui futurus vel non futurus sit Pontifex: ibi impune multa leguntur. Me non exigua spes tenet, fore, ut jam Deo propitio pacatoque utamur, ac Pontifex eligatur, in quem omnes numeri probitatis sapientiæque conveniant. In quam spem eo libentius ingredior, quod istuc idem Collegio ipsi Cardinalium propositum esse intelligo. nam horum ea mens esse videtur, ut enim, ex ipsis, Ecclesiæ universæ Pontificem dent, qui rebus illius, quæ quo loco sitæ sint vident, maxime opportunus censeatur. Quod ut, divino illustrati lumine, præstare possint, superiori die Dominico, Sacrificio Missæ peracto, ex sacello Xysti, in alterum Pauli, sacrosancta Christi Domini corporis mysteria, cereos accensos manibus gestantes, detulerunt; ibique diem totum divinissima illa hostia precibus supplicantium exposita stetit. Calanius de Aciaria, vir nobilis ac doctus, plus ex se dedit, quam promiserat, nam, pro uno aut altero, ex suis popularibus, decem attulit, quorum ingenii doctrinæque imagines, in nostra Pinacotheca, omnibus, ad cognoscendum imitandumque, pateant. Vale. Romæ, x Kalend. Septemb. c i o i o c x l i v.

M m 5

LXXI. TYR.

Innocentii X nomine, Pontificiis vestibus indutus, delatus est, inter faustas populi acclamationes, in Ædem, Apostolorum principi sacram; quo tota civitas, illud spectandi cupida, confluxerat, quod quisquam, totis uno & viginti annis, non viderat, ut ibi de more ille Cardinales, ad pedum, genuum, atque oris oscula admitteret. Ingens, omnis sexus, ætatis, atque ordinis, hominum multitudo, Palatii scalas, porticum, Ædemque compleverat: atque, ad primum novi Pontificis aspectum, tanti omnium, vitam & salutem illi deprecantium, clamores excitati sunt, ut palatium, porticus, Ædes, ac cælum ipsum, ruere videretur. Quos ille sibi clamores gratos & acceptos accidere, vultu, significatione, manu, qua frequentissimas illis cruces dividebat, indicare conabatur. Qui clamor non autem constitit, quam ille in ara confedit. Homo est Romanus; præstat ingenio, doctrina, rerumque maximarum usu. Ideo populus Rom. magnam in spem venit, fore, ut rempub. gerat quam optime. Postremo, cærimonis omnibus rite peractis, eodem cum plausu reductus est in ædes Pontificias, ibique Datarium Cecchinum, Domus præfectum sibi Androsillam elegit. Vale. Romæ, xvi Kalendas Octobr. c i c i c x l i v.

*de Andro-  
silla, nil*

## LXXIII.

T Y R R H E N O,

Viro Clarissimo.

**A** Cceptis tuis literis, tua manu exaratis, quæ multos jam dies, ob summas & innumeras occupationes tuas, siluerant, perinde exhilaratus sum, ut ille, qui ex diuturnis tenebris, tandem fuerit ad aspiciendum lucem emissus. nam, & iilarum suavitate mirabiliter sum recreatus, & incredibilem ex eo voluptatem accepi, quod intellexi, occupationes tuas, quantumvis maximas, nempe quæ ad pacem toti terrarum orbi pariendam spectent, quo nihil ne excogitari quidem utilius vel salutarius potest, non eam vim posse habere, ut me tibi ex  
me-



memoria prorsus evellat, neque adeo omne tempus eripiant, ut nulla ejus pars reliqua sit, qua ad literas, ad me datas; utaris. Accepi ab humanissimo Calauio octerniones, quos mittis, mihi gratissimos; & proximis tuis literis alios duos. qui Calavius excusavit etiam occupationes tuas, quod meis literis responsum non daret. quod fuit mihi jucundum in primis. nam verebar, perturbatione eas temporum ad te non pervenisse, vel omnino interiisse. Scribit Nihusius, Niciana Exempla, nuper impressa, jam penitus esse divendita: cum fas nobis non fuerit, unicum saltem ejus operis exemplar aspicere. quod satis mirari non possum; cum impressores, istarum partium, ambitiose soleant ea, quæ typis mandaverint, cum bibliopolis nostris communicare; præsertim si spes aliqua utilitatis sese ostendat. At ego liquidò affirmare possum Cæcio si velit, librum hunc non minus multos emtores habiturum hic Romæ fuisse, quam Pinacotheca olim habuerit: cui, simul ac venit, non fuit necesse, tanquam iuveudibili merci, emtorem adducere; sed tam multi ultro se obtulerunt, ut, paucis diebus, omnia ejus exemplaria magno precio venierint. Cujus ego Pinacothecæ partem alteram iuchoavi, neque ita longum post tempus, Deo juvante, absolvam: quæ, spes est fore, ut te magis etiam quam altera delectet, ob varietatem formarum, partim venustarum, partim deformium, quæ tum admirationem tum risum moveant: nam deformitas, ut vosti, est regio sedesque ridiculi. Nos hic Romæ, in summo ocio & tranquillitate, ævum agimus, Innocentii X. Pont. Max. providentia; qui nihil æque exhorret, atque strepitus armorum, ac tumultus. Et columba; ramum oleæ rostro ferens, verus ejus familiæ insigne, quid aliud præfigere videtur, nisi, ut tandem, tua etiam opera, sublati discordiis, toto orbe terrarum, pax inter viros principes, æquis legibus, componatur? Erit mihi pergratum, si, quod tuo commodo fiat, has duas epistolas, ad Nihusium quam primum preferendas curaveris. Vale. Romæ, iv Non. Octobris C I O I O C X L I V.

## LXXIV.

T Y R R H E N O,

Viro Clarissimo.

V Enit, cum tuis ad me literis, domum meam Laurentius, familiaris tuus, & consiliorum omnium particeps. Quo quidem homine delectatus sum plurimum. nam mihi est visus vir probus, ac plenus humanitatis & officii: atque, quemadmodum ex prudentissimis ejus sermonibus conjicere potui, neminem arbitror, potuisse te, ad ea, quæ mandaveris, perficienda, aptiorem prudentioremve mittere. Litteras autem tuas legi, non solum avidissime, ut alias, verum etiam cum præcipuo quodam animi sensu, ex virtutum tuarum admiratione concepto. Visus sum enim, in eis videre animum tuum, rejectis omnium humanarum rerum cupiditatibus, arctissimis cum Deo amplexibus circumplicatum atque conjunctum. Quocirca jure te beatum existimo. Quid enim illi deesse, ad beate vivendum, potest, qui spes suas, & cogitationes omnes, fixas ac locatas habeat in Deo qui non potest amitti, ab illis autem rebus abstractas atque sejunctas, quæ vix tenentur, cum fugiunt, extinguuntur, & cadunt; qui illam maxime optatam & expectatam securitatem, hoc est, vacuitatem ab angoribus, obtineat, quam nusquam fas est reperire, nisi in Deo? Habeant igitur sua Reges Regna, suas divitias divites, suas opes opulenti; nihil in eis invenio, quod sit magnopere invidendum; illi ego invideo, illum beatum judico, qui possit cum Rege Davide gloriari ac dicere, *Mihi autem, adharere Deo, bonum est, ponere in Domino Deo spem meam.* Etenim humanus animus, decerptus ex inente divina, si pacis oculique est cupidus, cum alio, nisi cum ipso Deo, copulari conjungique non potest. Itaque, cui tantum obtigit boni, nihil melius expecti potest, quam ut ille cum Deo nexus atque conjunctio sit ipsi perpetua, neque quavis opum honorumque accessione dirimatur distrahaturque; tum, ut lumen illud, divi-

divinitus, ad ipsum illustrandum, immissum, non aliquo secundo fortunæ, dolose blandientis, statu hac illac impulsus, extinguitur atque depereat. Iam Pinacothecam alteram, propemodum instructam, atque refertam clarorum virorum inagipibus, habeo: & cogito, cuiusnam amici doctique hominis nomini inscriptam einitam. Non enim est consilium, multorum hac in re morem & consuetudinem sequi, qui egregios multorum annorū labores suos non aliis commendandos statuunt, nisi iis, qui æquam ceterorum mortalium condicionem, præstantia dignitatis aut fortunæ suæ, transeunt, ut opes honoresque adipiscantur. Nam primum, omnis ab animo meo excessit pecuniæ cupiditas, omne ambitionis studium evasit. tum illi tota errant via, si quid, his artibus, fieri posse existimant. bene cum ipsis actum erit, si beati illi, quibus opera dedicant sua, fastidiosa atque superba manu, illa receperint, & in angulum aliquem rejecerint; idque non statim, sed postquam sæpius redire eos jusserint, ac, multas horas expectando, encaverint. Quis enim non experiatur, quemadmodum apud istos probis, honestis, ac literatis viris omnes ardui difficilesque sint aditus? nam, cui nota non sint illa, in anulis usitata, & ad excruciamdum inventa, tormenta! Redito alio die; nunc non est ocium; occupatus est; adiri non vult; aliaque his similia: quæ non sunt verba, sed lapides, stimuli, flammæ, quæ miseros, expectatione suspensos, lacerant, fodicent, urunt. tum, nonne, plus quam velimus, notum est atque perspectum, quantus iis honor habeatur, in quibus aliqua virtutis exsuperantia redundet? nonne, superioribus annis, totus orbis terrarum vidit, admiratus est, ingemuit, quos, ob ætatis maturitatem, ob generis splendorem, ob artium liberalium studia, ob vitæ morumque integritatem, florere, in Rep. honores maximos gerere, opibus præstare oporteret, iis pueros, infima de facie homines, rerum omnium imperitos ac rudes, &, quod pejus cæno collinit, turpibus moratos moribus, anteponi? Verum, quidquid alii loquantur ac sentiant, nunquam cominittam, ut, mea opera, ita virtutis precium ad terram concidat, ut florentem hominum fortunam, nulla cognitione rerum, nulla

nulla scientia ornatam, tanquam aream habendam existimem, in qua, ad aucupium honorum vel pecuniæ, optimi ingenii cujusque partus, res longe iis, quæ petuntur, præstantiores, quasi cibus, offundantur. Stephanus Vajus, Hospitalis S. Spiritus in Saxia domus Præceptor, magna est apud Innocentium X, ejusque fratris filium, in amore & gratia. hic miros de te sermones mecum habet, tuas virtutes in cælum effert, atque adeo se tibi addictum ostendit, ut sit ultro pollicitus, quoties occasio se dederit, tuam apud Pontificem rem, majore etiam diligentia studioque quam suam, acturum, tuaque eidem merita in memoriam revocaturum. Non est contemnenda officiosa hominis, in primis gratiosi eloquentisque, sedulitas. Hæ enim domesticæ familiaresque commendationes majorem habere vim solent, quam externa summorum Principum officia; propterea quod ab ambitionis suspitione longius absint. Vale. Romæ, Idibus Octobr. c i c i c c x l i v.


## LXXV.

T Y R R H E N O,

Viro Clarissimo.

**R** Eddita mihi sunt, uno tempore, abs te literæ duæ: quarum singulæ binos epistolarum, typis commissarum, octerniones continebant. Gaudeo, opus procedere: tuæque singulari in me benevolentia tantum hoc beneficium acceptum refero. Earum literarum in alteris, dies erat adscriptus xvi Kal. Octobris; quo die, octavo post festum Nativitatis Deiparæ Virginis, longo seculorum intervallo renovatum est vetus illud Virginis ejusdem in hanc sanctam Sedem, atque adeo in totum Christianum orbem, beneficium. Nam, quemadmodum olim, in Rom. Pontificis electione, distracti, in varia studia, Patrum amplissimorum animi, tandem ad eligendum, ni fallor, Innocentium iv coaluerunt; ita etiam nunc eodem die, post longas unius & eo amplius mensis disceptationes ac controversias, omnium fere Cardina-

lium


 Ium consensu, præter admodum paucos, collocatus est  
 in summa Petri Apostolorum principis Sede, Ioannes  
 Baptista Cardinalis Pamphilius, & Innocentii X nomi-  
 ne appellatus. Et sane miraculo tribuenda est ejusmodi  
 electio. Tum enim accidit, cum minus expectabatur :  
 adeoque hi, qui propensi non erant in ipsum, tandem su-  
 bito, inmutata voluntate, egregia hominis merita sibi in  
 animum subjicientes, quibus ille summus ac Deo proxi-  
 mus dignitatis locus deberi existimabatur, majori etiam  
 studio quam ceteri, in eorum sententiam ierunt, qui  
 eum potissimum eligendum esse censebant. Atque, ad il-  
 lorum voluntates commutandas, magnus Innocentio  
 fuit usus in Cardinalis Panciroli opera: qui merito apud  
 illum auctoritate & gratia pollet maxime, ac primum  
 fere locum tenet adium Vaticanarum, negotiis princi-  
 pum virorum, ab arcanis, præst, nunquam fere à Pon-  
 tificis latere discedit, cum eo sermones familiares con-  
 fert, eosque, singulis prope diebus, in multam noctem  
 producit. Magna Pontifex in suis rebus utitur maturita-  
 te: nullum adhuc magistratum loco movit, eidemque  
 alterum subrogavit: solum Latinas literas scribendi pro-  
 vinciam, quam olim Rospigliosus administrabat, Gaspa-  
 ri de Simeonibus, homini erudito, quem tibi notum  
 esse arbitror, demandavit. Nihil ab eo tam postulatur,  
 quam ut severa judicia fiant, quibus suum unicuique tri-  
 buatur. Hoc si præstiterit, explebit omnem expectatio-  
 nem Pontificatus sui, ac desiderii nostri. Existimo, non  
 minimæ fore utilitari, tum Sacerdotibus tū allis, si typis  
 mandaretur opusculum illud, quod olim ad te misi, de  
 Sacerdotis dignitate atque præstantia: multa enim con-  
 tinet, nec vulgaria, quæ Sacerdotes ad magnitudinem  
 sui muneris agnoscendam, aliosque ad majorem illis cul-  
 tum honoremque præstandum, possint impellere. At ni-  
 hil statuere audeo, sed omnem tui esse arbitrij rem volo.  
 Vale. Romæ, x Kal. Novemb. C I O I O C X L I V.

## LXXVI.

T Y R R H E N O,

Viro Clarissimo.

**N**On levem mihi molestiam attulit, quod scribis; fasciculum literarum, quæ ad te mittebantur, à prædonibus direptum, interiisse. Nam in eo, ut arbitror, meæ etiam ad te erant inclusæ, in quibus diligenter narrabam, Io. Baptistam Cardinalem Pamphilium, omnium fere Cardinalium consensu, dignum fuisse habitum, (ac merito,) cui Reip. Christianæ universæ regendæ tuendæque partes committerentur, simulque populi Rom. lætitiâ, ex illius electione conceptam; quam ex plausu ostendit, quo illum exceperat, dñm è conclavi, in Ædem Apostolorum Principis, pontificia in sella, suorum humeris, deportabatur, ut, in ara ejusdem Ædis maxima insidens, Cardinales, debitum sibi obedientiæ officium deferentes, ad pedum atque oris osculum admitteret. Quæ lætitiâ ideo affici videbatur, quod magnam in spem venerat, fore, ut, ejus opera ac liberalitate, ex iis incommodis ac malis eriperetur, in quibus, superiorum temporum vitio, inhæserat. Quod difficile erit. nam, quod fecimus damnum, ejusmodi est, ut multorum annorum cursu sarciri vix possit. Tum, iv Non. hujus mensis, non minori populi Rom. concursu atq; frequentia, quoniam fere innumeris, ob longum Urbani viii Pontificatum, hujusmodi spectaculo interesse non contigerat, magna pompa præcedentibus Cardinalibus, actoribus anæ Magistratibus, oratoribus Principum, (nam Præfectus Urbis, qui cum oratoribus illis de loco contendit, ne tumultus aliquis oriretur, fuerat admonitus, ne illuc accederet,) Janrea in sella in templum, Apostolorum principis in honorem, Deo dicatum, fuit erectus. Vbi primum sacrum, de more, solemni ritu peregit. Cui illæ ceremoniæ antecesserant, quæ adhiberi in ejus muneris functione solitæ sunt; atq; ea in primis, quæ, stappa bis vel ter incensa & in altum elata, clara voce admonetur Pontifex, ut

N n

me.

#

meminerit, perinde omnem humanam gloriam atque splendorem inflammari atque extinguere, ut in stупpa illa conspiceret. Quod ntinam omnibus, qui inflammato studio ad honores dignitatesque rapiuntur, in animo defixum hæreret: profecto modestius hi se gererent, neque rei, quæ momento pene temporis abit, alligarentur; immo tam incitatum suum ad honores cursum inhiberent, atque compescerent. His actis, eadem pompa delatus est eum in locum, ubi Rom. Pontifices populo benedicere consueverunt: ibique publice à Card. Lante, Patrum amplissimorum Collegii Decano, detracta mitra, ejus est capiti Pontificia tiara imposita, ut Populus Rom. novum Salomonem inspiceret in diademate, quo coronavit eum mater sua Ecclesia, in die desponsationis suæ. cujus ille aspectu recreatus, magna voce exclamavit, Vivat Pontifex Innocentius. Novi deinceps nihil accidit, nisi unum; quod ego non auderem scribere, nisi notum esset omnibus atque testatum, & in omnium sermonibus palam versaretur, ac pro certo scirem, fore ut de eo in historiis Latinæ Etruscæque literæ loquerentur. Nudius tertius, ab oratoris Regii Gallici filio, nam ipse ægrotus lectulo detinetur, fuerunt allatæ, ad Card. Antonium, Regis literæ, quibus illi Regni Galliarum patroni provinciam abrogabat, imperabatque, ut patrocinii diploma in medium afferret, ejusque insignia ab ostio domus removeret. Et, quo testatior res esset, factum hoc est, scriba publico ac testibus præsentibus. Ille, simulans, se in aliud cubiculum ire, ut diploma afferret, illorum conspectui se surripuit. Causæ dissidii, quamvis tibi ab aliis eas esse perscriptas non ignorem, eæ traduntur; quod, cum propositum Antonio & Francisco, ejus fratri germano, fuisset, Card. Sacchettum, eo fastigio dignissimum, suis suorumque suffragiis Pontificem maximum creare, quod ita Ecclesiæ in rem esse existimarent; quia verebantur, ne Pamphilius, qui erat illi par meritis, sed ætate multo superior, conatibus suis obstaret, quoque honeste possent tantum à Sacchetto æmulum remove, dederat operam Antonius quantum poterat, ut à Rege Galliarum ad ipsum epistola daretur, qua significaret, se à Pamphilio abhorrere; sed deinde, mutata voluntate, nihil illis

usus



usus, suum, ad Pamphilium, studiū cogitationemq; convertit. Quod ubi ad Regem, ejusque ministros, est allatum, illico, Regem fuisse ludibrio habitum, existimatum est, ac justam Pontifici occasionem prabitam suspicandi, Regem, alienum ab eo animum gerere. At, sicuti neutrum inde est consequens, ita ego Card. Antonio ignoscendum, neque continuo id illi vitio dandum, existimo. Nam, ut ille ait, nunquam ita quisquam bene subducta ratione ad vitam fuit, quin res, aut etiam usus, aliquid apportet novi, aliquid moneat, ut illa, quæ te scire credas, nescias, & quæ tibi putaris prima, in experiendo repudies. Ita etiam Card. Antonius, id quod antea Reip. expedire existimabat, deinde, experientia edoctus, à rationibus illius maxime alienum esse intellexit. Prope est, ut Cardinalium comitia fiant, quibus, Camillus Pamphilus in illud Collegium fortasse, una cum Io. Carolo Principe Mediceo, cooptabitur. Qui Camillus, nulla habita posteritatis ratione, nam masculæ stirpis solus est in sua familia, in sortem Domini vocari se ait. Vale. Romæ, iv Kal. Novemb. c i c i c x l i v.

## LXXVII.

T Y R H E N O

Viro Clarissimo.

**H** Octabellario, nihil à te, neque à Nihusio, literarum accepi. Vereor, ne, tum eas, tum osterniones epistolarum mearum, quæ reliquæ sunt, adversus aliquis casus exceperit. Quod minime velim: nam osternionum aliorum seriem disturbarent atque dirimerent. Cupimus scire, quid istic agatur de pace. Nam velim scias, Pontificem hunc, in cujus insigni, columba, ore ramum olivæ præferens, continetur, hujus in primis gloriæ cupidum esse, ut, se auctore atque administro, toto orbe terrarum pax componatur. Faxit Deus, ut gloria istam obtineat, & tranquillitas illa, quam tot discordiarum bellorumque tempestates abegerunt, revertatur. Ex quo, maxima in te laus redundabit, cui ejus componendæ, seu consiliis pro-

nere administrando se gerere debeant, præscripsit, ita etiam Cardinalibus, quemadmodum recte ordinem illum ac locum tuerentur, ostenderet. Mittendum eum ajunt in Hispaniam, ad Regem illum, Nuncium. Qui quidem, si illuc proficiscetur, imminutam ac prope collapsam Apostolicæ Sedis auctoritatem dignitatemque, prudentia, veterem in locum restituet, ac, vitæ innocentia, omnes eas regiones ad sui spectaculum advocabit. Omnes fere hic Romæ, gravedines ac distillationes, & febres etiam, quæ plures opprimunt, male habent, ex mira tempestatum inæquabilitate exortæ. Nam quemadmodum ex tempestatibus illæ sunt optimæ, quæ æquales; ita etiam pessimæ, quæ variant maxime. Etenim, modo calores, modo frigora, corpus excipiunt: quod, quodocunque evenit, periculum affert. Deinde, ferme sub initiū autumnī, summis caloribus, ex improvīso, intolerabilia frigora successerunt, quæ, relaxata superioribus caloribus corpora, invaserunt occuparuntque. Vale. Romæ, xviii Kal. Decem. c i c i c c x l i v.

LXXX.

T Y R R H E N O,

Viro Clarissimo.

**H**Eri, diē, D. Clementi celebri ac festo, Innocentius X Pont. Max. Basilicæ ac Palatii Lateranensis in possessionem est profectus, ea pompa ac magnificentia, quam non alias me vidisse memini. Quid multa? Cælū ipsum ejus honori gloriæque favere visum est. nam cum pridie magnam vim aquæ fudisset, ac postridie mane, ex densis atrisque nubibus, quæ illud occupaverant, maximus futurorum imbrium metus ostenderetur, tanta repente aëris serenitas ac suavitas extitit, ut verni temporis amœnitas, hilaritas, claritas, atque festivitas, ad illustrandum celebrandumque diem illum rediisse videretur. Quæ, ab ædibus Vaticanis, unde pompa prodibat, ad Basilicam Constantinianam itur, exteriores domorum omnium parietes, qua aulæis, qua sericis vestibus, qua Attalicis peristromatis, pulcre vestiti aspicebantur.

N n 5

A Ca-

A Capitolio vero usque ad Basilicam illam, ubi per ingens spacium nullæ sunt ædes, trabes præaltæ, certo quodam ordine ac situ, humi defixæ, ac superne aliis transversis tignis adjunctæ, aulæa itidem sustinebant: quæ partim Hebræorum natio, partim singula artificum corpora, ex S. P. Q. R. decreto, deportanda ibique affigenda curaverant. Ex singulis singularum ædium fenestris, aurea, vel serica, varii coloris ornamenta dependebant; quæ, operum colorumque varietate, satis verbis dici non potest, quantâ aspicientium oculis voluptatem afferrent. Ingens, à Pop. Rom. in Capitolii vertice, erat arcus extructus, cum inscriptionibus, quæ Romani Pontificis, singulari Dei beneficio sibi concessi ac traditi, laudes continebant. Alter item arcus, multo majori magnificentia sumtuque, à Duce Parmensi, via sacra, prope suos hortos excitatus, sed nondum, ob temporis brevitate, absolutus, inspiciebatur. Qui Dux, etiam fictilia atque marmorea hortorum suorum septa, atque inceniana, aulæis, quorum similia nusquam iuvenias, aliisque aureis ac sericis vestibus, mirum in modum ornanda curaverat. Equestris vero pompæ ordo hic erat. Levis armaturæ milites aliquot, ex Pontificis custodia, præibant: hos Cardinalium vestiarii, in equis, sequebantur, quorum colla bulgis, Phrygio opere, auro argentoque elaboratis, constraverant, triginta numero: proximi his succedebant Cardinalium eorundem tonsores, totidem numero; qui clavas argenteas, miro opere artificioque perfectas, quas suis dominis præferunt, cum publice Sacellum Pontificium vel Consistorium intrant, vel alium aliquem in locum veniunt, ante pectus, demissas, equorumque collis innixas, habebant. Sequebatur hos, equitatus nobilium; quorum ingens numerus, tum ex nobilitate Romana constabat, tum ex iis conflabatur, quos, genere, opibus, ac divitiis, omnium primos, ex suis civitatibus, Cardinalis Mediceus, Parmensis Mutinensisque Duces, Romanam evocaverant. hos regiæ opulentia cultus adornabat. horum singulos, pro cuiusque opibus, plures, varia induti veste, circumpedes comitabantur. hos vehabant equi, eximia magnitudinis pulcritudinisque. Post

tonforem sarcinatoremque Pontificis, haud longe erant  
 ii, quos scutiferos Apostolicos vocant. hos sequebantur  
 lecticæ, purpura auroque constrictæ, tres numero; mu-  
 læ, holosericis villosis purpureis, multo auro distinctis,  
 phaleratæ, sex; manique, aureis item ungulis phale-  
 ratæ viginti: regentes eos, purpureæ tunicæ adornabant.  
 Post hos, exiguo intervallo, tubicines sex, & tympa-  
 notribæ decem ac tres, cantu strepituque, auribus non  
 injucundo, aërem complebant: rubra illos amicula, hos  
 chlamydes, decorabant elegantissime. Tum, è familia  
 Pontificis, ante omnes equitabant cubicularii, quibus  
 quia in eum ædiuin locum, quem Pontifex tenet, pe-  
 dem intro ferre non licet, Extra muros, est nomen. hos  
 longæ, manicatæque, ac paululum in vertice crispatæ,  
 rubri coloris vestes honestabant. proximi his, Advocati  
 Consistoriales, eodem pene quo illi cultu; nisi quod  
 color erat violaceus, & circa collum, involucrum,  
 albis pellibus subsutum, habebant. Sequebatur hos ma-  
 gnus eorum numerus, quos Pontificis clavatores appel-  
 lant: hos argenteæ clavæ, sed puræ, ac violacea amicu-  
 la, adornabant. Proximi ibant, intimi honorarii que cu-  
 bicularii. post hos alii quatuor, galeros Pontificios  
 quatuor, holoserico villosio purpureo tectos, rubra  
 item impositos virga, gestabant: qui quoniam mul-  
 ta, quæ proveniunt, commoda inter se soli parti-  
 untur, Cubicularii participes appellantur. His omni-  
 bus idem erat; qui Advocatis Consistorialibus, ha-  
 bitus; sed colore tantum distabat, quia purpureus.  
 Iam omnium in se oculos atque ora converterat Ma-  
 gistratus Populi Rom. qui Populus, quo majorem  
 Pontifici, civi suo, honorem haberet, ferme quin-  
 quaginta viros nobiles, qui Magistratus in Vrbe gesse-  
 rant, elegerat, atque eorum singulis consularem ve-  
 stem, equi phaleras, ac tegmen capitis quod biretum  
 vocant, ex holoserico villosio nigro, dono dederat: quo  
 ornato, Magistros Curiarum, quos capita regionum  
 appellant, anteibant. his, tredecim regionibus Urbis  
 paribus numero, femoralia ac thoraces albi, sagique  
 purpurei, ex raso serico, erant: iisque postremus, Dux  
 Caesarinus, S. P. Q. R. signifer, in auro fulgebat, Con-  
 su,

ualbe d.  
 nerius ha-  
 ty.

Duèry.

sulibus tribus proximus. Qui consules, die tam pulcro,  
 tam celebri, ac venustatis pleno, sericas vestes deposue-  
 rant, atque aureas sumserant. Deinde, aulae Rom.  
 Antistites procedebant. quorum primi se in conspectum  
 dabant Abbreviatores, tum Rotæ auditores, illi hyper-  
 endyma carbasinum violaceis tunicis, hi nigris super-  
 lectum habebant, præter Decanum, cui, & phaleris &  
 vestibis violaceis uti, jus est; at galeri, omnium capi-  
 tibus, nigri hærebant. Ab his non ita longo intervallo  
 aberat Subdiaconus Apostolicus, post oratorem Cæsaris  
 & urbis rectorem, Crucem præferens Pontifici. Quem,  
 lectica aperta, purpura auroque decora, albi vehebant  
 muli: utrumque lecticæ latus decorabant quinquaginta  
 ephebi, quos ex Romana nobilitate selectos, Pop. Rom.  
 varia veste, ex serico albo auroque contexta, induerat;  
 qui etiam Pontificis honoris gratia, tegmen capitis, cui  
 albentes plumæ hærebant, detractum, manu gerebant.  
 sed ante lecticam præcedebant circumpedes, ad sexagin-  
 ta, ex familia Pontificis. quam sequebatur Secretarius  
 domesticus, medius inter cubiculi præfectum atque  
 pincernam. sequebatur etiam medicus. Pontificem co-  
 mitabantur Cardinales triginta, nam alii, quibus vel ob  
 ætatem, vel ob infirmam valetudinem, equitandi facul-  
 tas non erat, rheda vecti, ad Lateranensem Basilicam  
 sese contulerunt, ut ibi Pontifici præsto essent. Singulis  
 Cardinalibus, phaleratis purpura auroque mulis, pur-  
 purea in veste hærentibus, purpureumque in capite  
 galerum habentibus, bini præibant circumpedes, li-  
 gneis cum clavis atque prælongis, inauratis, ubi uni-  
 uscujusque insignia erant depicta. Comitabantur etiam  
 post illos Pontificem, una cum domus ejusdem præ-  
 fecto, Episcopi, quos, quia Pontifici in sacrificiis assi-  
 stunt, Episcopos assistentes appellant. hi mulorum pha-  
 leris, ac vestium amplitudine ornatuque, si recte ani-  
 madverti, quamvis colore violaceo, haud ita multum  
 à Cardinalium cultu abhorrebant, sed viridi caput ga-  
 lero insertum habebant. Verum, quod sum oblitus, ac  
 volui dicere, Pontificis ac Cardinalium fere omnium  
 latera, Helvetii armati muniebant. Augebant postremo  
 Antistitum numerum Protonotarii Apostolici; quibus

capita violacei galeri tegebant. Claudebant denique agmina plures, levis armaturæ equitū, turmæ. Vbi ad Ædem Lateranensem ventum est, Pontifex, summo Pontificali amictu & mitra, auro gemmisque distincta clarissimis, in porticu ejusdem Ædis, clerum illum ad pedum osculum excepit, & oblatas à Card. Columna Ædis claves accepit. Hoc interim spacio Cardinales, sacerdotales vestes induerunt, & mitras capitibus addiderunt. His peractis, aurea Pontifex in sella, deferentium humeris, sub umbella, est elatus in templum, præcedentibus cantoribus, qui modulatis vocibus concinebant hymnum, *Te Deum laudamus*. In summo templo parata erat sedes, auro contrata, sub umbella, ad quam, multis gradibus, iter erat. hanc Pontifex conscendens, Cardinales, fidem & obedientiam sibi deferentes, humaniter est amplexus. His quoque peractis, gestatoriam rursus sellam inscendens, eadem pompa, qua venerat, locum, supra porticum, ad benedictiones extructum, unde jam diu pecunia, recens excusa, ab ærarii præfecto in populum jaciebatur, adiit; ibique populo, qui frequens convenerat, benedixit. Et hic finis fuit ejus diei celebritatis. Nos, impransī, hora diei vigesima tertia domum reuerſi sumus. Hæc raptim ac cursim ad te scripsi; ne mihi è memoria elaberentur. Vale. Romæ, VIII Kalend. Decembr. C I C I C C X L I V.

## LXXXI.

T Y R R H E N O,

Viro Clarissimo.

**S**emper, tuæ ad me literæ, lepidæ, elegantes, amcenæ: semper, cum aliquid scribis, illud assequeris, ut nemo scripsisse melius existimetur. Verum, in iis, quas proxime ad me dedisti, tanta vis eloquentiæ, nitidis, elegantiaque, visa est inesse, ut non alia, ab alterius cujusvis ingenii fonte, quam ab eo qui emanat ex tuo, neque copiosior neque nitidior prodire potuerit. Quocirca, ob hanc causam, & quia longiores erant omni-

bus iis, quas hoc anno à te accepi, quanta sim voluptate affectus, quibus gaudiis exultaverim, non dico, sed in cogitatione tua relinquo; cui plusquam ceteris notum est atque perspectum, quantum tibi tribuam, quamque mihi decorum & honestum existimem, non solum à te aliquo in numero haberi, verum etiam diligere, laudari, ac sæpius literis, plenis amoris officiique, recreari. at à quo viro? ab eo, cujus similes si plures proferre possemus, bene cum Rep. Christiana ageretur. Canticum vero Moysis, Latinis à te versibus explicatum, tantum habet elegantia, splendoris, & ornamentorum, ut non videam, cuinam debeas eorum cedere, qui in hoc scribendi genere sunt versati; ac ne Buchanano quidem, qui primas tulisse existimatur. Eadem fuit eorum sententia, quibus illud ostendi; & in his Hugonis Vbaldini, Roberti Card. Vbaldini fratris; qui illud mecum carmen, semel, iterum, ac sæpius legit. Qui quanti te faciat, quamque, quocunque accedit, pleno, ut dicitur, modio, verborum honore prosequatur, satis dici verbis non potest. Ille tuas egregias singularesque virtutes, quas, partim ex literis quas ad me scribis, iisque quibus tibi respondeo, partim ex ore illorum qui istinc ad nos veniunt, perspectas habet, enarrat. ille, omnibus audientibus, dicit, ex tui similibus ornamentum curia, augustissimo Patrum amplissimorum ordini splendorem, esse petendum. Voluit etiam à me tui oris imaginem habere: quam Cardinali Cappono, qui apud se diversatur, ostendit. Quamobrem æquum est, te, in amore, homini sanctissimo nobilissimoque respondere, cum eoque mutuum facere. Scripseram, superioribus literis, de inscriptione, in aula Pontificia domus regia, restituta; qua, egregia quædam Reip. Venetæ in Sedem Apostolicam merita, ibi depicta, declarantur. Quæ Pontificis libera, neque, cujusquam admonitione, coacta ejus restituendæ voluntas, ita Senatui illi grata accidit, ut non usitatis, sed singularibus animi significationibus, compensandam eam esse decreverit. Nam & Equitem Angelum Contarenum, unum ex Reip. Procuratoribus, ad Pontificem allegavit, qui immortales eidem gratias agat: tum, Camillum, fratris illius filium, nunc Cardinalem, om-

mnem



nemque deinceps Pamphiliam familiam, Veneta Nobilitate donavit: postremo, quod refert, statuit, ut Ecclesiasticorum hominum causas Nuncius Apostolicus, in cujus illi forum conveniunt, cognoscat. Quod etiam factum est à Duce Sabaudia: cujus Pontifex literas, plenas veræ animi demissionis humilitatisque, cum legeret, lacrimas non tenuisse narratur. Sed, quod fueram oblitus, Senatus Venetus, in familia Pamphilia, Nobilium suorum numero adscribenda, Senatus consulto, olim ab ipso facto, derogavit, quo sanciebatur, ne quis Romanorum Pontificum cognatus in Nobilium numerum reciperetur, nisi antea honorem illum in beneficio & gratia postulasset. Quid multis opus est? Id unum Pontifex videtur agere, in idque tota mente & cogitatione incumbere, ut Christianos Principes, magis officii beneficiisque, quam terrore ac minis, in officio contineat. Ac, per hanc rationem, Reip. Christianæ vulnera sanari posse confidit. Nec ridicula eorum interpretatione commovetur, qui idcirco putant ipsum bene audire velle, ut ii, qui ante ipsum remp. administrant, male audiant, neque hoc se modo gerere suæ laudis, sed illorum contumeliæ causa. Namque est ipse sibi met conscius, cum de Principibus bene mereri studet, non illorum consilia damnare, qui nulli rei tam visi sunt operam dare, quam ut eos à Sedis Apostolicæ amicitia, quantum potest, abalienarent; sed in corpore Reip. ægro, quod tum illi tum ipse curandum acceperit, ad sanitatem revocando, se diuersa uti ratione. Quod si illi in suam contumeliam fieri existimant, errant; perinde ac erraret medicus, qui ab eo medico, qui ipsi successisset, se injuria affectum esse quereretur, si, quæ ipse, in ægroto curando, constituerat, innet ille: quod nulla ratione ab eo fieret; nam eadem de re variæ sunt hominum voluntates atque sententiæ; ac difficile est de unaquaque judicare. Illi ægram Remp. optime curari posse credebant, sanguinem mittendo, sumtibus & jacturis eam exhauriendo, finitimos Principes, armorum strepitu, concutiendo. hic contra, meliorem medicinam, ad eam sanandam, esse arbitratus est, crebra sanguinis missione ac dejectione amissas, illi vires repa-

rare, gravissima onera quibus opprimitur adimere;  
 Christianos Principes, ad illius dignitatem ac decus au-  
 gendum, intuitu inter se amoris nexu constringere, ho-  
 norem, ut par est, illis habere; nihil, quod honeste pe-  
 ratur, denegare, fidem, in eo quod promiserit, non  
 fallere. Atque hæc curandi ratio adhuc illi ex sententia  
 succedit, nam vix quidquam venit in mentem optare ab  
 illis, quin perficiat. Ac modo ardebat cupiditate incre-  
 dibili, ut Cardinales omnes uno eodemque cognomento  
 appellarentur; neque Celsitudinis nomen inter eos am-  
 plius audiretur: sed non audebat hoc palam efferre. at  
 cum id leviter odoratus esset Cardinalis Mediceus, qui  
 nunc nomen mutavit, & Cardinalis Etruriæ sibi titu-  
 lum indidit, &, quem usurpabat antea, Medicei, Io.  
 Carolo, fratris filio, nuper Cardinali creato, reliquit;  
 cum, inquam, id ille persensisset, sponte Celsitudinis  
 cognomento se abdicavit, ac, suis omnibus ad se veni-  
 re iussis, poenam statuit in eos, qui se non eodem, quo  
 ceteros Cardinales, titulo affecissent. eademque opera,  
 suis ex insignibus, diadema iussit expungi. Magnus fit  
 omnis generis hominum, tum virorum tum mulierum,  
 concursus in viam sacram, quæ nunc forum boarium,  
 quod ibi boves sint venales, appellatur, arcum trium-  
 phalem visendi causa, ab Odoardo Farnesio, Parmæ ac  
 Placentiæ Duce, Innocentio Pontifici, ad pompam ejus  
 diei, quo ad Ædem Lateranensem profectus est, excita-  
 tum; qui arcus, ob magnitudinem operis, tum non potuit  
 absolvi, nunc autem, absolutionem perfectionemque  
 suam adeptus, ab omnibus visitur. Opus est sane am-  
 plum, magnificum, sumtuosum, dignum eo Principe  
 qui dedit, dignum illo cui datum est, dignum ea fre-  
 quentia qua celebratur. Omnino, principes viros inter,  
 certamen esse videtur, quisnam eorum, majorem huic  
 Pontifici amorem, cultum, ac reverentiam exhibeat.  
 Vale. Romæ, pridie Kal. Dec. CI D I CXLIV.

## LXXXII.

T Y R R H E N O,

Viro Clarissimo.

**R** Eddidi literas tuas Episcopo Cyrenensi : quæ (ut ex vultus hilaritate , quâ eas accepit , & ex verborum humanitate , qua easdem prosecutus est , con-  
 jicere potui , ) fuerunt illi gratissimæ : summaque ex eis voluptate se fuisse affectum ostendit , cum , me præ-  
 sente & audiente , legit , quam propensam , quamque mirificam erga ipsum voluntatem gereres. quam hu-  
 manissimam animi tui significationem se pluris facere dixit , quam si quodvis aliud lucrum , quantumvis ma-  
 ximum , fecisset ; semper enim se amicitiam tuam op-  
 tasse , semper aliquo suo beneficio tuam gratiam prome-  
 reri studuisse , sed nunquam ejus rei occasionem sibi fuisse oblatam. Ac rursus id , quod mihi sæpe dixerat , affirma-  
 vit , te , non tam magni facere , quod antiquissima hone-  
 stissimaque sis familia , nec , quod plures deinceps magi-  
 stratus gesseris , nec , quod honorificum sustineas mu-  
 nus ; nunquam enim vestra ista nomina multum apud se  
 valuisse , nunquam ea , quæ sunt hominum opinionibus  
 amplissima , se esse admiratum : non igitur , inquit , tam  
 te diligere , colere , in oculis ferre ob eas res , quas solas  
 stulti primas ducunt , quam ob ornamenta virtutis , quæ  
 maxima ac pene innumerabilia in te conveniunt , quibus  
 tuum , apud istas gentes , quæ tua , tum abstinentia , tum  
 justitia , facilitate , doctrina , sanctitate , liberalitate-  
 que recreantur , nomen in honore , celebritate , & amo-  
 re versatur. Et , quamvis ea , quæ in te laudantur , etiam  
 sine cujusquam comparatione , satis sint per se ipsa ma-  
 gna & clara ; tamen quorundam , tuarum virtutum lau-  
 dibus , mores dissimilimi , fecerunt ea longe majora at-  
 que clariora. Non est necesse , à me quemquam nomi-  
 nari , ne , cum tua laude , cujusquam præterea dedecus  
 conjungam. Quamobrem id jam es consecutus , ut nul-  
 lius muneris onus sit ira magnum & grave , quod non

tuis par viribus habeatur: neque verendum est, ne, si tibi credatur, clitellæ, ut est in proverbio, bovi impositæ esse videantur; hoc est, ne illud plane non esse tuum onus existimetur. Sed, ut ad Vajum redeam, sic ab eo discessi, ut diceret, omnibus in rebus, quæ ad tuam dignitatem pertinerent, vel conservandam vel augendam, se tibi non amicum modo verum etiam amicissimum esse, suis omnibus officiis effecturum ut judices. Nec minorem erga te benevolentiam studiumque præ se ferre videtur Card. Capponus, qui summum Pont. istum magno sibi amoris nexu habet adstrictum: idque mea, atque Hugonis Vbaldini, Basilicæ Vaticanæ Archidiaconi, opera; cujus ille domi habitat. Etenim vir hic, tum generis, tum doctrinæ, tum virtutum omnium splendore clarissimus, mira illi de te prædicat, oris etiam tui imaginem ostendit; ex cujus delineamentis, de sui animi specie pulcritudineque conjecit: nec male: est enim, inquit Ambrosius, ipsa corporis species simulacrum mentis, figura probitatis. Quamobrem, de ejus in te voluntate, simul ac usus venerit, dubitare non debes. Perge igitur de Rep. Christiana bene mereri, virtutis & honestatis amore, ut facis: quam qui sequitur, cum sit stabilis & æterna, eum semper beatum esse contingit: non autem opum, divitiarum, honorum, gloriæque cupiditate; quæ cum sint fluxa, caduca, & injuriis apta fortunæ, iis abundantem licet esse miserrimum. Vale. Romæ, vi Idus Decembr, c i d i o c x l i v.

F I N I S.